

ଲୁକ ଲିଖିତ ସୁସମାଚାର ଲୁକ ରାଚାମାନି ନେହଁ କାରୁ ମୂଲୁ ହାଡ଼ା

ଲୁକ ରାଚାମାନି ନେହଁ କାରୁତା ଜୀସୁ କ୍ରୀସ୍ତ ଜୀଞ୍ଜୁତି କାତା ରାସ୍ତକି ଆହାମାନେ । ପୁଃନି ମେରାତି ସାରିଗଟା ନେହଁ କାରୁ ପତିୟା ବିତ୍ରାଟି ଇଦି ରଣ୍ଡି “ନେହଁ କାରୁ” ଇନେରି । ଇ ବାରେ ପ୍ରବୁ ଜୀସୁ ହାଡ଼ି ତାୟୁ ମାତିୟୁ, ମାର୍କ, ଲୁକ ଅଡ଼େ ଜହନ ରାଚାମାନେରି । ଲୁକ ଜୀସୁ ମାହାପୁରୁଞ୍ଜାଣି ଏନାଆଁ ଗଟଞ୍ଜି ଆହାମାନେ ଅଡ଼େ ଜୀସୁ ହାହାନା ଖେଣ୍ଡେ ନିଜିତି ତାୟୁ ଲାକପୁରୁ ହାଚାଣି ଇଞ୍ଜା ତାମି ସୀସୁୟା ଏନିକଁ କାମା କିତେରି ଏ ବାରେ ରାଚାମାନେସି । ଏ ପତିଇଁ “ପାଣ୍ଡୁଞ୍ଜି ଆହାମାନାରି କାମା” ଇଞ୍ଜା ଇନେରି । ଇ ପତି ଏଚେତା ରାସ୍ତକି ଆହାମାନେ, ଅଡ଼େ ଆମିନି ଟାୟୁତା ରାସ୍ତକି ଆହାମାନେ, ଏ କାତା ଆମ୍ବାଆସି ନେହଁ କଁ ପୁଞ୍ଜାହିଲଅସି, ଇ ପତି ଜୀସୁ କ୍ରୀସ୍ତ ଜାର୍ନା ଆଡ଼ି ୭୨ ବାର୍ସା ତାୟୁ ରାସ୍ତକି ଆହାମାନେ ।

ଇ ପତିତା ଜୀସୁ ଇସ୍ରାୟେଲତି ଗେଲ୍‌ପିନାସି ଅଡ଼େ ବାରେ କୃଡ଼ାତି ଲକୁଣି ଗେଲ୍‌ପିନାସି ଇଞ୍ଜା ଲୁକ ତାନି ନେହଁ କାରୁତା ରାଚାନା ତସାମାନେସି । ହିଲାଆ ଗାଟାରି ତାଣା ନେହଁ କାରୁ ଝେକ୍‌ହାଲି, ମାହାପୁରୁତି ସୁଦୁଜୀଞ୍ଜୁ ଜୀସୁଇଁ ଆଚାମାଚେ, ଇଞ୍ଜା ଜୀସୁ ଏନିକଁ ହାରେକା ଦେବା ଦୁକୁ କସ୍ତ ଗାଟାରାଇଁ ଅଡ଼େ ହିଲାଆଗାଟାରାଇଁ ସାୟେମି କିହାମାଚେସି ଲୁକ ରାଚାମାନେସି ।

ଜୀସୁ ଜାର୍ନାଆଡ଼ି ବେଲାତା ଦୁତୁୟା ପାରୁ ପାଡ଼ିନାୟି ଅଡ଼େ ମେଣ୍ଡା ଗଡ଼କା ଜୀସୁଇଁ ବେତି ହାନାୟି, ଜୀସୁ ବାର ବାର୍ସା ଆହାମାଚାଟି ମାହାପୁରୁ ଇଲୁତା ହାନାୟି, ଇଞ୍ଜା ନେହଁ ସମିରଣି ଅଡ଼େ ଜାକ୍ତିତି ମୀରୁଏଣି ପୁଣ୍ଡିକିନି କାତା ଇ ବାରେ ସାରିଗଟା ନେହଁ କାରୁ ରାଚାମାନାରି ବିତ୍ରା ଲୁକ ନେହଁ କଁ ରାଚାନା ତସାମାନେସି । ଅଡ଼େ ମାହାପୁରୁ ତାଣା ପ୍ରାତାନା କିନାଣି ଜିକେଏ ଲୁକ ହାରେକା ରାଚାନା

ତସ୍ୟାମାନେସି ୩:୨୧; ୬:୧୭; ୬:୧୨; ୧୧:୧-୧୨ । ସୁଦୁଜୀଞ୍ଜୁ ବେଟାଆନ୍ତି
କାତା, ଜୀସୁଇଁ ସେବାକିନି ଇୟାସିକା କାତା ଇଞ୍ଜା ମାହାପୁରୁ ଲୁକ୍‌କୁଇଁ
ତାନି ପାପୁ ମ୍ଲୋକ୍‌ନି କାତା ଇ ବାରେ କାତା ଲୁକ୍ ହାରେଏ ନେହଁକଁ
ରାଚାନା ଝେସାମାନେସି ୩:୩; ୧୧:୪; ୧୭:୩-୪; ୨୩:୩୪; ୨୪:୪୭ ।

ପତିତା ମାନାୟି

- ୧. ଲୁକ୍ ଝେକ୍‌ନାୟି ଅଡ଼େ ଏନାଆଁତାକି ରାଚାମାନାଣି ଝେହ୍‌ନାୟି । ୧:୧-୪
- ୨. ଜୀସୁ କ୍ରୀସ୍ତ ଜାର୍ନା ଅଡ଼େ ସେବା କାମା ମାଟ୍‌ନାୟି । ୧:୫-୪:୧୩
- ୩. ଜୀସୁ କ୍ରୀସ୍ତ କାବାଆନ୍ତି କାମାୟାଁ ଅଡ଼େ ଜାପ୍‌ନାୟି । ୪:୧୪-୨୧:୩୮
- ୪. ଜୀସୁ କ୍ରୀସ୍ତ ହାନାୟି, ମାହ୍‌ଣିଣା ମୁହ୍‌ନାୟି ଅଡ଼େ ଝେଣ୍ଡେ ନିଜ୍‌ନାୟି । ୨୨:୧-୨୪

ମାଟ୍‌ନି କାତା

୧ ମୁଲୁଟିଏ ଆମ୍ବାଆରି ତୀରେ ମେସ୍ତାରି ଇଞ୍ଜା ବଲୁ ଝେକ୍‌ନାରି,
ଏଞ୍ଜାରି ମାଲେ ହେର୍‌ପା ମାଞ୍ଜାନି ଲେହେଁ,^୨ ମା ବିତା ଆହାମାନି କାମା
ବାରେ ହାରେକା ନେହଁକଁ ରାଚାଲି ଜାଗ୍ରାତା ଆହାମାନେରି ।
୩ ଜୀଞ୍ଜୁତି ତିୟପିଲ, ମୁଲୁଟିଏ ବାରେ କାତା ନେହଁକଁ ସିନିକିହାନା
ଏମ୍ବାଆଁ ଏନାୟି ମାନେ ଏଦାଆଁ ନିଜେତାକି ରାଚାଲି ନାନୁ ଜିକେଏ
ନେହେଁ ଇଞ୍ଜା ଅଣ୍ଡିପିତେଏଁ ।^୪ ଏନିକଁ ନାନୁ ଏ ବାରେ କାତା
ଜାପାମାଞ୍ଜି, ଏଦି ସାତା ଇଞ୍ଜା ପୁଞ୍ଜାଲି ଆଡ଼ିଦି ।

ବାପ୍ତିସ୍ମ* ହାନି ଜହନତି ଜାର୍ନାତି କାବୁ

^୫ ଜୀହୁଦା ଦେସାତି ରାଜା ହେରଦ ବେଲାତା ଅବିୟ କୁଡ଼ାତି
ଜିକରିୟ ଦରୁଗାଟି ର ପୂଜେରା ମାତେସି; ତାନି ତକ୍ତି ହାରଣ କୁଡ଼ାତି
ମାକ୍‌ମା, ଏଦାନି ଦରୁ ଏଲିସାବେତ ।^୬ ଜିକରିୟ ଅଡ଼େ ଏଲିସାବେତ
ମାହାପୁରୁତି ହୁକୁମି ଇଞ୍ଜା ମେରା ତଲେ ଦହ୍ ହିଲାଆଗାଟାଇ ଆହାନା
ମାହାପୁରୁ ନକିତା ଦାମ୍‌ମୁ ଗାଟାଇ ମାରୁ ।^୭ ସାମା ଏଞ୍ଜାରକି କକାରି
ପଦାୟା ହିଲାଆଡୁ, ଇତିହଁ ଏଲିସାବେତ ବାଞ୍ଜେଣି ମାତେ, ଅଡ଼େ
ତକ୍ତି ତକ୍ତା ରିଆରି ଜିକେଏ ଗାତି ବୁଡ଼ହି ବୁଡ଼ହା ଆହାମାତେରି ।

* ୧:୪ ୧:୫ ମୁଞ୍ଜନାୟି

୮ ର ଦିନା ଜିକରିୟ ତାମି ଗତିତି ପାଲି ଏଜାଲିଏ ମାହାପୁରୁ ନକିତା ପୂଜେରା କାମା କିନି ବେଲାତା, ୯ ପୂଜେରା କାମାତି ମେରା ତଲେ ଆର୍ଡ଼ି ଆହାନା ଏଞ୍ଜାଣାକି ମାହାପୁରୁ ଇଲୁତା ହତାନା ଦୁପ୍ପାଣି ହୀହାଲି ଆଡେ, ୧୦ ଇଞ୍ଜା ଦୁପ୍ପାଣି ହୀନି ବେଲାତା ବାରେ ଲକୁ ପାଙ୍ଗାତା ପ୍ରାତାନା କିହିମାଚେରି ।

୧୧ ଏଚିବେଲା ମାହାପୁରୁତି ର ଦୁତୁ ଦୁପ୍ପାଣି ପିଣ୍ଡା ଚିଃନିଞ୍ଜାକି ନିଚାନା ଏଞ୍ଜାଣାକି ତଞ୍ଜାଆଡେ । ୧୨ ଜିକରିୟ ଏଦୁାଣି ମେସାନା କାବାଆହାନା ଆଜିତେସି । ୧୩ ସାମା ଦୁତୁ ଏଞ୍ଜାଣାକି ଏଲେଇଚେ, “ଜିକରିୟ, ଆଜାଆନି, ଇଚିହିଁ ମୀ ଗହାରା ଖେଣ୍ଡି ଆହାମାନେ, ଇଞ୍ଜା ନୀ ତକ୍ତି ଏଲିସାବେତ ନିଜେତାକି ର କକାଣାକି ଜାନିଁ କିନେ, ଇଞ୍ଜା ଏଞ୍ଜାଣି ଦରୁ ଜହନ ଇଞ୍ଜାଁ ହୀଦେରି । ୧୪ ଇଚିହିଁ ଏଞ୍ଜାସି ମୀ ରାହାଁତି ରାହାଁ ଆନେସି, ଇଞ୍ଜା ହାଚେକା ଏଞ୍ଜାଣି ଜାନୀତା ରାହାଁ କିନେରି । ୧୫ ଇଞ୍ଜା ଏଞ୍ଜାସି ମାହାପୁରୁ ନକିତା କାଜାସି ଆନେସି; ଏଞ୍ଜାସି ଅଙ୍ଗୁରି ରାସା କି କାଡୁ ଏଚେଲାଞ୍ଜା ଗହଅସି, ଇଞ୍ଜା ତାଲିନି ବାଣ୍ଡିଟିଏ ସୁଦ୍ଧାଞ୍ଜାତା ବେଟାଆନେସି, ୧୬ ଏଞ୍ଜାସି ଇସାୟେଲ ମୀରକା ବିତ୍ରାଟି ହାଚେକା ଲକୁକି ମାହାପୁରୁ ଞ୍ଜାକି ଖେଟ୍‌ହା ତାନେସି । ୧୭ ତାଞ୍ଜିୟାଁ ହିୟାଁ ମୀରକା ଞ୍ଜାକି ଇଞ୍ଜା କାତା ମାନୁଞ୍ଜି ଆଆଗାଟାରାକି ତାରିଗାଟି ବୁଦିତା ତାକାଲି ଖେଟ୍‌ହା ତାତାଲି ଇଞ୍ଜା ମାହାପୁରୁ ତାକି ତିୟାରା ଆହାମାନି ର ଲକୁତି କୁଲମି ଜାଗ୍ରାତା କିହାଲି ବାପ୍ପିସ୍ତାଁ ହୀନି ଜହନ ଏଲିୟତି ଜୀସୁ ଅଡେ ବାଡ଼ୟୁ ତଲେ ପ୍ରବୁତି ନକିତା ତାକିନେସି ।”

୧୮ ଏଚେଟିଏ ଜିକରିୟ ଦୁତୁକି ଏଲେଇଚେସି, “ନାନୁ ଆମିନି ସିନା ତଲେ ପୁକି ? ଇଚିହିଁ ନାନୁ ବୁଡ଼ହାଚେସି, ଇଞ୍ଜା ନା ତକ୍ତିନି ବାର୍ସା ଗାତି ଆଡେୟିଏ ।”

୧୯ ଦୁତୁ ଏଞ୍ଜାଣାକି ଏଲେଇଚେ, “ନାନୁ ଗାବ୍ରିୟେଲ, ନାନୁ ମାହାପୁରୁ ନକିତା ନିଚା ତ୍ତୟିନାଚେସି, ଇଞ୍ଜା ନିଜେ ଖେସାଲି ଅଡେ ଇ ନେହିଁ କାରୁ ପୁଣ୍ଡି କିହାଲି ନାନୁ ପାଣ୍ଡି ଆହାମାକି । ୨୦ ମେହ୍‌ମୁ ଇ ବାରେ ଆଆପାଚେକା ନାନୁ ବେବଡା ଆହାନା ତ୍ତୟିଦି, ଇଚିହିଁ ନା ଆମିନି କାତା ସାତା ଆନେ ଏ ବାରେ ନାନୁ ନାମାଆତି ।”

† ୧:୧୭ ୧:୧୭ ମୁଞ୍ଜନାସି

୨୧ ଏମ୍ବାଟିଏ ଲକ୍ଷ୍ମୀ ଜିକରିୟାଙ୍କ କାରିମାଚେରି, ଇଞ୍ଜା ମାହାପୁରୁ ଇଲୁତା ଇଚେକା ଝେଡ଼ା ଆଡ଼ାକି କାବା ଆହିମାଚେରି । ୨୨ ସାମା ଏଝାସି ପାଙ୍ଗାତା ଝାହାନା ଏଝାରାଇଁ କାତା ଆହାଲି ଆଡ଼ାଆତେସି; ଏମ୍ବାଟିଏ ଏଝାସି ମାହାପୁରୁ ଇଲୁତା ଏନାଆଁ ମେସାମାନେସି ଇଞ୍ଜା ଏଝାରି ପୁଚେରି, ଇଞ୍ଜା ଏଝାସି ଏଝାରାଇଁ କେୟୁ ହୁଟିହଁ ତସାଲି ମାଟ୍‌ହେସି ଇଞ୍ଜା ବେବ୍‌ଡ଼ା ଆହାନା ତୟିତେସି ।

୨୩ ତାୟୁ ମାହାପୁରୁ ଇଲୁତି ସେବା କାମା ରାୟାଲିଏ, ଏଝାସି ତାମି ଇଜ ହାଚେସି । ୨୪ ଏଚରଦିନା ହାଟି ତାୟୁ ତାନି ତକ୍ତି ଏଲିସାବେତ ପୁରାମାସା ଆଡ଼େ ଅଡ଼େ ଏଡ଼ି ପାସା ଲେଞ୍ଜୁ ପାତେକା ଲକ୍ଷ୍ମୀ ତଞ୍ଜା ଆଆତେ । ୨୫ ଏଡ଼ି ଏଲେଇଚେ, “ନୀଏଁ ନାଙ୍ଗେ ପ୍ରବୁ କାର୍ମାମେସାନା ଲକ୍ଷ୍ମୀ ନାଙ୍ଗେ ଲାଜା କିହିମାଞ୍ଜାତାଣି ପିସପି କିହାଲି ନାଙ୍ଗେ ଇଲେକ୍ତି କିହାମାଞ୍ଜାନେସି !”

ଜୀସୁ ଜାର୍ନାତି କାବୁ

୨୬ ଏଲିସାବେତ ପୁରାମାସା ଆହାନା ସ. ଲେଞ୍ଜୁ ଆହାଲିଏ ଗାବ୍ରିୟେଲ ଦୂତୁ ମାହାପୁରୁ ତାଣାଟି ଗାଲିଲିତି ନାଜରତ ଗାଡ଼ାତି ର. ଡ଼ାଆ ପଦାନି ତାଣା ପାଣ୍ଡୁଆଡ଼େ; ୨୭ ☆ଏ ଡ଼ାଆ ପଦାନି ଦାଝୁଦ କୁଡ଼ାତି ଜସେପ ଇନାଣାକି ରୀସା ମାଚେରି; ଏ ଡ଼ାଆ ପଦା ଦରୁ ମରିୟମ । ୨୮ ଦୂତୁ ପଦା ତାଣା ଝାହାନା ଏଲେଇଚେ, “ଆଲ ମାହାପୁରୁତି କାର୍ମା ମେହନାତି ନିଙ୍ଗେ ହିଡ଼ଡ଼ି ଆୟାପେ !”

୨୯ ମରିୟମ ଏ ହାଡ଼ା ଝେଞ୍ଜାନା ଇଦି ଏନିଲେହେତି କାତା ଇଞ୍ଜା ଆଜାନା ମନତା ଅଣ୍ଡିପିତେ । ୩୦ ଏମ୍ବାଟିଏ ଦୂତୁ ଏଲେଇଚେ, “ଆଲ ମରିୟମ ଆଜାଆନି; ନିଙ୍ଗେ ମାହାପୁରୁ କାର୍ମା ମେସାମାଞ୍ଜାନେସି । ୩୧ ☆ନୀନୁ ପୁରାମାସା ଆହାନା ର. ମୀରଏଣାଇଁ ବେଟାଆଡ଼ି ଏଝାଣି ଦରୁ ଜୀସୁ ଇଞ୍ଜା ଇଚିଦେରି । ୩୨ ଏଝାସି କାଜାସି ଆନେସି ଇଞ୍ଜା ମାହାପୁରୁ ମୀରଏସି ଇଞ୍ଜା ଝେଙ୍ଗିନେସି; ପ୍ରବୁ ମାହାପୁରୁ ଏଝାଣାକି ତାମି ଆକୁ ଦାଝୁଦତି ସିଂଗାସାଣି ହୀନେସି, ୩୩ ଏଝାସି ଜାକୁବ କୁଡ଼ାତା ଜୁଗୁ ଜୁଗୁତାକି ରାଜି କିନେସି, ଇଞ୍ଜା ଏଝାଣି ରାଜି ଏଚେଲାଝା ରାଏ !”

☆ ୧:୨୭ ୧:୨୭ ମାତି ୧:୧୮ ☆ ୧:୩୧ ୧:୩୧ ମାତି ୧:୨୧

୩୪ ସାମା ମରିୟମ ଦୂତୁଇଁ ଏଲେଇଚେ, “ଇଦି ଏନିକି ଆନେ ? ନାନୁ ତକ୍ରାଇଁ ଜିକେଏ ପୁଞ୍ଜାହିଲଅଁ ।”

୩୫ ଦୂତୁ ଏଲେଇଚେ, “ସୁଦୁଜୀଝୁ ନୀ ଲାକ ରେଚାଝାନ୍ନେ ଅଡ଼େ ମାହାପୁରୁତି ବାଡ଼ୁୟୁ ଝାନ୍ନେ, ଏଦାଆଁତାକି ନୀ ତାଣାଟି ଜାର୍ନା ଆନେସି, ଏଝାସି ମାହାପୁରୁତି ମୀରଏସି ଇଞ୍ଜିଁ ଝେଙ୍ଗାନେସି । ୩୬ ଅଡ଼େ ମେହ୍ମୁ ନୀ କୁଡାତି ଏଲିସାବେତ ଜିକେଏ ବୁଡ଼ୁହି ବେଲାତା ପୁରାମାସା ଆହାମାନେ । ଆମିନି ଇୟା ବାଝେଣି ଇଞ୍ଜିଁ ଝେଙ୍ଗାମାନେ, ଏଦି ନୀସଁ ସି ଲେଞ୍ଜୁ ଆହାମାନେ; ୩୭ ଇତିହଁ ମାହାପୁରୁତି ବଲୁ ବାଡ଼ୁୟୁ ହିଲାଆଗାଟାୟି ଆଏ ।”

୩୮ ଏମ୍ବାଟିଏ ମରିୟମ ଏଲେଇଚେ, “ନାନୁତ ପ୍ରବୁତି ହଢ଼େଣିତେସଁ; ନୀ କାତେଏ ନାଙ୍ଗେତାକି ଆୟାପେ ।” ଏମ୍ବାଟିଏ ଦୂତୁ ଏଦାନି ତାଣାଟିଏ ହାଚେ ।

ମରିୟମ ଏଲିସାବେତ ଇଜ ହାନାୟି

୩୯ ଏମ୍ବାଟିଏ ମରିୟମ ନିଙ୍ଗାନା ଜୀହୁଦା ଦେସାତି ହରକା ରାଜିତି ର ଗାଡ଼ାତା ତବେ ହାଚେ, ୪୦ ଅଡ଼େ ଜିକରିୟ ଇଜ ହାଜାନା ଏଲିସାବେତନି ଜହରା କିତେ । ୪୧ ଅଡ଼େ ଏଲିସାବେତ ମରିୟମନି ଜହରା ଝେଣ୍ଡମ୍ବନିଏ ତାନି ବାଣ୍ଡିତି ମୀଲା ଝୀଡ଼ିତେ, ଇଞ୍ଜାଁ ଏଲିସାବେତ ସୁଦୁଜୀଝୁଟି, ୪୨ କାଜା ଗିୟାଁତଲେ ଏଲେଇଚେ, “ଇୟାସିକା ବିତ୍ରାଟି ନୀନୁ ହାଚେକା ନେହାଁତି, ଇଞ୍ଜାଁ ନୀ ବାଣ୍ଡିତି ମୀଲା ଜିକେଏ ନେହାୟି ! ୪୩ ଅଡ଼େ ନା ପ୍ରବୁତି ଇୟା ନା ତାଣା ଝାନ୍ନେ ଇ କାର୍ମା ନାଙ୍ଗେ ଏମ୍ବିଟି ଝାଚେ ? ୪୪ ଇତିହଁ ନୀ ଜହରା ହାଡ଼ା ନା କିୟଁଁ ଝେଣ୍ଡମ୍ବନିଏ ନା ବାଣ୍ଡିତି ମୀଲା ରାହାଁଟି ଝୀଡ଼ିତେ ୪୫ ଆମିନି ଗାଟାୟି ନାମିତେ ଏଦାନାକି ନେହେଁ, ଇତିହଁ ପ୍ରବୁ ତାଣାଟି ଏଦାନାକି ଏନାଆଁ ଝେସ୍ପି ଆହାମାନେ ଏ ବାରେ ପୁରା ଆନେ !”

ମରିୟମତି ଜହରା ପାରୁ

୪୬ ଏଚେଟିଏ ମରିୟମ ଏଲେଇଚେ,
“ନା ଜୀଝୁ ପ୍ରବୁତି ଜହରା କିହିମାନେ;

୪୭ ଅଡ଼େ ନା ଜୀଝୁ ନାଙ୍ଗେ ଗେଲ୍ପାନି ମାହାପୁରୁ ତାଣା ରାହାଁ
ଆହିମାନେ,

- ୪୮ ଇଚ୍ଛିହଁ ଏଞ୍ଜେଲି ତାନି ହଲେଣିନି କାର୍ନା କାକୁଲି
 ମେସାମାନେସି ।
 ଏନିଇଚ୍ଛିହଁ ନୀଞ୍ଜୁଟିଏ ବାରେ ଲକୁ ନାଙ୍ଗେ ନେହାୟି ଇଞ୍ଜୁ
 ଜଲାନେରି,
- ୪୯ ଇଚ୍ଛିହଁ ଆମ୍ବାଆସି ବାରେକିହାଁ ବାଡ଼ୁୟୁଗାଟି ମାହାପୁରୁ
 ଏଞ୍ଜେଲି ନା ତାକି କାଜା କାମା କିହାମାନେସି,
 ଏଞ୍ଜେଲି ଦରୁ ସୁଦୁ;
 ୫୦ ଇଞ୍ଜା ତାଙ୍ଗେ ଆଜିନାରାକି ପାରୁ ପାରୁ ତାକି ତାନି
 କାର୍ନାମେହନାୟି ତୁୟିନେ ।
- ୫୧ ଏଞ୍ଜେଲି ତାନି ବାଡ଼ୁୟୁଗାଟି କେୟୁଟି କାଜା କାମା କିହାମାନେସି,
 ତାହାରା ଗାଟାରାକ୍ ଏଞ୍ଜେରି ହିୟାତି ଅଣ୍ପୁତା ମାନାଣି ଗୁଟି
 କିହାମାନେସି;
- ୫୨ ଏଞ୍ଜେଲି ସାଲୁଞ୍ଜି କିନାରାକ୍ ତାନି ରାଜା ଗାଦି ପିସ୍ପି କିହାମାନେସି,
 କାକୁଲି ଗାଟାରାକ୍ ନିକ୍ହାମାନେସି,
- ୫୩ ଏଞ୍ଜେଲି ହାକି ଗାଟାରାକ୍ ନେହଁ ଆସ୍ତି ହାହାନା ପାଞ୍ଜି
 କିହାମାନେସି,
 ଇଞ୍ଜା ଦନ ଗାଟାରାକ୍ ଖାରୁଇ କେୟୁଟି ପାଣ୍ଡାମାନେସି ।
- ୫୪ କାଲକାଲା ତାକି ଅଣ୍ପାଲି ତାନି ହଲେଏସି ଇସ୍ତାୟେଲତି କାର୍ନା
 ଆହାମାନେସି ।
- ୫୫ କାଲକାଲା ତାକି ଅବ୍ରାହାମ ଅଡ଼େ ତାନି ବାରେ କୁଡ଼ାତାରାକ୍
 କାର୍ନାମେହନାଣି ବାଣା ଆହାହିଲଅସି ।”
- ୫୬ ଅଡ଼େ ମରିୟମ ତାନି ଲେଞ୍ଜୁ ଏଲିସାବେତ ତଲେ ତୁୟାନା ତାନି
 ଇଜ ଖାଡ଼େ ।

ବାପ୍ତିସ୍ମା‡ ହାନି ଜହନତି ଜାର୍ନା

୫୭ ତାୟୁ ଏଲିସାବେତ ପୁରାମାସା ଏଜାଲିଏ ର କକାସି ଜାର୍ନା
 ଆଡ଼େସି, ୫୮ ଅଡ଼େ ମାହାପୁରୁ ଏଦାନି ହାରେକା କାର୍ନା ମେସାମାନାଣି
 ଖେଞ୍ଜାନା ତାନି କୁଡ଼ାତାରି ଇଞ୍ଜା ଅଡ଼େ ଆଟ୍‌ହିତାରି ଏଦାନିତଲେ
 ହାରେକା ରାହାଁ କିତେରି ।

‡ ୧:୫୭ ୧:୫୭ ମୁଞ୍ଜିନାୟି

୫୯ କକାସି ଖାରେକା ଆହାଲିଏ, ଏଞ୍ଜାରି ତଲୁ ଦାଚାଲି ଖାହାନା ତାମି ଆବା ଦରୁଲେହେଁ ତାନି ଦରୁ ଜିକରିୟ ଇଟାଲି ମନ କିତେରି । ୬୦ ସାମା ତାମି ଇୟା ଏଲେଇଚେ, “ଆଏ ! ଏଞ୍ଜାଣି ଦରୁ ଜହନ ଆନେ ।”

୬୧ ଏଞ୍ଜାରି ଏଲେଇଚେରି, “ମୀ କୁଡ଼ାତା ଆମ୍ବାଆରାକି ଏଲେତି ଦରୁ ହିଲେଏ !” ୬୨ ଏମ୍ବାଟିଏ ଏଞ୍ଜାରି ତାଞ୍ଜିଗାଟାଣାକ୍ କେୟୁ ହୁଟାନା କକାଣାକ୍ ଏନି ଦରୁ ଇଟିନାୟି ଇଞ୍ଜିଁ ଖେଚେରି ।

୬୩ ଜିକରିୟ ର ରାଟିନି ପାଟା ରାସାନା ଏଞ୍ଜାଣି ଦରୁ ଜହନ ଇଞ୍ଜିଁ ରାଟିଚେସି, ଏଦାଆଁ ମେସାନା ବାରେଜାଣା କାବା ଆଚେରି ! ୬୪ ଅଡେ ଏ ଦେବୁଣିଏ ଏଞ୍ଜାଣି ଗୁତି ଅଡେ ଖେନରି ପିସପି ଆଡେ ଅଡେ ଏଞ୍ଜାସି ଜଲିହଁ ମାହାପୁରୁତି ଜହରା କିତେସି । ୬୫ ଏମ୍ବାଟିଏ ତାମି ଲକୁ ବାରେ ଆଜାହାଚେରି, ଅଡେ ଇ କାତା ଜୀହୁଦା ଦେସାତି ହରକା ରାଜିତା ବାରେଞ୍ଜାକି ଖେଜିଚେ, ୬୬ ଇଞ୍ଜାଁ ଖେନି ବାରେ ଲକୁ ଏ କାତା ତାମି ମନତା ଇଟାନା ଏଲେଇଚେରି, “ଆତିହଁ ଇ କକାସି ଏନିଲେହେଁତାସି ଆନେସି ?” ଏନିଇଚିହଁ ପ୍ରବୁ ଇଞ୍ଜାଣି ତଲେ ମାନେସି ଇଞ୍ଜିଁ ପୁଚେରି ।

ଜିକରିୟତି ତାୟୁ ଆନି କାତା ଖେକନାୟି

୬୭ ଅଡେ ଜିକରିୟ ସୁଦୁଜୀଞ୍ଜୁ ତଲେ ଇ ତାୟୁ ଆନି କାତା ଏଲେଇଚେସି,

୬୮ ଇସ୍ରାୟେଲତି ମାହାପୁରୁ ଜହରା !

ଏନିଇଚିହଁ ଏଞ୍ଜାସି ତାନି ଲକୁଣି କାର୍ମାମେସାନା ଗେଲ୍ପି କିହାମାନେସି;

୬୯ ଏଞ୍ଜାସି ତାନି ହଲେଏସି ଦାଞ୍ଜୁଦ କୁଡ଼ାଟି ମା. ତାକି ର. ଗେଲ୍ପିନାଣାକ୍ ହାହାମାଞ୍ଜାନେସି ।

୭୦ ତଲି କାଲ୍ମାଟିଏ ତାନି ନେହଁ ମାହାପୁରୁ ଅଶ୍ପୁତି ବଲୁ ଖେହନାରି ଗୁତି ତଲେ ଏନିକଁ ଜଲ୍ଲା ମାଚେରି,

୭୧ ଏଲେକିହଁଏ ମାଙ୍ଗେ ମା. ସାତୁୟାଁ ତାଣାଟି ଅଡେ ମାଙ୍ଗେ ଅପାଆଗାଟାରି ତାଣାଟି ଗେଲ୍ପି କିହାମାଞ୍ଜାନେସି,

- ୭୨ ଏଞ୍ଜେଲ୍ ଏଲେ ଇଞ୍ଜାମାନେସି, ଏଞ୍ଜେଲ୍ ମା ଆକୁୟାଣି କାର୍ମା ମେସାମାଲ୍ ଅଡ଼େ ତାନି ସୁଦୁଗାଟି ରାଜିମାନାତି ଅଣ୍ପିନେସି । ୭୩ ମା ଆବା ଅବ୍ରାହାମ ତାଣା ଏନିମି ପାର୍ମାଣା କିହାଁ ଆଞ୍ଜାମାନାଣି ଅଣ୍ପାମା ପୁରା କିହାମାନେସି, ୭୪ ଅଡ଼େ ମା ସାଦୁୟାଁ ତାଣାଟି ଗେଲ୍ପି ଆହାନା, ଆଜାଆନା କାଲେଏ ତାଙ୍ଗେ ସେବା କିହାଲି ଆଡ଼ିନାୟି,
- ୭୫ ତାନି ନକିତା ମାର ନୀତାମାନି ପାତେକା ସୁଦୁ ଅଡ଼େ ଦାର୍ମୁ ଗାଟାତାୟି ଆହାନା ଡ଼ୟିନାୟି ।
- ୭୬ ଏ ନା ମାର୍ଏଶାତି ନୀନୁ ବାରେତି କିହାଁ ବାଡ଼ୁୟାଗାଟି ମାହାପୁରୁ ଅଣ୍ପପୁତି ବଲୁ ଝେହ୍ନାତି ଇଞ୍ଜାଁ ଝେଙ୍ଗିଦି;
- ୭୭ ପାପୁ ମ୍ଲୋପକି ଆହାନା ଏଞ୍ଜାରି ଗେଲ୍ପି ଆନାଣି ବେଟାଆନେରି, ଏ କାତା ପୁଣ୍ଡି କିହାଲି ତାକି ତାନି ଲକୁତାଣା ହାଜି । ୭୮ ଇଞ୍ଜାଁ ମାଙ୍ଗେ ହିଡ଼ଡ଼ି ଜିରୁତା ତାଚାଲି ମା ମାହାପୁରୁତି ଜୀଞ୍ଜୁନନ୍ତି କାର୍ମାତଲେ ଲାକପୁରୁଟି ମାଙ୍ଗେତାକି ଝେଡ଼ା ହଡ଼ିମାନି ଲେହେଁ ଆନେ,
- ୭୯ ଆମ୍ବାଆରି ହାନ୍ତିଲେହେଁତି ତାଣା ବାସା କିନେରି, ହିଡ଼ଡ଼ି ଜିରୁତା ଅହାଲି ତାକି ଏଞ୍ଜେଲ୍ ବାରେତି ଲାକ ଲାକପୁରୁଟି ଉଜେଡ଼ି ହୀନେସି । ୮୦ ଇଞ୍ଜାଁ ଏ କକାସି ଆଙ୍ଗାତା ଜୀଞ୍ଜୁତା ପାତାଆହାନା ଇସ୍ରାୟେଲ ଲକୁତାଣା ଝେଙ୍ଗାଆ ପାତେକା ଲକୁ ହିଲାଆ ଟାୟୁତା ଡ଼ୟିତେସି ।

୨

ଜୀସୁତି ଜାର୍ନା

(ମାତି ୧:୧୮-୨୫)

୧ ଏତିବେଲାତା ରମ୍ ଦେସାତି ବାରେ ଲକୁ ଦରୁ ରାଟି କିହାଲି କାୟିସର ଅଗସ୍ତସ୍ ତାଣାଟି ହୁକୁମି ଆଡ଼େ । ୨ ସିରିୟାତି ସାଲ୍ଝି କିନାସି କୁରିଣିୟ ବେଲାତା ତଲି ମୂଲୁ ଦରୁ ରାସ୍କି ଆହାମାଟେ ।

୩ ଏଦାଆଁତାକି ବାରେଜାଣା ଦରୁ ରାଟି କିହାଲି ନାୟୁଁଟିଏ ଜାହାରା ଗାଡ଼ାତା ହାଟେରି ।

୪ ଜସେପ ଜିକେଏ ଦରୁ ରାଟି କିହାଲି ମରିୟମନି ତଲେ ଗାଲିଲିତି ନାଜରିତ ଗାଡ଼ାଟି ଜୀହୁଦା ରାଜିତି ବେତଲିହିମ ଜନି ଦାଝୁଦ ଗାଡ଼ାତା ହାଚେସି, ଇଚିହୁ ଏଝାସି ଦାଝୁଦ କୁଡ଼ା ଇଞ୍ଜାହାଁ ଏ ଗତିତାସି ମାଚେସି; ୫ ଏଝାସି ଦରୁ ରାଟି କିୟାଲି ମରିୟମନି ତଲେ ହାଚେସି, ଏଦି ଏଝାଣାକି ବୀହା ଆହାଲି ରୀସପି ଆହାମାଚେ ଅଡ଼େ ଏଦି ପୁରାମାସା ଆହାମାଚେ । ୬ ଅଡ଼େ ଏ ଲକୁ ବେତଲିହିମତା ମାନିବେଲା, ଏଦାନାକି ଜାନି କିନି କାରୁ ଏଗାଝାଡ଼େ, ୭ ଇଞ୍ଜା ଏଦି ତାନି ପାଣ୍ଝା ମୀରଏଣାଲ୍ ଜାନି କିତେ ଇଞ୍ଜା ହିମ୍ବରି ପୁକ୍‌ହାନା କଡ଼ିୟାଁ ଗହନି ଡ଼ଗତା ତ୍ରିପହେ, ଇଚିହୁ ଏ ଲକୁତାକି ବାସାଗାୟୁ ହିଲାଆଡେ ।

ମେଣ୍ଡା ଗଡ଼କା ଅଡ଼େ ଦୂତୁୟାଁ

୮ ଏ ଦାରିମାରି ନାସକାଣାଁ ମେଣ୍ଡା ଗଡ଼କା ଲାଆଁୟାଁ ପାଙ୍ଗାତା ଡ଼ୟାନା ମେଣ୍ଡାୟାଁ କାଟିମାଚେରି । ୯ ପ୍ରବୁତି ର ଦୂତୁ ଏଝାରିତାଣା ଝାଡ଼େ ଇଞ୍ଜା ପ୍ରବୁତି ଗାଝୁରମିତି ଉଜେଡ଼ି ଏଝାରି ସାରିଝାକି ତଞ୍ଜାଆଡ଼େ, ଅଡ଼େ ଏଝାରି ହାରେକା ଆଜିତେରି । ୧୦ ଏମ୍ବାଟିଏ ଦୂତୁ ଏଝାରାଲ୍ ଏଲେଇଚେ, “ମୀରୁ ଆଜାଆଦୁ ! ନାନୁ ମୀ ବାରେ ଲକୁତାକି ହାରେକା ରାହାଁତି କାରୁ ମିଙ୍ଗେ ଝେସିମାଞ୍ଜାଇ, ୧୧ ଇଚିହୁଁ ନୀଞ୍ଜୁ ଦାଝୁଦ ଗାଡ଼ାତା ମିଙ୍ଗେ ଗେଲପାନାସି ଜାର୍ନା ଆହାମାନେସି, ଏଝାସି କ୍ରୀସ ପ୍ରବୁ । ୧୨ ଅଡ଼େ ଇଦି ମିଙ୍ଗେତାକି ସିନାଲେହେଁ ଆନେ, ମୀରୁ ର କକାଣାଲ୍ ହିମ୍ବରି ପୁକ୍‌ହାନା କଡ଼ିୟାଁ ଗହନି ଡ଼ଗତା ତୁରାମାନାଣି ମେହଦେରି ।”

୧୩ ଦେବୁଣିଏ ଏ ଦୂତୁ ତଲେ ଲାକପୁରୁତି ହାରେକା ଦୂତୁୟାଁ ଝାହାନା ମାହାପୁରୁଲ୍ ଜହରା ପାରୁ ପାଡ଼ିତୁ, ୧୪ “ଲାକପୁରୁ ମାହାପୁରୁତି ଗାଝୁରମି, ଅଡ଼େ ଦାରତିତା ଏଝାଣି ରାହାଁ ଇଞ୍ଜା ମାଣ୍ଝିୟାଁ ବିତ୍ରା ହିଡ଼ଡ଼ି ।”

୧୫ ଦୂତୁୟାଁ ଏମ୍ବାଟି ଲାକପୁରୁ ହାଜାଲିଏ ମେଣ୍ଡା ଗଡ଼କା ତାମ୍ବୁ ତାମ୍ବୁ କାତା ଆଡ଼େରି, “ମାର ବେତଲିହିମ ପାଡେକା ହାଜାନା ପ୍ରବୁ ମାଙ୍ଗେ ଆମିନି କାତା ଝେସାମାଞ୍ଜାନେସି ଏଦାଆଁ ସିନି କିକାନ ।”

୧୭ ଏମାଟିଏ ତବେ ହାଜାନା ପାରାନା ମରିୟମ ଅଡ଼େ ଜସେପ ଇଞ୍ଜା କଡ଼ିୟା ଗହନି ତଂଗତା ପୁଃନି ଜାର୍ନାଆଡ଼ି କକାଣାକ୍ ତୁରାମାନାଣି ମେସ୍ତେରି । ୧୭ ଏଝାରି ଇ ବାରେ ମେସାନା ଏ କକାଣି କାତା ଏନାଆଁ ଇଣ୍ଡି ଆହାମାଚେ ଏଦାଆଁ ଝେକ୍‌ହେରି । ୧୮ ଅଡ଼େ ଏଚେକା ଲକୁ ମେଣ୍ଡା ଗଡ଼କା ତାଣାଟି ଏ ବାରେ କାତା ଝେଚେରି, ଏଝାରି ବାରେ ଏ କାତାତାକି କାବା ଆଡ଼େରି । ୧୯ ସାମା ମରିୟମ ଇ ବାରେ କାତା ହିୟାତା ଇଟାନା ହାରେକା ଅଣ୍‌ପାଲି ମାଟ୍‌ହେ । ୨୦ ଅଡ଼େ ମେଣ୍ଡା ଗଡ଼କାକି ଏନିକ୍‌ ଝେସ୍‌ପି ଆହାମାଚେ, ଏଲେକିହିଁଏ ଏଝାରି ଏନା ଏନାଆଁ ଝେଚେରି ଇଞ୍ଜା ମେସ୍ତେରି ଏ ବାରେତାକି ମାହାପୁରୁତି ଗାଝୁରମି ଅଡ଼େ ଜହରା କିହିଁ ଝେଣ୍ଡା ହାଚେରି ।

ଜୀସୁଇଁ ଦରୁ ଇଟିନାୟି

୨୧ ଏଝାଣାକି ଆଟାଦିନା ଆଡ଼େ ଅଡ଼େ ତଲୁ ଦାଃନି ଦିନା ଝାଡ଼େ ଇଞ୍ଜା ଏଝାଣି ଦରୁ ଜୀସୁ ଇଞ୍ଜା ଇଟିଚେରି; ଇ ଦରୁ ତାନି ପୁରାମାସା ଆନି ନକେଏ ଦୁତୁ ତାଣାଟି ଝେସ୍‌ପି ଆହାମାଚେ ।

ମାହାପୁରୁ ଇଲୁତା ଜୀସୁ

୨୨ ଅଡ଼େ ଏଚେତା ମସାତି ମେରା ତଲେ ଏଝାରି ଅଟ୍‌ହା କଡ଼ିନି ଦିନା ଏଗାଝାଡ଼େ, ଏଚେଟିଏ ଜସେପ ଅଡ଼େ ମରିୟମ ଜୀସୁଇଁ ମାହାପୁରୁ ନକିତା ଜିରୁସାଲମତା ଅହିଁ ହାଚେରି । ୨୩ ଏନିକ୍‌ ମାହାପୁରୁତି ସାସ୍ତେରିତା ରାସ୍‌କି ଆହାମାନେ, “ବାରେ ପାଣ୍ଡା ମୀରକା ପ୍ରୁ ତାକି ସୁଦୁଗାଟାରି ଇଞ୍ଜା ଝେଈନେରି ।” ୨୪ ଅଡ଼େ ମେରାତା ରାସ୍‌କି ଆହାମାନି ଇ ମେରା ତଲେ ରୀ କୁଗୁରି ପଟାୟା ଆଆତ୍‌ ରୀ ପାର୍‌ଝା ପଟାୟା ମାହାପୁରୁ ନକିତା ପୂଜା କିହାଲି ଏଝାଣାକ୍ ଜିରୁସାଲମତା ଅଡ଼େରି ।

୨୫ ଏଚିବେଲା ଜିରୁସାଲମତା ସିମିୟନ ଦରୁଗାଟି ର ମାଣ୍‌ସି ମାଚେସି; ଏଝାସି ର ଦାର୍‌ମୁଗାଟାସି ଅଡ଼େ ମାହାପୁରୁଇଁ ଆଜିନାସି ମାଚେସି, ଅଡ଼େ ଇସାୟେଲ ଲକୁ ବାର୍‌ସୁ ବେଟାଆନାଣି କାଟିମାଚେସି, ଇଞ୍ଜା ସୁଦୁଜୀଝୁ ଏଝାଣି ତାଣା ମାଚେ । ୨୬ ମାହାପୁରୁ ପାଣ୍ଡାନି କ୍ରୀସୁଇଁ ମେହ୍‌ଆ ପାଚେକା ଏଝାସି ହାଅସି ଇଞ୍ଜା ସୁଦୁଜୀଝୁ ତଲିଏ

☆ ୨:୨୧ ୨:୨୧ ଲୁକ ୧:୩୧

ଖେସାମାତେ । ୨୭ ସିମିୟନ ସୁଦୁଜୀଝୁଟି ମାହାପୁରୁ ଇଲୁତା ଖାତେସି; ଅଡ଼େ ତାଲି ତାଞ୍ଜି ମସାତି ମେରାଲେହେଁ କିହାଲି ଜୀସୁଇଁ ବିତ୍ରା ତାତୁ, ୨୮ ଏତିବେଲା ସିମିୟନ କକାଣାଇଁ ପମାନା ମାହାପୁରୁଇଁ ଜହରା କିତେସି;

୨୯ “ଏ ପ୍ରବୁ ନୀର୍ବ ନୀନୁ ଖେସିଲେହେଁ
ନୀ ହବେଲଏଣା ଜୀଝୁ ହିଡ଼ଡ଼ିତଲେ ଅମୁ;

୩୦ ନା କାନୁ ନୀ ଗେଲପିନାଣାଇଁ ମେସାମାନେ ।

୩୧ ଏନିଇଚିହିଁ ବାରେ ଲକୁତାକି କେପାମାନି

୩୨ ଜୀହୁଦିଆଆତାରାକି ସାତା ତହୁନି ର ଉଜେଡ଼ି ଆନେସି,
ଅଡ଼େ ନୀ ଇସ୍ରାୟେଲ ଲକୁତି ଗାଝୁରମି ଲେହେଁ କିହାମାଞ୍ଜି
।”

୩୩ ଇଞ୍ଜା ତାମି ଇୟା ଅଡ଼େ ଆବା ଏଞ୍ଜାଣି ତାକି ଖେସପି ଆହିମାନି ବାରେ କାତାତାକି କାବା ଆହିମାତେରି । ୩୪ ଏତେଟିଏ ସିମିୟନ କକାଣାଇଁ ବର ହୀହାନା ତାମି ଇୟା ମରିୟମନି ଏଲେଇଚେସି, “ମେହମୁ ଇଞ୍ଜାସି ଇସ୍ରାୟେଲତି ହାରେକା ଲକୁଣି ନାସା କିହାଲି ଅଡ଼େ ଗେଲପାଲି ଆଡ଼ଝି ଆହାମାନେସି, ଆମ୍ବାଆରି କପାଟି ହାରେକା ଜଲିନେରି । ଏଞ୍ଜାସି ମାହାପୁରୁ ତାଣାଟି ର ସିନାଲେହେଁ ଆନେସି । ୩୫ ଆଆତ ନୀ ଜୀଝୁତା ଜିକେଏ କାଣ୍ଡାତଲେ ଗୁକ୍‌ହିସାରେ ହଚାହାନି ଲେହେଁ, ଏ କସୁ ନୀ ହିୟାତା ଆୟାନେ ।”

୩୬ ଅଡ଼େ ହାନା ଦରୁଗାଟି ର ମାହାପୁରୁ ଅଣ୍‌ପୁଡ଼ି ବଲୁ ଖେହନାୟି ମାତେ; ଏଦି ଆସେର୍ କୁଡାତି ପନୁଏଲ ମାକ୍‌ମା । ଏଦାନାକି ହାରେକା ବାର୍ସା ଆହାମାତେ; ଏଦି ତାଆ ଆଡ଼ି ଜେଚ ସାତା ବାର୍ସା ଡକ୍‌ତଲେ ବାସା କିହାମାତେ, ଅଡ଼େ ସାରିକଡ଼ି ସାରି ବାର୍ସା ରାଗ୍‌ଶେଣି ଆହାନା ନୀତାମାତେ । ୩୭ ଏଦି ମାହାପୁରୁ ଇଲୁ ପିହ୍‌ଆନା ବାତିମାଲିହିଁ ଲାଆଁ ମାଦେନା ରାନ୍‌ନା ତିନାଆନା ପ୍ରାତାନା କିହିମାତେ । ୩୮ ଏ ଦେବୁଣିଏ ଏଦି ଖାହାନା ମାହାପୁରୁତି ଜହରା କିହିଁ ଜିରୁସାଲମତି ଗେଲପିନାଣାଇଁ କାଡ଼ି ମାନାରାଇଁ ଏଞ୍ଜାଣି କାତା ଖେସାଲି ମାଟ୍‌ହେ ।

ନାଜରିତତା ଖେଶ୍‌ଆ ଖାନାୟି

୩୯ ☆ତାୟୁ ଜସେପ ଅଡ଼େ ମରିୟମ ମାହାପୁରୁତି ମେରା ତଲେ ବାରେ କାମା ରାପୁହାନା ଗାଲିଲିତି ତାନି ଗାଡ଼ା ନାଜରିତତା ଖେଣ୍ଡା ଖାଡ଼େରି ୪୦ ଅଡ଼େ ଜୀସୁ ଆଙ୍ଗାତା ବୁଦିତା ଅଡ଼େ ବାଡ଼ୁୟୁତା ପାତା ଆଡ଼େସି, ଅଡ଼େ ମାହାପୁରୁତି କାର୍ନା ଏଞ୍ଜାଣିଲାକ ମାଚେ ।

ଜୀସୁ ମାହାପୁରୁ ଇଲୁତା

୪୧ ତାନି ଇୟା ଆବା ବାରେ ବାର୍ସା ପିସ୍ପିଆନ୍ତି ପାର୍ବୁତାକି ଜିରୁସାଲମତା ହାଜିମାଚେରି । ୪୨ ଜୀସୁ ବାର ବାର୍ସା ଆହାଲିଏ ଏଞ୍ଜାରି ପାର୍ବୁତି ମେରାଲେହେଁ ଜିରୁସାଲମତା ହାଚେରି । ୪୩ ଅଡ଼େ ପାର୍ବୁତି ଦିନା ରାପୁହାନା ଏଚେତା ଏଞ୍ଜାରି ଖେଣ୍ଡା ଖାଜିମାଚେରି, ଏଚିବେଲାତା ଡ଼ଣା କକାସି ଜୀସୁ ଜିରୁସାଲମତା ଡ଼ୟାହାଚେସି, ସାମା ତାନି ଇୟା ଆବା ପୁଞ୍ଜାହିଲାଆଚେରି; ୪୪ ସାମା ଏଞ୍ଜାରି ତାନିତଲେ ଖାହାମାଚି ଲକୁତଲେ ମାନେସି ଇଞ୍ଜା ଅଣ୍ପାନା ର ଦିନାତି ଜିରୁ ହାଚେରି, ଅଡ଼େ ତାନି ଲକୁ ଇଞ୍ଜା ପୁଚି ଲକୁତାଣା ପାରାଲି ମାଟ୍‌ହେରି, ୪୫ ଇଞ୍ଜା ଏଞ୍ଜାଣାଇଁ ମେଡ଼ା ଆଆନା ପାରି ପାରି ଜିରୁସାଲମତା ଖେଣ୍ଡା ହାଚେରି । ୪୬ ତାନିଦିନା ତାୟୁ ଏଞ୍ଜାରି ଏଞ୍ଜାଣାଇଁ ମାହାପୁରୁ ଇଲୁତା ବେଟାଆଡ଼େରି; ଏଞ୍ଜାସି ମେରାପୁନାରି କାତା ଖେଞ୍ଜିହ୍ ଏଞ୍ଜାରାଇଁ ଖେଣ୍ଡେ କାତା ଖେଞ୍ଜିମାଚେସି, ୪୭ ଅଡ଼େ ଏଚେକା ଲକୁ ଏଞ୍ଜାଣି କାତା ଖେଞ୍ଜିମାଚେରି, ବାରେଜାଣା ଏଞ୍ଜାଣି ବୁଦିତା ଅଡ଼େ ଖେହ୍ନି କାତାତା କାବା ଆହିମାଚେରି । ୪୮ ଏଚିବେଲା ତାନି ଇୟା ଆବା କକାଣାଇଁ ମେସାନା କାବାଆତୁ ଇଞ୍ଜା ତାନି ଇୟା ଏଞ୍ଜାଣାଇଁ ଏଲେଇଚେ, “ମୀର୍‌ଏଣା ମାଙ୍ଗେ ଏନାଆଁତାକି ଇଚେକା ଦୁକୁ ହିୟାତି ? ମେହ୍‌ମୁ ନାନୁ ଅଡ଼େ ମୀ ଆବା ଏଚେକା ଦୁକୁଆହ୍ ନିଙ୍ଗେ ପାରିମାଞ୍ଜାନମି ।”

୪୯ ଏମ୍ବାଟିଏ ଜୀସୁ ଏଲେଇଚେସି, “ମୀରୁ ନାଙ୍ଗେ ଏନାଆଁତାକି ପାରିମାଞ୍ଜାଦେରି ? ନା ଆବା ଇଜ ନାନୁ ମାନାଣି ମୀରୁ ପୁଞ୍ଜାହିଲଅଚେରି ?” ୫୦ ସାମା ଏଞ୍ଜାସି ଆମିନି କାତା ଜଲିଚେସି, ତାନି ଇୟା ଆବା ପୁଞ୍ଜାଲି ଆଡ଼ାଆଚେରି ।

୫୧ ତାୟୁ ଜୀସୁ ତାନି ଇୟା ଆବା ତଲେ ଖେଣ୍ଡେ ନାଜରିତତା ଖାଡ଼େସି, ଇଞ୍ଜା ଏଞ୍ଜାରି କାତା ମାନୁଞ୍ଜି ଆହାନା ଡ଼ୟିଚେସି, ଅଡ଼େ ତାନି

ଇୟା ଇ ବାରେ କାତା ଜାଗ୍ରାତା ତଲେ ମନତା ଇଟାମାଚେ । ୫୨ ଅଡ଼େ ଜୀସୁ ଆଜ୍ଞାତା, ବୁଦିତା ଇଞ୍ଜା ମାହାପୁରୁ ଅଡ଼େ ମାଣ୍ଠିୟା କାର୍ମାଟି ପାତା ଆଡ଼େସି ।

୩

ବାପ୍ତିସ୍ମ* ହାନି ଜହନ ଝେକ୍‌ନାୟି

(ମାତି ୩:୧-୧୨; ମାର୍କ ୧:୧-୮; ଜହ ୧:୧୯-୨୮)

୧ ଡିବିରିୟା କାୟିସରତି ସାଲୁଝି କିନି ପନ୍ଦର ବାର୍ଷା ଆୟାଲିଏ, ଏରିବେଲା ପନ୍ତ୍ରିୟ ପିଲାତ ଜୀହୁଦା ରାଜିତି ସାଲୁଝି କିନାସି ଅଡ଼େ ହେରଦ ଗାଲିଲି ରାଜିତି ରାଜା ମାଚେସି, ଅଡ଼େ ତାମି ତାୟି ପିଲିପ ଇତୁରିୟା ଅଡ଼େ ତ୍ରାକନିତି ରାଜି ଅଡ଼େ ଲୁସାନିୟା ଅବିଲିନିତି ରାଜା ମାଚେସି । ୨ ହାନାନ ଅଡ଼େ କୟାପା କାଜା ପୂଜେରା ମାଚେରି, ଏରିବେଲାତା ମାହାପୁରୁତି ବଲୁ ଲକୁ ହିଲାଆ ଟାୟୁତା ଜିକରିୟ ମୀରୁଏସି ଜହନ ତାଣା ଝାଡ଼େ । ୩ ଏମ୍ବାଟିଏ ବାପ୍ତିସ୍ମ† ହାନି ଜହନ ଜର୍ଦନ ଦାରିତି ବାରେ ନାୟକାଝାକି ହାଜାନା ପାପୁ ମ୍ଲେପୁକି ଆହାଲି ମନ ଝେଟ୍‌ହାନା ବାପ୍ତିସ୍ମ‡ ଅନି କାତା ଝେକ୍‌ହାଲି ମାଟ୍‌ହେସି,

୪ ଏନିଇଟିହିଁ ମାହାପୁରୁ ଅଣ୍‌ପୁତି ବଲୁ ଝେହ୍‌ନି ଜିସାୟ ପତିତା ରାସ୍‌କି ଆହାମାନେ,

“ଲକୁ ହିଲାଆ ଟାୟୁତା ରଅଣି ହାଡା ଝେଜିମାନେ;

ପ୍ରବୁତି ଜିରୁ ନେହିଁ କେପାଦୁ;

ଅଡ଼େ ଏଝାଣି କାଜା ଆଂଗେଣି ତିୟି କିଦୁ !

୫ ବାରେ ଗାଡ଼ଞ୍ଜା ନେଞ୍ଜି କିଝିଆନୁ,

ବାରେ ହର୍‌କା ମେଟାୟାଁ ଉଣା କିଝିଆନୁ,

ଡଂଗିତି ଜିରୁ ତିୟି କିଝିଆନେ,

କାଡ଼ଦି ତେପା ବୁମିତି ବାରେ ସମାନା କିଝିଆନେ ।

୬ ବାରେ ଦାରୁତିତି ଲକୁ ମାହାପୁରୁତି ଗେଲ୍‌ପିନାଣି ମେହ୍‌ନେରି ।”

୭ ☆ଏଲେକିହିଁ, ଜହନ ତାଣାଟି ବାପ୍ତିସ୍ମ§ ଅହାଲି ଝାହିମାନି ଲକୁଣି ମେସାନା ଏଝାରାଇଁ ଏଲେଇଚେସି, “ଆଡ଼େ ରାସ୍‌କା

* ୩: ୩:୧ ମୁଞ୍ଜିନାୟି † ୩:୩ ୩:୩ ମୁଞ୍ଜିନାୟି ‡ ୩:୩ ୩:୩ ମୁଞ୍ଜିନାୟି ☆ ୩:୭ ୩:୭ ମାତି ୧୨:୩୪; ୨୩:୩୩ § ୩:୭ ୩:୭ ମୁଞ୍ଜିନାୟି

କୃତାତାତେରି ମାହାପୁରୁ ପାଣ୍ଡାମାଞ୍ଜାନି କପାଟି ପିସ୍ପି ଆହାଲି ମାଙ୍ଗେ ଆମ୍ବାଆସି ସେତୁନା ହିୟାତେସି ? ୮ ✨ଏଦାଆଁତାକି ମନ ଝେଟ୍‌ହାକତିତି ନେହଁ କାମା ତହ୍‌ହୁ; ଅଡ଼େ ଅବ୍ରାହାମ ମା ଆବା ଇଞ୍ଜିହଁ ଅଶ୍‌ପାଆଦୁ, ନାନୁ ମିଙ୍ଗ ଝେସିମାଞ୍ଜାଇଁ, ମାହାପୁରୁ ଇ ଝାଲୁକାଟି ଜିକେଏ ଅବ୍ରାହାମତି ମୀରକାଣି ଗାଡ଼ି କିହାଲି ଆଡ଼ିମାନେସି ! ୯ ✨ଅଡ଼େ ନୀଏଁ ଜିକେଏ ମାର୍‌ନୁ ତାକିତା କାଃଆଲି ଆଗାମାନେ; ଆମିନି ମାର୍‌ନୁ ନେହଁ ପାଡ଼େୟି ଆୟେଏ ଏଦାନି ବୃଣ୍‌ହାନା ହିରୁତା ମେଡ଼ପି ଆନେ ।”

୧୦ ଏମ୍ବାଟିଏ ଲକୁ ଏଝାଣାଇଁ ଝେଚେରି, “ଆତିହଁ ମାମ୍ବୁ ଏନାଆଁ କିନମି ?”

୧୧ ଏଝାସି ଏଲେଇଚେସି, “ଆମ୍ବାଆରାକି ଜଡ଼େକା ସକାୟାଁ ମାନୁ, ଏଝାସି ଆମ୍ବାଆରାକି ହିଲାର ଏଝାଣାକି ରଣ୍ଡାଆଁ ହୀପେସି; ଇଞ୍ଜା ଆମ୍ବାଆରାକି କାଡ଼ି ମାନେ ଏଝାସି ଜିକେଏ ଏଲେକିପାସି ।”

୧୨ ✨ସିସ୍ତୁ ରାହ୍‌ନାରି ଜିକେଏ ବାପ୍ତିସ୍ତା* ଅହାଲି ଝାହାନା ଏଲେଇଚେରି, “ଏ ଗୁରୁ ମାମ୍ବୁ ଏନାଆଁ କିନମି ?”

୧୩ ଏଝାସି ଏଝାରାଇଁ ଏଲେଇଚେସି, “ମିଙ୍ଗେତାକି ଏଚେକା ମେରା ମାନେ ଏଚେକାଟିଏ ଆଗାଡ଼ା ରାହ୍‌ଆଦୁ ।”

୧୪ ଏଚରଜାଣା ରିଜାରି କସ୍‌କା ଝାହାନା ଏଲେଇଚେରି, “ମାମ୍ବୁ ଏନାଆଁ କିନମି ?”

ଏଝାସି ଏଝାରାଇଁ ଏଲେଇଚେସି, “ବାଡ଼ୁୟୁଟି କି ନାଡ଼ିକିହାନା ଆମ୍ବାଆରି ଦନ ମୀଞ୍ଜା ଅଆଦୁ, ଅଡ଼େ ମୀରୁ ଏଚେକା ବେଟାଆଡ଼େରି ଏଚେକା ତଲେଏ ନୀତାଦୁ ।”

୧୫ ଲକୁ ମସିହାଇଁ କାଡ଼ିମାଚେରି, ଇଞ୍ଜା ଜହନଏ କ୍ରୀସ୍ତ ହାବୁଲ୍‌ଲାଇଁ ଇଞ୍ଜି ଅଶ୍‌ପାନା ବାରେଜାଣା ତାମି ମନତା କାତା ଆହିମାଚାକି, ୧୬ ଜହନ ଏଝାରାଇଁ ଏଲେଇଚେସି, “ନାନୁସାଁ ଏୟୁତଲେ ବାପ୍ତିସ୍ତା† ହୀହିମାଞ୍ଜାଇଁ, ସାମା ନା କିହାଁ ଆମ୍ବାଆସି ବାଡ଼ୁୟୁ ଗାଟାସି ଏଝାସି ଝାହିମାନେସି, ଏଝାଣି ସେପୁୟାତି ତୁର୍କା ଜିକେଏ ହୁକହାଲି ନାନୁ ପାଡ଼ାଆଅଁ; ଏଝାସି ମିଙ୍ଗେ ସୁଦୁଜୀଝୁ ଅଡ଼େ ହିରୁତଲେ ବାପ୍ତିସ୍ତା‡

✨ ୩:୮ ୩:୮ ଜହ ୮:୩୩ ✨ ୩:୯ ୩:୯ ମାତି ୭:୧୯ ✨ ୩:୧୭ ୩:୧୭ ଲୁକ ୭:୨୯
 * ୩:୧୭ ୩:୧୭ ମୁଞ୍ଜନାୟି † ୩:୧୭ ୩:୧୭ ମୁଞ୍ଜନାୟି ‡ ୩:୧୭ ୩:୧୭ ମୁଞ୍ଜନାୟି

ହିୟାନେସି । ୧୭ ତାନି କ୍ଳାନୁତି ତାସାଲି ଅଡ଼େ ତାନି ଆନୀତି କ୍ଳସାହାଁ କୁଡ଼ି କିହାନା ଗାଡ଼େୟିତା ଇଟାଲି ଏଞ୍ଜାଣି କେୟୁତା ହେତି ମାନେ, ଇଞ୍ଜା ଗାଟା ପଡ଼ତୁ ଏରେଲା ତୁମ୍ବାଆଗାଟି ହିରୁତା ହୁଡ଼ା ତୁହ୍ନେସି ।”

୧୮ ଏଞ୍ଜାସି ଇଲେତି ହାରେକା କାତା ଖେସିହିଁ ଅଡ଼େ ରାହାଁତି କାତା ଜଲିହିଁ ଲକୁତାଣା ନେହିଁ କାରୁ ଖେକ୍‌ହିଁ ମାରେସି;

୧୯ ☆ସାମା ରାଜା ହେରଦ ତାମି ତାୟି ତକ୍ତି ହେରଦିୟାନି କାତା ଅଡ଼େ ତାନୁ କିହାମାନି ବାରେ ଲାଗେଏତି କାମାତାକି ଜହନ ତାଣାଟି ଲାଗି ବେଟା ଆହାମାଚାକି, ୨୦ ହେରଦ ଜହନଇଁ ଦସ୍‌ପାନା କାୟିଦିତା ଇଟାନା ହାରେକା ଲାଗେଏତି କାମା କିଡେସି ।

ଜୀସୁତି ବାପ୍ତିସ୍ମ

(ମାତି ୩:୧୩-୧୭; ମାର୍କ ୧:୯-୧୧)

୨୧ ବାରେ ଲକୁ ବାପ୍ତିସ୍ମ* ଅତି ତାୟୁ ଜୀସୁ ଜିକେଏ ବାପ୍ତିସ୍ମ† ଅହାନା ପ୍ରାତାନା କିହିମାଗାଟି ହାଗୁ ଦେପିଆଡେ, ୨୨ ☆ଅଡ଼େ ସୁଜୁଜୀଝୁ ପାର୍‌ଝା ପଟାଲେହେଁ ଏଞ୍ଜାଣିଲାକ ରେଟାଝାଡେ; ଇଞ୍ଜା ହାଗୁଟି ଇ ହାଡ଼ା ଆଡେ, “ନୀନୁ ନା ଜୀଝୁତି ମୀର୍‌ଏଣାତି ନୀ ତାଣା ନା ରାହାଁ ମାନେ ।”

ଜୀସୁତି ଆକୁ ଆବାୟା

(ମାତି ୧:୧-୧୭)

୨୩ ଜୀସୁ ସେବା କାମା ମାଟ୍‌ହି ବେଲାତା ଏଞ୍ଜାଣାକି କଡ଼େଦସ ବାର୍‌ସା ଆହାମାଚେ; ଲକୁତି କାତାତଲେ ଏଞ୍ଜାସି ଜସେପ ମୀର୍‌ଏସି; ଜସେପ ଏଲି ମୀର୍‌ଏସି, ୨୪ ଏଲି ମତାତ ମୀର୍‌ଏସି, ମତାତ ଲେବି ମୀର୍‌ଏସି, ଲେବି ମଲ୍‌କି ମୀର୍‌ଏସି, ମଲ୍‌କି ଜନୟ ମୀର୍‌ଏସି, ଜନୟ ଜସେପ ମୀର୍‌ଏସି, ୨୫ ଜସେପ ମତିତିୟା ମୀର୍‌ଏସି, ମତିତିୟା ଆମସ ମୀର୍‌ଏସି, ଆମସ ନାହୁମ ମୀର୍‌ଏସି, ନାହୁମ ହେସ୍‌ଲି ମୀର୍‌ଏସି, ହେସ୍‌ଲି ନଗୟ ମୀର୍‌ଏସି, ୨୬ ନଗୟ ମହତ ମୀର୍‌ଏସି, ମହତ ମତିତିୟସ୍ ମୀର୍‌ଏସି, ମତିତିୟସ୍ ସିମିୟି ମୀର୍‌ଏସି, ସିମିୟି ଜସେକ ମୀର୍‌ଏସି, ଜସେକ ଜଦା ମୀର୍‌ଏସି, ୨୭ ଜଦା ଜହନ ମୀର୍‌ଏସି,

☆ ୩:୧୯ ୩:୧୯ ମାତି ୧୪:୩,୪; ମାର୍କ ୬:୧୭,୧୮ § ୩:୨୦ ୩:୨୧ ମୁଞ୍ଜିନାୟି * ୩:୨୧ ୩:୨୧ ମୁଞ୍ଜିନାୟି † ୩:୨୧ ୩:୨୧ ମୁଞ୍ଜିନାୟି ☆ ୩:୨୨ ୩:୨୨ ମାତି ୩:୧୭; ମାର୍କ ୧:୧୧; ଲୁକ ୯:୩୫

ଜହନ ରେସା ମୀରୁଏସି, ରେସା ଜିରୁବାବେଲ ମୀରୁଏସି, ଜିରୁବାବିଲ ସଲ୍‌ଟିୟେଲ୍ ମୀରୁଏସି, ସଲ୍‌ଟିୟେଲ୍ ନେରି ମୀରୁଏସି, ^{୨୮} ନେରି ମଲ୍‌କି ମୀରୁଏସି, ମଲ୍‌କି ଅଦ୍‌ଦି ମୀରୁଏସି, ଅଦ୍‌ଦି କସାମ ମୀରୁଏସି, କସାମ ଏଲ୍‌ଲୀଦାନ ମୀରୁଏସି, ଏଲ୍‌ଲୀଦାନ ଏର ମୀରୁଏସି, ^{୨୯} ଏର ଜିହସୁୟ ମୀରୁଏସି, ଜିହସୁୟ ଏଲ୍‌ଲିୟାଜର ମୀରୁଏସି, ଏଲ୍‌ଲିୟାଜର ଜରିମ ମୀରୁଏସି, ଜରିମ ମତାତ ମୀରୁଏସି, ମତାତ ଲେବି ମୀରୁଏସି, ^{୩୦} ଲେବି ସିମିୟନ ମୀରୁଏସି, ସିମିୟନ ଜୀହୁଦା ମୀରୁଏସି, ଜୀହୁଦା ଜସେପ ମୀରୁଏସି, ଜସେପ ଜନାମ ମୀରୁଏସି, ଜନାମ ଏଲ୍‌ଲିୟାକିମ ମୀରୁଏସି, ^{୩୧} ଏଲ୍‌ଲିୟାକିମ ମଲ୍‌ଲୀହ ମୀରୁଏସି, ମଲ୍‌ଲୀହ ମନ୍‌ନା ମୀରୁଏସି, ମନ୍‌ନା ମତତା ମୀରୁଏସି, ମତତା ନାତନ ମୀରୁଏସି, ନାତନ ଦାବୁଦ ମୀରୁଏସି, ^{୩୨} ଦାବୁଦ ଜିସି ମୀରୁଏସି, ଜିସି ଅବେଦ ମୀରୁଏସି, ଅବେଦ ବୟାଜ ମୀରୁଏସି, ବୟାଜ ସେଲହ ମୀରୁଏସି, ସେଲହ ନହସନ ମୀରୁଏସି, ^{୩୩} ନହସନ ଅମିନାଦାବ ମୀରୁଏସି, ଅମିନାଦାବ ଅଦ୍‌ନିନି ମୀରୁଏସି, ଅଦ୍‌ନିନି ଅର୍‌ନି ମୀରୁଏସି, ଅର୍‌ନି ହେସ୍ରା ମୀରୁଏସି, ହେସ୍ରା ପେରସ ମୀରୁଏସି, ପେରସ ଜୀହୁଦା ମୀରୁଏସି, ^{୩୪} ଜୀହୁଦା ଜାକୁବ ମୀରୁଏସି, ଜାକୁବ ଇସାହାକ ମୀରୁଏସି, ଇସାହାକ ଅବ୍ରାହାମ ମୀରୁଏସି, ଅବ୍ରାହାମ ତେରହ ମୀରୁଏସି, ତେରହ ନାହର ମୀରୁଏସି, ^{୩୫} ନାହର ସରୁଗ ମୀରୁଏସି, ସରୁଗ ରଗୁ ମୀରୁଏସି, ରଗୁ ପେଲଗ ମୀରୁଏସି, ପେଲଗ ଏବର ମୀରୁଏସି, ଏବର ସେଲହ ମୀରୁଏସି, ^{୩୬} ସେଲହ କେନାନ ମୀରୁଏସି, କେନାନ ଅର୍‌କ୍ୟଦ ମୀରୁଏସି, ଅର୍‌କ୍ୟଦ ସେମ ମୀରୁଏସି, ସେମ ନହ ମୀରୁଏସି, ନହ ଲେମକ ମୀରୁଏସି, ^{୩୭} ଲେମକ ମତୁସେଲହ ମୀରୁଏସି, ମତୁସେଲହ ହନକ ମୀରୁଏସି, ହନକ ଜେରଦ ମୀରୁଏସି, ଜେରଦ ମହଲଲେଲ ମୀରୁଏସି, ମହଲଲେଲ କେନାନ ମୀରୁଏସି, ^{୩୮} କେନାନ ଏନସ ମୀରୁଏସି, ଏନସ ସେତ ମୀରୁଏସି, ସେତ ଆଦମ ମୀରୁଏସି, ଆଦମ ମାହାପୁରୁ ମୀରୁଏସି ।

୪

ଜୀସୁଇଁ ତାୟିପାରି କିନାୟି
(ମାତି ୪:୧-୧୧; ମାର୍କ ୧:୧୨-୧୩)

୧ ଜୀସୁ ସୁଦୁଜୀଝୁ ବେଟାଆହାନା ଜର୍ଦନ କାତାଟି ଝେଣ୍ଡାଝାଡେସି ଇଞ୍ଜା ରୀ କଡ଼ି ଦିନା ପାତେକା ସୁଦୁଜୀଝୁ ତଲେ ଲକୁ ହିଲାଆ ଚାୟୁତା ହାଚେସି । ୨ ଏମ୍ବାଆଁ ଏଝାସି ସୟତାନ ତାଣାଟି ତାୟିପାରି କିଝିଆଡେସି । ଇ ରୀ କଡ଼ି ଦିନା ଏଝାସି ଏନାଆଁ ତିନାଆଡେସି, ଅଡ଼େ ଏ ରୀ କଡ଼ି ଦିନା ରାହାଲିଏ ଏଝାସି ହାକି ଆଡେସି ।

୩ ଏମ୍ବାଟିଏ ସୟତାନ ଏଝାଣାଲ୍ ଏଲେଇଚେ, “ନୀନୁ ମାହାପୁରୁ ମୀର୍ଏଣାତି ଇଚିହ୍ ଇ ଝାଲକାଣି ରୁଟି ଆହାଲି ହୁକୁମି ହୀମୁ ।”

୪ ସାମା ଜୀସୁ ଏଲେଇଚେସି, “ଦାମ୍ବୁ ସାସ୍ତେରିତା ରାସ୍କି ଆହାମାନେ, ମାଣସି ଝାରୁଇ ରୁଟି ତିଞ୍ଜାନା ନୀତଅସି ।”

୫ ଅଡ଼େ ସୟତାନ କାଜା ହରୁ ଲାକ ଅହାନା ଗାଡ଼େକା ତାକି ଦାରୁତିତି ବାରେ ରାଜି ଏଝାଣାଲ୍ ତସ୍ତେ । ୬ ଇଞ୍ଜା ସୟତାନ ଏଝାଣାଲ୍ ଏଲେଇଚେ, “ନୀନୁ ନିଙ୍ଗେ ଇ ବାରେ ଦନ୍ତେ ଅଦିକାରା କିୟାଲ୍, ଏନାଆଁତାକି ଇଚିହ୍ ବାରେ ନାଙ୍ଗେ ହେର୍ପି ଆହାମାଞ୍ଜାନେ, ଅଡ଼େ ନୀନୁ ଆମ୍ବାଆରାକି ମନ ଏଝାଣାକି ହୀଲ୍ । ୭ ଇଦାଆଁତାକି ନୀନୁ ନା ନକିତା ମେଣ୍ଡାକୁତାନା ଜହରା କିୟାଦି, ଇଚିହ୍ ଇ ବାରେ ନୀଦି ଆନେ ।”

୮ ଜୀସୁ ଏଲେଇଚେସି, “ରାସ୍କି ଆହାମାନେ, ‘ନୀନୁ ନୀ ମାହାପୁରୁଇ ଜହରା କିଦି, ଅଡ଼େ ଝାରୁଇ ଏଝାଣି ସେବା କିଦି ।”

୯ ଅଡ଼େ ସୟତାନ ଏଝାଣାଲ୍ ଜିରୁସାଲମତା ଅହାନା ମାହାପୁରୁ ଇଲୁ ତୁଡ଼ିୟା ଲାକ ନିପ୍ହାନା ଏଲେଇଚେ, “ନୀନୁ ମାହାପୁରୁଟି ମୀର୍ଏଣାତି ଇଚିହ୍ ଇମ୍ବାଟି ଡ଼ଇକା ଗେମ୍ବାମ୍; ୧୦ ଇଚିହ୍ ରାସ୍କି ଆହାମାନେ, ‘ନିଙ୍ଗେ ଗେଲ୍ପାଲିତାକି ମାହାପୁରୁ ତାନି ଦୁଡୁୟାଲ୍ ହୁକୁମି ହୀନେସି ।’ ୧୧ ଅଡ଼େ ରାସ୍କି ଆହାମାନେ, ‘ନୀ କତାୟା ଏନିକ୍ ଝାଲକାଣା ଆଡ଼ାଉ ଏଦାଆଁତାକି ଏଝି ନିଙ୍ଗେ କେସ୍ତାତଲେ ପେରହା ଆସ୍ତାନୁ ।’”

୧୨ ସାମା ଜୀସୁ ଏଦାନି ଏଲେଇଚେସି, “ଦାମ୍ବୁ ସାସ୍ତେରିତା ରାସ୍କି ଆହାମାନେ, ନୀନୁ ପ୍ରବୁ ନୀ ମାହାପୁରୁଇ ତାୟିପାରି କିଆନି ।”

୧୩ ସୟତାନ ଜୀସୁଲ୍ ବାରେ ତାୟିପାରି କିନାଣି ରାପ୍ହାନା ଗାଡ଼େକା ତାକି ଏଝାଣାଲ୍ ପିସାନା ହାଚେ ।

ଜୀସୁ ଗାଲିଲିତା ସେବା କାମା ମାଟ୍‌ନାୟି

(ମାତି ୪:୧୨-୧୭; ମାର୍କ ୧:୧୪-୧୫)

୧୪ ଏ ଡାୟୁ ଜୀସୁ ସୁଦୁଜୀସୁତି ବାଡ଼ୟୁ ତଲେ ଗାଲିଲିତା ଖାଡ଼େସି, ଅଡ଼େ ସାରିଖାକି ଏଞ୍ଜାଣି କାତା ଝେଜିଡେ । ୧୫ ଅଡ଼େ ଏଞ୍ଜାସି ଏଞ୍ଜାରି ଜୀହୁଦି ଲକୁତି କୁଟମି ଇଲକାଣା* ଜାପ୍‌ହିହିଁ ବାରେ ଲକୁ ତାଣାଟି ଗାଞ୍ଜୁରମି ବେଟାଆଡ଼େସି ।

ଜୀସୁଇଁ ନାଜରିତତା ଅପାଆଡେରି

(ମାତି ୧୩:୫୩-୫୮; ମାର୍କ ୬:୧-୬)

୧୬ ଅଡ଼େ ଏଞ୍ଜାସି ଆମିନି ନାଜରିତତା ପହିପାତି ଆହାମାରେସି, ଏରେତା ଏ ଗାୟୁତା ହାରେସି ଅଡ଼େ ତାମି ମେରାଲେହେଁ ଜମିନି ଦିନାତା ଜୀହୁଦି ଲକୁତି କୁଟମି ଇଲୁତା† ହାରେସି ଇଞ୍ଜା ପଡ଼ଞ୍ଜି ଆହାଲି ନିଡେସି, ୧୭ ଏମ୍‌ଗାଟିଏ ମାହାପୁରୁ ଅଣ୍‌ପୁତି ବଲୁ ଝେହ୍‌ନି ଜିସାୟତି ପତି ହୀଡେରି, ଜୀସୁ ଏଦାଆଁ ଏକ୍‌ହାନା ଏମିନିତାଣା ଇ କାତା ରାସ୍‌କି ଆହାମାନେ ଏ କାତା ବେଟାଆଡ଼େସି;

୧୮ “ପ୍ରବୁତି ଜୀସୁ ନା ତାଣା ମାନେ,

ଏନିଇତିହିଁ ହିଲାଆ ଗାଟାରି ତାଣା ନେହିଁ କାବୁ ଝେକ୍‌ହାଲି ଏଞ୍ଜାସି ନାଞ୍ଜେ ଆଟାମାଞ୍ଜାନେସି;

କାୟିଦିତା ମାନାରାଇଁ ପିସ୍‌ପି ଆନାଣି ଝେକ୍‌ହାଲି,

କାଣକା ମେହ୍‌ଆଗାଟାରାଇଁ ମେସ୍‌ପି କିହାଲି,

ଦୁକୁ ବେଟାଆହି ମାନାରାଇଁ ଗେଲ୍‌ପାଲି,

୧୯ ଇଞ୍ଜା ମାହାପୁରୁ କାର୍ମା ମେସ୍‌ସାନି ବେଲାତି କାତା ଝେକ୍‌ହାଲି ପ୍ରବୁ ନାଞ୍ଜେ ପାଣ୍ଡାମାଞ୍ଜାନେସି ।”

୨୦ ଏମ୍‌ଗାଟିଏ ଜୀସୁ ପତିତି ମୁଦା କିହାନା ସେବା କିନାଣି କେୟୁତା ହୀହାନା କୁଗିଡେସି । ଅଡ଼େ ଜୀହୁଦି ଲକୁତି କୁଟମି ଇଲୁତା‡ କୁଗାମାନି ବାରେ ଲକୁ ଜୀସୁ ଖାକି ସିନିକିଡେରି । ୨୧ ଇଞ୍ଜା ଜୀସୁ ଏଞ୍ଜାରାଇଁ ଏଲେଇରେସି, “ନୀଞ୍ଜୁଟିଏ ଦାମ୍‌ନୁ ପତିତି ଇ କାତା ମୀରୁ ଝେଣ୍‌ମ୍‌ନିଏ ପୁରା ଆଡେ ।”

* ୪:୧୫ ୪:୧୫ ସିନଗର୍ † ୪:୧୬ ୪:୧୬ ସିନଗର୍ ‡ ୪:୨୦ ୪:୨୦ ସିନଗର୍

୨୨ ଅଡ଼େ ବାରେଜାଣା ତାନି କାତାତାକି ସାକି ହୀତେରି, ଅଡ଼େ ତାନି
ଗୁଡ଼ିଟି ହଡ଼ିମାନି କାର୍ମାତି ବଲୁତା କାବା ଆଡ଼େରି ଇଞ୍ଜା ଏଲେଇଚେରି,
“ଇଝାସି ଏନାଆଁ ଜସେପ ମୀରଏସି ଆଏକି ?”

୨୩ ଏମ୍ବାଟିଏ ଏଝାସି ଏଝାରାଇଁ ଏଲେଇଚେସି, “ମୀରୁ ସାତେଏ
ନାଜେ ଏଲେ ଇଞ୍ଜାଦେରି, ଏ ଅସଗୁରୁ ନୀନୁଏ ନିଜେ ନେହ
କିହାକତାମୁ; କପରନାହୁମତା ଏନା ଏନାଆଁ କିହାମାଞ୍ଜି ଇଞ୍ଜି ମାମ୍ବୁ
ଝେଞ୍ଜାମାନମି ଏଲେକି ମୀ ଆକୁ ଆବାୟା ନାୟୁତା ଜିକେଏ
କିମ୍ବୁ ।” ୨୪ ✨ଅଡ଼େ ଏଝାସି ଏଲେଇଚେସି, “ନାନୁ ମିଜେ ସାତା
ଝେସିମାଞ୍ଜାଇଁ, ମାହାପୁରୁ ଅଶ୍ପୁତି ବଲୁ ଝେହ୍ନାରି ତାନୁ ପାତାଆଡ଼ି
ନାୟୁତି ଲକୁ ଅପଅରି । ୨୫ ସାମା ନାନୁ ମିଜେ ସାତା ଝେସିମାଞ୍ଜାଇଁ,
ଏଲିୟ ବେଲାତା ଏନିକି ତାନି ବାସା ସ ଲେଞ୍ଜୁ ପାତେକା ହାଗୁଟି
ପିୟୁ ରିଆତାକି ବାରେ ଦେସା କାର୍ଝୁ ଆହାମାଚେ, ଏରିବେଲାତା
ଇସ୍ରାୟେଲତା ହାରେକା ରାଝେଣିସିକା ମାତିହୁଁ ଜିକେଏ; ୨୬ ଏଲିୟ
ଏଝାସିକା ତାଣା ପାଶୁଝି ଆଆନା ସିଦନ ଦେସାତି ସାରିପତ ନାୟୁତି
ର ରାଝେଣିନି ତାଣା ପାଶୁଝି ଆଡ଼େସି । ୨୭ ଅଡ଼େ ମାହାପୁରୁ ଅଶ୍ପୁତି
ବଲୁ ଝେହ୍ନି ଏଲିସାୟ ମାଚାଟି ଇସ୍ରାୟେଲ ବିତ୍ରା ହାରେକା କାଜା
ରଗା ଗାଚାରି ମାଚେରି; ଆଡ଼ିଜିକେଏ ଏଝାରି ବିତ୍ରାଟି ରଅସି ଜିକେଏ
ନେହୁଁ ଆଆତେସି, ସାମା ସିରିୟା ଦେସାତି ନାମାନ ନେହୁଁ
କିଝିଆଡ଼େସି ।”

୨୮ ଜୀହୁଦି ଲକୁତି କୁଟମି ଇଲୁତାଽ ଇ ବାରେ କାତା ଝେଞ୍ଜାନା
ବାରେଜାଣା କାର୍ବି ଆଡ଼େରି, ୨୯ ଅଡ଼େ ଏଝାରି ନିଜ୍ଜାନା ଏଝାଣାଇଁ
ଗାଡ଼ାଟି ପାଜାତା ପେରହେରି ଇଞ୍ଜା ଏଝାରି ଏମିନି ଗାଡ଼ା ହରୁଲେକ
ଦସାମାଚେରି ଏ ହରୁ ଲାକଟି ଡ଼ଇକା ମେଡ଼ହାଲି ଏଝାଣାଇଁ ଅଡ଼େରି;
୩୦ ସାମା ଏଝାସି ଏଝାରି ମାଦିଟି ହଡ଼ାହାଚେସି ।

ଜୀସୁ ବୁଡୁ ଆଲଗା ମାଚାଣାଇଁ ନେହୁଁ କିନାୟି
(ମାର୍କ ୧:୨୧-୨୮)

୩୧ ଜୀସୁ କପରନାହୁମ ଦରୁଗାଟି ଗାଲିଲିତି ର ଗାଡ଼ାତା ଝାଡ଼େସି,
ଇଞ୍ଜା ଜମିନି ଦିନା ଲକୁଣି ଜାପ୍ହି ମାଚେସି, ୩୨ ✨ଅଡ଼େ ଏଝାରି

✨ ୪:୨୪ ୪:୨୪ ଇହ ୪:୪୪ § ୪:୨୮ ୪:୨୮ ସିନଗଗ ✨ ୪:୩୨ ୪:୩୨ ମାତି ୭:୨୮, ୨୯

ଏଞ୍ଜାଣି ଜାପୁନି ତାଣା କାବା ଆଡେରି, ଏନାଆଁତାକି ଇତିହିଁ ଏଞ୍ଜାଣି ଜଲିନାୟି ଅଦିକାରା ଗାଟାୟି ଲେହେଁ ମାଚେ । ୩୩ ର ଦିନା ଜୀହୁଦି ଲକୁତି କୁଟମି ଇଲୁତା* ର ପଲୁଆ ବୁତୁ ଆଲଗାମାଚି ଲକୁ ମାଚେସି; ଏଞ୍ଜାସି କିରଡିହିଁ ଏଲେଇଚେସି, ୩୪ “ଏ ନାଜରିତତି ଜୀସୁ ନୀ ତଲେ ମାଙ୍ଗେ ଏନାୟି ମାନେ ? ନୀନୁ ମାଙ୍ଗେ ନାସା କିହାଲି ଖାହାମାଞ୍ଜି କି ? ନୀନୁ ଆମ୍ବାଆତି ନାନୁ ପୁଞ୍ଜାମାଈ; ନୀନୁ ମାହାପୁରୁତି ସୁଦୁ ମାଣସିତି ।”

୩୫ ଜୀସୁ ଏଦାନି ଦାକା ହାହାନା ଏଲେଇଚେସି, “ପାଲେଏ ଆମ୍ବୁ ଇଞ୍ଜା ଇଞ୍ଜାଣି ତାଣାଟି ହଚାହାଲାନୁ ।” ଏମ୍ବାଟିଏ ଏ ବୁତୁ ଏଞ୍ଜାଣାଇ ମାଦିଏ ତ୍ରକହାନା ଏଞ୍ଜାଣାଇ ଏନାଆଁ କିଆନା ହଚାହାଚେ ।

୩୬ ଏମ୍ବାଟିଏ ବାରେଜାଣା କାବାଆହାନା ଏଲେଇଶ୍ମି ଆଡେରି, “ଇଦି ଏନିଲେହେଁତି କାତା ? ଏଞ୍ଜାସି ବୁତୁୟାଈଁ ଅଦିକାରା ଅଡେ ବାଡୁୟୁଟି ହୁକୁମି ହାହିମାନେସି ଇଞ୍ଜା ଏଞ୍ଜି ହଚା ହାଜିମାନୁ !”

୩୭ ଏମ୍ବାଟିଏ ଏଞ୍ଜାଣି ହାଡାତି କାରୁ ଦେସାତି ସାରିଞ୍ଜାକି ଖେଙ୍ଗାହାଚେ ।

ଜୀସୁ ହାଡେରକା ଲକୁଇଁ ନେହିଁ କିନାୟି

(ମାତି ୮:୧୪-୧୭; ମାର୍କ ୧:୧୯-୩୪)

୩୮ ଏମ୍ବାଟିଏ ଜୀସୁ ଜୀହୁଦି ଲକୁତି କୁଟମି ଇଲୁଟି† ହଚାନା ସିମନ ଇଜ ହାଚେସି । ସିମନ ପୟା ଗାତି ନମେରି ଆହାମାଚେ, ଅଡେ ଏଞ୍ଜାରି ଇ କାତା ଜୀସୁଇଁ ଏଲେଇଚେରି । ୩୯ ଏମ୍ବାଟିଏ ଏଞ୍ଜାସି ଏଦାନି ତାଗେ ନିଚାନା ନମେରିତି ଦାକା ହାଚେସି, ଇଞ୍ଜା ଏଦାନାକି ନମେରି ପିସ୍ତେ, ଏଦି ଏ ଦେବୁଣିଏ ନିଙ୍ଗାନା ଏଞ୍ଜାରି ସେବା କିଚେ ।

୪୦ ଖେଡା କୁଡ଼ହି ମାଚାଟି ଆମ୍ବାଆରି ତାଣା ଏନିଲେହେଁତି ରଗ ମାଚେ, ଏଲେତି ରଗ ଲକୁଣି ଜୀସୁ ତାଣା ତାଚେରି, ଇଞ୍ଜା ତାମି ତାକାଣା କେୟୁ ଇଚାନା ବାରେତି ନେହିଁ କିଚେସି । ୪୧ ଅଡେ ବୁତୁୟାଁ ଜିକେଏ କିରଡିହିଁ ହାଡେରକା ଲକୁ ତାଣାଟି ଏଲେଇଞ୍ଜି ହଚାହାଚୁ, “ନୀନୁ ମାହାପୁରୁ ମୀରଏଣାତି ।”

ଅଡେ ଜୀସୁ ଏ ବାରେତି କାତା ଆହାଲି ହାଆନା ଦାକା ହାଚେସି, ଇତିହିଁ ଏଞ୍ଜାସି କ୍ରୀସ୍ତ ଇଦାଆଁ ଏଞ୍ଜି ପୁଞ୍ଜାମାଚୁ ।

* ୪:୩୩ ୪:୩୩ ସିନଗର † ୪:୩୮ ୪:୩୮ ସିନଗର

ଜୀସୁ ଜୀହୁଦି ଲକୁଡି କୁଟମି ଇଲୁତା ୱେକ୍ନାୟି
(ମାର୍କ ୧:୩୫-୩୯)

୪୨ ଲାଈ ୱେୟାଲିଏ ଏଞ୍ଜାସି ହଟାନା ଲକୁ ହିଲାଆ ଚାୟୁତା ହାଚେସି; ଅଡେ ଲକୁ ଏଞ୍ଜାଣାଇଁ ପାରି ପାରିହୁଁ ଏଞ୍ଜାଣି ତାଣା ୱାଡେରି, ଅଡେ ଏଞ୍ଜାସି ଏନିକ୍ ଏଞ୍ଜାରି ତାଣାଟି ହାଲଅସି, ଏଦାଆଁତାକି ଏଞ୍ଜାଣାଇଁ ମାଞ୍ଜାଲି ବାତିମାଲିତେରି । ୪୩ ସାମା ଏଞ୍ଜାସି ଏଞ୍ଜାରାଇଁ ଏଲେଇଚେସି, “ଏଟକା ଗାଡାତା ଜିକେଏ ନାନୁ ମାହାପୁରୁ ରାଜିତି ନେହୁଁ କାରୁ ୱେକ୍ନାୟି ମାନେ, ଇଚିହୁଁ ଏଦାଆଁତାକି ନାନୁ ପାଣ୍ଡୁଞ୍ଜି ଆହାମାଇଁ ।”

୪୪ ଇଞ୍ଜା ଏଞ୍ଜାସି ଜୀହୁଦା ଦେସାତି ଜୀହୁଦି ଲକୁଡି କୁଟମି ଇଲକାଣାଃ ହାଜାନା ନେହୁଁ କାରୁ ୱେକ୍ନେସି ।



ଜୀସୁ ମୀଣକା ଆହ୍ନାରାଇଁ ହାଟିନାୟି
(ମାତି ୪:୧୮-୨୨; ମାର୍କ ୧:୧୭-୨୦)

୧୫୪ ଦିନା ଜୀସୁ ଗେନେସର ବାନ୍ଦା ଗାଟୁତା ନିଚାମାଚାଟି ହାରେକା ଲକୁ ମାହାପୁରୁତି କାତା ୱେଞ୍ଜାଲି ଏଞ୍ଜାଣି ସାରିସୁଟୁ ରୁଣ୍ଡା ଆଡେରି । ୧୫୫ ଇଞ୍ଜା ଏଞ୍ଜାସି ବାନ୍ଦା ଗାଟୁତା ରୀ ତଂଗାୟି ମାନାଣି ମେସ୍ତେସି; ଏମ୍ବାଟି ମୀଣକା ଆହ୍ନାରି ଏମ୍ବାଟି ରେଚାନା ତାମି ଜାଲାୟି ନରୁହି ମାଚେରି । ୧୫୬ ଏ ତଂଗ ବିତ୍ରାଟି ଏମିନାୟି ସିମନଞ୍ଜାୟି ମାଚେ, ଏ ତଂଗତା କୁଗାନା ଗାଟୁଟିଏ ହିରେ ହେକ ହାଜାଲି ବାତିମାଲିତେସି; ଇଞ୍ଜା ଏଞ୍ଜାସି କୁଗାନା ଲକୁଣି ଜାପୁହେସି ।

୪ ଏଞ୍ଜାସି ତାନି କାତା ରାପୁହାଲିଏ ସିମନଇଁ ଏଲେଇଚେସି, “ମୀଣକା ଆସାଲି କୁଡନି ଏୟୁଞ୍ଜାକି ହାଜାନା ମୀ ଜାଲାୟି ମେଡଦୁ ।”

୫ ଏମ୍ବାଟିଏ ସିମନ ଏଲେଇଚେସି, “ଏ ଗୁରୁ ମାମ୍ବୁ ଲୁଆଆଁ ୱେୟେ କସ୍ତ କିତିଞ୍ଜା ର ମୀନୁ ଜିକେଏ ବେଟାଆଆତମି; ସାମା ନୀ କାତା ଆସାନା ଜାଲା ମେଡଇଁ ।” ୬ ଇଞ୍ଜା ଏଞ୍ଜାରି ଜାଲା ମେଡହାଲିଏ

‡ ୪:୪୪ ୪:୪୪ ସିନଗର୍ ☆ ୫:୧ ୫:୧ ମାତି ୧୩:୧,୨; ମାର୍କ ୩:୯,୧୦; ୪:୧ ☆ ୫:୫ ୫:୫ ଜହ ୨୧:୩ ☆ ୫:୭ ୫:୭ ଜହ ୨୧:୭

ଏମ୍ବାଆଁ ଜାଲା ନେଞ୍ଜେ ମୀଶକା ହଟୁ, ଇଞ୍ଜା ଏଝାରି ଜାଲା ଡାମ୍ବାଲି ମାଟ୍‌ହେ । ^୭ ଏମ୍ବାଟିଏ ଏଝାରି ଆମିନି ତଡ଼ଗୁାଟାରି ଅର ଡଂଗତା ମାଚେରି, ଏଝାରି ଏନିକିଁ ଝାହାନା ସାଢେମି କିନେରି, ଏଦାଆଁତାକି ଏଝାରି ଏଝାରାଇଁ କେୟୁ ଜୀଞ୍ଜିତେରି, ଏମ୍ବାଟିଏ ଏଝାରି ଝାହାନା ରୀ ଡଂଗାଁଣା ମୀଶକା ନେଞ୍ଜି କିୟାଲିଏ ଏ ଡଂଗାଁୟାଁ ମୁଞ୍ଜିମାରୁ । « ସାମା ସିମନ ପିତର ଏଦାଆଁ ମେସାନା ଜୀସୁ କଡାଣା ରିହାନା ଏଲେଇଚେସି, “ଏ ପ୍ରବୁ ନା ତାଣାଟି ହାଜାତୁହ୍‌ମୁ ଏନାଆଁତାକି ଇଚିହ୍‌ ନାନୁ ପାପୁଗାଟି ମାଣ୍‌ସିତେସ୍‌ !”

^୮ ଇଚିହ୍‌ ଏଝାରି ହାଚେରକା ମୀଶକା ଆସାମାଚାକି ତାନୁ ଅଡେ ତାନିତଲେ ମାଚାରି କାବା ଆହାହାଚେରି; ^{୧୦} ଜେବଦିତି ରୀ ମୀରକା ଜାକୁବ ଅଡେ ଜହନ, ଆମ୍ବାଆରି ସିମନ ଆଟ୍‌ହିତାରି ମାଚେରି, ଏଝାରି ଜିକେଏ କାବା ଆହାହାଚେରି । ଅଡେ ଜୀସୁ ସିମନଇଁ ଏଲେଇଚେସି, “ଆଜାଆନି ନୀଞ୍ଜୁଟିଏ ନୀନୁ ଲକୁଣି ଆହ୍‌ଦି ।” ^{୧୧} ଏଚେଟିଏ ଏଝାରି ଡଂଗାଁୟାଁ ଗାଟୁତା ତାଚାନା ଏମ୍ବାଆଁ ବାରେ ପିସାନା ଜୀସୁ ଜେଚ ହାଚେରି ।

**କାଜା ରଗ ଗାଟାଣାଇଁ ନେହ୍‌ କିନାୟି
(ମାତି ୮:୧-୪; ମାର୍କ ୧:୪୦-୪୫)**

^{୧୨} ଜୀସୁ ର ଗାଡ଼ାତା ମାଚାଟି ମେହ୍‌ଦୁ ଏମ୍ବାଆଁ ଗୁଡ଼ା ଆଙ୍ଗା କାଜା ରଗ ଗାଟାସି ମାଚେସି; ଏଝାସି ଜୀସୁଇଁ ମେସାନା ମୁନୁ କୁତାନା ଏଝାଣାଇଁ ଏଲେଇଚେସି, “ଏ ପ୍ରବୁ ନୀନୁ ମନ କିତିହ୍‌ ନାଙ୍ଗେ ନେହ୍‌ କିହାଲି ଆଡ଼ାଦି ।”

^{୧୩} ଏଚେଟିଏ ଏଝାସି କେୟୁ ଦାସାହାଁ ତୀଗାନା ଏଲେଇଚେସି, “ନାନୁ ମନ କିହିମାଇଁ ନୀନୁ ନେହ୍‌ ଆମ୍ବା ।” ଏ ଦେବୁଣିଏ କାଜା ରଗଟି ଏଝାସି ନେହ୍‌ ଆଡେସି । ^{୧୪} ଜୀସୁ ଏଝାଣାଇଁ ହୁକୁମି ହୀହାନା ଏଲେଇଚେସି, “ଆମ୍ବାଆରାଇଁ ଝେହ୍‌ଆନି, ସାମା ହାଜାନା ପୁଜେରାଙ୍ଗାଣି ତହ୍‌ମୁ, ଅଡେ ମସାତି ମେରାଲେହେଁ ନୀନୁ ନେହ୍‌ ଆଡ଼ାଣି ସାକି ହୀହାଲି ପୂଜା ହୀମୁ ।”

^{୧୫} ସାମା ଏଝାଣି କାତା ହାଚେରକା ଝେଙ୍ଗାହାଚେ, ଅଡେ ହାଚେରକା ଲକୁ ଝେଞ୍ଜାଲିତାକି ଅଡେ ରଗଟି ନେହ୍‌ ଆହାଲିତାକି ରୁଣ୍ଡା

ଆଡେରି ।^{୧୭} ସାମା ଜୀସୁ ଲକୁ ହିଲାଆ ଟାୟୁତା ହାଜାନା ପ୍ରାଡାନା କିହିମାରେସି ।

ଜୀସୁ ର ଟଟ ଖାୟିତାଣାକ୍ ନେହ୍ କିନାୟି
(ମାତି ୯:୧-୮; ମାର୍କ ୨:୧-୧୨)

^{୧୭} ର ଦିନା ଜାପୁହି ମାତାଟି, ଗାଲିଲି ଦେସାତି ବାରେ ନାୟକାଟି, ଜୀହୁଦା ଦେସା ଇଞ୍ଜା ଜିରୁସାଲମଟି ଖାହାମାନି ପାରୁସିୟା ଅଡେ ମେରାପୁନାରି ଜୀସୁ ତାଣା କୁଗାମାରେରି, ଇଞ୍ଜା ଏଝାସି ଏନିକ୍ ନେହ୍ କିନେସି ଇଦାଆଁତାକି ପ୍ରବୁତି ନେହ୍ କିନି ବାଡୁୟୁ ଜୀସୁ ତାଣା ମାରେ ।^{୧୮} ଏଚରଜାଣା ଲକୁ ର ଟଟ ଖାୟିତାଣାକ୍ କାଟେଲିତା ଡେକା ତାଚାନା ଜୀସୁ ନକିତା ବିଡା ଅହାଲି ଅଣ୍ପିଡେରି ।^{୧୯} ସାମା ଏମ୍ପାଆଁ ହାରେକା ଲକୁ ମାତାକି ଜିରୁ ବେଟାଆଆଡେରି, ଇଞ୍ଜା ଏଝାରି ଇଲୁ ଡେପରିତା ଡେକା ଅହାନା ତୁଡିୟାତି ଟାୟିଲି ହୁକହାନା କାଟେଲି ତଲେ ଜୀସୁ ନକିତା ରେପହେରି ।^{୨୦} ଜୀସୁ ଏଝାରି ନାମୁ ମେସାନା ଟଟ ଖାୟିତାଣାକ୍ ଏଲେଇରେସି, “ତଢେ ନୀ ପାପୁ ବାରେ ମେଣ୍ଟାମାନେ ।”

^{୨୧} ଏଚେଟିଏ ମେରା ଜାପୁନାରି ଅଡେ ପାରୁସିୟା କାତା ଆହ୍ ଏଲେଇଣ୍ଡି ଆଡେରି, “ଇଝାସି ମାହାପୁରୁ ନିନ୍ଦା କିହିମାନେସି, ଇଝାସି ଆମ୍ପାଆସି ! ମାହାପୁରୁ ପିସପେ ଅଡେ ଆମ୍ପାଆସି ପାପୁ ମ୍ଲେକ୍‌ହାଲି ଆଡିମାନେସି !”

^{୨୨} ସାମା ଜୀସୁ ଏଝାରି କାତାବାର୍ତା ଆହିମାନାଣି ପୁଞ୍ଜାନା ଏଝାରାକ୍ ଏଲେଇରେସି, “ମୀରୁ ମୀ ମନତା ଏନାଆଁତାକି ଏଲେକ୍ ଅଣ୍ପିମାଞ୍ଜେରି ?^{୨୩} ଏନାଆଁ ଇନାୟି ଉସାସା ‘ନୀ ପାପୁ ବାରେ ମେଣ୍ଟାଡେ ଇନାୟି କି ନିଙ୍ଗାନା ତାକାମୁ ଇନାୟି ?’^{୨୪} ଦାରୁଡିତା ପାପୁ ମ୍ଲେକ୍‌ହାଲି ମାଣ୍ଡି ମୀରଏଣାକି ଅଦିକାରା ମାନେ, ଇଦାଆଁ ମୀରୁ ଏନିକ୍ ପୁଞ୍ଜାଲି ଆଡିଦେରି” ଇଦାଆଁତାକି ଟଟ ଖାୟିତାଣାକ୍ ଏଲେଇରେସି, “ନାମୁ ନିଙ୍ଗେ ଝେସିମାଞ୍ଜାକ୍, ନିଙ୍ଗାନା ନୀ କାଟେଲି ଡେକାନା ନୀ ଇଜ ହାଲାମୁ !”

^{୨୫} ଏଚେଟିଏ ଏଝାସି ଏ ଦେରୁଣିଏ ଏଝାରି ନକିତା ନିଙ୍ଗାନା ଆମିନି କାଟେଲିତା ତୁରାମାରେସି, ଏଦାଆଁ ଡେକାନା ମାହାପୁରୁକ୍ ଜହରା

କିହିଁ ତାମି ଇଜ ହାଚେସି । ୨୭ ଏଚେଟିଏ ବାରେଜାଣା କାବାଆହାନା ମାହାପୁରୁଇଁ ଜହରା କିଚେରି, ଅଡ଼େ ଆଜିତଲେ ଏଲେଇଚେରି, “ନୀଞ୍ଜୁ ମାମ୍ବୁ କୁବାଆନ୍ତି କାମା ମେସୁମି ।”

ଜୀସୁ ଲେବିଙ୍କ ହାଟିନାୟି

(ମାତି ୯:୯-୧୩; ମାର୍କ ୨:୧୩-୧୭)

୨୭ ଏମ୍ବାଟିଏ ଜୀସୁ ପାଙ୍ଗାତା ହାଜାନା ଲେବି* ଦରୁଗାଟି ର ସିସୁ ରାହନାସି ସିସୁ ରାହନି ଚାୟୁତା କୁଗାମାନାଣି ମେସାନା ଏଞ୍ଜାଣାଇ ଏଲେଇଚେସି, “ନା ଜେଚ ଖାମ୍ବୁ ।” ୨୮ ଏମ୍ବାଟିଏ ଏଞ୍ଜାସି ବାରେ ପିସାନା ନିଙ୍ଗାନା ଏଞ୍ଜାଣି ଜେଚ ହାଚେସି ।

୨୯ ଅଡ଼େ ଲେବି ତାମି ଇଜ ର କାଜା ବଜି କିଚେସି, ଇଞ୍ଜା ହାଚେକା ସିସୁ ରାହନାରି ଅଡ଼େ ଏଟକାଟି ଲକୁ ବାରେ ଏଞ୍ଜାରିତଲେ ତିଞ୍ଜାଲି କୁଗିଚେରି । ୩୦ ଏଚେଟିଏ ପାରୁସିୟା ଅଡ଼େ ଏଞ୍ଜାରି ଗଟିତି ମେରାପୁନାରି ତାମି ସୀସୁୟାଁଇଁ ଏଲେଇଚେରି, “ମୀରୁ ଏନାଆଁତାକି ସିସୁ ରାହନାରି ଅଡ଼େ ପାପୁ ଗାଟାରି ତଲେ ତିଞ୍ଜି ଉଣ୍ଡି ମାଞ୍ଜେରି ?”

୩୧ ଜୀସୁ ଏଞ୍ଜାରାଇଁ ଏଲେଇଚେସି, “ନେହିଁ ମାନାରାକି ଅସଗୁରୁ ଲଡ଼ା ହିଲେଏ, ସାମା ରଚ ଗାଟାରାକି ଲଡ଼ାମାନେ । ୩୨ ନାନୁ ତୀରିଗାଟାରାଇଁ ହାଟାଲି ଖାହାହିଲଅଁ, ସାମା ମନ ଖେଟ୍ପି କିହାଲି ପାପୁ ଗାଟାରାଇଁ ହାଟାଲି ଖାହାମାଇଁ ।”

ଉପାସା କିନି କାତା ଖେନାୟି

(ମାତି ୯:୧୪-୧୭; ମାର୍କ ୨:୧୮-୨୨)

୩୩ ଏଚେକା ଲକୁ ଜୀସୁଇଁ ଖେଚେରି, “ଜହନତି ସୀସୁୟାଁ ଅଡ଼େ ପାରୁସିୟାଁତି ସୀସୁୟାଁ ଅଲେ ଅଲେ ଉପାସା ଅଡ଼େ ପ୍ରାଡାନା କିହିମାନେରି, ସାମା ନୀ ସୀସୁୟାଁ ତିଞ୍ଜି ଉଣ୍ଡି ମାନେରି ।”

୩୪ ଏମ୍ବାଟିଏ ଜୀସୁ ଏଞ୍ଜାରାଇଁ ଏଲେଇଚେସି, “ବାହା ଲକୁତଲେ ହନେଏସି ମାନି ପାତେକା ବାହା ଲକୁ ଉପାସା ମାଞ୍ଜାଲି ଆଡ଼ିନେରି ? ୩୫ ସାମା ର ଦିନା ଖାନେ; ଏଞ୍ଜାରି ତାଣାଟି ହନେଏସି ହାନେସି, ଏଚେଟିଏ ଏଞ୍ଜାରି ଉପାସା କିନେରି ।”

* ୫:୨୭ ୫:୨୭ ମାତିୟୁ ☆ ୫:୩୦ ୫:୩୦ ଲୁକ ୧୫:୧,୨

୩୭ ଇଞ୍ଜା ଏଝାସି ର ପୁଣ୍ଠିକିନି କାତା ଜିକେଏ ଝେସ୍ତେସି,
 “ଆମ୍ବାଆସି ପ୍ଲାଠଇ ହିମ୍ବରିତା ପୁଠନି ପାସକି ତାଟଅସି; ତାଡିଡିଝା ଏ
 ପୁଠନି ପାସକି ଗେହ୍ନେ ଇଞ୍ଜା ପୁଠନି ପାସକି ପ୍ଲାଠଇ ପାସକି ତଲେ
 ଆଣ୍ଡେଏ । ୩୭ ଅଡେ ଆମ୍ବାଆସି ପୁଠନି ଅଞ୍ଜୁରି ରାସା ପ୍ଲାଠଇ ଡକାତା†
 ଇଟଅସି; ଇଟିଡିହ୍ ଅଞ୍ଜୁରି ରାସା ଡକାଡି ଅୟ୍ କିହାନା ବହାହାନେ
 ଅଡେ ଡକା ଜିକେଏ ନସ୍ତୁ ଆନେ, ୩୮ ସାମା ପୁଠନି ଅଞ୍ଜୁରି ରାସା ପୁଠନି
 ଡକାତା ଇଟିନାୟ୍ ମାନେ ।

୩୯ ଆମ୍ବାଆରି ପ୍ଲାଠଇ ଅଞ୍ଜୁରି ରାସା ଗସ୍ତି ଡାୟ୍ ପୁଠନି ଅଞ୍ଜୁରି ରାସା
 ଗହ୍ ଅଡେରି । ପ୍ଲାଠଆୟ୍ ନେହେଁ ଇଞ୍ଜେରି ।”



ଜମିନି ଦିନାଡି ପ୍ରବୁ

(ମାଡି ୧୨:୧-୮; ମାର୍କ ୨:୨୩-୨୮)

୧ ର ଜମିନି ଦିନା ଜୀସୁ ତାନି ସୀସୁୟାଁ ତଲେ ଗହ୍ ଗୁଡିୟାଟି
 ହାଜିମାଟାଟି ସୀସୁୟାଁ ଗହ୍ ଜେକା ଡାପହାନା କେୟ୍ତଲେ ରାକ୍‌ହା
 ଡିଞ୍ଜିମାଟେରି । ୨ ସାମା ପାରୁସିୟାଁ ବିଡ୍ରାଟି ଏଟରଜାଣା ଏଲେଇଟେରି,
 “ଜମିନି ଦିନାତା ଏନାଆଁ କିନାୟ୍ ମେରା ହିଲେଏ ମୀରୁ ଏନାଆଁତାକି
 କିହିମାଞ୍ଜେରି ।”

୩ ଜୀସୁ ଏଝାରାଇଁ ଏଲେଇଟେସି, “ଦାଝୁଦ ଅଡେ ତାନି ତଣ୍ଡେସିଙ୍ଗା
 ହାକି ମାଟାଟି ଏନାଆଁ କିହାମାଟେରି, ଏଦାଆଁ ମୀରୁ ଏଟେଲା ପଡ଼ଝି
 ଆହାହିଲଅଡେରି ?

୪ ଏଝାସି ମାହାପୁରୁ ଇଲୁତା ହଡାନା ଆମିନି ହେରପିଆହାମାନି
 ରୁଟି ପୂଜେରାଙ୍ଗା ପିସ୍‌ପେ ଆମ୍ବାଆରି ତିନି ମେରା ହିଲାଆତେ ଏଦାଆଁ
 ତିରେସି ଇଞ୍ଜା ତାନି ତଣ୍ଡେସିଙ୍ଗାକି ଜିକେଏ ହାଡେସି ।”

୫ ଅଡେ ଏଝାସି ଏଝାରାଇଁ ଏଲେଇଟେସି, “ମାଣ୍ଡିସି ମୀରୁଏସି
 ଜମିନି ଦିନାଡି ପ୍ରବୁ ଆନେସି ।”

ଝାୟିଡି କେୟ୍ତ ଗାଟାଣାଇଁ ନେହେଁ କିନାୟ୍

(ମାଡି ୧୨:୯-୧୪; ମାର୍କ ୩:୧-୬)

† ୫:୩୭ ୫:୩୭ ତଲୁ ତଲେ କେପିଡି ଅଞ୍ଜୁରି ରାସା ଇଟିନି ବାସ୍ତା ରୁପୁ

୬ ଏଞ୍ଜେଲ୍ ର ଜମିନି ଦିନାତା ଜୀହୁଦି ଲକ୍ଷ୍ମି କୁଟମି ଇଲୁତା* ହାଜାନା ଜାପୁହି ମାରେସି; ଏମ୍ପାଆଁ ରଅସି ମାରେସି ଏଞ୍ଜେଲ୍ ଟିଃନି କେୟୁ ଖାୟାହାଜାମାରେ । ୭ ଅଡେ ଏଞ୍ଜେଲ୍ ଜମିନି ଦିନାତା ନେହୁ କିନେସିକି ଆଏ ଏଡାଆଁ ସିନିକିହାଲି ମେରାପୁନାରି ଅଡେ ପାରୁସିୟାଁ କୁଗାନା ସିନିକିହିମାରେରି, ଏନିକି ଏଞ୍ଜେଲ୍ ଦହ ଆସାଲି ପାରୁ ବେଟାଆନେରି । ୮ ସାମା ଏଞ୍ଜେଲ୍ ଏଞ୍ଜେରି ହିୟାତି ଅଣ୍ପୁ ପୁଞ୍ଜାନା ଆମିନି ଲକ୍ଷ୍ମି କେୟୁ ଖାୟାହାଜାମାରେ ଏଞ୍ଜେଲ୍ ଏଲେଇରେସି, “ନିଙ୍ଗାମୁ ମାଦି ନିମୁ ।” ଏରେଟିଏ ଏଞ୍ଜେଲ୍ ନିତେସି । ୯ ଏମ୍ପାଟିଏ ଜୀସୁ ଏଞ୍ଜେରାଲ୍ ଏଲେଇରେସି, “ନାନୁ ମିଙ୍ଗେ ଖେଞ୍ଜିମାଞ୍ଜାଲ୍ ଜମିନି ଦିନାତା ଏନାଆଁ କିନାୟି ମେରା ମାନେ ? ନେହୁ କିନାୟି କି ଲାଗେଏ କିନାୟି ? ଜୀହୁତି ଗେଲ୍ପିନାୟି କି ନାସା କିନାୟି ?” ୧୦ ଅଡେ ଏଞ୍ଜେଲ୍ ସାରିଖାକି ଲକ୍ଷ୍ମି ସିନିକିହାନା ଏଞ୍ଜେଲ୍ ଏଲେଇରେସି, “ନୀ କେୟୁ ଦାହୁମୁ ।” ଏମ୍ପାଟିଏ ଦାସ୍ତେସି, ଇଞ୍ଜା ଏଞ୍ଜେଲ୍ କେୟୁ ନେହୁ ଆହାହାରେ । ୧୧ ଏଡାଆଁ ମେସାନା ଏଞ୍ଜେରି କାର୍ବି ଆହାହାରେରି ଅଡେ ଜୀସୁଲ୍ ଏନିକିହାଲି ଆନେ ଇଞ୍ଜା ତାମ୍ପୁ ତାମ୍ପୁ କାତା ଆଡେରି ।

ଜୀସୁ ବାରଜାଣା ସୀସୁୟାଁ ଆଡିନାୟି

(ମାତି ୧୦:୧-୪; ମାର୍କ ୩:୧୩-୧୯)

୧୨ ଏତିବେଲାତା ଏ ଦିନା ପ୍ରାତାନା କିହାଲି ହରୁ ଲାକ ହାରେସି ଇଞ୍ଜା ଲାଆଁ ଖେୟେ ମାହାପୁରୁ ତାଣା ପ୍ରାତାନା କିତେସି । ୧୩ ଲାଲ୍ ଖେୟାଲିଏ ଏଞ୍ଜେଲ୍ ତାନି ସୀସୁୟାଁ ତାଗେ ହାଟାନା ଏଞ୍ଜେରି ବିତ୍ରାଟି ବାରଜାଣାତି ଆଡିତେସି; ଇଞ୍ଜା ଏଞ୍ଜେରାଲ୍ ପାଣ୍ଡୁଆଡାରି ଇଞ୍ଜା ଦରୁ ଇଡିତେସି, ୧୪ ଏଞ୍ଜେରି ଆଡେରି ସିମନ ଆମ୍ପାଆରାଲ୍ ଏଞ୍ଜେଲ୍ ପିତର ଦରୁ ହାଡେସି, ଅଡେ ତାନି ତାୟି ଆୟିୟ, ଜାକୁବ ଅଡେ ଜହନ, ପିଲିପ, ବାର୍ତଲମି, ୧୫ ମାତିୟୁ ଅଡେ ତମା, ଆଲେପି ମୀରଏସି ଜାକୁବ ଅଡେ ସିମନ, ଆମିନି ଗାଟାଣାଲ୍ ତାନି ଦେସାତି ଜୀହୁ ନନାସି ଇନେରି, ୧୬ ଜାକୁବ ମୀରଏସି ଜୀହୁଦା ଅଡେ ଇୟାରିୟତ ଜୀହୁଦା, ଆମ୍ପାଆସି ଜୀସୁଲ୍ ସାତୁ କେୟୁତା ହେରପିତେସି ।

* ୭:୭ ୭:୭ ସିନଗଗ

ଜୀସୁତି ଜୀପ୍ନାୟି ଅଡ଼େ ରଗଟି ନେହୁଁ କିନାୟି
(ମାତି ୪:୨୩-୨୫)

୧୭ ଅଡ଼େ ଏଝାସି ଏଝାରିତଲେ ରେଚାଝାହାନା ନିମା ଗାଟି ଚାନ୍ଦୁତା ନିତେସି, ଇଞ୍ଜା ତାନି ହାରେକା ସୀସୁୟାଁ ଅଡ଼େ ବାରେ ଜୀହୁଦା ଦେସା ଜିରୁସାଲମ ଇଞ୍ଜା ସର ଅଡ଼େ ସିଦନ ଦାରିଟି ହାରେକା ଝାଡ଼େରି । ୧୮ ଏଝାରି ଜୀସୁତି କାତା ଝେଞ୍ଜାଲି ଅଡ଼େ ତାନି ରଗଟି ନେହୁଁ ଆହାଲି ଝାହାମାଚେରି, ଅଡ଼େ ଆମିନି ଗାଟାରି ବୁଡୁୟାଁ ତାଣାଟି କସ୍ତ ବେଚାଆହି ମାଚେରି, ଏଝାରି ଜିକେଏ ନେହୁଁ ଆଡ଼େରି; ୧୯ ବାରେଜାଣା ଏଝାଣାଈଁ ତୀଗାଲି ମନ କିହିମାଚେରି, ଇତିହୁଁ ଏଝାଣି ତାଣାଟି ବାଡ଼ୁୟୁ ହଚାନା ବାରେଜାଣାଟି ନେହୁଁ କିହିମାଚେ ।

ଆମ୍ବାଆରି ନେହେଁ
(ମାତି ୫:୧-୧୨)

୨୦ ଏଚିବେଲାତା ଜୀସୁ ତାନି ସୀସୁୟାଣି ସିନିକିହାନା ଏଲେଇଚେସି,

“ହିଲାଆଗାଟାଚେରି ମୀରୁ; ମିଙ୍ଗେ ନେହେଁ,
ଇଚିହୁଁ ମାହାପୁରୁ ରାଜି ମୀଦିଏ ।

୨୧ ନୀଏଁ ହାକି ଗାଟାଚେରି ମୀରୁ; ମିଙ୍ଗେ ନେହେଁ,
ଇଚିହୁଁ ମୀରୁ ତାୟୁ ପାଞ୍ଜିଦେରି ।

ନୀଏଁ ତୀହିମାନାଚେରି ମୀରୁ; ମିଙ୍ଗେ ନେହେଁ,
ଇଚିହୁଁ ମୀରୁ ତାୟୁ କାକ୍ଦେରି ।”

୨୨ ☆“ଏଚେତା ଲକୁ ମିଙ୍ଗେ ଅପଅରି ଅଡ଼େ ମାଣ୍ଡସି ମୀରଏଣା ତାକି ଏଟକା କିୟାନେରି, ଅଡ଼େ ନିୟା କିୟାନେରି ଇଞ୍ଜା ମୀ ଦରୁତି ଲାଗେଏତାୟି ଇଞ୍ଜୁଁ ଅପଅରି, ଆତିହୁଁ ମୀରୁ ନେହେଁ । ୨୩ ☆ଏ ବେଲାତା ରାହାତଲେ ଏନ୍ଦାଦୁ, ଏନିଇଚିହୁଁ ଲାକପୁରୁ ମିଙ୍ଗେତାକି ହାରେକା ଦାନା ମାନେ; ଅଡ଼େ ଏଲେକିହୁଁ ଏ ଏଝାରି ଆକୁ ଆବାୟାଁ ମାହାପୁରୁ ଅଣ୍ଡପୁତି ବଲୁ ଝେହନାରାଇଁ କିହିମାଚେରି ।”

୨୪ “ସାମା ଆୟତା ତଣ୍ଡ ବେଚାଆନ୍ତି ଦନ ଗାଟାଚେରି ମୀରୁ;

☆ ୭:୨୨ ୭:୨୨ ଚିତ ୪:୧୪ ☆ ୭:୨୩ ୭:୨୩ କାମା ୭:୫୨

ମୀରୁ ମୀ ଅଶ୍ଵିମାତି ସୁକୁ ବେଟା ଆହାମାଞ୍ଜେରି !

୨୫ ଆୟତା ତଣ୍ଡ ବେଟାଆନାତେରି ନୀର୍ଘ ପାଞ୍ଜାମାନାତେରି ମୀରୁ;

ଇଚିହ୍ନି ତାୟୁ ମୀରୁ ହାକି ଆଦେରି ।

ଆୟତା ନୀର୍ଘ କାକ୍‌ହି ମାନାତେରି ମୀରୁ;

ଇଚିହ୍ନି ତାୟୁ ମୀରୁ ଦୁକୁ ଆହାନା ତୃଦେରି ।”

୨୬ “ଏଚିବେଲା ବାରେ ଲକୁ ମିଙ୍ଗେ ନେହାତେରି ଇଞ୍ଜାନେରି, ଏଚିବେଲା ଆୟତା ତଣ୍ଡ ବେଟା ଆନାତେରି; ଏଲେକିହ୍ନି ଏ ଏଞ୍ଜାରି ଆକୁ ଆବାୟା ମିଚି ବଲୁ ଖେହନାରାଇଁ କିହିମାଚେରି ।”

ସାତୁୟାଁଇଁ ଜୀଞ୍ଜନନାୟି

(ମାତି ୫:୩୮-୪୮; ୭:୧୨)

୨୭ ସାମା ମୀରୁ ଖେଞ୍ଜିମାଞ୍ଜେରି, ନାନୁ ମିଙ୍ଗେ ଖେସିମାଞ୍ଜାଇଁ, ମୀ ସାତୁୟାଁଇଁ ଜୀଞ୍ଜନଦୁ; ଆମ୍ବାଆରି ମିଙ୍ଗେ ଅପଅରି ଏଞ୍ଜାରି ନେହ୍ନି କିଦୁ; ୨୮ ଆମ୍ବାଆରି ମିଙ୍ଗେ ବାକା ଇଟାନେରି, ଏଞ୍ଜାରାଇଁ ବର ହୀଦୁ; ଆମ୍ବାଆରି ମିଙ୍ଗେ ଲାଗେଏ କିହ୍ନି ଲେମ୍ବାନେରି ଏଞ୍ଜାରି କସମି ପ୍ରାତାନା କିଦୁ । ୨୯ ଆମ୍ବାଆସି ମିଙ୍ଗେ ର ଗେଏଲାତା ସାପ୍ତା ଖେତାନେସି, ଏଞ୍ଜାଣାକି ଅର ଗେଏଲା ଜିକେଏ ଅଗାହୀଦୁ; ଇଞ୍ଜା ଆମ୍ବାଆସି ମୀ ହିମ୍ବୁରି ଅନେସି ଏଞ୍ଜାଣାଇଁ ମୀ ସକା ଜିକେଏ ଅହାଲି କାହିକିଆଦୁ । ୩୦ ଆମ୍ବାଆସି ମିଙ୍ଗେ ରୀସ୍ତାନେସି, ଏଞ୍ଜାଣାକି ହୀଦୁ; ଇଞ୍ଜା ଆମ୍ବାଆସି ଦନ ଅନେସି, ଏଞ୍ଜାଣାଇଁ ଖେଣ୍ଡେ ରାହ୍‌ଆଦୁ । ୩୧ ☆ଲକୁ ମିଙ୍ଗେ ଏନିକ୍‌ଲେମ୍ବାପେରି ଇଞ୍ଜି ଅଶ୍ଵିମାଞ୍ଜେରି, ମୀରୁ ଜିକେଏ ଏଞ୍ଜାରାଇଁ ଏଲେକିହ୍ନି ଲେମ୍ବାଦୁ ।

୩୨ ଇଞ୍ଜା ଆମ୍ବାଆରି ମିଙ୍ଗେ ଜୀଞ୍ଜ ନୟାନେରି, ଏଞ୍ଜାରାଇଁ ଜୀଞ୍ଜ ନତିହ୍ନି ଏନି ବର ବେଟାଆଦେରି ? ଇଚିହ୍ନି ପାପୁ ଗାଟାରି ଜିକେଏ ତାମ୍‌ଙ୍ଗେ ଜୀଞ୍ଜ ନନାରାଇଁ ଜୀଞ୍ଜ ନନେରି । ୩୩ ଅଡେ ଆମ୍ବାଆରି ମିଙ୍ଗେତାକି ନେହ୍ନି କିୟାନେରି, ମୀରୁ ଏଞ୍ଜାରି ନେହ୍ନି କିଦେରି, ଆତିହ୍ନି ମୀରୁ ଏନି ବର ବେଟାଆଦେରି ? ଇଚିହ୍ନି ପାପୁ ଗାଟାରି ଜିକେଏ ଏଲେକିନେରି । ୩୪ ଇଞ୍ଜା ଆମ୍ବାଆରି ତାଣାଟି ବେଟାଆହାଲି ଆସା ମାନେ, ଏଞ୍ଜାରାକି ରୀଶା ହୀତିସାରେ ମୀରୁ

☆ ୭:୩୧ ୭:୩୧ ମାତି ୭:୧୨

ଏହି ବର ବେଟାଆଦେରି ? ପାପୁ ଗାଟାରି ଜିକେଏ ସମାନା ଲେକାତଲେ ବେଟାଆହାଲି ପାପୁ ଗାଟାରାକି ରୀଣା ହୀନେରି ।
 ୩୫ ସାମା ମୀ ସାତୁୟାଣି ଜୀଝୁନଦୁ ଇଞ୍ଜା ଏଝାରି ନେହଁ କିଦୁ, ୱେଣ୍ଟେ ବେଟାଆହାଲି ଆସା କିଆନା ଉଦାରା ହୀଦୁ; ଆତିହଁ ମିଙ୍ଗେତାକି କାଜା ଦାନା ମାନେ, ଇଞ୍ଜା ମୀରୁ କାଜା ମାହାପୁରୁତି ମୀରକା ଆଦେରି, ଇତିହଁ ଏଝାସି ଜୀଝୁ ନଆଗାଟାରାଇଁ ଅଡେ ପାପୁ ଗାଟାରାଇଁ ଜିକେଏ ଜୀଝୁ ନନାସି । ୩୬ ମୀ ଲାକପୁରୁତି ଆବା ଏନିକଁ କାର୍ମା ମେହନାସି ମୀରୁ ଜିକେଏ ଏଲେକିହଁ ଏ କାର୍ମା ମେହନାତେରି ଆଦୁ ।

**ଏଟକା ତାରାଇଁ ନୀହାଁୟି କିଆଦୁ
 (ମାତି ୭:୧-୫)**

୩୭ “ଅଡେ ନୀହାଁୟି କିଆଦୁ, ଆତିହଁ ମୀରୁ ମାହାପୁରୁ ତାଣା ନୀହାଁୟି କିଝି ଆଅତେରି; ଦହ ଦହଆଦୁ, ଆତିହଁ ମୀରୁ ମାହାପୁରୁ ତାଣା ଦହ ଗାଟାତେରି ଆଅତେରି; ଦହ ମ୍ଲେକ୍ତୁ, ଆତିହଁ ମାହାପୁରୁ ମୀ ଦହ ଜିକେଏ ମ୍ଲେକ୍ତୁହାନେସି; ୩୮ ହୀଦୁ ଆତିହଁ ମିଙ୍ଗେ ଜିକେଏ ହୀପ୍ତକିଆନେ; ଲକୁ ମାଣାତି ନେଞ୍ଜିକିହାନା ଏଦାନି ନାବ୍‌ଗାନା ଦାକ୍‌ହାନା ତେଲି କିହାନା ମୀ ଅଟଡିତା ହିୟାନେରି; ଇତିହଁ ଆମିନି ମାଣାତଲେ ଲାଡିଦେରି, ମିଙ୍ଗେ ଜିକେଏ ଏ ମାଣା ତଲେଏ ଲାଟା ହିୟାନେରି ।”

୩୯ ✧ଏଝାସି ଏଝାରାଇଁ ର ପୁଣ୍ଡିକିନି କାତା ଜିକେଏ ଏଲେଇଚେସି, “ର କାଣା ଅର କାଣାଇଁ ଜିରୁ ତସାଲି ଆଡିନେସିକି ? ଏଝାରି ରିଆରି ଜିକେଏ ରହେଁଏ ଗାଡୁଡୁତା ତରଗଅରି କି ? ୪୦ ✧ସୀସୁ ତାନି ଗୁରୁ କିହାଁ କାଜାସିଆଏ; ସାମା ବାରେଜାଣା ସୀସୁୟାଁ ନେହଁ କି କାପାଲି ଆଡିସାରେ ତାନି ଗୁରୁ ସମାନା ଆନେରି ।”

୪୧ ଅଡେ ଏନାଆଁତାକି ମୀ ତାୟି କାନୁତି ଲାଟା ସିନିକିହିମାଞ୍ଜି, ସାମା ନୀ କାନୁତା ଆମିନି କାଜା ଲାଟା ମାନାଣି ଏନାଆଁତାକି ଅଣ୍ଡିପି ହିଲଅତି ? ୪୨ ନୀନୁ ନୀ କାନୁତା ମାନି କାଜା ଲାଟାତି ଅଣ୍ଡିପାଆନା, ଏନିକଁ ନୀ ତାୟିଇଁ ଏଲେଇଞ୍ଜାଲି ଆଡିଦି, ତାୟି ୱାମୁ ନୀ କାନୁତା ମାନି ଲାଟା

✧ ୭:୩୯ ୭:୩୯ ମାତି ୧୫:୧୪ ✧ ୭:୪୦ ୭:୪୦ ମାତି ୧୦:୨୪,୨୫; ଜହ ୧୩:୧୭; ୧୫:୨୦

ଡେ଼଼ା଼ଇଁ, ଆଡେ କୁଟୁ ଗାଟାଡି ତଲିଏ ନୀ କାନୁଡି କାଜା ଲାଟା ଡେ଼଼ା କତାମ୍, ତାୟୁ ମୀ ତାୟି କାନୁଡି ଲାଟା ନେହଁ କଁ ମେସାଲି ଆଡ଼ିଦି ।

ମାର୍ନୁ ଅଡେ ତାନି ପାଡେୟି
(ମାଡି ୭:୧୭-୨୦; ୧୨:୩୩-୩୫)

୪୩ “ଇଡିହଁ ଇଲେଡି ଏନି ର ନେହଁ ମାର୍ନୁ ହିଲେଏ, ଏମିନାୟି ଲାଗେଏଡି ପାଡେୟି ଆୟିନେ, ଅର଼଼ାକି ଇଲେଡି ଏନି ମାର୍ନୁ ହିଲେଏ ଏମିନାୟି ନେହଁ ପାଡେୟି ଆୟିନେ । ୪୪ ✨ଇଡିହଁ ବାରେ ମାର୍ନୁକାଣି ତାନି ପାଡେୟି ତଲେ ପୁନାୟି; ହାପ୍‌କା ମାର୍ନୁଟି ଲକୁ ତୟା ପାଡେୟି ଏହ୍‌ଅରି, ଇଞ୍ଜା ହାପ୍‌କା ବୂଟାଟି ଅଞ୍ଜୁରି ପାଡେୟି ଏହ୍‌ଅରି ।

୪୫ ✨ନେହଁ ଲକୁ ନେହଁ ମନ ବିଡ୍ରାଟି ନେହଁ କାତା ହପ୍‌ନେସି, ଇଞ୍ଜା ପଲ୍‌ଆ ଗାଟାସି ପଲ୍‌ଆ ମନ ବିଡ୍ରାଟି ପଲ୍‌ଆ କାତା ହପ୍‌ନେସି; ଇଡିହଁ ହିୟା ବିଡ୍ରା ମାନାଣି ଗୁଡିଟି ଜଲିନେସି ।

ରୀ ଇଲ୍‌କା କେପିନାରି
(ମାଡି ୭:୨୪-୨୭)

୪୬ ଅଡେ ମାର୍ନୁ ଏନାଆଁତାକି ନାଞ୍ଜେ ପ୍ରବୁ ପ୍ରବୁ ଇଞ୍ଜା ମାଞ୍ଜାଦେରି, ସାମା ନା କାତା ମାନ଼ି ଆହି ହିଲଅତେରି ? ୪୭ ଆମ୍ବାଆସି ନା ତାଣା ଖାହାନା ନା କାତା ଖେଞ୍ଜାନା ବାରେ ମାନ଼ି ଆନେସି, ଏ଼଼ାସି ଏନିଲେହେଁତାସି, ନାନୁ ମିଞ୍ଜେ ଖେସ୍ତାଇଁ । ୪୮ ଏ଼଼ାସି ଇଲେଡି ର ଇଲୁ ଦହ୍‌ନିଲେହେଁତ ଲକୁ, ଏମିନିଗାଟାସି ଗାଡି ଗାଡୁୟୁ କାର୍‌ହାନା ପୁନାଦି ଖାଲ୍‌କାତଲେ କାଡି ନିପ୍‌ନେସି; କାଜା କାତା ଖାହାନା ଏ ଇଲୁଡି ଗୁପିଡେ, ଖାଲ୍‌କାତଲେ ଇଲୁ ଦସାମାଟାକି କାତା ଇଲୁଡି ଦାକ୍‌ହାଲି ଆଡାଆଡେ । ୪୯ ସାମା ଆମ୍ବାଆସି ଖେଞ୍ଜାନା ମାନ଼ି ଆଅସି ଏ଼଼ାସି ଗାଡୁୟୁଟିଏ ପୁନାଦି କିଆନା ଲାକ ଲାକ ଇର୍‌ଆ ଲାକ ଇଲୁ କିହାମାନି ଲକୁ ଲେହେଁତାସି; କାଜା କାତା ଖାହାନା ଇଲୁଡି ଗୁପାଲିଏ ଦେବୁଣିଏ ଇଲୁ ରିହା ହାଟେ ଇଞ୍ଜା କୁଡ୍‌ପୁନାସା ଆହାହାଟେ ।”



ଜୀସୁ ର ରମିୟ ହଲେଏଣାଙ୍କ ନେହଁ କିନାୟି
(ମାତି ୮:୫-୧୩)

୧ ଜୀସୁ ଲକୁ ନକିତା ବାରେ କାତା ଖେସାଲି ରାପ୍‌ହାଲିଏ କପରନାହୁମ ଗାଡ଼ାତା ହାରେସି । ୨ ଏଚିବେଲ୍ୟାତା ରଅସି ପାସାକଡ଼ି କସ୍‌କା ମୁହେଁ କାଜାଣା ହଲେଏସି ହାନ୍ତିଲେହେଁ ନଫେରି ଆହାମାରେସି; ଏ ହଲେଏଣାଙ୍କ ଏଝାସି ହାରେକା ଜୀସୁ ନହଁ ମାରେସି । ୩ ଏଝାସି ଜୀସୁ କାତା ଖେଞ୍ଜାନା, ଏଝାସି ଏନିକି ଖାହାନା ତାନି ହଲେଏଣାଙ୍କ ନେହଁ କିନେସି, ଇଦାଆଁତାକି ଜୀହୁଦି ଲକୁତି କାଜାରି ବିତ୍ରାତି ଏଚରଜାଣାତି ଏଝାଣି ତାଣା ପାଣ୍ଡାନା ବାତିମାଲିତେସି । ୪ ଏଝାରି ଜୀସୁ ତାଣା ଖାହାନା ହାରେକା ବାତିମାଲିହଁ ଖେସ୍ତେରି, “ଏଝାସି ନୀ ତାଣାଟି ହାରେକା ସାଢେମି ବେଟାଆହାଲି ପାଡ଼ା ଆନାସି; ୫ ଇଚିହଁ ଏଝାସି ମା ଜୀହୁଦି ଲକୁଣି ଜୀସୁ ନନେସି ଅଡ଼େ ତାନୁଏ ମାଜେତାକି ଜୀହୁଦି ଲକୁତି କୁଟମି ଇଲୁ* କିହାମାନେସି ।”

୬ ଏମ୍ବାଟିଏ ଜୀସୁ ଏଝାରିତଲେ ହାରେସି, ଏଝାସି କାଜାଣି ଇଲୁଟିଏ ହିରେ ହେକ ମାଚାଟିଏ ତାନି ତଣେସିଙ୍ଗାଣି ଖେସା ପାଣ୍ଡିତେସି, “ଏ ପ୍ରବୁ ନୀନୁ ଅଡ଼େ କସ୍ ପ୍ଲୁଃଆନିଦେ; ଇଚିହଁ ନୀନୁ ନା ଇଜ ପାଞ୍ଜୁଲି ଇଚିଦି ଇଲେକଁ ପାଡ଼ାଆଆତାଡେସି; ୭ ଇଦାଆଁତାକି ନୀନୁ ନୀ ତାଣା ଖାହାଲି ପାଡ଼ାଆଆଁ ଇଞ୍ଜଁ ଅଣ୍ପିଡେସି; ସାମା ନୀନୁ ର ପଦୁ ଖେସା ପାଣ୍ଡାମୁ ନା ହଲେଏସି ନେହଁ ଆନେସି । ୮ ଇଚିହଁ ନୀନୁ ରଅଣି ତାଣା କାମା କିନି ମାଣ୍ଡି ଆଡ଼ିହଁ ଜିକେଏ ନା ଅଦିକାରାତା ଅଡ଼େ କସ୍‌କା ମାନେରି; ଅଡ଼େ ନୀନୁ ରଅଣାଙ୍କ ହାଲାମୁ ଇଚିହଁ ହାନେସି; ରଅଣାଙ୍କ ଖାମୁ ଇଚିହଁ ଖାନେସି; ଇଞ୍ଜା ନା ହଲେଏଣାଙ୍କ ଇଦାଆଁ କିମୁ ଇଚିହଁ ଏଝାସି କିନେସି ।”

୯ ଜୀସୁ ଇ ବାରେ କାତା ଖେଞ୍ଜାନା କାବା ଆଡେସି, ଅଡ଼େ ଜେଟ ଖାହିମାନି ଲକୁଝାକି ସିନିକିହାନା ଏଲେଇରେସି, “ନୀନୁ ମିଜେ

* ୭:୫ ୭:୫ ସିନଗର

ଝେସିମାଞ୍ଜାଇଁ ଇସ୍ରାୟେଲ ଲକୁ ବିତ୍ରା ଜିକେଏ ନାନୁ ଇଲେତି ନାମୁ ମେସାହିଲଅଁ ।”

୧୦ ଅଡ଼େ ପାଣ୍ଡୁଝି ଆହାମାଟି ଲକୁ ଇଜ ଝାହାନା ହଢ଼ଲେଏସି ନେହୁଁ ଆହାମାନାଣି ମେସ୍ତେରି ।

ରାଣ୍ଠେଣି ଇୟାନି ମୀର୍ଏଣାଇଁ ଜୀସୁ ହୀନାୟି

୧୧ ଏମ୍ବାଟିଏ ନାଇନ ଦରୁଗାଟି ଗାଡ଼ାତା ହାଚେସି, ତାନି ସୀସୁୟାଁ ଇଞ୍ଜା ହାଚେକା ଲକୁ ଏଝାଣିତଲେ ହାଜିମାଚେରି । ୧୨ ଏଝାସି ଗାଡ଼ାଟି ଗଲିମ୍ବୁଗାତା ଏଜାଲିଏ ଲକୁ ର ମାଡ଼ହାତି ପାଙ୍ଗାତା ଡେକା ତାଟି ମାଚେରି, ଏଝାସି ତାମି ଇୟାନି ରଣ୍ଠିଏ ମୀର୍ଏସି ମାଚେସି, ଇଞ୍ଜା ଏ ଇୟା ରାଣ୍ଠେଣି ମାଚେ; ଅଡ଼େ ଗାଡ଼ାଟି ହାଚେକା ଲକୁ ଏଦାନିତଲେ ମାଚେରି । ୧୩ ଏଦାନି ମେସାନା ଜୀସୁ ହାଚେକା କାର୍ମା ଅଣ୍ପାନା ଏଦାନି ଏଲେଇଚେସି, “ଡ଼ୀଆନି ।” ୧୪ ଅଡ଼େ ଏଝାସି ତାଗେ ହାଜାନା ଡେକାମାଟି ଚେଚେଣିତି ଡାଗିଚେସି, ଇଞ୍ଜା ଡେକା ଅହିମାଟି ଲକୁ ନିଚାଲିଏ ଜୀସୁ ଏଲେଇଚେସି, “ଆଡ଼େ ଦାଂଗ୍‌ଶେଣାଁତି ! ନାନୁ ଏଲେଇଞ୍ଜିମାଞ୍ଜାଇଁ ନିଙ୍ଗାମୁ !” ୧୫ ଏଚେଟିଏ ହାହାମାଟି ଦାଂଗ୍‌ଶେଏସି ନିଙ୍ଗାନା କୁଗିଚେସି ଇଞ୍ଜା ଜଲିଚେସି, ଇଞ୍ଜା ଏଝାସି ତାମି ଇୟାନି କେୟୁତା ହେଚ୍‌ପିଚେସି ।

୧୬ ଏଚେଟିଏ ବାରେଜାଣା ଆଜିତାକି ମାହାପୁରୁଇଁ ଜହରା କିହୁଁ ଏଲେଇଚେରି; “ମା ବିତ୍ରା ର ମାହାପୁରୁ ଅଣ୍ପୁତି ବଲୁ ଝେହ୍‌ନାସି ହଚାମାନେସି, ଇଚିହୁଁ ମାହାପୁରୁ ତାନି ଲକୁଣି କାର୍ମା ମେସାମାନେସି !”

୧୭ ଇଞ୍ଜା ଜୀସୁ କିତି ଇ କାତା ବାରେ ଜୀହୁଦା ଦେସାତା ଅଡ଼େ ସାରିସ୍ତୁ ମାନି ରାଜିତା ଝେଙ୍ଗାହାଚେ ।

ବାପ୍ତିସ୍ମାଁ ହୀନି ଜହନତି କାରୁ ଝେହ୍‌ନାରି

(ମାଟି ୧୧:୨-୧୯)

୧୮ ଡାୟୁ ବାପ୍ତିସ୍ମାଁ ହୀନି ଜହନତି ସୀସୁୟାଁ ଇ ବାରେ କାତା ଏଝାଣାଇଁ ଝେସ୍ତେରି । ୧୯ ଏଚେଟିଏ ଜହନ ତାନି ରୀ ସୀସୁୟାଁଇଁ ତାଗେ ହାଚାନା ପ୍ରବୁ ତାଣା ଏଲେଇଞ୍ଜା ପାଣ୍ଡିଚେସି, “ଆମ୍ବାଆସି

† ୭:୧୭ ୭:୧୮ ମୁଞ୍ଜିନାୟି ‡ ୭:୧୮ ୭:୧୮ ମୁଞ୍ଜିନାୟି

ଝାନାୟି ମାତେ, ନୀନୁଏ ଏଝାତିକି, ଆଆତ୍ ମାମ୍ମୁଅର ରଅଣାଇଁ କାଃଆନମି ?”

୨୦ ଏଝାରି ଜୀସୁ ତାଣା ଝାହାନା ଏଲେଇଚେରି, “ବାପ୍ତିସ୍ତା ହୀନି ଜହନ ମାଜେ ଏଲେଇଞ୍ଜା ପାଣ୍ଡାତେସି, ଆମ୍ବାଆସି ଝାନାୟି ମାତେ ଏଝାତି ନୀନୁଏ କି ଆଆତ୍ ମାମ୍ମୁଅର ରଅଣାଇଁ କାଃଆନମି ?”

୨୧ ଏଚିବେଲା ଏଝାସି ହାରେକା ରଗ, କସ୍ତୁ ଅଡେ ପଲ୍ଲଆ ବୁଡୁୟାଁ ତାଣାଟି ହାରେକା ଲକୁଣି ନେହ୍ କିତେସି, ଇଞ୍ଜା ହାରେକା କାଣ୍ଡାକା ମେହ୍‌ଆଗାଟାରାଇଁ ମେହ୍‌ନି ବାଡୁୟୁ ହୀତେସି । ୨୨ ଏଝାସି ଏଝାରାଇଁ ଏଲେଇଚେସି, “ମୀରୁ ହାଜାନା ଏନା ଏନାଆଁ ମେସାମାଞ୍ଜେରି ଅଡେ ଝେଞ୍ଜାମାଞ୍ଜେରି, ଏ ବାରେ ଜହନଇଁ ଝେହ୍‌ଦୁ; କାଣ୍ଡାକା ମେହ୍‌ଆଗାଟାରି ମେସାଲି ଆଡିମାନେରି, ସଟାୟାଁ ତାକାଲି ଆଡିମାନେରି, କାଜା ରଗ ଗାଟାରି ନେହ୍ ଆହିମାନେରି, ବେରାୟାଁ ଝେଞ୍ଜିମାନେରି, ହାଡାରି ନୀଡିମାନେରି, ଅଡେ ହିଲାଆ ଗାଟାରି ନେହ୍ କାରୁ ଝେଞ୍ଜିମାନେରି; ୨୩ ନା ତାଣା ଆମ୍ବାଆରି ଆନାମାନା ଆଆନା ନାମାନେରି, ତାମ୍‌ଜେଏ ନେହ୍ ।”

୨୪ ଜହନ ସୀମୁୟାଁ ହାଜାଲିଏ, ଜୀସୁ ଲକୁଣି ଜହନତି କାତା ଏଲେଇଚେସି, “ଏଚିବେଲା ବାଃଲି ବାଟାତା ମୀରୁ ହାଜାମାଚେରି, ଏମ୍ବାଆଁ ଏନାଆଁ ମେସାଲି କାଟାମାଚେରି ? ଏନାଆଁ ଗାଲି ତଲେ ଝାଲିମାନି ତାଣ୍ଡିତି ? ୨୫ ଏଦାଆଁ ଆଆତିହ୍ ଏନାଆଁ ମେସାଲି ହାଜାମାଚେରି ? ନେହ୍ ଅଜିତି ପାଡାଡା ହିମ୍ବୁରି ହୁଟାମାନି ର ମାଣସିଇଁ ? ମେହ୍‌ଦୁ ଆମ୍ବାଆରି ନେହ୍ ନେହ୍ ହିମ୍ବୁରିକା ହୁଟାନା ସୁକୁ ତଲେ ଡୟିନାରି ଏଝାରି ରାଜା ଗାଡାତା ଡୟିନେରି ! ୨୬ ଏଦାଆଁ ଆଆତ୍ ଏନାଆଁ ମେସାଲି ହାଜାମାଚେରି ? ଏନାଆଁ ର ମାହାପୁରୁ ଅଣ୍‌ପୁଡି ବଲୁ ଝେହ୍‌ନାଣାଇଁ ? ନାନୁ ମିଜେ ସାତା ଝେସିମାଞ୍ଜାଇଁ, ମାହାପୁରୁ ବଲୁ ଝେହ୍‌ନାରି କିହାଁ କାଜାଣାଇଁ । ୨୭ ଆମ୍ବାଆରି କାତା ରାସ୍‌କି ଆହାମାନେ, ‘ହେଶୁ ନାନୁ ନା କାରୁ ଝେହ୍‌ନାଣାଇଁ ନୀ ନକିତା ପାଣ୍ଡିମାଞ୍ଜାଇଁ, ଏଝାସି ନୀ ନକିତା ଜିରୁ ତିୟାରା କିନେସି, ଏଝାସି ଏ ମାଣସି ।’ ୨୮ ନାନୁ ମିଜେ ସାତା ଝେସିମାଞ୍ଜାଇଁ ଇୟାନି ବାଣ୍ଡିତି

ଜାର୍ନୀ ଆହାମାନାରି ବିତ୍ତା ଜହନ ବାରେକିହାଁ କାଜାସି; ଆଡ଼ିଜିକେଏ ମାହାପୁରୁ ରାଜିତା ଆମ୍ବାଆସି ଉଣା ଏଝାସି ଏଝାଣି କିହାଁ କାଜାସି ।”

୨୯ ✨ବାରେଜାଣା ଇ କାତା ଝେଞ୍ଜାନା, ସିସ୍ତୁ ରୀହନାରି ଜିକେଏ ଜହନ ତାଣାଟି ବାପ୍ତିସ୍ମ* ଅହାମାଚାକି ମାହାପୁରୁଇଁ ସାତା ଇଞ୍ଜିଁ ଇଚେରି; ୩୦ ସାମା ପାରୁସିୟାଁ ଅଡ଼େ ମେରାପୁନାରି ଏଝାଣି ତାଣାଟି ବାପ୍ତିସ୍ମ† ପ୍ଲୁଃଆନାହାଁ ତାମ୍ଲେ ତାକି ମାହାପୁରୁ ଅଣ୍ପିମାଚାଣି କୂଚେରି ।

୩୧ “ଇ କାଲାତି ଲକୁଣି ଆମ୍ବାଆରି ତଲେ ତୁକ୍‌ଇଁ, ଇଞ୍ଜିଁ ଏଝାରି ଆମ୍ବାଆରି ଲେହେଁ ? ୩୨ ଏମିନି କକାରି ହାଟା ବାଜାରାତା କୁଗାନା ତାମ୍ଲୁ ଏଲେଇଣ୍ଡି ଆନେରି, ‘ମାମ୍ଲୁ ନ୍ରିଙ୍ଗତାକି ପାରୁଡ଼ି ଉକିତମି, ମୀରୁ ଏନ୍ଦାଆତେରି; ମାମ୍ଲୁ ତୁକୁ ତଲେ ଡୀତମି ମୀରୁ ଡୀଆତେରି !’ ଏଝାରି ଇଲେତାରି ଇଞ୍ଜିଁ ଜୀସୁ ଝେସ୍ତେସି । ୩୩ ଇଚିହଁ ବାପ୍ତିସ୍ମ‡ ହୀନି ଜହନ ଝାହାନା ରାନ୍ଦା ତିନାଆତେସି କି ଅଞ୍ଜୁରି ରାସା ଗହ୍‌ଆତେସି, ଅଡ଼େ ମୀରୁ ଏଲେଇଚେରି, ‘ଏଝାଣାଇଁ ବୃତୁ ଆଲଗାମାଚେ ।’ ୩୪ ମାଣସି ମୀର୍‌ଏସି ଝାହାନା ରାନ୍ଦା ତିଚେସି ଉଚେସି, ଅଡ଼େ ମୀରୁ ଏଲେ ଇଞ୍ଜିମାଞ୍ଜେରି, ‘ମେହ୍‌ଦୁ ଇଝାସି ଚିଣ୍ଡିକାଝୁ, କାଡ଼ବୁଡୁ, ସିସ୍ତୁ ରୀହନାରି ଅଡ଼େ ପାପୁ ଗାଗାରି ତଡ଼େଏସି ।’ ୩୫ ମାହାପୁରୁଡ଼ି ବୁଦି ତାନି ବାରେ ମୀର୍‌କା ତାଣାଟି ସାତା ଇଞ୍ଜିଁ ତଞ୍ଜାଆନେ ।”

ପାରୁସି ସିମନ ଇଜ ଜୀସୁ ହାନାୟି

୩୬ ଅଡ଼େ ପାରୁସିୟାଁ ବିତ୍ତାଟି ରଅସି ଜୀସୁଇଁ ତାନି ଇଜ ତିଞ୍ଜାଲି ଏଲେଇଚେସି, ଏମ୍ବାଟିଏ ଜୀସୁ ଏ ପାରୁସି ଇଜ ହଡାନା ରାନ୍ଦା ତିଞ୍ଜାଲି କୁଗିଚେସି । ୩୭ ✨ମେହ୍‌ଦୁ ଏ ଗାଡ଼ାତା ପାପୁଗାଟି ର ଇୟା ମାଚେ; ଜୀସୁ ପାରୁସିୟାଁ ଇଜ ତିଞ୍ଜାଲି କୁଗାମାନେସି ଇଞ୍ଜିଁ ପୁଞ୍ଜାନା ଏଦି ର ଗାଜୁତା ଗାନ୍ଦାଗାଟି ନିୟୁଁ ତାଚାନା, ୩୮ ତାୟୁଝାକି ଜୀସୁ କଡାୟାଦାରି ନିଚାନା ଡୀହି ଡୀହି କାଣ୍ଡୁ ବକ୍‌ହାନା ଏଝାଣି ପାଃଆନାୟାଁ ଉଦି କିହାନା ତାନି ତାୟୁଁ ବାଣାୟାଁ ତଲେ ଜୀସୁ ପାଃଆନାୟାଁ ଜେଜିହଁ ଏଝାଣି ପାଃଆନାୟାଁ ନଣ୍ଡିଚେ ଅଡ଼େ ଗାନ୍ଦା

☆ ୭:୨୯ ୭:୨୯ ମାତି ୨୧:୩୨; ଲୁକ ୩:୧୨ * ୭:୨୯ ୭:୨୯ ମୁଞ୍ଜିନାୟି † ୭:୩୦ ୭:୩୦ ମୁଞ୍ଜିନାୟି ‡ ୭:୩୩ ୭:୩୩ ମୁଞ୍ଜିନାୟି ☆ ୭:୩୭ ୭:୩୭ ମାତି ୨୭:୭; ମାର୍କ ୧୪:୩; ଜହ ୧୨:୩

ନିମ୍ନ ରୁବିଡେ । ୩୯ ଏଦାଆଁ ମେସାନା ଆମିନି ପାରୁସି ହାଟାମାଚେସି, ଏଝାସି ମନ ମନତା ଅଶ୍ପିଡେସି, “ଇଝାସି ମାହାପୁରୁ ଅଶ୍ପୁତି ବଲୁ ଝେହ୍ନାସି ଆହାମାଚିହିଁମା, ତାଜେ ଡାଗିମାନି ଇୟାତି ଏନିଲେହେଁତାୟି ପୁଚେସିମା, ଇଚିହିଁ ଏଡ଼ି ପାପୁ ଗାଟାୟି ।”

୪୦ ଜୀସୁ ଏଝାଣାଇଁ ଏଲେଇଚେସି, “ଆଡ଼େ ସିମନ ନାନୁ ନିଜେ ର କାତା ଝେସ୍ତାନାୟିମାନେ ।”

ଏଝାସି ଏଲେଇଚେସି, “ହାଅ ପୁରୁ ଝେସ୍ତାମୁ ।”

୪୧ “ର ସାଝୁକାରି ତାଣା ରିଆରି ରୀଣାଗାଟାରି ମାଚେରି; ରଅସି ପାସାଝାଞ୍ଜା ଅଡ଼େ ରଅସି ରୀ କଡ଼ି ଦସଟାକା ରୀଣା ଗାଟାସି ।

୪୨ ଏଝାରି ରୀଣା ଡିକହାଲି ଆଡ଼ାଆଲିଏ, ଏଝାରି ସାଝୁକାରି ରିଆରି ରୀଣାତି ଜିକେଏ ପିସାଡୁସ୍ତେସି । ଇଞ୍ଜା ଏଝାରି ବିତ୍ରାତି ଆମ୍ବାଆସି ଏଝାଣାଇଁ ହାରେକା ଜୀଝୁ ନନେସି ?”

୪୩ ସିମନ ଏଲେଇଚେସି, “ନା ଅଶ୍ପୁତା ଆମ୍ବାଆରାକି ଗାଡ଼ି ରୀଣା ପିସ୍ପିଆଡେ ଏଝାସି ।”

ଜୀସୁ ଏଲେଇଚେସି, “ନୀନୁ ନେହିଁ ଅଶ୍ପାମାଞ୍ଜି ।” ୪୪ ଅଡ଼େ ଏଝାସି ଏ ଇୟାନିଝାକି ସିନିକିହାନା ସିମନଇଁ ଏଲେଇଚେସି, “ଇ ଇୟାନି ମେସିମାଞ୍ଜି ? ନାନୁ ମୀ ଇଜ ଝାଡେସ୍, ନା କଡାୟି ତାକି ଏମୁ ହିୟାଆତି, ସାମା କାଶ୍ଟୁଲେ ନା ପାଝଆନାୟି ଉଦି କିହାନା ତାନି ତାୟି ରୁଣାୟି ତଲେ ଜେଜାଡେ । ୪୫ ନୀନୁ ନାଜେ ନଶ୍ଟାଆତି ? ସାମା ନାନୁ ବିତ୍ରା ଝାଝୁନିଏ ନା ପାଝଆନାୟି ନଶ୍ଟାଲି ପିସିମାଞ୍ଜେଏ । ୪୬ ନୀନୁ ନା ତାୟି ତୁ ନିମ୍ନ ରୁବାଆତି ? ସାମା ଇଦି ନା ପାଝଆନାଣା ଗାନ୍ଦା ନିମ୍ନ ରୁବାଡେ । ୪୭ ଇଦାଆଁତାକି ନାନୁ ନିଜ ଝେସିମାଞ୍ଜାଇଁ, ଇଦାନି ହାରେକା ପାପୁ ମେଶ୍ଟାମାନେ ଏଡ଼ାଣିତାକି ଏଡ଼ି ହାରେକା ଜୀଝୁନହିଁମାଞ୍ଜାନେ; ସାମା ଆମ୍ବାଆରାକି ଉଣା ପାପୁ ମେଶ୍ଟାନେ ଏଝାସି ଉଣା ଜୀଝୁ ନନେସି ।” ୪୮ ଅଡ଼େ ଜୀସୁ ଏ ଇୟାନି ଏଲେଇଚେସି, “ନୀ ପାପୁ ବାରେ ମେଶ୍ଟାମାନେ ।” ୪୯ ଏମ୍ବାଟିଏ ଏଝାଣିତଲେ ଡିଞ୍ଜାଲି କୁଗାମାଟାରି ମନ ମନତା ଏଲେଇଚେରି,

“ପାପୁ ଜିକେଏ ମେଶ୍ଟା କିହିମାନେସି ଇଝାସି ଆମ୍ବାଆସି ?”

୫୦ ସାମା ଜୀସୁ ଏ ଇୟାନି ଏଲେଇଚେସି, “ନୀ ନାମୁ ନିଜେ ଗେଲ୍ପାମାଞ୍ଜାନେ; ହିଡ଼ି ତଲେ ହାଲାନୁ ।”

୫୧

୫୨

୫୩

୫୪

୫୫

୫୬

୮

ଜୀସୁତଲେ ଡ଼ୟିନି ଇୟାସିକା

^୧ ଏତରଦିନା ତାୟୁ ଜୀସୁ ଗାଡ଼ାତାକି ଗାଡ଼ା ନାୟୁଁ ତାକି ନାୟୁଁ ରେଜିହୁଁ ମାହାପୁରୁ ରାଜିତି ନେହୁଁ କାରୁ ଝେକହେସି, ଅଡ଼େ ବାରଜାଣା ସୀସୁୟାଁ ଏଝାଣିତଲେ ମାଚେରି, ^୨ ଅଡ଼େ ଏମିନିଗାଟି ଇୟାସିକା ପଲୁଆ ବୁଡୁୟାଁ ତାଣାଟି ରଗଟି ନେହୁଁ କିଝି ଆହାମାରୁ, ଇତିହୁଁ ମଗଦଲିନି ମରିୟମ, ଆମ୍ବାଆରି ତାଣାଟି ସାଡ଼ାଗାଟା ବୁଡୁୟାଁ ହଡ଼ାହାଜାମାରୁ, ^୩ ହେରଦ ଇଜତି ଗୁମୁସ୍ତା କୁଜା ଅଡ଼େ ତାନି ଡକ୍ତି ଜହାନା, ସସାନା ଅଡ଼େ ହାଚେକା ଇୟାସିକା ଏଝାଣିତଲେ ମାଞ୍ଜାନା ତାମି ଦନ ହୀହାନା ଏଝାରି ସେବା କିହିମାରୁ ।

ବିଚା ମାଟିନି ପୁଣ୍ଠିକିନି କାତା

(ମାତି ୧୩:୧-୧୯; ମାର୍କ ୪:୧-୯)

^୪ ଲକୁ ବାରେ ଗାଡ଼ାୟାଁଟି ଝାହିମାଚାକି ହାଚେକା ଲକୁ ଏଝାଣି ତାଣା ରୁଣ୍ଡା ଆଡ଼େରି ଇଞ୍ଜାଁ ଏଝାସି ଏଝାରାଇଁ ପୁଣ୍ଠିକିନି କାତାତଲେ ଝେସ୍ତେସି ।

* “ରଅସି ବିଚା ମାଟିନାସି ବିଚା ମାଟାଲି ହଡ଼େସି । ଏଝାସି ମାଟି ମାଟିହୁଁ କଚେକା ବିଚା ଜିରୁତା ରୀତେ ଏଦାଆଁ ଲକୁ ଝିସାଡୁସ୍ତେରି, ଅଡ଼େ ହାଗୁ ଲାକ ଡ଼ୟିନି ପଟା କାଟି ପେରୁହା ତିରୁ । ^୨ ଅଡ଼େ କଚେକା ଝାଲୁକା ଲାକ ରୀତେ, ଇଞ୍ଜାଁ ନେୟାଁନା ବୁମି ଅଲୁ ହିଲାଆତାକି ଝାୟାହାଚେ । ^୩ ଅଡ଼େ କଚେକା ହାପୁକା ବୁଟାତା ରୀତେ, ଇଞ୍ଜାଁ ହାପୁକା ବୁଟା ପାଡ଼ାଆହାନା ଆନାଁ ତାକିତି ପୁକହାଡୁସ୍ତେ । ୮ ଅଡ଼େ କଚେକା ବିଚା ନେହୁଁ ବୁମିତା ରୀତେ, ଇଞ୍ଜାଁ ପାଡ଼ାଆହାନା ପାସାକଡ଼ି ପାଡ଼େୟି ଆୟିତେ ।” ଏଚେଟିଏ ଜୀସୁ କାଜା ଗିୟାଁତଲେ ଏଲେଇଚେସି, “ଆମ୍ବାଆରାକି ଝେଞ୍ଜାଲି କୀର୍କା ମାନୁ ଏଝାରି ଝେଝାମ୍ବାରି ।”

ପୁଣ୍ଠିକିନି କାତାତି ଅଣପୁ

(ମାତି ୧୩:୧୦-୧୭; ମାର୍କ ୪:୧୦-୧୭)

^୯ ତାମି ସୀସୁୟାଁ ଇ ପୁଣ୍ଠିକିନି କାତାତି ଅର୍ଥ ଏନାୟି ଇଞ୍ଜୁଁ ଝେଚେରି, ^{୧୦} ଏଝାସି ଏଲେଇଚେସି, “ମାହାପୁରୁ ରାଜିତି କାତା

ପୁଞ୍ଜାଲି ମିଙ୍ଗେ ବାଡ଼ୟୁ ହୀପକି ଆହାମାନେ, ସାମା ଏବଂକା ତାରାଈ ପୁଣ୍ଡିକିନି କାତାତଲେ ଖେସ୍ପିଆନେ, ଇଚିହିଁ ଏଞ୍ଜାରି ମେସି ମେସିହିଁ ମେହ୍‌ଅରି ଅଡ଼େ ଖେଞ୍ଜିଖେଞ୍ଜି ତେଲ୍‌ହଅରି ।”

ଜୀସୁ ବିଚା ମାଟିନି କାତାତି ପୁଣ୍ଡିକିନାୟି

(ମାତି ୧୩:୧୮-୨୩; ମାର୍କ ୪:୧୩-୨୦)

୧୧ ପୁଣ୍ଡିକିନି କାତା ଅର୍ତ୍ତ ଇଦି, ବିଚା ମାହାପୁରୁ ବଲ୍ଲୁ, ୧୨ ଜିରୁ ଦାରିତି ପାଡ଼େୟି ଇଲେତାରି, ଏଞ୍ଜାରି ମାହାପୁରୁ କାତା ଖେନେରି; ତାୟୁ ସୟତାନା ଖାହାନା ଏଞ୍ଜାରି ଏନିକିଁ ନାମାଆପେରିଞ୍ଜା ଅଡ଼େ ଗେଲ୍‌ପି ଆଆପେରିଞ୍ଜା ଇଞ୍ଜିଁ ଏଞ୍ଜାରି ହିୟାଁତା ଖେଞ୍ଜାମାନାଣି ମୀଞ୍ଜାଅନେ । ୧୩ ଖାଲ୍‌କା ବୁମିତା ରିତି ଲକୁ ଇଲେତାରି, ଏଞ୍ଜାରି କାତା ଖେଞ୍ଜାନା ରାହାଁଟି ଆହ୍‌ନେରି; ଏଞ୍ଜାରିତାଣା ହୀରୁ ଜୀଆତାକି ଗାଡ଼େକା ତାକି ନାମିନେରି, ଅଡ଼େ ତାୟିପାରି କିନାୟି ଖାଡ଼ିସାରେ ମାହାପୁରୁଈ ପିସା ତୁହ୍‌ନେରି । ୧୪ ଅଡ଼େ ହାପକା ବୁଚାତା ରିତି ଲକୁ ଇଲେତାରି ଆମିନି ଗାଟାରି ମାହାପୁରୁ କାତା ଖେଞ୍ଜାନା ଦାର୍‌ତିତି ଦୁକୁ କାକୁଲି, ଦନତି ଜୁପକା ଅଡ଼େ ଦାର୍‌ତିତି ରାହାଁ ଏଞ୍ଜାରାଈ ପୁକ୍‌ହାତୁସାମାନାକି ନେହିଁକିଁ କାମ୍ବାଲି ଆଡ଼ଅରି । ୧୫ ନେହିଁ ବୁମିତା ରିତି ପାଡ଼େୟି ଇଲେତାରି, ଏମିନିଗାଟାରି ନେହିଁ ସୁଦୁଜୀଞ୍ଜୁ ହିୟାଁଟି କାତା ଖେଞ୍ଜାନା ଆହ୍‌ନେରି, ଅଡ଼େ ବାରେ ଅର୍‌ହାନା କାମା କିହାନା ପାଡ଼େୟି ଆୟିନେରି ।

ମାଣା ପୁକ୍‌ହି ଦୀଞ୍ଜି

(ମାର୍କ ୪:୨୧-୨୫)

୧୬ *ଦୀଞ୍ଜି ତୀସାନା ଆମ୍ବାଆରି ମାଣା ପୁକ୍‌ହାନା କି କାଟେଲି ତୁଇକା ଇଟଅରି, ସାମା ଦୀଞ୍ଜି ସତ୍ତାତା ଇଚିନେରି, ଏନିକିଁ ଇଜାଧାନି ଲକୁ ଉଜେଡ଼ି ମେହ୍‌ନେରି ।

୧୭ *ତୁଗୁମାନାୟି ଏନାୟିଞ୍ଜା ହିଲେଏ, ଏନାୟି ତଞ୍ଜା ଆଏ ଇଲେକିଁ ଏନାୟି ଜିକେଏ ହିଲେଏ, ଖେସ୍ପି ଆହାନା ତଞ୍ଜା ଆଏ ଇଲେତି ତୁଗୁମାନାୟି ଏନାୟି ହିଲେଏ ।

☆ ୮:୧୭ ୮:୧୭ ମାତି ୫:୧୫; ଲୁକ ୧୧:୩୩ ☆ ୮:୧୭ ୮:୧୭ ମାତି ୧୦:୨୬; ଲୁକ ୧୨:୨

୧୮ ଏନିକିଁ ଖେଜାମାଞ୍ଜେରି ଏଦାଆଁତାକି ଜାଗ୍ରାତା; ଇଚିହିଁ ଆମ୍ବାଆରାଝାୟି ମାନେ ଏଝାଣାକି ହୀଠ୍‌କିଆନେ, ଅଡ଼େ ଆମ୍ବାଆରାଝାୟି ହିଲେଏ ଏଝାସି ନାଦି ମାନେ ଇଞ୍ଜିଁ ଅଣ୍‌ପିମାନେସି, ଏଦାଆଁ ଜିକେଏ ଅଝିଆନେ ।

ଜୀସୁତି ଇୟା ଅଡ଼େ ତାୟିୟାଁ

(ମାତି ୧୨:୪୭-୫୦; ମାର୍କ ୩:୩୧-୩୫)

୧୯ ଜୀସୁତି ଇୟା ଅଡ଼େ ତାମି ତାୟିୟାଁ ଏଝାଣି ତାଣା ଝାଡ଼େରି, ସାମା ଲକୁ ମାନ୍ଦା ମାଚାକି ଏଝାଣି ତାଣା ହାଜାଲି ଆଡ଼ାଆଡ଼େରି ।
୨୦ ଏମ୍ବାଟିଏ ଜୀସୁଇଁ ଝେସ୍ତେରି, “ମୀ ଇୟା ଅଡ଼େ ମୀ ତାୟିୟାଁ ନିଜେ ମେସାଲି ପାଞ୍ଜାତା ନିରାମାନେରି ।”

୨୧ ସାମା ଏଝାସି ବାରେତି ଏଲେଇଚେସି, “ମାୟା ଅଡ଼େ ମା ତାୟିୟାଁ ଏଝାରି, ଆମ୍ବାଆରି ମାହାପୁରୁତି କାତା ଝେନେରି ଅଡ଼େ ମାନଝି ଆନେରି ।”

ଜୀସୁ କାଜା ଗାଲିତି ସାପି କିନାୟି

(ମାତି ୮:୨୩-୨୭; ମାର୍କ ୪:୩୫-୪୧)

୨୨ ର ଦିନା ଜୀସୁ ଅଡ଼େ ତାନି ସୀସୁୟାଁ ତଂଗତା କୁରିତେରି, ଇଞ୍ଜାଁ ଜୀସୁ ଏଝାରାଇଁ ଏଲେଇଚେସି, “ଝାତୁ ମାର ସାମଦୁରି ଆତାଲା ହାନ ।” ଏମ୍ବାଟିଏ ଏଝାରି ତଂଗଟି ହାଚେରି । ୨୩ ସାମା ଏଝାରି ତଂଗତା ହାଜିମାନି ବେଲାତା ଜୀସୁ ତୁରୀତେସି । ଏଚିବେଲା ସାମଦୁରିତା କାଜା ଗାଲି ଆଡ଼େ, ଅଡ଼େ ଏୟୁ ତଂଗତା ହଡ଼ିମାଚାକି ଏଝାରି ହାରେକା କସ୍ତୁ ଆଡ଼େରି ଇଞ୍ଜାଁ ଆଜିତେରି । ୨୪ ଏଚେଟିଏ ସୀସୁୟାଁ ତାଗେ ଝାହାନା ନିକହାଁ ଏଲେଇଚେରି, “ଏ ଗୁରୁ ଏ ଗୁରୁ ମାର ହାହିମାନାୟି !”

ଏମ୍ବାଟିଏ ଏଝାସି ନିଜାମା କାଜା ଗାଲିତି ଦାକା ହୀତେସି, ଇଞ୍ଜାଁ ଏ ବାରେ ସାପି ଆହାନା ସୁସ୍ତି ଆଡ଼େ । ୨୫ ଇଞ୍ଜାଁ ଏଝାସି ଏଝାରାଇଁ ଏଲେଇଚେସି, “ମୀ ନାମୁ ଆମ୍ବିୟା ?” ସାମା ଏଝାରି ଆଜି ଅଡ଼େ କାବାଆହାନା ତାମ୍ବୁ ଏଲେଇଶମ୍ବି ଆଡ଼େରି, “ଈଝାସି ଏନିଲେହେଁତାସି ଇଚିହିଁ ଗାଲି ଅଡ଼େ ଝାଡ଼ିମାନି ଏୟୁଣି ଜିକେଏ ହୁକୁମି ହୀହିମାନେସି ।”

ବୃତୁୟା ଆଲଗା ମାଚାଣାଇଁ ଜୀସୁ ନେହୁଁ କିନାୟି
(ମାତି ୮:୨୮-୩୪; ମାର୍କ ୫:୧-୨୦)

୨୭ ତାୟୁ ଏଞ୍ଜାରି ଗାଲିଲି ନକିତି ଆତାଲାଞ୍ଜାକି ଗରାସିୟ ଦେସାତା ଏତେରି । ୨୭ ଜୀସୁ ତଂଗଟି ରେଚାନା ଗାଟୁତା ଖାହାଲିଏ, ଏ ଗାଡ଼ାତି ର ବୃତୁ ଆଲଗା ମାଚାସି ଖାହାନା ଏଞ୍ଜାଣାଇଁ ବେଟାଆଡେସି; ଏଞ୍ଜାସି ଗାଡ଼ୁ ଦିନାଟିଏ ହିମ୍ବରିକା ହୁଚାଆନା ଅଡେ ଇଜ ମାନାଆନା ମାଡ଼ହା ମୁହନି ଚାୟୁତା ଡୟିମାଚେସି । ୨୮ ଏଞ୍ଜାସି କିରଡ଼ିହୁଁ ଜୀସୁ କଡାଣା ରିହାନା କାଜା ଗିୟାତଲେ ଏଲେଇଚେସି, “ଏ ବାଡ଼ୟୁଗାଟି ମାହାପୁରୁ ମୀରଏଶାତି ଜୀସୁ ନୀ ତଲେ ନାଞ୍ଜେ ଏନାୟି ମାନେ ? ନାନୁ ବାତିମାଲିମାଞ୍ଜାଇଁ ନାଞ୍ଜେ ଅଡେ କସ୍ତ ହିୟାଆନି ।” ୨୯ ଇତିହୁଁ ଜୀସୁ ଏ ପଲୁଆ ବୃତୁତି ଏ ମାଣସି ତାଣାଟି ହଚା ହାଜାଲି ହୁକୁମି ହାହାଲି ହାଜିମାଚେସି । ଏ ପଲୁଆ ବୃତୁ ହାରେକା ପାଲି ଏଞ୍ଜାଣାଇଁ ଆଲଗାମାଚେ, ଇଞ୍ଜା ଲକୁ ଏଞ୍ଜାଣାଇଁ କେସ୍ତା କଡାଣା ହିକ୍‌ଶିୟା ତଲେ ଦସ୍‌ପା ଇତିମାଚେରି, ସାମା ଏ ଦସ୍‌ପା ମାଚାଣି ତାପହାନା ବୃତୁ ତଲେ ବାୟା ଆହାନା ଲକୁ ହିଲାଆ ଚାୟୁତା ହଚିମାଚେସି ।

୩୦ ଜୀସୁ ଏଞ୍ଜାଣାଇଁ ଏଲେଇଚେସି, “ନୀ ଦରୁ ଏନାୟି ?”

“ନା ଦରୁ ମାନ୍ଦା” ଇଞ୍ଜା ଇଚେସି, ଏନାଆଁତାକି ଇଚିହୁଁ ହାରେକା ବୃତୁୟା ଆଲଗାମାରୁ । ୩୧ ଇଞ୍ଜା ଜୀସୁ ଏଞ୍ଜାସିକାଣି ତାଡେପୁରୁ ପାଣ୍ଡାଲି ହୁକୁମି ହାଅସି, ଇଦାଆଁତାକି ଏଞ୍ଜାଣାଇଁ ବାତିମାଲିତୁ ।

୩୨ ଏମ୍ବାଆଁ ହରୁ ଦାରିତା ର ମାନ୍ଦା ପାଜିୟା ମେୟି ମାରୁ, ଇଞ୍ଜା ଜୀସୁଇଁ ଏ ବୃତୁୟା ପାଜିୟା ମାନ୍ଦା ବିତ୍ରା ହାଜାଲି ହେଲ ରାସ୍ତୁ । ୩୩ ଏଞ୍ଜାସି ହେଲ ହାହାଲିଏ, ବୃତୁୟା ଏ ମାଣସି ତାଣାଟି ହଚା ହାଜାନା ପାଜିୟା ବିତ୍ରା ହୁଚୁ; ଏଚେଟିଏ ଏ ପାଜିୟା ଏ ହରୁଟି ଦାବଡ଼ି ହାଜାନା ଦାରିତା ମାତି ସାମ୍‌ଦୁରିତା ମେଦା ହାହାହାରୁ ।

୩୪ ଏ ପାଜିୟା ମାନ୍ଦା ମେତିମାତି ଗଡ଼କା ଏଦାଆଁ ମେସାନା ହଚେରି ଇଞ୍ଜା ଗାଡ଼ା ଅଡେ ନାସ୍‌କାଣା ଏ କାତା ଝେସ୍ତେରି । ୩୫ ଏନାୟି ଆହାମାନେ ଏଦାଆଁ ମେସାଲି ଲକୁ ହଚାଞ୍ଜାଡେଚେରି; ଇଞ୍ଜା ଏଞ୍ଜାରି ଜୀସୁ ତାଗେ ଖାହାନା, ଆମିନି ମାଣସି ତାଣାଟି ବୃତୁୟା ହଚା ହାଜାମାରୁ, ଏଞ୍ଜାଣାଇଁ ନେହୁଁ ହିମ୍ବରିକା ହୁଚାନା ନେହୁଁ ମନତଲେ ଜୀସୁ

କର୍ତ୍ତା ତୁଇ କୁଗାମାଚାଣି ମେସାନା ଆଜିତେରି । ୩୭ ଅଡ଼େ ଆମିନି ଗାଟାରି ମେସାମାଚେରି ଏଞ୍ଜାରି ଏ ବୃତ୍ତୁ ଆଲଗା ମାଚାସି ଏନିକ୍ ନେହ୍ ଆଡେସି, ଏଦାଆଁ ଏଞ୍ଜାରାଇଁ ଖେସ୍ତେରି । ୩୭ ଏମ୍ବାଟିଏ ଗରାସିୟ ବାରେ ନାସ୍‌କାତି ସାରିଞ୍ଜାକି ବାରେ ଲକୁ ଜୀସୁଇଁ ତାମି ଦେସାଟି ହାଜାଲି ବାତିମାଲିତେରି, ଇଚିହ୍ ଏଞ୍ଜାରି ହାରେକା ଆଜିମାଚେରି । ଇଞ୍ଜାଁ ଏଞ୍ଜାସି ର ତଂଗତା ହଚାନା ଖେଣ୍ଡାହାଚେସି । ୩୮ ସାମା ଏମିନିଗାଟାଣି ତାଣାଟି ବୃତ୍ତୁୟାଁ ହଚା ହାଜାମାରୁ, “ନାଜେ ନୀ ତଲେ ହାଜଲି ହେଲ ହିୟାମୁ” ଇଞ୍ଜାଁ ବାତିମାଲିତେସି; ୩୯ ସାମା ଜୀସୁ ଏଞ୍ଜାଣାଇଁ ହେଲ ହାହାନା, “ମୀ ଇଜ ଖେଣ୍ଡା ହାଲାମୁ, ଇଞ୍ଜାଁ ମାହାପୁରୁ ନିଜେତାକି ଆମିନି କାମା କିହାମାଞ୍ଜାନେସି ଏ କାତା ଖେକ୍‌ମୁ ।” ଏଚେଟିଏ ଏଞ୍ଜାସି ହାଜାନା ଜୀସୁ ତାଜେତାକି ଆମିନି କାମା କିହାମାଚେସି, ଏ ବାରେ ଗାଡ଼ାତା ଖେକ୍‌ହେସି ।

**ଜାୟିରସତି ମାଜ୍ଞା ଅଡ଼େ ଜୀସୁତି ହିମ୍ବିରି କୁଞ୍ଜୁ ତୀଗିତି ଇୟା
(ମାତି ୯:୧୮-୨୭; ମାର୍କ ୫:୨୧-୪୩)**

୪୦ ଜୀସୁ ଖେଣ୍ଡା ଖାହାଲିଏ ମାନ୍ଦା ଲକୁ ଏଞ୍ଜାଣାଇଁ ରାହାଁତଲେ ବେଟାଆଡେରି, ଇଚିହ୍ ଏଞ୍ଜାରି ବାରେଜାଣା ଏଞ୍ଜାଣାଇଁ କାଟିମାଚେରି । ୪୧ ଏମ୍ବାଟିଏ ଜାୟିରସ ଦରୁଗାଟାସି ଖାଡେସି; ଏଞ୍ଜାସି ଜୀହୁଦି ଲକୁତି କୁଟମି ଇଲୁଡି* କାଜାସି ମାଚେସି । ଏଞ୍ଜାସି ଜୀସୁ କତାଣା ରିହାନା ତାମି ଇଜ ହାଜାଲି ବାତିମାଲିତେସି, ୪୨ ଇଚିହ୍ ଏଞ୍ଜାଣାକି ବାର ବାର୍ଯାତି ରଣ୍ଡିଏ ମାଜ୍ଞା ମାଚେ, ଏଦି ହାନିଲେହେଁ ନମେରି ଆହାମାଚେ ।

ସାମା ଏଞ୍ଜାସି ହାଜିମାଚାଟି ଲକୁ ଏଞ୍ଜାଣି ମୁହେଁ ମୁହେଁ ଆହିମାଚେରି । ୪୩ ଏଚିବେଲାତା ବାର ବାର୍ଯା ପାଡେକା ନେତେରି ଖାଜିନି ରଗଗାଟି ର ଇୟା, ଏମିନି ଗାଟାୟି ଆମ୍ବାଆରି ତାଣାଟି ଜିକେଏ ନେହ୍ ଆହାଲି ଆଡିହିଲାଆଡେ, ୪୪ ଏଦି ତାୟୁ ଖାକିଟି ଖାହାନା ଜୀସୁତି ହିମ୍ବିରି କୁଞ୍ଜୁ ତୀଗିତେ, ଏ ଦେବୁଣିଏ ଏଦାନି ନେତେରି ବନ୍ଦାୟି ପିସ୍ତେ । ୪୫ ଏମ୍ବାଟିଏ “ନାଜେ ଆମ୍ବାଆୟି ତୀଗାତେ” ଇଞ୍ଜାଁ ଜୀସୁ ଖେଚେସି ?

* ୮:୪୧ ୮:୪୧ ସିନଗଗ୍

ସାମା ବାରେଜାଣା ଆଏ ଇଞ୍ଜାଲିଏ, ପିତର ଏଲେଇଚେସି, “ଏ ଗୁରୁ ଲକୁ ବାରେ ମୁହେଁ ମୁହେଁ ଆହିମାନେରି ।”

୪୭ ସାମା ଜୀସୁ ଏଲେଇଚେସି, “ନାଞ୍ଜେ ଆମ୍ବାଆୟିମା ଡୀଗାଡେ, ଇତିହୁଁ ନା ଡାଣାଟି ର ବାଡ଼ୁୟୁ ହଡ଼ାକି ନାନୁ ପୁଚେଏଁ ।” ୪୭ ଏମ୍ବାଟିଏ ଏ ଇୟା ଖାହାନା ଅଣ୍ପିତେ ନାନୁ ଅଡ଼େ ଡଗୁନା ମାଞ୍ଜାଲି ଆଡ଼ଅଁ ଇଞ୍ଜୁଁ ଅଣ୍ପାଦା ଆଜିତାକି ତାରା ତାରା ଆହୁଁ ଜୀସୁ କଡାଣା ରିହାନା, ଏନାଆଁତାକି ଡୀଗିତେ ଇଞ୍ଜା ଦେବୁଣିଏ ଏନିକଁ ନେହୁଁ ଆଡେ, ବାରେ ଲକୁ ନକିତା ଖେସ୍ତେ । ୪୮ ଏମ୍ବାଟିଏ ଜୀସୁ ଏଦାନି ଏଲେଇଚେସି, “ମାଞ୍ଜା ନୀ ନାମୁ ନିଞ୍ଜେ ନେହୁଁ କିହାମାଞ୍ଜାନେ, ହିଡ଼ଡ଼ିଟି ହାଲାମୁ ।”

୪୯ ଜୀସୁ ଇ କାତା ଖେସିମାଟି ବେଲାତା ଜୀହୁଦି ଲକୁଡି କୁଟମି ଇଲୁଡି† କାଜାଣା ଇଜଟି ରଅସି ଖାହାନା ଜାୟିରସଇଁ ଏଲେଇଚେସି, “ନୀ ମାଞ୍ଜା ହାହାହାଚେୟିଏ ଗୁରୁଇଁ ଅଡ଼େ କସ୍ତୁ ହାଆନିଦେହେଁ ।”

୫୦ ସାମା ଜୀସୁ ଏ କାତା ଖେଞ୍ଜାନା ଏଞ୍ଜାଣାଇଁ ଏଲେଇଚେସି, “ଆଜାଆନି ନାମାମୁ ଏଡ଼ି ନୀଡିନେ ।”

୫୧ ଅଡ଼େ ଜୀସୁ ଇଜ ଖାହାନା ପିତର, ଜହନ ଅଡ଼େ ଜାକୁବ ଇଞ୍ଜା ପଦାନି ତାମି ଆବା ଇୟାନି ପିସ୍ପେ ଆମ୍ବାଆରାଇଁ ବିଡ୍ରା ହାଜାଲି ହାଆଡେସି । ୫୨ ସାମା ବାରେଜାଣା ଡାହି ଡାହିଁ ବକତା ଖେଚା କଡିମାରୁ । ଏମ୍ବାଟିଏ ଜୀସୁ ଏଲେଇଚେସି, “ଡୀଆଡୁ; ଏଡ଼ି ହାହାହିଲେଏ, ସାମା ଡୁରାମାନେ ।”

୫୩ ସାମା ପଦା ହାହାମାନାଣି ପୁଞ୍ଜାନା ଏଞ୍ଜି ଏଞ୍ଜାଣାଇଁ କାକ୍‌ହୁ । ୫୪ ସାମା ଜୀସୁ ପଦାନି କେୟୁ ଆସାନା ହାଟାହାଁ ଏଲେଇଚେସି, “ଆକେ ପଦା, ନିଞ୍ଜାମୁ ।” ୫୫ ଏମ୍ବାଟିଏ ପଦାନି ଜୀସୁ ଖେଣ୍ଡା ଖାଡେ ଅଡ଼େ ଏ ଦେବୁଣିଏ ନିଞ୍ଜିତେ, ଇଞ୍ଜା ଇଚାଣି ଡିଞ୍ଜାଲି ହୀଦୁ ଇଚେସି । ୫୬ ଏମ୍ବାଟିଏ ତାମି ତାଲି ତାଞ୍ଜି କାବାଆଡୁ; ସାମା ଇ ପଦା ନେହୁଁ ଆଡାଣି ଆମ୍ବାଆରାଇଁ ଖେହୁଆଡୁ ଇଞ୍ଜୁଁ ଏଞ୍ଜାସିକାଣି ହୁକୁମି ହାଡେସି ।

† ୮:୪୯ ୮:୪୯ ସିନଗରୁ



ଜୀସୁ ବାରଜାଣା ସୀସୁୟାଁଇଁ ପାଣ୍ଡିନାୟି

(ମାତି ୧୦:୫-୧୫; ମାର୍କ ୬:୭-୧୩)

୧ ଏଚେଟିଏ ଜୀସୁ ବାରଜାଣାତି ହାଟାନା ରୁଣ୍ଡା କିହାନା ଏଝାରାଇଁ ବାରେ ବୁଡୁୟାଁ ଲାକ ଅଡ଼େ ରଗଟି ନେହଁ କିହାଲି ବାଡ଼ୁୟୁ ଅଡ଼େ ଅଦିକାରା ହୀତେସି । ୨ ଅଡ଼େ ଏଝାସି ଏଝାରାଇଁ ମାହାପୁରୁତି ରାଜିତି କାତା ଝେକହାଲି ଅଡ଼େ ରଗ ଗାଟାରାଇଁ ନେହଁ କିହାଲି ପାଣ୍ଡିତେସି ୩ ଇଞ୍ଜା ଏଝାରାଇଁ ଏଲେଇଚେସି, “ମୀରୁ ହାଜାଲିତାକି କୁତା ବାଡ଼ଗା କି ମଣା କି ରୁଟି କି ଏନି ଟାକାୟାଁ ଜିକେଏ ଅଆଦୁ, ଅଡ଼େ ଜଡ଼େକା ସକାୟାଁ ଜିକେଏ ଅଆଦୁ । ୪ ଅଡ଼େ ମୀରୁ ଆମିନି ଇଜ ହାଜେରି, ଏମ୍ବାଟି ଝେଣ୍ଡାହାନି ପାତେକା ଏମ୍ବାଆଁ ଡ଼ୟାଦୁ; ୫ ଅଡ଼େ ଏଚେକା ଲକୁ ମିଜେ ଆବଅରି ଏଝାରି କପାଟି ସାକି ହାହାଲି ଏ ଗାଡ଼ାଟି ହଟା ଝାନାଟି ମୀ କଡାତି ଦୁଡ଼ି ହାଣ୍ଡାଁନା ଝାଦୁ ।”

୬ ଏମ୍ବାଟିଏ ଏଝାରି ହାଜାନା ସାରିଝାକି ନେହଁ କାରୁ ଝେକହୁହଁ ରଗ ଗାଟାରାଇଁ ନେହଁ କିହୁହଁ ନାୟୁଁ ନାୟୁଁତା ରେଚେରି ।

ହେରଦ ରାଜା ବିଲକି ଆନାୟି

(ମାତି ୧୪:୧-୧୨; ମାର୍କ ୬:୧୪-୨୯)

୭ ଏମ୍ବାଟିଏ ଏ ଦେସାତି ରାଜା ହେରଦ ଇ ବାରେ କାତା ଝେଞ୍ଜାନା କାବା ଆଡ଼େସି, ଇଚିହଁ ବାପ୍ତିସ୍ତା* ହାନି ଜହନ ହାଡ଼ାରି ତାଣାଟି ନିଜାମାନେସି ଇଞ୍ଜା ଆମ୍ବା ଆମ୍ବାଆରି ଏଲେଇଞ୍ଜିମାଚେରି; ୮ ଅଡ଼େ ଆମ୍ବା ଆମ୍ବାଆରି ଏଲିୟ ତଞ୍ଜା ଆହାମାନେସି ଇଞ୍ଜା ଏଟକାତାରି ତଲିକାଲାତି ମାହାପୁରୁ ଅଣପୁତି ବଲୁ ଝେହୁନାରି ବିତ୍ରାଟି ରଅସି ନିଜାମାନେସି ଇଞ୍ଜା ଝେସିମାନେରି । ୯ ସାମା ହେରଦ ଏଲେଇଚେସି, “ଜହନତି ତାୟୁଁ ମାରତ ଦାଟା ମାନାୟି, ସାମା ଆମ୍ବାଆରି କାତା ମାର ଝେଞ୍ଜିମାନାୟି ଏଝାସି ଆମ୍ବାଆସି ?” ଅଡ଼େ ଏଝାସି ଏଝାଣାଇଁ ମେସାଲି ମନ କିହିମାଚେସି ।

☆ ୯:୫ ୯:୫ କାମା ୧୩:୫୧ ☆ ୯:୫ ୯:୫ ଲୁକ ୧୦:୪-୧୧ ☆ ୯:୭ ୯:୭ ମାତି ୧୭:୧୪; ମାର୍କ ୮:୨୮; ଲୁକ ୯:୧୯ * ୯:୭ ୯:୭ ମୁଞ୍ଜିନାୟି

ଜୀସୁ ପାସାମାଣା ଲକୁଣି ତୀହନାୟି

(ମାତି ୧୪:୧୩-୨୧; ମାର୍କ ୬:୩୦-୪୪; ଜହ ୬:୧-୧୪)

୧୦ ତାୟୁ ପାଣୁଝି ଆହାମାଚାରି ଖାହାନା ଏନା ଏନାଆଁ କିହାମାଚେରି, ଏ ବାରେ ଏଝାଣାଇଁ ଖେସ୍ତେରି । ଅଡ଼େ ଏଝାସି ଏଝାରିତଲେ ଏଟକା ଆହାନା ବେଡ଼ସାୟିଦା ଦରୁଗାଟି ଗାଡ଼ାତା ହାଚେରି । ୧୧ ସାମା ଲକୁ ଏଦାଆଁ ପୁଞ୍ଜାନା ଏଝାଣି ଜେଚ ଜେଚ ହାଚେରି; ଇଞ୍ଜା ଏଝାସି ଏଝାରାଇଁ କାର୍ମା ଆହା ଆବାନା ମାହାପୁରୁ ରାଜିତି କାତା ଖେସ୍ତେସି, ଅଡ଼େ ଏମିନିଗାଟାରି ରଗଟି ନେହୁଁ ଆନାୟି ମାଚେ, ଏଝାରାଇଁ ନେହୁଁ କିତେସି ।

୧୨ ଏଚେଟିଏ ମିଡ଼ଅଲ୍ଲା ଆହାଲି ମାଟ୍‌ହେ; ଏଚେଟିଏ ବାରଜାଣା ସୀସୁୟାଁ ତାନି ତାଣା ଖାହାନା ଏଲେଇଚେରି, “ଲକୁ ଏନିକିଁ ନାସକା ଅଡ଼େ ଗାଡ଼ାତା ହାଜାନା ବାସାଗାୟୁ ଅଡ଼େ ତିଞ୍ଜାଲି କାଦି ପାରିନେରି, ଏଦାଆଁତାକି ଏଝାରାଇଁ ହେଲ ହୀମୁ ଇଚିହୁଁ ମାର ଲକୁ ହିଲାଆ ଗାୟୁତା ମାନାୟି ।”

୧୩ ସାମା ଏଝାସି ଏଝାରାଇଁ ଏଲେଇଚେସି, “ମୀରୁ ଏଝାରାକି ତିଞ୍ଜାଲି ହୀଦୁ ।”

ଏଝାରି ଏଲେଇଚେରି, “ମା ତାଣା ପାସାଗଟା ରୁଟି ଇଞ୍ଜା ରୀ ମୀଣକା ପିସପେ ଆଗାଡ଼ା ହିଲାତ; ଏନାଆଁ ମାର ହାଜାନା ଇ ବାରେତାକି କାଦି କଡ଼ିନାୟି ?” ୧୪ ଇଚିହୁଁ ଏଝାରି ପାସାମାଣା ଆବାୟାଁ ମାଚେରି ।

ଇଞ୍ଜା ଏଝାସି ତାନି ସୀସୁଣି ଏଲେଇଚେସି, “କଡ଼େଦସ ଜାଣା ଲାକା କୁଟିକିଦୁ ।”

୧୫ ଏଚେଟିଏ ଏଝାରି ଏଲେକିହୁଁଏ ବାରେତି କୁଟିକିଚେରି । ୧୬ ଅଡ଼େ ଏଝାସି ପାସାଗଟା ରୁଟି ଅଡ଼େ ରୀ ମୀଣକାଣି ଆସାନା ଲାକପୁରୁ ଖାକି ସିନିକିହାନା ବର ହୀତେସି, ଇଞ୍ଜା ରୁଟି ଡ଼ିକ୍‌ହାନା ଲକୁକି ହାସ୍‌ପାଲି ସୀସୁୟାଁକି ହୀତେସି । ୧୭ ଏଚେଟିଏ ବାରେଜାଣା ତିଞ୍ଜା ପାଞ୍ଜିଚେରି, ଅଡ଼େ ହାରିତାଣି ବାର ତାଲି ରୁଟି କୁଡ଼ି କିଚେରି ।

ଜୀସୁଇଁ ପିତର କ୍ରୀସ୍ତ ଇଞ୍ଜୁଁ ଝେକ୍‌ନାୟି

(ମାତି ୧୭:୧୩-୧୯; ମାର୍କ ୮:୨୭-୨୯)

୧୮ ର ଦିନା ଜୀସୁ ରଥସିଏ ପ୍ରାତାନା କିନି ବେଲାତା ସୀସୁୟାଁ ଏଞ୍ଜାରିତଲେ ମାଚେରି, ଅଡ଼େ ଏଞ୍ଜାସି ଏଞ୍ଜାରାଇଁ ଝେଚେସି, “ନାନୁ ଆମ୍ବାଆତେଏଁ ଇଞ୍ଜିଁ ଲକୁ ଏଲେଇଞ୍ଜିମାନେରି ?”

୧୯ ☆ଏଚେଟିଏ ଏଞ୍ଜାରି ଏଲେଇଚେରି, “ଆମ୍ବାଆରି ବାପ୍ତିସ୍ମା ହୀନି ଜହନ, ଆମ୍ବାଆରି ଏଲିୟ, ଅଡ଼େ ଆମ୍ବାଆରି ତଲିକାଲାତି ମାହାପୁରୁ ଅଣ୍ଟପୁତି ବଲୁ ଝେହନାରି ବିତ୍ରାଟି ରଥସି ନିଙ୍ଗାମାନେସି ।”

୨୦ ☆ଏଞ୍ଜାସି ଏଞ୍ଜାରାଇଁ ଏଲେଇଚେସି, “ନାନୁ ଆମ୍ବାଆତେଏଁ ମୀରୁ ଏନାଆଁ ଇଞ୍ଜିଁ ମାଞ୍ଜେରି ?”

ପିତର ଏଲେଇଚେସି, “ନାନୁ ମାହାପୁରୁତି କ୍ରୀସୁ ।”

ଜୀସୁ ତାନି ଦୁକୁ ଅଡ଼େ ହାକିତି କାତା ଝେହନାୟି

(ମାତି ୧୭:୨୦-୨୮; ମାର୍କ ୮:୩୦-୯:୧)

୨୧ ଏଚେଟିଏ ଏଞ୍ଜାସି ଏଞ୍ଜାରାଇଁ ଆମ୍ବାଆରାଇଁ ଝେହଆଦୁ ଇଞ୍ଜିଁ ଜାଣ୍ଡେ କିହଁ ହୁକୁମି ହୀତେସି, ୨୨ “ମାଣ୍ଡସି ମୀରୁଏସି ହାରେକା ଦୁକୁ ପାଣ୍ଡନାୟି ମାନେ ଇଞ୍ଜାଁ ଲକୁତି କାଜାରି, କାଜା ପୂଜେରାଙ୍ଗା ଇଞ୍ଜାଁ ମେରାପୁନାରି ତାଣାଟି ଅପାଆନା ଏଞ୍ଜାଣାଇଁ ପାୟିନେରି, ଇଞ୍ଜାଁ ତାନି ଦିନାଟିଏ ନିଙ୍ଗିନେସି ।”

୨୩ ☆ଏଚେଟିଏ ଏଞ୍ଜାସି ବାରେତି ଏଲେଇଚେସି, “ଆମ୍ବାଆସି ନା ଜେତ ତାକାଲି ମନ କିନେସି, ଏଞ୍ଜାସି ତାଙ୍ଗେ ଅପାଆନା ବାରେଦିନା ତାନି କ୍ରୁସ ଡେକାନାହାଁ ନା ଜେତ ତାକାପେସି । ୨୪ ☆ଇଚିହଁ ଆମ୍ବାଆସି ଜାହାରା ଜୀଝୁ ଗେଲପାଲି ମନ କିନେସି ଏଞ୍ଜାସି ନାସା କିନେସି; ସାମା ଆମ୍ବାଆସି ନା ତାକି ନିଜେତି ଜୀଝୁ ନାସା କିନେସି ଏଞ୍ଜାସି ଗେଲପି କିହାକଡିନେସି । ୨୫ ଅଡ଼େ ମାଣ୍ଡସି ଇ ଦାରଡିତା ମାନାଣି ବାରେ ମେଡି କିହାନା ତାନି ଜୀଝୁତି ନାସା କିନେସି, ଇଚିହଁ ଏଞ୍ଜାଣାକି ଏନି ଲାବା ? ୨୬ ଇଚିହଁ ଆମ୍ବାଆସି ନାଙ୍ଗେତାକି ଅଡ଼େ ନା କାତାତାକି ଲାଜା ଆଡେସି, ମାଣ୍ଡସି ମୀରୁଏସି ତାନି କାଜାପାଣା ତଲେ ଇଞ୍ଜାହାଁ ମାହାପୁରୁ ଆବା ଅଡ଼େ ତାନି ସୁଦୁଗାଟି ଦୂଡୁୟାଁ ତଲେ କାଜାପାଣାଟି ଝାଡେସି ଏଚିବେଲା ଏଞ୍ଜାସି ଜିକେଏ ଏଞ୍ଜାଣି ତାକି ଲାଜା

☆ ୯:୧୯ ୯:୧୯ ମାତି ୧୪:୧,୨; ମାର୍କ ୭:୧୪,୧୫; ଲୁକ ୯:୭,୮ † ୯:୧୯ ୯:୧୯ ମୁଞ୍ଜିନାୟି
☆ ୯:୨୦ ୯:୨୦ ଜହ ୭:୬୮,୬୯ ☆ ୯:୨୩ ୯:୨୩ ମାତି ୧୦:୩୮; ଲୁକ ୧୪:୨୭ ☆ ୯:୨୪ ୯:୨୪ ମାତି ୧୦:୩୯; ଲୁକ ୧୭:୩୩; ଜହ ୧୨:୨୫

ଆନେସି । ୨୭ ସାମା ନାନୁ ମିଙ୍ଗେ ସାତା ଝେସିମାଞ୍ଜାଇଁ, ମାହାପୁରୁତି ରାଜି ମେହୁଆ ପାତେକା ଇମ୍ପାଆଁ ନିଚାମାନାରି ଏଚରଜାଣା ହାଅରି ।”

ଜୀସୁ ଅର ଖାଣା ଆନାୟି

(ମାତି ୧୭:୧-୮; ମାର୍କ ୯:୨-୮)

୨୮ ଈ କାତା ଝେସାନା ଆଚାଦିନା ହାଜାଲିଏ ପିତର, ଜହନ ଅଡେ ଜାକୁବଇଁ ଅହଁ ହାଜାନା ପ୍ରାତାନା କିହାଲି ହରୁତା ହାଚେସି । ୨୯ ଅଡେ ଏଝାସି ପ୍ରାତାନା କିହିମାଚାଟି ତାନି ମୁମୁଡୁଁ ଖାଣା ତିରିମୁହେ ଇଞ୍ଜାଁ ତାନି ହିମ୍ପୁରି ଦବଲା ଆହାନା ହାରେକା ଉଜେଡ଼ି ଆଡେ । ୩୦ ମସା ଅଡେ ଏଲିୟ ଏଝାଣିତଲେ କାତା ଆହିମାଚେରି; ୩୧ ଏଝାରି ଗାଝୁରମିଟି ତଞ୍ଜାଆହାନା ଜୀସୁ ଜିରୁସାଲମତା ହାନିକାତା ଜଲୁକି ଆହିମାଚେରି । ୩୨ ଏଚିବେଲା ପିତର ଅଡେ ତାନି ତଣେସିଙ୍ଗାକି ଗାଡ଼ି ଇଦାକାଣକା ହଡ଼ିମାତୁ; ସାମା ଏଝାରି ଇଦାଟି ନିଙ୍ଗାଲିଏ ତାନି ଗାଝୁରମି ଇଞ୍ଜାଁ ଏଝାଣିତଲେ ରିଆରି ନିଚାମାନାଣି ମେସ୍ପେରି । ୩୩ ଇଞ୍ଜାଁ ଏଝାରି ତାଣାଟି ହାଜିମାଚାଟି ପିତର ଜୀସୁଇଁ ଏଲେଇଚେସି, “ଗୁରୁ ମାମ୍ବୁ ଇମ୍ପାଆଁ ମାନାୟି ନେହେଁ; ମାମ୍ବୁ ଇମ୍ପାଆଁ ତାନିଗଟା ଗୁଡାୟାଁ କେପିନମି, ନିଙ୍ଗେତାକି ରଣ୍ଡାଆଁ, ମସାକି ରଣ୍ଡାଆଁ ଅଡେ ଏଲିୟକି ରଣ୍ଡାଆଁ ।” ସାମା ତାନୁ ଏନାଆଁ ଇଞ୍ଜିମାଚେସି ତାନୁଏ ପୁଞ୍ଜି ହିଲାଆଡେସି ।

୩୪ ଏଝାସି ଏଲେଇଞ୍ଜି ମାଚାଟି ଇଚାୟି ହାଗୁ ଦୁନ୍ଦା ଝାହାନା ଏଝାରାଇଁ ପୁକ୍ତହେ, ଇଞ୍ଜାଁ ଏଝାରି ଦୁନ୍ଦାତା ହଡ଼ି ମାଚାଟି ଆଜିତେରି । ୩୫ ☆☆ଇଞ୍ଜାଁ ଏ ଦୁନ୍ଦାଟି ଈ ହାଡା ଝାଡେ, “ଇଝାସି ନା ମାର୍‌ଏସି, ନାନୁ ଆଚିତାସି, ଇଝାଣି ବଲୁ ଝେଞ୍ଜୁ ।”

୩୬ ଏଲେଇଞ୍ଜି ଝେସ୍ତ୍ରୁ ତାୟୁ ଜୀସୁ ରଅସିଏ ତଞ୍ଜାଆଡେସି । ଏଝାରି ଈ କାତାତାକି ପାଲେଏ ମାଞ୍ଜାନା, ଏନା ଏନାଆଁ ମେସାମାଚେରି ଏ ବେଲାତା ଆମ୍ବାଆରାଇଁ ଜିକେଏ ଝେହୁଆଡେରି ।

ଜୀସୁ ବୁଡୁ ଆଲଗାମାଟି କକାଣାଇଁ ନେହଁ କିନାୟି

(ମାତି ୧୭:୧୪-୧୮; ମାର୍କ ୯:୧୪-୨୭)

☆ ୯:୩୫ ୯:୩୫ ମାତି ୩:୧୭; ୧୨:୧୮; ମାର୍କ ୧:୧୧; ଲୁକ ୩:୨୨ ☆ ୯:୩୫ ୯:୩୫ ୨ପିତ ୧:୧୭,୧୮

୩୭ ଅଡ଼େ ର ନେରୁ ହରୁଟି ରେଚା ଖାହାଲିଏ ହାରେକା ଲକୁ ଏଝାଣାଇଁ ବେଟା ଆୟାଲି ଖାଡ଼େରି । ୩୮ ଅଡ଼େ ଏ ମାନ୍ଦା ଲକୁ ବିତ୍ରାଟି କାଜା ଗିୟାଁତଲେ ହାଟାନା ଏଲେଇଚେସି, “ଏ ଗୁରୁ ନାନୁ ବାତିମାଲିମାଞ୍ଜାଇଁ ନା ମୀରଏଣାଇଁ କାର୍ମା ଆମ୍ବୁ, ଇତିହୁଁ ଏଝାସି ନା ରଣ୍ଡିଏ ମୀରଏସି; ୩୯ ଏଝାଣାଇଁ ର ବୁଡୁ ଆଲଗାମାନେ, ଇଞ୍ଜା ଏଝାସି ପେଦରାହାଁ ଦେବୁଣିଏ କିରଡ଼ି ମାନେସି, ଇଞ୍ଜା ଏଝାଣାଇଁ ଇଲେକିଁ ବୁମିତା ତୁକହାନା ଗୁଡ଼ିଟି ପମ୍ବୁଲି ହପ୍ପୁହି ମାନେ, ଇଞ୍ଜା ଏଝାଣାଇଁ ଗାତି ବାଦା କିହାନା ଏଝାଣି ତାଣାଟି କାକୁଲିଟି ହଟାହାନେ । ୪୦ ନାନୁ ବୁଡୁଟି ପସ୍ପି କିହାଲି ନୀ ସୀସୁୟାଁ ବାତିମାଲିତେସି, ସାମା ଏଝାରି ପସ୍ପି କିହାଲି ଆଡ଼ାଆତେରି ।”

୪୧ ଜୀସୁ ଏଲେଇଚେସି, “ଆଡ଼େ ନାମାଆଗାଟି ଏଟକା ଜିରୁ ଆହୁନି କୁଡ଼ା, ନାନୁ ଅଡ଼େ ଏଚେକା ମୀ ତଲେ ମାଞ୍ଜାନା ମୀ କାତା ଅରହାଇଁ ? ନୀ ମୀରଏଣାଇଁ ଇମ୍ପାଆଁ ତାମ୍ବୁ ।”

୪୨ ବୁଡୁ ଆଲଗାମାଟି କକାସି ଖାହିମାଟାଟି ବୁଡୁ ଏ କକାଣାଇଁ ବୁମିତା ତାଡ଼ି କିହାନା ତ୍ରେପହାତୁସ୍ତେ, ସାମା ଜୀସୁ ଏ ପଲ୍ଲଆ ବୁଡୁଟି ଦାକା ହୀତେସି ଇଞ୍ଜା କକାଣାଇଁ ନେହୁଁ କିହାନା ତାମି ଆବା କେୟୁତା ହେର୍ପିତେସି । ୪୩ ଏଚେଟିଏ ବାରେ ଲକୁ ମାହାପୁରୁଟି ବାଡ଼ୁୟୁ ମେସାନା ଜାଗଲା ଆଡ଼େରି । ସାମା ଏଝାସି କିହାମାନି ବାରେ କାମାତାକି ଜାଗଲା ଆହିମାଟାକି ଜୀସୁ ତାନି ସୀସୁୟାଁଇଁ ଏଲେଇଚେସି ।

ଜୀସୁ ତାନି ହାକିତି କାତା ଅଡ଼େ ଖେଣ୍ଡେ ଖେହନାୟି

(ମାତି ୧୭:୨୨, ୨୩; ମାର୍କ ୯:୩୦-୩୨)

୪୪ “ଇ ବାରେ କାତା ମୀ କୀର୍କା ଅତାନା ଖେଞ୍ଜୁ; ଇତିହୁଁ ମାଣ୍ଡିସି ମୀରଏସି ସାତୁୟାଁ କେୟୁତା ହେର୍ପିଆନେସି ।” ୪୫ ସାମା ଏଝାରି ଏ କାତା ତେଲହାଆତେରି, ଏଝାରି ତେଲହାଲି ଆଡ଼ାଆରେରୁ ଏଝାରି ତାଣାଟି ତୁଗୁମାଚେ, ଇଞ୍ଜା ଏଝାରି ଏ କାତା ଜିକେଏ ଜୀସୁଇଁ ଖେଞ୍ଜାଲି ଆଜିମାଚେରି ।

ବାରେକିହାଁ କାଜାସି ଆମ୍ବାଆସି

(ମାତି ୧୮:୧-୫; ମାର୍କ ୯:୩୩-୩୭)

୪୭ ☆ଏଞ୍ଜରୀ ବିତ୍ରାଟି ଆମ୍ବାଆସି କାଜାସି, ଇ କାତାତାକି ଏଞ୍ଜରୀ ବିତ୍ରା ବାଦିବାଦା ଆଡେରି । ୪୭ ସାମା ଜୀସୁ ଏଞ୍ଜରୀ ବିତ୍ରା ବାଦିବାଦା ଆହିମାନାଣି ପୁଞ୍ଜାନା, ର ଉଣା କକାଣାଇ ତାନି ନକିତା ନିପହାନା ଏଞ୍ଜରାଇଁ ଏଲେଇଚେସି, ୪୮ ☆“ଆମ୍ବାଆସି ନା ଦରୁଟି ଇ ଉଣା କକାଣାଇ ଆବିନେସି, ଏଞ୍ଜାସି ନାଜେ ଆବାନେସି, ଅଡେ ଏଞ୍ଜାସି ନାଜେ ପାଣ୍ଡାତାଣାଇ ଆବିନେସି; ଇଚିହଁ ମୀ ବିତ୍ରାଟି ଆମ୍ବାଆସି ବାରେକିହଁ ଉଣା ଏଞ୍ଜାସି କାଜାସି ।”

ମୀ କପାଟି ନିଜାଆ ଗାଟାସି ମୀ ତଲେତାସି
(ମାର୍କ ୯:୩୮-୪୦)

୪୯ ଏଚେଟିଏ ଜହନ ଏଲେଇଚେସି, “ଗୁରୁ, ମାମ୍ବୁ ନୁୀ ଦରୁଟି ବୁଡୁୟାଁ ପେରହି ମାଗାଣି ମେସୁମି ଇଞ୍ଜା ଏଞ୍ଜାସି ମା ତଲେ ନୀ ଜେଚ ଖାଆଲିଏ କାହିକିତମି ।”

୫୦ ସାମା ଜୀସୁ ଏଞ୍ଜରାଇଁ ଏଲେଇଚେସି, “କାହିକିଆଦୁ, ଇଚିହଁ ଆମ୍ବାଆସି ମୀ କପାଟି ନିଜା ହିଲଅସି ଏଞ୍ଜାସି ମୀ ତଲେତାସି ।”

ସମିରଣି ନାସକାଣାଁ ଜୀସୁଇଁ ଆବାଆତାୟି

୫୧ ଏଚିବେଲା ଜୀସୁ ଲାକପୁରୁ ହାନି ବେଲା ଏଗାଞ୍ଜାହିମାତାକି ଏଚିବେଲା ଜୀସୁ ଜିରୁସାଲମତା ହାଜାଲି ମନତି ତୀରି କିତେସି ।

୫୨ ଅଡେ ତାନି ନକେଏ କସକାଣି ପାଣ୍ଡିତେସି, ଏଞ୍ଜରୀ ହାଜାନା ର ସମିରଣ ନାୟୁତା ଜୀସୁ ଖାଚେସି ଇଞ୍ଜା ଜାଗ୍ରାତା କିହାନା କାଡେରି;

୫୩ ସାମା ଏଞ୍ଜାସି ଜିରୁସାଲମତା ହାଜାଲି ମନ କିହାମାନେସି ଇଞ୍ଜା ପୁଞ୍ଜାନା ଏଞ୍ଜାଣାଇଁ ଆବାଆଡେରି । ୫୪ ଇଦାଆଁ ମେସାନା ଜାକୁବ ଅଡେ ଜହନ ଇ ରୀ ସୀସୁୟାଁ ଏଲେଇଚେରି, “ଏ ପ୍ରବୁ ଏଲିୟ ଏନିକଁ ଏଲେଇଞ୍ଜାମାଚେସି, ଏଲେକିହଁଏ ହାଗୁଲାକଟି ହିଚୁ ରିହାନା ଏଞ୍ଜରାଇଁ ନାସା କିପେ, ଏଲେଇଞ୍ଜାଲି ନୀ ମନ ମାନେକି?”

୫୫ ସାମା ଏଞ୍ଜାସି ଖେଣ୍ଡେ ସିନିକିହାନା ଏଞ୍ଜରାଇଁ ଲାଗାନା ଏଲେଇଚେସି, “ମୀରୁ ଏନିଲେହେତି ଜୀସୁ ଗାଟାଡେରି, ମୀରୁ ପୁଞ୍ଜାହିଲଅଡେରି ମାଣ୍ଡିସି ମୀରଏସି ମାଣ୍ଡିସିୟାଁତି ଜୀସୁ ନାସା କିହାଲି

☆ ୯:୪୭ ୯:୪୭ ଲୁକ ୨୨:୨୪ ☆ ୯:୪୮ ୯:୪୮ ମାତି ୧୦:୪୦; ଲୁକ ୧୦:୧୭; ଜହ ୧୩:୨୦

ଝାଆନା ଗେଲ୍‌ପାଲି ଝାହାମାନେସି । ୫୬ ଏଚେଟିଏ ଏଝାରି ଅର ନାୟୁତା ହାଚେରି ।”

ଜୀସୁତି ସୀସୁ ଆହାଲି ପାଡ଼ା ଆନାୟି

(ମାତି ୭:୧୯-୨୨)

୫୭ ଏଝାରି ଜିରୁତା ହାଜିମାଚାଟି ରଅସି ଝାହାନା ଜୀସୁଇଁ ଏଲେଇଚେସି, “ନୀନୁ ଆମ୍ବିୟା ହାଜି, ନୀନୁ ଜିକେଏ ନୀ ତଲେ ଝାଲ୍ ।”

୫୮ ଜୀସୁ ଏଝାଣାଇଁ ଏଲେଇଚେସି, “ନାକାୟାକି ତ୍ତୟିନି ପାଝୁୟାଁ ମାନୁ, ହାଗୁ ଲାକ ଉମ୍ବିନି ପଟାୟାକି ବାସାଟାୟୁ ମାନେ, ସାମା ମାଣ୍‌ସି ମୀର୍‌ଏଣାକି ତାୟୁଁ ତୁନର୍‌ହାଲି ଟାୟୁ ହିଲେଏ ।”

୫୯ ଇଞ୍ଜା ଏଝାସି ଅଡ଼େ ରଅଣାଇଁ ଏଲେଇଚେସି, “ନା ଜେଚ ଝାମୁ ।” ସାମା ଏଝାସି ଏଲେଇଚେସି, “ପ୍ରୁ ନକେଏ ହାଜାନା ନା ଆବାଇଁ ମାହ୍‌ଣିଣା ମୁସାଲି ହେଲ ହିୟାମୁ ।”

୬୦ ଜୀସୁ ଏଲେଇଚେସି, “ହାଡ଼ାରାଇଁ ତାମି ହାଡ଼ି ଲକୁଣି ମୁସାଲି ପିହ୍‌ଦୁ, ସାମା ମୀରୁ ହାଜାନା ମାହାପୁରୁ ରାଜିତି କାତା ଝେହ୍‌ଦୁ ।”

୬୧ ଅଡ଼େ ରଅସି ଝାହାନା ଏଲେଇଚେସି, “ପ୍ରୁ ନୀନୁ ଜେଚ ଝାଲ୍ ସାମା ନକେଏ ଇଜତି ଲକୁ ତାଣାଟି ହେଲ ଅହାଲି ହିୟାମୁ ।”

୬୨ ସାମା ଜୀସୁ ଏଝାଣାଇଁ ଏଲେଇଚେସି, “ଆମ୍ବାଆସି ନାଟେଲି କେୟୁତା ଆସାନା ତାୟୁଝାକି ସିନିକିନେସି ଏଝାସି ମାହାପୁରୁ ରାଜିତା ପାଡ଼ା ଆଅସି ।”

୧୦

ଜୀସୁ ତାନିକଡ଼ି ବାରଜାଣାତି ପାଣ୍ଡିନାୟି

୧ ଏମ୍ବାଟିଏ ପ୍ରୁ ଅଡ଼େ ତାନିକଡ଼ି ବାରଜାଣାତି ଆଚାନା ତାନୁ ଆମିନି ଗାଡ଼ା ଅଡ଼େ ନାୟକାଣାଁ ହାଜାଲି ମନ କିହାମାଚେସି, ଏ ନାୟକା ଅଡ଼େ ଗାଡ଼ାୟାଣା ରିଆରି ଲାକା କିହାଁ ପାଣ୍ଡିଚେସି । ୨ ଇଞ୍ଜା ଏଝାସି ଏଝାରାଇଁ ଏଲେଇଚେସି, “ପାଡ଼ି ହାରେକା ସାମା ଦାଃଆନାରି ଉଣା ଜାଣା; ଇଦାଆଁତାକି ଗୁଡ଼ିୟାତା କାମା କିନାରାଇଁ ପାଣ୍ଡାଲିତାକି

☆ ୧୦:୨ ୧୦:୨ ମାତି ୯:୩୭,୩୮

ଗୁଡ଼ିୟାତି ସାଧୁକାରିଙ୍କ ବାଡ଼ିମାଲୀଦୁ । ୩ ✨ମୀରୁ ହାଦୁ; ନାନୁ ମିଙ୍ଗ କ୍ଷାନ୍ତିୟା ବିତ୍ରା ମେଣ୍ଡା ତାଲୁକା ଲେହେଁ ମିଙ୍ଗେ ପାଣ୍ଡିମାଞ୍ଜାଳ ।
 ୪ ତାରୁୟା, ମଣା କି ସେପୁୟା ଜିକେଏ ଅଥାଦୁ, ଅଡେ ଜିରୁତା ଆମ୍ବାଆରାଲ୍ ଜହରା କିଆଦୁ । ୫ ଅଡେ ମୀରୁ ଆମିନି ଇଲୁତା ହଡ଼ଦେରି ନକେଏ ଇ ଇଲୁତାକି ହିଡ଼ଡ଼ି ଆପେ ଇଞ୍ଜୁ । ୬ ଅଡେ ଏ ଇଜ ହିଡ଼ଡ଼ିତି ମାଣ୍ଡି ରଅସି ମାତିହ୍ ମୀ ହିଡ଼ଡ଼ି ଏଞ୍ଜାଣାକି ଆପେ; ଅଡେ ହିଲାଆତିହ୍ ମୀ ହିଡ଼ଡ଼ି ମିଙ୍ଗେ ଖେଣ୍ଡେ ଖାନ୍ତେ । ୭ ✨ଇଞ୍ଜା ଏଞ୍ଜାରିତାଣା ଏନାୟି ମାନେ ଏଦାଆଁ ତିଞ୍ଜା ଉଣ୍ଡାନା ଏ ଇଜ ମାଞ୍ଜୁ, ଇତିହ୍ କାମାକିନାସି ତାନି କାମାତି ବୁତି ମେଡ଼ା ଆନାୟି ମାନେ । ଏ ଇଜ ପିସାନା ଅର ଇଜ ହାଲାଆଦୁ । ୮ ଅଡେ ଆମିନି ଗାଡ଼ାତା ହାଜେରି ଅଡେ ଲକୁ ମିଙ୍ଗେ ଅପାନେରି ଅଡେ ଏମ୍ବାଆଁ ଏନାଆଁ ତିଞ୍ଜାଲି ହିୟାନେରି ଏଦାଆଁ ତିଞ୍ଜୁ । ୯ ଏମ୍ବାଆଁ ମାନି ରଗ ଗାଟାରାଲ୍ ନେହ୍ କିଦୁ, ଅଡେ ଏଞ୍ଜାରାଲ୍ ଏଲେଇଞ୍ଜୁ ‘ମାହାପୁରୁତି ରାଜି ମୀ ତାଣା ଏଦାତେୟିଏ ।’ ୧୦ ✨ସାମା ମୀରୁ ଆମିନି ଗାଡ଼ାତା ହାଜେରି ଇଞ୍ଜା ଲକୁ ମିଙ୍ଗେ ଅପଅରି, ଏମ୍ବାତି ଆଂଗେଣିକାଟି ପାଙ୍ଗାତା ହାଜାନା ଏଲେଇଞ୍ଜୁ, ୧୧ ✨ମୀ ଗାଡ଼ାତି ଆମିନି ଦୁଡ଼ି ମା କଡ଼ାୟାଣା ଆଟାମାଟେ, ଏଦାଆଁ ଜିକେଏ ମିଙ୍ଗେ ତାକି ହାଣ୍ଡି ମାନମି; ସାମା ମାହାପୁରୁତି ରାଜି ଏଗାଞ୍ଜାହିମାନେ ଇଦାଆଁ ପୁଞ୍ଜୁ ।’ ୧୨ ✨ନାନୁ ମିଙ୍ଗେ ଖେସିମାଞ୍ଜାଲ୍, ନୀହାୟି ଦିନାତା ଏ ଗାଡ଼ାତି ଡଣ୍ଡ କିହାଁ ସଦମତି ଗାଡ଼ାତି ଡଣ୍ଡ ଉଣା କିଞ୍ଜିଆନ୍ତେ ।

ନାମାଆଗାଟି ନାସ୍‌କା
 (ମାତି ୧୧:୨୦-୨୪)

୧୩ ଆୟତା ଡଣ୍ଡ ପାଣ୍ଡିନି କରାଜିନ୍ ଅଡେ ବେଡ଼ସାୟିଦା ଇତିହ୍ ମୀ ତାଣା ଆମି ଆମିନି କାବାଆନି କାମାୟାଁ କିଞ୍ଜିଆହାମାନୁ, ଏ ବାରେ ସର ଅଡେ ସିଦନତା କିଞ୍ଜି ଆହାମାତିହ୍ ମା, ଏଞ୍ଜାରି ହାରେକା ଦିନା ନକେଏ ବାସ୍ତାୟାଁ ପରହାଁ ଦାରମ୍ପୁଡ଼ା କୁଗାନା ମନ୍ ଖେଟ୍‌ହେରିମା ।

✨ ୧୦:୩ ୧୦:୩ ମାତି ୧୦:୧୭ ✨ ୧୦:୭ ୧୦:୭ ୧କର ୯:୧୪; ୧ଡିମ ୫:୧୮ ✨ ୧୦:୧୦ ୧୦:୧୦ କାମା ୧୩:୫୧ ✨ ୧୦:୧୧ ୧୦:୧୧ ମାତି ୧୦:୭-୧୪; ମାର୍କ ୬:୮-୧୧; ଲୁକ ୯:୩-୫ ✨ ୧୦:୧୨ ୧୦:୧୨ ମାତି ୧୧:୨୪ ମାତି ୧୦:୧୫

୧୪ ଆଡ଼ିଜିକେଏ ନୀହାଁୟି ଦିନାତା ସର ଅଡ଼େ ସିଦନତି ଡଣ୍ଡ ଉଣା କିଞ୍ଚିଆନ୍ନେ । ୧୫ ଏ କପରନାହୁମ ନୀନୁ ଲାକପୁରୁ ପାତେକା ପାତାଆଦି ? ହାଡ଼ାରି ମାନି ରାଜିତା ମେଡ଼ପି ଆଦି ।”

୧୬ ☆ଜୀସୁ ଏଲେଇଚେସି “ଆମ୍ବାଆସି ମୀ କାତା ଝେନେସି, ଏଞ୍ଜାସି ନା କାତା ଝେନେସି, ଇଞ୍ଜା ଆମ୍ବାଆସି ମିଙ୍ଗେ ଅପଅସି ଏଞ୍ଜାସି ନାଙ୍ଗେ ଅପଅସି, ଅଡ଼େ ଆମ୍ବାଆସି ନାଙ୍ଗେ ଅପଅସି ଏଞ୍ଜାସି ନାଙ୍ଗେ ପାଣ୍ଡାତାଣାଇଁ ଅପଅସି ।”

ତାନିକଡ଼ି ବାରଜାଣା ଝେଣ୍ଡା ଝାନାୟି

୧୭ ଏମ୍ବାଟିଏ ତାନିକଡ଼ି ବାରଜାଣା ଝେଣ୍ଡା ଝାହାନା ରାହାଁଟି ଏଲେଇଚେରି, “ପ୍ରବୁ ବୁଡୁୟାଁ ଜିକେଏ ନୀ ଦରୁଟି ମା ଡ଼ଇକା ହେରପି ଆହିମାନୁ ।”

୧୮ ସାମା ଜୀସୁ ଏଞ୍ଜାରାଇଁ ଏଲେଇଚେସି, “ହାଗୁ ମିହୁନିଲେହେଁ ଲାକଟି ସୟତାନ ରିହିମାନାଣି ମେସ୍ତେଏଁ । ୧୯ ମେହୁଦୁ ନାନୁ ମିଙ୍ଗେ ରାସକା, କାଚାକୁପିୟାଁ ମୁହେଁ ତାକାଲି ଅଡ଼େ ସାଡୁଡ଼ି ବାରେ ବାଡ଼ୁୟୁ ମୁହେଁ ଜିକେଏ ଅଦିକାରା ହାହିମାଞ୍ଜାଇଁ, ଅଡ଼େ ଏନାୟି ଜିକେଏ ମିଙ୍ଗେ ନସ୍ତ କିହାଲି ଆଡ଼େଏ । ୨୦ ସାମା ପଲ୍ଲଆ ବୁଡୁୟାଁ ବାଡ଼ୁୟୁ ମୀ ଡ଼ଇକା ମାନେ ଇଞ୍ଜିଁ ରାହାଁ ଆଆଦୁ, ସାମା ମୀ ଦରୁ ଲାକପୁରୁ ରାସକି ଆହାମାନେ ଏଦାଆଁତାକି ରାହାଁ କିଦୁ ।”

ଜୀସୁତି ରାହାଁ

(ମାତି ୧୧:୨୫-୨୭; ୧୩:୧୭, ୧୭)

୨୧ ଏଚିବେଲା ଜୀସୁ ସୁଦୁଜୀଝୁ ତଲେ ରାହାଁ ଆହାନା ଏଲେଇଚେସି, “ଆବା ଲାକପୁରୁ ଅଡ଼େ ଦାରତିତି ପ୍ରବୁ, ନୀନୁ ବୁଦିଗାଟି ଲକୁତାଣା ଇ ବାରେ କାତା ଡ଼କୁହାନା ଉଣା କକାରି ତାଣା ତସାମାଞ୍ଜି, ଇଦାଆଁତାକି ନିଙ୍ଗେ ଜହରା କିହିମାଞ୍ଜାଇଁ; ଏ ଆବା ଇଦିଏ ନୀ ନକିତା ନେହାୟି ଆଡ଼େ ।”

୨୨ ☆“ନା ଆବାତି ବାରେ ଅଦିକାରା ନାଙ୍ଗେ ହେରପି ଆହାମାନେ; ଅଡ଼େ ମୀରଏସି ଆମ୍ବାଆସି, ଇଦାଆଁ ଆବା ପିସ୍ତେ ଆମ୍ବାଆସି

☆ ୧୦:୧୭ ୧୦:୧୭ ମାତି ୧୦:୪୦; ମାର୍କ ୯:୩୭; ଲୁକ ୯:୪୮; ଜହ ୧୩:୨୦ ☆ ୧୦:୨୨ ୧୦:୨୨ ଜହ ୩:୩୫; ଜହ ୧୦:୧୫

ପୁନଃ, ଅଡ଼େ ଆବା ଆମ୍ବାଆସି ଇଦାଆଁ ମୀରୁଏଣା ପିସ୍‌ପେ ଆମ୍ବାଆସି ପୁନଃ, ଇଞ୍ଜା ମୀରୁଏସି ଆମ୍ବାଆରି ତାଣା ଏଞ୍ଜାଣାକ୍ ତସାଲି ମନ କିନେସି, ଏଞ୍ଜାସିଦେଁ ପୁନେସି ।”

୨୩ ଅଡ଼େ ଜୀସୁ ତାମ୍ବୁ ସିନିକିହାନା ତାମି ସୀସୁୟାକ୍ ଏଟ୍‌କେଏ ଏଲେଇରେସି, “ହାରେକା ନେହେଁ ଏ କାଣକା ଏମିନିଗାଟାଣି ମେସିମାନୁ, ଏନାଆଁ ମୀରୁ ମେସିମାଞ୍ଜେରି । ୨୪ ଇତିହଁ ନାନୁ ମିଙ୍ଗେ ଖେସିମାଞ୍ଜାକ୍, ମୀରୁ ଏନା ଏନାଆଁ ମେସିମାଞ୍ଜେରି ଏ ବାରେ ହାରେକା ମାହାପୁରୁ ଅଣ୍‌ପୁତି ବଲୁ ଖେହନାରି ଅଡ଼େ ରାଜାୟା ମେସାଲି ମନ କିହାମାରେ, ସାମା ମେସାଲି ଆଡାଆତେରି; ଅଡ଼େ ମୀରୁ ଏନା ଏନାଆଁ ଖେଞ୍ଜିମାଞ୍ଜେରି, ଏ ବାରେ ଏଞ୍ଜାରି ଖେଞ୍ଜାଲି ମନ କିତେରି ସାମା ଖେଞ୍ଜାଲି ଆଡାଆତେରି ।”

ନେହଁ ସମିରଣତି ପୁଣ୍‌ମିକିନି କାତା

୨୪ ☆ମେହ୍‌ପୁ ର ମସାତି ମେରା ଜାପୁନାସି ଖାହାନା ଜୀସୁକ୍ ତାୟିପାରିକିହଁ ଖେରେସି, “ଏ ଗୁରୁ କାଲାକାଲାତି ଜୀଞ୍ଜୁ ବେଟାଆହାଲି ନାନୁ ଏନାଆଁ କିକ୍ ?”

୨୫ ଏରେଟିଏ ଜୀସୁ ଏଲେଇରେସି, “ମସାତି ମେରାତା ଏନାଆଁ ରାସ୍‌କି ଆହାମାନେ, ନୀନୁ ଏନିକ୍ ପଡ଼ଞ୍ଜି ଆହିମାଞ୍ଜି ?”

୨୬ ଏଞ୍ଜାସି ଏଲେଇରେସି, “ନୀନୁ ନୀ ବାରେ ହିୟାଁ, ବାରେ ଜୀଞ୍ଜୁ, ବାରେ ବାଡ଼ୁ ଅଡ଼େ ବାରେ ମନ ହାହାନା ପ୍ରବୁ ନୀ ମାହାପୁରୁକ୍ ଜୀଞ୍ଜୁନମ୍; ଅଡ଼େ ପାଡ଼ିତି ଲକୁଣି ନୀ ଜୀଞ୍ଜୁ ଲେହେଁ ଜୀଞ୍ଜୁ ନମ୍ ।”

୨୭ ଏରେଟିଏ ଜୀସୁ ଏଞ୍ଜାଣାକ୍ ଏଲେଇରେସି, “ନୀନୁ ନେହଁ କ୍ ଖେସାମାଞ୍ଜି; ଏଲେଏ କିମ୍ ଆତିହଁ ଏ ଜୀଞ୍ଜୁ ମେଡା ଆଦି ।”

୨୮ ସାମା ଏଞ୍ଜାସି ତାଙ୍ଗେ ତୀରିତାସି କିହାକତାଲି ମନ କିହାନା ଜୀସୁକ୍ ଖେରେସି, “ଆତିହଁ ନା ପାଡ଼ିତାସି ଆମ୍ବାଆରି ?”

୨୯ ଜୀସୁ ଏ କାତା ଆସାନା ଏଲେଇରେସି, “ର ଲକୁ ଜିରୁସାଲମଟିଏ ଜିରିହତା ହାଜିମାଟାଟି ସରକା ତାଣା ହେରହେସି । ଏଞ୍ଜାରି ଏଞ୍ଜାଣି ହିମ୍‌ରିଦୁକି ମୀଞ୍ଜାନା ହାନ୍‌ଲେହେଁ ମାଡା ଖେଟାନା ପିସା ହାରେରି । ୩୧ ଏଟିବେଲାତା ର ପୁଜେରା ଏ ଜିରୁଟି ହାଜିମାରେସି,

☆ ୧୦:୨୫ ୧୦:୨୫ ମାତି ୨୨:୩୫-୪୦; ମାର୍କ ୧୨:୨୮-୩୪

ଇଞ୍ଜି ଏଝାସି ଏଝାଣାଇଁ ମେସାନା ଜିରୁ ପିସାନା ଅର ଜିରୁଟି ହାଚେସି । ୩୨ ଏଲେକିହିଁ ଏ ର ଲେବି କୃତାତାସି ଜିକେଏ ଏ ଜିରୁଟି ଝାହାନା ଏଝାଣାଇଁ ମେସାନା ଅର ଜିରୁ ହାହାନା ହାଚେସି । ୩୩ ସାମା ର ସମିରଣ ଲକୁ ଏ ଜିରୁଟି ହାଜିମାଚେସି, ଇଞ୍ଜି ଏଝାଣାଇଁ ମେସାନା ହାଚେକା କାର୍ମା ଆଚେସି, ୩୪ ଅଡେ ତାଗେ ହାଜାନା ଏଝାଣି ଗାହାୟା ବାରେ ନିୟୁଁ ଅଡେ ଅଜୁରି ରାସା ରୁବାନା ଗାହାୟାଣା ଦସ୍‌ପାନା ଏଝାଣାଇଁ ର ଗାଡ଼ଦେ ଲାକ କୁଟିକିହାନା ର ସେବାକିନି ଇଲୁତା ଅହାନା ଏଝାଣି ସେବା କିଚେସି । ୩୫ ଅର ଦିନା ସେବାକିନି ଇଲୁ ଗାଟାଣାକି ରୀ କାନି ହାହାନା ଏଲେଇଚେସି, ‘ଇଝାଣି ସେବା କିମ୍ପୁ, ଅଡେ ଏଚେକା ଗାଡ଼ି କାରୁଁ ଆନୁ, ଝେଶ୍ଟା ଝାନାଟି ବାରେ ହିୟାଇଁ ।’ ”

୩୬ ଜୀସୁ ଏଲେଇଚେସି, “ଇ ତାନି ଜାଣାତି ବିତ୍ରା ଆମ୍ବାଆସି ସରକାତାଣା ହେରହା ମାଚାଣି ପାଡ଼ିତାସି ଇଞ୍ଜିଁ ଅଣ୍‌ପିମାଞ୍ଜେରି ?”

୩୭ ଏ ମୋରା ଜୀପୁନାସି ଏଲେଇଚେସି, “ଆମ୍ବାଆସି ଏଝାଣାଇଁ କାର୍ମା ଆଚେସି ଏଝାସି ।”

ଜୀସୁ ଏଲେଇଚେସି, “ହାଲୀମୁ ନୀନୁ ଜିକେଏ ଏଲେଏ କିମ୍ପୁ ।”

ଜୀସୁ ମାର୍ତ୍ତା ଅଡେ ମରିୟମନି ଇଜ

୩୮ ☆ଏଝାରି ହାଜିମାନି ବେଲ୍ଲାତା ର ନାୟୁତା ହାଚେରି, ଇଞ୍ଜି ମାର୍ତ୍ତା ଦରୁଗାଟି ର ଇୟା ଜୀସୁଇଁ ତାନି ଇଜ ହାଡ଼ିଚେ । ୩୯ ଏଦାନାକି ର ତାଜି ମାଚେ ଏଦାନି ଦରୁ ମରିୟମ, ଏଡ଼ି ପ୍ରବୁତି କଡ଼ା ଡ଼ଇ କୁଗାନା ଏଝାଣି କାତା ଝେଞ୍ଜିମାଚେ । ୪୦ ସାମା ମାର୍ତ୍ତା ରାଦା ଝାଜାଲି ହାଚେକା କିଲିବିଲି ଆହିମାଚେ; ଇଦାଆଁତାକି ଜୀସୁ ତାଣା ଝାହାନା ଏଲେଇଚେ, “ଏ ପ୍ରବୁ ନା ତାଜି ଝାଜିନି କାମା ବାରେ ନା ଲାକ ହେରପା ମାଞ୍ଜାନେ ଇଦାଆଁ ଅଣ୍‌ପି ହିଲଅତି କି ? ଇଦାଆଁତାକି ନାଜେ ସାୟେନି କିହାଲି ଏଲେଇନାମ୍ପୁ ।”

୪୧ ସାମା ପ୍ରବୁ ଏଲେଇଚେସି, “ମାର୍ତ୍ତା, ମାର୍ତ୍ତା ନୀନୁ ହାଚେକା କାମାତା ଅଣ୍‌ପିହିଁ କିଲିବିଲି ଆହିମାଞ୍ଜି, ୪୨ ସାମା ଝାରଇ ର କାତା ଲଡ଼ାମାନେ । ମରିୟମ ଏ ନେହିଁ କାତା ବାଟି କିହାମାନେ; ଏଦାଆଁ ଏଦାନି ତାଣାଟି ଅଡ଼ି ଆଏ ।”

୧୧

ଜୀସୁ ଜାପୁହାମାନି ପ୍ରାଡାନା

(ମାତି ୭:୯-୧୩; ମାତି ୭:୭-୧୧)

^୧ ର ଦିନା ଜୀସୁ ର ଚାୟୁତା ପ୍ରାଡାନା କିହିମାଚେସି; ଏଝାସି ପ୍ରାଡାନା କିହାଲି ରାପୁହାଲିଏ, ତାନି ସୀସୁୟା ବିତ୍ରାଟି ରଅସି ଏଲେଇଚେସି, “ଏ ପ୍ରବୁ, ଜହନ ଏନିକି ତାନି ସୀସୁୟାଙ୍କୁ ପ୍ରାଡାନା କିହାଲି ଜାପୁହି ମାଚେସି, ନୀନୁ ଜିକେଏ ମାଙ୍ଗେ ଏଲେକିହିଏ ପ୍ରାଡାନା କିହାଲି ଜାପୁହାମୁ ।”

^୨ ଏଚେଟିଏ ଜୀସୁ ଏଝାରାଙ୍କୁ ଏଲେଇଚେସି, “ଏଚିବେଲା ମୀରୁ ଏଲେଇଞ୍ଜି ପ୍ରାଡାନା କିପୁ; ଏ ଆବା

ନୀ ଦରୁ ନେହାୟି ଇଞ୍ଜି ମାନୁଞ୍ଜି ଆପେ;

ନୀ ରାକ୍ତି ଖାପେ ।

^୩ ବାରେଦିନା ମାଙ୍ଗେ ଲଡ଼ା ଆନି ରାନ୍ଦା ହିୟାମୁ ।

^୪ ମା ଦହ ବାରେ ମ୍ବେକ୍‌ହାମୁ,

ଇଚିହି ମାମୁ ଜିକେଏ ମା ଦହ କିତାରାଙ୍କୁ ମ୍ବେକ୍‌ନମି ।

ମାଙ୍ଗେ ପାନ୍ଦାତା ମେଡ଼ହାଆନି ।”

^୫ ଅଡ଼େ ଏଝାସି ଏଝାରାଙ୍କୁ ଏଲେଇଚେସି, “ମୀ ତାଣା ଆମ୍ବାଆସି ଇଲେଡି ତଢେଏସି ମାନେସି, ଆମ୍ବାଆରି ତାଣା ମାଦି ଲାଆୟା ହାଜାନା ଏଲେଇନେସି, ଏ ତଢେ ନାଙ୍ଗେ ତାନିଗଟା ରୁଟି ହିୟାମୁ, ^୬ ଇଚିହି ନା ଗତାଗାଟି ତଢେଏସି ନା ତାଣା ଖାହାମାନେସି, ଏଝାଣାକି ତିଞ୍ଜାଲି ହୀହାଲି ନା ତାଣା ଏନାୟିଝା ହିଲେଏ !” ^୭ ଅଡ଼େ ବିତ୍ରାଟି ଏଲେଇନେସି, ‘ନାଙ୍ଗେ କସ୍ତ ହିୟାଆନି; ଦାରା ସୁଣ୍ଡକି ଆଡ଼େୟିଏ, ଇଞ୍ଜା ନା ମୀରକା ନା ତଲେ ତୁରା ମାନେରି; ନାନୁ ନିଙ୍ଗାନା ହୀହାଲି ଆଡ଼ଅଁ ।’ ^୮ ନାନୁ ମିଙ୍ଗେ ଝେସିମାଞ୍ଜାଙ୍କୁ, ଏଝାସି ତାନି ତଢେଏସି ଆହାମାନାକି ଲାଜା ପସାନା ଅଲେ ଅଲେ ରୀସ୍ତାକି ଏଝାସି ନିଙ୍ଗାନା ଏଝାଣି ଲଡ଼ାମାନି ପାଚେକା ଏଝାସି ଏଝାଣାକି ହୀନେସି ।”

^୯ ନାନୁ ଜିକେଏ ମିଙ୍ଗେ ଝେସିମାଞ୍ଜାଙ୍କୁ, ରାହ୍‌ଦୁ ଆତିହି ମିଙ୍ଗେ ହୀପକିଆନେ; ପାରାଦୁ ଆତିହି ମେଡ଼ା ଆଦେରି; ଦୁଝେରିତା ଝେଦୁ ଆତିହି ମିଙ୍ଗେତାକି ଦାରା ଦେପି ଆନେ । ^{୧୦} ଇଚିହି ଆମ୍ବାଆସି

ରୀହନେସି ଏଞ୍ଜାସି ବେଟାଆନେସି; ଆମ୍ବାଆସି ପାରିନେସି ଏଞ୍ଜାସି
 ନେଡ଼ାଆନେସି; ଅଡ଼େ ଆମ୍ବାଆସି ଦୁଝେରିତା ଝେନେସି ଏଞ୍ଜାଣି ତାକି
 ଦାରା ଦେପିଆନେ ।

୧୧ “ଅଡ଼େ ମୀ ତାଣା ଇଲେତି ଆମିନି ଆବା ମାନେସି, ତାନି
 ମୀରଏସି ମୀନୁ ରୀସ୍ତିସାରେ ଏଞ୍ଜାସି ମୀନୁତି ବାଦୁଲି ରାତୁ ହୀନେସି
 ? ୧୨ ଅଡ଼େ ଗୁଡୁ ରୀସ୍ତିସାରେ ଏଞ୍ଜାଣାକି କାଚାକୁପି ହୀନେସି ?
 ୧୩ ଇଦାଆଁତାକି ମୀରୁ ଲାଗେଏ ପଲେଏତି ଲକୁ ଆଡ଼ିଜିକେଏ ମୀ
 ମୀରକା ମାସକାକି ନେହାଁଣି ହୀହିମାଞ୍ଜେରି, ଆଡ଼ିହୁଁ ଆମିନି ଆବା
 ଲାକପୁରୁଟି ହୀହିମାଞ୍ଜାନେସି, ଏଞ୍ଜାସି ତାନି ତାଣା ରୀହନି ଲକୁକି
 ଏଚେ ହାରେକା ସୁଦୁଜୀଝୁ ହୀଅସି !”

ଜୀସୁ ଅଡ଼େ ପଲ୍ଲଆ ବୁଡୁ
 (ମାତି ୧୨:୨୨-୩୦; ମାର୍କ ୩:୨୦-୨୭)

୧୪ ଜୀସୁ ର ପାଲି ବୁଡୁ ପେରୁହି ମାଚେସି ଏ ବୁଡୁ ଗୁଲା । ବୁଡୁ
 ଏଞ୍ଜାଣି ତାଣାଟି ହଟା ହାଜାଲିଏ ଏ ଗୁଲା ଜଲିଚେସି; ଏମ୍ବାଟିଏ ଲକୁ
 ବାରେ କାବା ଆଡେରି । ୧୫ ✨ସାମା ଏଞ୍ଜାରି ବିତ୍ରାଟି ଆମ୍ବା ଆମ୍ବାଆରି
 ଏଲେଇଚେରି, “ଏଞ୍ଜାସି ପଲ୍ଲଆ ବୁଡୁୟାଁ କାଜା ପେନୁ ବାଲ୍ଲଜିବୁଲ୍
 ବୁଡୁ ତଲେ ବୁଡୁୟାଁ ପିସପି କିହିମାନେସି ।”

୧୬ ✨ଇଞ୍ଜା ଏଟକାତାରି ଏଞ୍ଜାଣାକି ତାୟିପାରି କିହାଲିତାକି ଏଞ୍ଜାଣି
 ତାଣାଟି ହାଗୁଟି ର ସିନା ରୀସ୍ତେରି । ୧୭ ସାମା ଏଞ୍ଜାସି ଏଞ୍ଜାରି ମନତି
 ଅଣ୍ପୁ ପୁଞ୍ଜାନା ଏଞ୍ଜାରାକି ଏଲେଇଚେସି, ଆମିନି ରାଜି ବାଗା ଆହାନା
 ତାନି କପାଟି ନିଜିନେ ଏଡ଼ି ନାସା ଆହାହାନେ ଇଞ୍ଜା ଇଲୁ ଲାକ ବାରେ
 ରିହାହାନେ । ୧୮ ଇଞ୍ଜା ସୟତାନ ବାଗା ଆହାନା ଜାହାରା କପାଟି
 ନିଜିନେ, ଇଚିହୁଁ ତାନି ରାଜି ଏନିକିଁ ତୀରିଆହାନା ଡ଼ୟିନେ ?
 ନାନୁ ପଲ୍ଲଆ ବୁଡୁୟାଁ ବାଲ୍ଲଜିବୁଲ୍ ତଲେ ବୁଡୁୟାଁ ପିସପି କିହିମାକି
 ଇଞ୍ଜିମାଞ୍ଜେରି । ୧୯ ସାମା ନାନୁ ପଲ୍ଲଆ ବୁଡୁୟାଁ ବାଲ୍ଲଜିବୁଲ୍ ତଲେ
 ବୁଡୁୟାଁ ପିସପି କିହିମାକି, ଆଡ଼ିହୁଁ ମୀ ମୀରକା ଆମ୍ବାଆରି ବାଡ଼ୁୟୁ
 ତଲେ ପିସପି କିନେରି ? ଇଞ୍ଜା ଏଞ୍ଜିଏ ମିଜେ ନୀହାୟି କିୟାନୁ ।

✨ ୧୧:୧୫ ୧୧:୧୫ ମାତି ୯:୩୪; ୧୦:୨୫ ✨ ୧୧:୧୬ ୧୧:୧୬ ମାତି ୧୨:୩୮; ୧୬:୧; ମାର୍କ
 ୮:୧୧

୨୦ ସାମା ନାନୁ ମାହାପୁରୁ ବାଡ଼ୁଛୁ ତଲେ ବୃତୁୟାଁ ପିସ୍ପି କିହିମାଈଁ ଇଚିହିଁ ମାହାପୁରୁତି ରାଜି ମୀ ତାଣା ଏଗାଝାଡ଼େୟିଏ ।

୨୧ ବାଡ଼ୁଛୁଗାଟି ଲକୁ ଏଚେପାତେକା ଆସ୍ତି ଆସାନା ତାନି ଗାଡ଼ାତି ଗେଲ୍ପିନେସି, ଏଚିବେଲା ପାତେକା ତାନି ଦନ ଗେଲ୍ପିଆହାନା ଡ଼ୟିନେ; ୨୨ ସାମା ଏଚିବେଲା ଏଝାଣି କିହାଁ ହାରେକା ବାଡ଼ୁଛୁଗାଟି ଲକୁ ଏଝାଣିତଲେ ଜୁହୁ କିହାନା ଜୀଣା ଆନେସି, ଏଚିବେଲା ଏଝାସି ଆମିନି ଆସ୍ତିତି ବାସ୍ତୁ କିହାମାଚେସି, ଏ ବାରେ ଏଝାସି ମୀଞ୍ଜା ଅନେସି, ଇଞ୍ଜା ମୀଞ୍ଜା ଅହାମାନି ଦନ ବାଟିକିହା ଅନେରି ।

୨୩ ✨ଆମ୍ବାଆସି ନା ଝାକିଟି ଆଆଗାଟାସି ଏଝାସି ନା ସାତୁ; ଇଞ୍ଜା ଆମ୍ବାଆସି ନା ତଲେ କୁଡ଼ି କିଅସି ଏଝାସି ଆଲାଋ କିନାସି ।

ପଲ୍ଲଆ ବୃତୁ ଝେଣ୍ଡା ଝାନାୟି

(ମାତି ୧୨:୪୩-୪୫)

୨୪ “ର ପଲ୍ଲଆ ବୃତୁ ର ମାଣ୍ଡସି ତାଣାଟି ହଚା ହାଜାନା ଏୟୁ ହିଲାଆ ଝାୟିତି ଚାୟୁତା ଜମାଲି ପାରିନେ, ଇଞ୍ଜା ମେଡ଼ି କିଆନା ଏଲେଇନେ, ‘ନାନୁ ଆମିନି ଇଲୁଟି ହଚା ଝାହାମାଚେସ୍, ଏ ଇଲୁତା ଝେଣ୍ଡା ହାଇଁ ।’ ୨୫ ଇଞ୍ଜା ଏଡ଼ି ଝେଣ୍ଡା ଝାହାନା ଏଦାଆଁ ଅଜିହିଁ ନେହିଁ ଆହାମାନାଣି ମେହ୍ନେ । ୨୬ ଏଚିବେଲା ଏଡ଼ି ହାଜାନା ତାନିକିହାଁ ହାରେକା ପଲ୍ଲଆଗାଟି ସାଡ଼ାଗଟା ବୃତୁୟାଁ ଆସାନା ଝାନେ, ଅଡ଼େ ବାରେଜାଣା ଏମ୍ବାଆଁ ହଡ଼ାନା ବାସା କିନୁ, ଇଞ୍ଜା ଏ ମାଣ୍ଡସିତି ତଲିତି କସ୍ତୁ କିହାଁ ତାୟୁତି କସ୍ତୁ ହାରେକା ଆନେ ।”

ଆସୁଲି ରାହାଁ

୨୭ ଜୀସୁ ଇ ବାରେ କାତା ଝେସିମାଗାଟି ଲକୁ ମାୟା ବିତ୍ରାଟି ର ଇୟା କାଜା ଗିୟାତଲେ ଏଲେଇଚେ, “ଆମିନିଗାଟି ଇୟା ନିଈଈ ଜାନ କିହାନା ପାଲୁ ଉଟ୍‌ହାତେ ଏ ଇୟା ହାରେକା ନେହେଁ ।”

୨୮ ସାମା ଜୀସୁ ଏଲେଇଚେସି, “ଆମ୍ବାଆରି ମାହାପୁରୁତି ବଲୁ ଝେନେରି ଅଡ଼େ ମାନୁଝି ଆନେରି ଏଝାରାକିଦେହେଁ ନେହେଁ ।”

ସିନା ପାରିନାୟି

(ମାତି ୧୨:୩୮-୪୨)

୨୯ ☆ଲକ୍ଷ୍ମୀ ମାୟା ମାୟା ଆହ୍ୱାନା ଏଞ୍ଜେଲ୍ ତାଣା ରୁଣ୍ଡା ଆହ୍ୱାଲିଏ ଜୀସୁ ଏଞ୍ଜେଲ୍ କ୍ଷେପ୍ରେସି, “ଇ କାଲ୍ଲାତି ଲକ୍ଷ୍ମୀ ହାରେକା ଲାଗେଏତାରି; ଇଞ୍ଜେଲ୍ ବାରେ ସିନାୟ୍ ପାରିନେରି, ସାମା ଏଞ୍ଜେଲ୍ ଜୁନସତି ସିନା ପିସପେ ଏନି ସିନା ହାପ୍‌କିଆଏ । ୩୦ ଇତିହିଁ ଜୁନସ ଏନିକ୍ ନିନିବି ଲକ୍ଷ୍ମୀତାକି ର ସିନାଲେହେଁ, ମାଣ୍ଡସି ମୀରୁଏସି ଜିକେଏ ଏଲେକିହିଁଏ ଇ ଜୁଗୁତି ଲକ୍ଷ୍ମୀତାକି ଆନେ । ୩୧ ନୀହାୟ୍ ଦିନାତା ସିବା ଦେସାତି ରାଣି ଇ କାଲ୍ଲାତି ଲକ୍ଷ୍ମୀ ନକିତା ନିତାନା ଏଞ୍ଜେଲ୍ କପାଟି ସାକିହୀନେ, ଇତିହିଁ ଏନି ସଲମନତି ବୁଦିତିକାତା ଖେଞ୍ଜାଲି ଦାର୍ତିତି ହେକ ଦେସାଟି ଖାହାମାଟେ; ମେହ୍‌ଦୁ ସଲମନକିହାଁ କାଜାସି ଇମ୍ପାଆଁ ମାନେସି । ୩୨ ନୀହାୟ୍ ଦିନାତା ନିନିବି ଗାଡାତି ଲକ୍ଷ୍ମୀ ନିତାନା ଏଞ୍ଜେଲ୍ କପାଟି ସାକି ହୀନେରି, ଇତିହିଁ ଏଞ୍ଜେଲ୍ ଜୁନସ ଖେପ୍ରେସି କାତା ଖେଞ୍ଜାନା ଅଣ୍ଡା କତାନା ମନ ଖେର୍‌ହେରି; ମେହ୍‌ଦୁ ଜୁନସକିହାଁ ହାରେକା କାଜାସି ଇମ୍ପାଆଁ ମାନେସି ।”

ଆଜ୍ଞାପତି ଉଜେଡ଼ି

(ମାତି ୫:୧୫; ୭:୨୨, ୨୩)

୩୩ ☆“ଆମ୍ବାଆସି ଦୀଞ୍ଜି ତୀସାନା ତୁଜୁନି ଚାୟୁତା କି ମାଣା ପ୍ରିକ୍‌ହାନା ଇଟଅରି, ସାମା ଦୀଞ୍ଜି ସଡ଼ାତା ଇତିନେରି, ଏନିକ୍ ଇଲ୍ଲୁ ବିତ୍ରା ଖାନ୍ତି ଲକ୍ଷ୍ମୀ ଉଜେଡ଼ି ମେହ୍‌ନେରି । ୩୪ ମୀ କାଣ୍‌କା ଆଜ୍ଞାପତି ଦୀଞ୍ଜି ଏଚେତା ମୀ କାଣ୍‌କା ନେହିଁ ମାନୁ ଏଚିବେଲ୍ଲା ପାତେକା ମୀ ଆଜ୍ଞା ବାରେ ଉଜେଡ଼ି ଆନେ; ସାମା ଏଚେତା ନୀ କାଣ୍‌କା ନେହିଁ ହିଲ୍ଲାଉ ଇତିହିଁ ଏଚେତା ମୀ ଗୁଡ଼ା ଆଜ୍ଞା ଜିକେଏ ଆନ୍ଦେରି ଆନେ । ୩୫ ଇଦାଆଁତାକି ଜାଗ୍ରାତା ଏନିକ୍ ମୀ ହିୟାତା ମାନି ଉଜେଡ଼ି ଆନ୍ଦେରି ଆଏ । ୩୬ ଏନାଆଁତାକି ଇତିହିଁ ମୀ ଗୁଡ଼ା ଆଜ୍ଞା ବାରେ ଉଜେଡ଼ି ଆନେ ଇଞ୍ଜା ଏମ୍ପାଆଁ ଏନି ଆନ୍ଦେରି ତ୍ରେୟେଏ, ଆତିହିଁ ଦୀଞ୍ଜି ଏନିକ୍ ମିଙ୍ଗେ ତାହାଣା ଉଜେଡ଼ିତା ଉଜେଡ଼ି କିୟାନେ, ଏଲେକିହିଁଏ ମୀ ଗୁଡ଼ା ଆଜ୍ଞା ଉଜେଡ଼ି ଆନେ ।”

☆ ୧୧:୨୯ ୧୧:୨୯ ମାତି ୧୭:୪; ମାର୍କ ୮:୧୭ ☆ ୧୧:୩୩ ୧୧:୩୩ ମାତି ୫:୧୫; ମାର୍କ ୪:୨୧; ଲୁକ ୮:୧୭

ଜୀସୁ ପାରୁସି ଅଡ଼େ ମୋରା ଜାପ୍ନାରାଇଁ ଦହ୍ ଦହ୍ନାୟି
(ମାତି ୧୩:୧-୩୬; ମାର୍କ ୧୨:୩୮-୪୦)

୩୭ ଜୀସୁ ଇ କାତା ଖେସ୍ତି ତାୟୁ ର ପାରୁସି ଏଝାଣାଇଁ ତାନି
ଇଜ ତିଞ୍ଜାଲି ଏଲେଇଚେସି; ଇଞ୍ଜା ଏଝାସି ଇଜ ହାଜାନା ତିଞ୍ଜାଲି
କୁଗିଚେସି । ୩୮ ସାମା ତିଞ୍ଜାଲି କୁଗିନି ନକେଏ ଏଝାସି କେସ୍ତା କଡାୟା
ନରହା ହିଲଆଚେସି, ଇଦାଆଁ ମେସାନା ଏ ପାରୁସି କାବା ଆଚେସି
। ୩୯ ଏଚେଟିଏ ପ୍ରୁ ଏଝାଣାଇଁ ଏଲେଇଚେସି, “ମୀ ପାରୁସିୟାତେରି
ଗିନାୟାଁ ଅଡ଼େ ସାଡ଼ଝାୟାଁ ପାଙ୍ଗାତା ନରହି ମାଞ୍ଜେରି, ସାମା ମୀ
ବିତ୍ରା କୁପକା ଅଡ଼େ ଲାଗେଏତାୟି ନେଞ୍ଜାମାନେ । ୪୦ ଆଡ଼େ ବୁଦି
ହିଲଆଗାଚାତେରି, ଆମ୍ବାଆସି ପାଙ୍ଗାତାଣି ଗାଡ଼ିକିଚେସି, ଏଝାସି
ବିତ୍ରାତାଣି ଜିକେଏ ଗାଡ଼ି କିହାହିଲଅସି କି ? ୪୧ ସାମା ମୀ ସାଡ଼ଝାୟାଁ
ଅଡ଼େ ଗିନାୟାଁଣା ମାନାଣି ହିଲଆ ଗାଗରାକି ହାତିହ୍ ମିଙ୍ଗେତାକି
ବାରେଏ ଅବହାୟି ଆନେ ।”

୪୨ ସାମା ଆୟଡା ତଣ୍ଡ ପାଣ୍ଡନି ପାରୁସିୟାତେରି, ଇଚିହ୍ ମୀରୁ
ହାସ୍ତୁ, ରାୟି ଇଞ୍ଜା ବାରେ କୁଚାତି ଦସ ବାଗାଟି ର ବାଗା ହାହିମାଞ୍ଜେରି,
ସାମା ନୀହାୟିତା ଅଡ଼େ ମାହାପୁରୁତି ଜୀସୁ ନନ୍ ତାଣା ଅଣ୍ପି
ହିଲଅଚେରି; ସାମା ଇ ବାରେ ମାନିଞ୍ଜି ଆହାନା ଏଟକାତାଣି ହେଲା
ଆନାୟି ହିଲେଏ ।

୪୩ “ଆୟଡା ତଣ୍ଡ ପାଣ୍ଡନି ପାରୁସିୟାତେରି, ଇଚିହ୍ ମୀରୁ
ମାହାପୁରୁ ଇଲୁତା କାଜା ଟାୟୁ ଇଞ୍ଜା ହାଟା ବାଜାରାତା ଜହରା
ବେଟାଆହାଲି ନେହେଁ ଅଣ୍ପିଦେରି । ୪୪ ଆୟଡା ମୀରୁ ତଣ୍ଡ
ବେଟା ଆନାଚେରି, ଇଚିହ୍ ମୀରୁ ତଞ୍ଜା ଆଆଗାଟି ମାଡ଼ହା ମୁହ୍ନି
ଟାୟୁଲେହେଁ ତାଚେରି; ଇଚିହ୍ ପୁନାଆନା ଲକୁ ଲାକ ତାକି
ମାନେରି ।”

୪୫ ଏଚେଟିଏ ମସାତି ମୋରାପୁନାରି ବିତ୍ରାଟି ରଅସି ଏଲେଇଚେସି,
“ଏ ଗୁରୁ ନୀନୁ ଏଲେଇଞ୍ଜି ମାଙ୍ଗେ ଲାଜା କିହିମାଞ୍ଜାଦି ।”

୪୬ ଜୀସୁ ଏଲେଇଚେସି, ଆୟଡା ମସାତି ମୋରା ପୁନାଚେରି ମୀରୁ,
ମୀରୁ ଜିକେଏ ତଣ୍ଡ ବେଟାଆଦେରି, ଇଚିହ୍ ମୀରୁ ମାଣ୍ଡସିୟା
ଲାକ ବକୁଗାଟି କାସ୍ତକା ଏକ୍ହି ମାଞ୍ଜେରି ଅଡ଼େ ଏ ବକୁତି ମୀରୁ
ର ଝାଞ୍ଜୁ ତଲେ ଜିକେଏ ତୀଗଅଚେରି । ୪୭ ଆୟଡା ତଣ୍ଡ

ବେଟା ଆନାତେରି ମୀରୁ ମାହାପୁରୁ ଅଣ୍ଟପୁତି ବଲ୍ଲୁ ୱେହ୍ନାରାଉଁ ପାୟାନା ଏଞ୍ଜାରି ମାଡ଼ହା ମୁହ୍ନି ଟାୟୁ ତୟାରା କିହିମାଞ୍ଜେରି । ୪୮ ଇଚିହିଁ ମୀରୁ ମୀ ଆକୁ ଆବାୟାଁ କାମାତା ସାକି ତସି ମାଞ୍ଜେରି ଇଞ୍ଜା ଏଞ୍ଜାରିଲେହେଁ ଆହିମାଞ୍ଜେରି; ଇଚିହିଁ ଏଞ୍ଜାରିସାଁ ଏଞ୍ଜାରାଉଁ ପାୟାମାଚେରି, ସାମା ମୀରୁ ଏଞ୍ଜାରି ମୁହ୍ନି ଟାୟୁତି କାତିୟାଁ ନିପୁହି ମାଞ୍ଜେରି । ୪୯ ଇଦାଆଁତାକି ମାହାପୁରୁ ଜିକେଏ ତାନି ବୁଦିତଲେ ଏଲେଇଞ୍ଜା ମାନେସି, ନାନୁ ଏଞ୍ଜାରି ନକିତା ମାହାପୁରୁ ଅଣ୍ଟପୁତି ବଲ୍ଲୁ ୱେହ୍ନାରାଉଁ ଅଡ଼େ ପାଣ୍ଡୁଞ୍ଜି ଆହାମାନାରାଉଁ ପାଣ୍ଡୁଇ; ଏଞ୍ଜାରି ବିତାତି ଆମ୍ବା ଆମ୍ବାଆରାଉଁ ପାୟିନେରି ଇଞ୍ଜା ନିନ୍ଦା କିନେରି, ୫୦ ଇ ଜୁଗୁତି ଲକୁ ଦାରତି ଗାଡ଼ି ଆଡ଼ି ନକେଏଟିଏ ବାରେ ମାହାପୁରୁ ଅଣ୍ଟପୁତି ବଲ୍ଲୁ ୱେହ୍ନାରି ପାୟିତାକି ତଣ୍ଡୁ ବେଟାଆନେରି, ୫୧ ଏନିକିଁ ହେବଲଇ ପାୟିତି ଦିନାଟିଏ ଜିକରିୟ ପାତେକା ଆମ୍ବାଆରାଉଁ ମାହାପୁରୁ ଇଲୁତି ଡାକିନି ପିଣ୍ଡା ଅଡ଼େ ସୁବୁ ବାକ୍ରା ମାଦିଏ ପାୟୁଞ୍ଜି ଆହାମାଚେ । ହାଅ, ନାନୁ ମିଙ୍ଗେ ସାତା ୱେସିମାଞ୍ଜାଉଁ, ଏଦାନି ବାଦୁଲି ଇ ଜୁଗୁତି ଲକୁ ଏ ବାରେତାକି ତଣ୍ଡୁ ବେଟାଆନେରି ।

୫୨ ଆୟତା ତଣ୍ଡୁ ପାଣ୍ଡୁନି ମେରା ପୁନାତେରି ମୀରୁ, ଇଚିହିଁ ବୁଦି ଦେନି କୁଚିତି ଅହାମାଞ୍ଜେରି; ମୀରୁତ ହଡ଼ି ହିଲଅତେରି ସାମା ହଡ଼ାଲି ଅଣ୍ଟପି ମାନାରାଉଁ ଆଂରିମାଞ୍ଜେରି ।

୫୩ ଜାସୁ ଏ ଇଜଟି ହାଜାଲିଏ ପାରୁସିୟାଁ ଅଡ଼େ ମେରାପୁନାରି ହାରେକା ଡାହାରା ଆହାନା ।

୫୪ ଏଞ୍ଜାଣି ଜଲିନି ହାଡ଼ାତା ଦହ ଆସାଲି ଏଞ୍ଜାଣାଉଁ ହାରେକା କାତା ୱେରେରି ।

୧୨

କୁଚୁ ଗାଟାରି ତାଣାଟି ଜାଗ୍ରାତା

(ମାତି ୧୦:୨୭, ୨୭)

୧ *ଏଚିବେଲାତା ମାଣା ମାଣା ଲକୁ ରୁଣ୍ଡା ଆହାନା ଡ୍ରିସ୍ପି ଆହିମାଚେରି; ଏଚିବେଲା ଏଞ୍ଜାସି ନକେଏ ତାନି ସୀସୁୟାଁଉଁ ଏଲେଇଚେସି, ପାରୁସିୟାଁ ଲାଗେଏତି କୁଚୁଗାଟି ତାଣାଟି ଜାଗ୍ରାତା

☆ ୧୨:୧ ୧୨:୧ ମାତି ୧୨:୨; ମାର୍କ ୮:୧୫

ଆହାମାନା ମାଞ୍ଜୁ । ^୨ ଯଦି ଏମାନେ ତୁମ୍ଭଙ୍କୁ ଆସନ୍ତି, ତେବେ ଲଲେକିମ୍ପା ପୁସ୍ତକ ଆହା ହିଲେକିଏ, ଅତେ ଏମାନେ ପୁନାଆରେକି ଲଲେକିମ୍ପା ତୁମ୍ଭମାନାମାନେ ଏମାନେ ହିଲେକିଏ । ^୩ ଇତିହାସ ମୀରୁ ଏନା ଏନାଆଁ ଆମେରିତା ଖେସାମାଞ୍ଜେରି, ଏ ବାରେ ଉଜେଡିତା ଖେଶ୍‌ମିଆନେ, ଏନା ଏନାଆଁ ପୁନାଆ ରେକି ଇଲୁ ବିତ୍ରା ତୁମ୍ଭମାନା ଖେସାମାଞ୍ଜେରି, ଏନାଆଁ ଇଲୁ ତୁଡିୟତା ଖେସ୍‌କି ଆନେ ।

ଆମ୍ଭାଆରାଇଁ ଆଜିନାହିଁ

(ମାତି ୧୦:୨୮-୩୧)

^୪ ଇତିହାସ ନା ତୁଣେସିଙ୍ଗାତେରି ମୀରୁ, ନାନୁ ମିଙ୍ଗେ ଖେସିମାଞ୍ଜାଇଁ, “ଆମ୍ଭାଆରି ଆଙ୍ଗାତି ପାୟିନେରି ସାମା ତାୟୁ ଏନାଆଁ କିହାଲି ଆଡ଼ଅରି, ଏଞ୍ଜାରାଇଁ ଆଜାଆଦୁ । ^୫ ସାମା ଆମ୍ଭାଆରାଇଁ ଆଜିଦେରି ଏନାଆଁ ମିଙ୍ଗେ ଖେସ୍‌ସାଇଁ; ପାୟିତି ଜେଚ ହିରୁ ଗାଡୁୟୁତା ମେଡ଼ହାଲି ଆମ୍ଭାଆରି ଅଦିକାରା ମାନେ, ଏଞ୍ଜାଣାଇଁ ଆଜାଦୁ; ହାଅ ନାନୁ ମିଙ୍ଗେ ସାତା ଖେସିମାଞ୍ଜାଇଁ, ଏଞ୍ଜାଣାଇଁ ଆଜାଦୁ ।”

^୬ ପାସାଗଟା ଜେତା ପଟାୟାଁ ରୀ କାନି ତାକି ପାରପି ଆଡ଼ କି ? ଆଡ଼ିଜିକେଏ ଏଞ୍ଜାସିକା ବିତ୍ରାଟି ରଣ୍ଡାଣି ଜିକେଏ ମାହାପୁରୁ ବାଣା ଆଅସି । ^୭ ସାମା ମୀ ତାୟୁଁ ତୁ ବାରେ ବାଣାୟାଁ ଜିକେଏ ଏଜିକିଞ୍ଜି ଆହାମାନୁ । ଆଜା ଆଦୁ; ଏନାଆଁତାକି ଇତିହାସ ମୀରୁ ଜେତା ପଟାୟାଁ କିହାଁ ହାରେକା ଦାରା ଗାଟାତେରି ।

ଲକୁ ନକିତା ଜୀସୁଇଁ ଖେକ୍‌ନାହିଁ

(ମାତି ୧୦:୩୨, ୩୩; ୧୨:୩୨; ୧୦:୧୯-୨୦)

୮ “ଅତେ, ନାନୁ ମିଙ୍ଗେ ଖେସିମାଞ୍ଜାଇଁ, ଆମ୍ଭାଆସି ଲକୁ ନକିତା ନାଙ୍ଗେ ଖେକ୍‌ହାନେସି, ମାଣ୍ଡିସି ମୀରୁଏସି ଜିକେଏ ମାହାପୁରୁତି ଦୁତୁୟାଁ ନକିତା ଖେକ୍‌ନେସି । ^୯ ସାମା ଆମ୍ଭାଆସି ଲକୁ ନକିତା ନାଙ୍ଗେ ଖେକ୍‌ହଅସି, ଏଞ୍ଜାଣାଇଁ ଜିକେଏ ମାହାପୁରୁ ଦୁତୁୟାଁ ନକିତା ଖେକ୍‌ଅସି ।

☆ ୧୨:୨ ୧୨:୨ ମାର୍କ ୪:୨୨; ଲୁକ ୮:୧୭

୧୦ ✨ଇଞ୍ଜା ଆମ୍ବାଆସି ମାଣ୍ଠି ମୀରଏଣା କପାଟି ଜଲିନେସି, ଏଞ୍ଜାଣି ପାପୁ ମେଣ୍ଟିନେ; ସାମା ଆମ୍ବାଆସି ସୁଦୁଜୀଝୁ କପାଟି ନିନ୍ଦା କାତା ଜଲିନେସି, ଏଞ୍ଜାଣି ପାପୁ ମେଣ୍ଟିନେଏ ।

୧୧ ✨ଏଚିବେଲା ଏଞ୍ଜାରି ମିଙ୍ଗେ ଜୀହୁଦି ଲକ୍ଷୁତି କୁଟମି ଇଲ୍‌କାଣା*, ସାଲ୍‌ଝି କିନାରି ତାଣା ଇଞ୍ଜା ଅଦିକାରା ବେଟା ଆହାମାନାରି ତାଣା ଅହାନା ନିପ୍‌ହାନେରି ଏଚିବେଲା ନା ଝାକିଟି ଆହାନା ଏନା ଏନାଆଁ ଜଲିନମି ଇଞ୍ଜା ଅଣପାଆଦୁ; ୧୨ ଇଚିହଁ ଏନାଆଁ ଜଲିନାୟି ମାନେ, ଏଦାଣି ଏଚିବେଲାତେଏ ସୁଦୁଜୀଝୁ ମିଙ୍ଗେ ଜାପ୍‌ହାନେସି ।”

ବୁଦି ହିଲାଆ ଦନ ଗାଟାସି

୧୩ ଲକୁ ମାନ୍ଦା ବିଦ୍ରାଟି ରଅସି ଜୀସୁଇଁ ଏଲେଇଚେସି, ଏ ଗୁରୁ ନା ତାୟିଇଁ ମା ଆବାତି ଦନ ବାଟି କିହାଲି ଏଲେଇଞ୍ଜା ହିୟାମୁ ।

୧୪ ସାମା ଜୀସୁ ଏଲେଇଚେସି, ଏ ତାୟି ଆମ୍ବାଆସି ନାଙ୍ଗେ ମୀ ମୁହେଁ ନୀହାଁୟି କିହାଲି ମାଦି କିହାନା ଆଟାମାଞ୍ଜାନେସି ? ୧୫ ଇଞ୍ଜା ଏଞ୍ଜାସି ଏଞ୍ଜାରାଇଁ ଏଲେଇଚେସି, ଜାଗ୍ରାତା, ବାରେଝାକିତି ଜୁପ୍‌କାଟି ମିଙ୍ଗେ ଗେଲ୍‌ପିକିହା କତାଦୁ, ଇଚିହଁ ର ମାଣ୍ଠିସିତି ଜୀଝୁ ତାନି ଦନତି ବାସ୍‌ କିନେ ।

୧୬ ଜୀସୁ ଏଞ୍ଜାରାଇଁ ଇ ପୁଣ୍ଡିକିନି କାତା ଝେସେସି, “ର ସାଝୁକାରିକି ବୁମିତା ଗାତି ତାସା କାମ୍‌ପିତେ । ୧୭ ଏମ୍ବାଟିଏ ଏଞ୍ଜାସି ମନ ମନତା ଅଣ୍‌ପାନା ଏଲେଇଚେସି, ‘ନାନୁ ନୀଏଁ ଏନାଆଁ କିଇଁ ? ନା ଆର୍ନା କୁଡ଼ି କିହାନା ଇଟାଲି ଟାୟୁ ହିଲେଏ ।’ ୧୮ ଅଡ଼େ ଏଲେଇଚେସି; ‘ନୀଏଁ ଇଲେ କିଇଁ ମାନି ଗାଦେୟିକା ରିକ୍‌ହାନା କାଜାଆଁ କିହାନା ଏମ୍ବାଆଁ ଗହଁୟାଁ ଇଞ୍ଜା ଏନି ଏନି ଆର୍ନା କୁଡ଼ି କିହାନା ଇଚିଇଁ, ୧୯ ଅଡ଼େ ନା ଜୀଝୁତି ଏଲେଇଇଁ, ଏ ଜୀଝୁ ହାରେକା ବାସା ତାକି ନିଙ୍ଗେ ତାକି ଗାତି ଆର୍ନା କୁଡ଼ି କିଝିଆହାମାନେ, ନୀଏଚି ଜମାନା ମନକିତି ଲେହେଁ ତିଞ୍ଜା ଉଣ୍ଡାନା ରାହାଁ କିମୁ ।’ ୨୦ ସାମା ମାହାପୁରୁ ଏଞ୍ଜାଣାଇଁ ଏଲେଇଚେସି, ଆଡ଼େ ବୁଦି ହିଲାଆଗାଟାଟି, ନୀଞ୍ଜୁ ଲାଆଁୟାଁ ନୀ ଜୀଝୁ

✨ ୧୨:୧୦ ୧୨:୧୦ ମାତି ୧୨:୩୨; ମାର୍କ ୩:୨୯ ✨ ୧୨:୧୧ ୧୨:୧୧ ମାତି ୧୦:୧୯,୨୦; ମାର୍କ ୧୩:୧୧; ଲୁକ ୨୧:୧୪,୧୫ * ୧୨:୧୧ ୧୨:୧୧ ସିନଗଗ

ନୀ ତାଣାଟି ଅଢ଼ିଆନେ; ଏଚେଟିଏ ନୀନୁ କୃତ୍ତିକିହା ଇଟାମାନି ବାରେ ଦନ ଆମ୍ବାଆରାଞ୍ଜାୟି ଆନେ ।”

୨୧ ଜୀସୁ ଏଲେଇଚେସି, “ଆମ୍ବାଆସି ତାଙ୍ଗେତାକି ଦନ କୃତ୍ତି କିନେସି, ସାମା ମାହାପୁରୁ ତାଣା ଦନଗାଟାସି ଆଅସି, ଏଞ୍ଜାସି ଇଞ୍ଜାଣି ଲେହେଁତାସି ।”

ଅଣ୍ଠାଆଦୁ

(ମାତି ୭:୨୫-୩୪)

୨୨ ଜୀସୁ ତାନି ସୀସୁୟାଣି ଏଲେଇଚେସି, ଇଦାଆଁତାକି ମିଙ୍ଗେ ଝେସିମାଞ୍ଜାଲ୍, ଏନାଆଁ ତିନାୟି, ଇଲେକ୍ ମୀ ଜୀସୁତାକି, ଏନାଆଁ ତୁରନାୟି ଇଲେକ୍ ମୀ ଆଙ୍ଗା ତାକି ଜିକେଏ ମୀରୁ ଅଣ୍ଠାଆଦୁ । ୨୩ ଇଚିହ୍ ରାନ୍ଦା କିହାଁ ଜୀସୁ କାଜାୟି ଅଡ଼େ ହିମ୍ବରକା କିହାଁ ଆଙ୍ଗା କାଜାୟି । ୨୪ ପଟାୟାଁଣି ସିନିକିଦୁ, ଏଢ଼ି ମାଟାଉ କି ଦାଉ, ଇଞ୍ଜା ଏଞ୍ଜାସିକା ଗାଦେୟିକା ହିଲାଉ, ଅଡ଼େ ମାହାପୁରୁ ଏଞ୍ଜାସିକାକି ତିନି କାଦି ହୀନେସି; ମୀରୁ ପଟାୟାଁ କିହାଁ ଏଚେକା କାଜାଚେରି ! ୨୫ ଅଡ଼େ ମୀ ବିତ୍ରାଟି ଆମ୍ବାଆଚେରି ଅଣ୍ଠା ଅଣ୍ଠାସି ମୀ ଜୀସୁତି ଆଗାଡ଼ା ପାଡ଼ିକିହାଲି ଆଡ଼ିଦେରି ? ୨୬ ମୀରୁ ର ଉଣା କାମାତି କିହାଲି ଆଡ଼ିହିଲଅଚେରି, ଆତିହ୍ ଏଚ୍ କାତି କାତା ଏନାଆଁତାକି ଗାଡ଼ି ଅଣ୍ଠାମାଞ୍ଜେରି ? ୨୭ ଜାଡ଼ାତି ପୁଙ୍ଗାଣି ସିନିକିହାଁ ଅଣ୍ଠାପାଦୁ, ଏଢ଼ି ଏନି କାମା କିଉ; ଆଡ଼ିଜିକେଏ ନାନୁ ମିଙ୍ଗେ ଝେସିମାଞ୍ଜାଲ୍, ସଲମନକି ବାରେ ଅଜିତାୟି ମାଚିହ୍ ଜିକେଏ ଏଞ୍ଜାଣାକି ଇ ପୁଙ୍ଗା ଏଚେକା ଅଜିତି ହିମ୍ବରକା ହିଲାଆତୁ । ୨୮ ଆମିନି ଜାଡ଼ା ନୀଞ୍ଜୁ ମାନେ, ଝିଏ ଝାୟା ହାନେ ଅଡ଼େ ହଲୁତା ହୁଡ଼ୁକିଆନେ, ମାହାପୁରୁ ଏ ଜାଡ଼ାତି ଇଲେତି ଝାଣା ହୀନେସି, ଏନାଆଁ ଏଞ୍ଜାସି ମିଙ୍ଗେ ହିମ୍ବରକା ପର୍ଝି କିୟସି ? ମୀ ନାମୁ ଏଚେକା ଉଣା !

୨୯ ଏଦାଆଁତାକି ଏନାଆଁ ତିନାୟି ଏନାଆଁ ଗହ୍ନାୟି, ଏଦାଆଁ ମୀରୁ ପାରିହ୍ ଚେଆଦୁ କି ଅଣ୍ଠାଆଦୁ, ୩୦ ଇଚିହ୍ ଦାର୍ତିତି ଜୀହୁଦିଆଆତାରି ଏ ବାରେ ପାରିହ୍ ଚେନେରି; ସାମା ଇ ବାରେ ମୀ ଲଡ଼ାମାନେ ଏଦାଆଁ ମୀ ଲାକପୁରୁତି ଆବା ପୁଞ୍ଜାମାନେସି । ୩୧ ମୀରୁ ମାହାପୁରୁତି ରାଜି ପାରାଦୁ, ଆତିହ୍ ଇ ବାରେ ମିଙ୍ଗେ ହୀପକିଆନେ ।

**ଲାକପୁରୁତି ଦନ
(ମାତି ୭:୧୯-୨୧)**

୩୨ ଏ ଉଣା ମେଣ୍ଟା ମାନ୍ଦାତେରି ଆଜାଆଦୁ, ଇଚିହିଁ ମିଙ୍ଗେ ଏ ରାଜିତି ହାହାଲି ମୀ ଲାକପୁରୁତି ଆବାକି ଏତେକା ରାହାଁ । ୩୩ ମୀରୁ ମୀ ଦନତି ପାର୍ଚନା ହିଲାଆ ଗାଟାରାକି ହୀଦୁ; ମୀରୁ ମିଙ୍ଗେତାକି ଇଲେତି ବଟ୍‌ଝା କେପାଦୁ; ଇଚିହିଁ ଏମ୍ପିୟା ସରୁ ଝାଅସି ଅଡେ ଲୀମ୍ପୁ ତିନେଏ ଇଲେତି ଲାକପୁରୁ ଦନ କୁଡି କିଦୁ, ୩୪ ଇଚିହିଁ ଆମ୍ପିୟା ଦନ ଏମ୍ପେଏ ଜିକେଏ ମୀ ମନ ମାଞ୍ଜେମାନେ ।

ଜାଗ୍ରାତା ହରେଲଏସି

୩୫ ☆“ମୀ ଟେଡେଲି ଦସା କତାନା ମାଞ୍ଜୁ ଅଡେ ମୀ ଦୀଝିୟାଁ ଡାଞ୍ଜିହିଁ ମାଣ୍ଡୁ: ୩୬ ☆ଅଡେ ପ୍ରବୁ ବୀହା ଇଜ ହାଜାନା ଝେଣ୍ଟା ଝାନାଟି ଏଝାଣାଇଁ ଦାରା ଦେନମିଝା ଇଞ୍ଜିଁ କାଟାମାନାରି, ମୀରୁ ଜିକେଏ ଏଝାରିଲେହେଁ କାଟାହାଁ ମାଞ୍ଜୁ । ୩୭ ପ୍ରବୁ ଝାହାନା ଆମିନି ହଲିୟାଙ୍ଗାଣି ଜାଗ୍ରାତା ମାନାଣି ମେହ୍‌ନେସି, ଏଝାରି ନେହେଁ; ନାନୁ ମିଙ୍ଗେ ସାତା ଝେସିମାଞ୍ଜାଇଁ, ଏଝାସି ତାନି ଟେଡେଲି ରୁପାନା ଏଝାରାଇଁ ତିଞ୍ଜାଲି କୁଗି କିହାଁ ତାଗେ ହାଜାନା ସେବା କିନେସି । ୩୮ ଅଡେ ଏଝାସି ମାଦି ଲାଆଁୟାଁ କି ଝେୟା ନେକେରିତା ଜିକେଏ ଝାହାନା ଏଝାରାଇଁ ଏଲେକିଁ କାଟାମାନାଣି ମେହ୍‌ନେସି ଏ ହଲିୟାଙ୍ଗା ନେହେଁ । ୩୯ ☆ସାମା ଇଦାଆଁ ପୁଞ୍ଜାମାଞ୍ଜୁ, ଆମିନି ବେଲାତା ସରୁ ଝାନେସି, ଇଦାଆଁ ଇଲୁଗାଟାସି ପୁଚିହିଁ ଏଝାସି ତାନି କୃତୁ ତୁଡହାଲି ହୀଆଡେସିମା । ୪୦ ମୀରୁ ଜିକେଏ ଜାଗ୍ରାତା ଆହାନା ମାଞ୍ଜୁ, ଇଚିହିଁ ମୀରୁ ଆମିନି ବେଲାତା ଅଣ୍ପା ହିଲଅଡେରି, ଏଚିବେଲାତା ମାଣ୍ଡସି ମୀରୁଏସି ଝାନେସି ।”

**ଟିକାଣା ହିଲାଆଗାଟି ହରେଲଏସି
(ମାତି ୨୪:୪୫-୫୧)**

୪୧ ଏଚେଟିଏ ପିତର ଏଲେଇଚେସି, “ଏ ପ୍ରବୁ ନୀନୁ ପୁଣ୍ଡିକିନି କାତା ମାଙ୍ଗେ କି ବାରେତାକି ଝେସିମାଞ୍ଜୁ ?”

☆ ୧୨:୩୫ ୧୨:୩୫ ମାତି ୨୫:୧-୧୩ ☆ ୧୨:୩୬ ୧୨:୩୬ ମାର୍କ ୧୩:୩୪-୩୬ ☆ ୧୨:୩୯ ୧୨:୩୯ ମାତି ୨୪:୪୩,୪୪

୪୨ ପ୍ରବୁ ଏଲେଇରେସି, “ସାଧୁକାରି ତାନି ଇଲୁତି ଲକୁତାକି ତାନି ରାନ୍ଦା କାରୁତା ରାନ୍ଦା ହାହାଲି ତାନି ଗୁମୁସ୍ତା ପାଣା ହେରପିନେସି, ଇଲେତି ଟିକାଣାଗାଟି ଅଡେ ବୁଦିଗାଟି ହଲେଏସି ଆମ୍ବାଆସି ?” ୪୩ ପ୍ରବୁ ଖାହାନା ତାନି ଆମିନି ହଲେଏଶାଇଁ ଏଲେ କିହିମାନାଣି ମେହନେସି ଏଞ୍ଜାସି ନେହେଁ । ୪୪ ନାନୁ ମିଙ୍ଗେ ସାତା ଝେସିମାଞ୍ଜାଇଁ, ଏଞ୍ଜାସି ଏଞ୍ଜାଶାଇଁ ତାନି ବାରେ ଦନତି ମୁହେଁ ଗୁମୁସ୍ତା କିହା ଇଚିନେସି । ୪୫ ସାମା ଏ ହଲେଏସି ନା ସାଧୁକାରି ଖାନାୟି ମାନେୟିଏ ଇଞ୍ଜି ମନତା ଅଶ୍ପାନା ହଲିୟାଙ୍ଗା ହଲେଣିସିକାଣି ଝେଚାଲି ଇଞ୍ଜା ତିଞ୍ଜି ଉଣ୍ଡିହୁଁ କାଡୁ ହଚାଲି ମାଟ୍ଟନେସି, ୪୬ ଆତିହୁଁ ଏମିନି ଦିନା ହଲେଏସି କାଚାହିଲଅସି ଇଞ୍ଜା ଏମିନି ବେଲା ଏଞ୍ଜାସି ପୁଞ୍ଜାହିଲଅସି, ଏ ଦିନା ଏ ବେଲାତା ତାନି ପ୍ରବୁ ଖାନେସି, ଇଞ୍ଜା ଏଞ୍ଜାସି ଏଞ୍ଜାଶାଇଁ ରା ବାଗା କିହାନା ନାମୁ ହିଲାଆଗାଗାରି ତଲେ ଏଞ୍ଜାଶାଇଁ କାଲନେସି ।

୪୭ ଅଡେ ଆମିନି ହଲେଏସି ତାନି ସାଧୁକାରିତି ମନ ଅଶ୍ପାନା ଜାଗ୍ରାତା ଆଅସି କି ଏଞ୍ଜାଣି ମନତଲେ କାମା କିଅସି, ଏଞ୍ଜାସି ଗାଡି ମାଡା ବେଟା ଆନେସି; ୪୮ ସାମା ଆମ୍ବାଆସି ପୁନାଆନା ମାଡା ପାଣ୍ଡି କାମା କିନେସି, ଏଞ୍ଜାସି ଉଣା ମାଡା ବେଟା ଆନେସି । ଆମ୍ବାଆରାକି ଗାଡି ହୀପୁକି ଆହାମାନେ, ଏଞ୍ଜାଣି ତାଣାଟି ହାରେକା ରାହନାୟି ମାନେ; ଇଞ୍ଜା ଲକୁ ଆମ୍ବାଆରାକି ଗାଡି ହୀହାମାନେରି ଏଞ୍ଜାଣି ତାଣାଟି ହାରେକା ଆଗାଡା ରାହନେରି ।

ଜୀସୁ ଲକୁଣି ବାଗା କିଞ୍ଜିକିନାୟି
(ମାତି ୧୦:୩୪-୩୬)

୪୯ “ନାନୁ ଇ ଦାରତିତା ହିରୁ ପ୍ରଡହାଲି ଖାହାମାଇଁ, ଇଦି ନୀଏଁ ଗୁଡୁ ଗୁଡୁ ଆହିମାନେ ଆତିହୁଁ ନାଙ୍ଗେ ଏନି ଅଶ୍ପୁ ? ୫୦ ✧ସାମା ନାନୁ ର ବାପ୍ତିସ୍ତା† ପାଣନାୟି ମାନେ, ଅଡେ ଏଦି ରାଆ ପାତେକା ନାଙ୍ଗେ ଏତେକା କସ୍ତୁ ହଚି ମାଞ୍ଜାନେ । ୫୧ ନାନୁ ଦାରତିତା ହିଡଡି ହୀହାଲି ଖାହାମାଇଁ ଇଞ୍ଜି ମୀରୁ ଅଶ୍ପିମାଞ୍ଜେରି ? ନାନୁ ମିଙ୍ଗେ ଝେସିମାଞ୍ଜାଇଁ, ଆଏ, ବାଗା କିହାଲି ଖାହାମାଇଁ । ୫୨ ଇଚିହୁଁ ର ଇଜ ପାସାଜାଣା ମାନେରି, ରିଆରି କପାଟି ତାନିଜାଣା ଅଡେ ତାନିଜାଣା

✧ ୧୨:୫୦ ୧୨:୫୦ ମାର୍କ ୧୦:୩୮ † ୧୨:୫୦ ୧୨:୫୦ ମୁଞ୍ଜିନାୟି

କପାଟି ରିଆରି ଏବଂକା ଆନେରି । ^{୫୩} ମୀର୍ଏଣା କପାଟି ତାଞ୍ଜି, ତାଞ୍ଜି କପାଟି ମୀର୍ଏସି, ମାଙ୍ଗା କପାଟି ତାଲି, ତାଲି କପାଟି ମାଙ୍ଗା, କୁଡ଼ିୟାନି କପାଟି ପୟା, ଅଡ଼େ ପୟା କପାଟି କୁଡ଼ିୟା ଏବଂକା ଆନୁ ।”

କାଳାତି ପୁନାୟି
(ମାତି ୧୭:୨,୩)

^{୫୪} ଇଞ୍ଜା ଏଞ୍ଜାସି ଲକୁଣି ଜିକେଏ ଏଲେଇଚେସି, “ଝେଡ଼ା କୃତନିଞ୍ଜାକି ହାଗୁ ନିଙ୍ଗି ମାନାଣି ମେସ୍ତ୍ରସାରେ ଦେବୁଣିଏ ଏଲେଇଞ୍ଜେରି ପିୟୁ ଖାଚେନ, ଅଡ଼େ ଏଲେକିହ୍ ଏ ଆଚେନ; ^{୫୫} ଅଡ଼େ ଚିଞ୍ଜି ଖାକିଚି ଗାଲି ଖେନାଣି ମେସ୍ତ୍ରସାରେ ମୀରୁ ଏଲେଇଞ୍ଜେରି, ଗାତି କାରା ଆଚେନ, ଅଡ଼େ ଏଲେଏ ଆଚେନ । ^{୫୬} ଆଡ଼େ କୁରୁ ଗାଟାତେରି, ମୀରୁ ଦାଚ୍ଚି ଅଡ଼େ ହାଗୁତି ସିନାୟା ପୁଞ୍ଜିମାଞ୍ଜେରି, ସାମା ଇ କାଳାତି ସିନାୟା ଏନିଲେହେତାଇ ପୁଞ୍ଜି ହିଲଅତେରି ?”

ଗଡ଼ହା ଆଡ଼ାଣି ତଲେ ଆଣ୍ଡିନାୟି
(ମାତି ୫:୨୫, ୨୬)

^{୫୭} ଏନାଆଁ କିନାୟିମାନେ ଇଞ୍ଜି ମୀରୁ ଏନାଆଁତାକି ମୀ ବିତ୍ରା ନୀହାୟି କିହିହିଲଅତେରି ? ^{୫୮} ଇଚିହ୍ ମୀ ଗଡ଼ହା ଆଡ଼ାଣି ତଲେ ନୀହାୟି କିନାଣି ତାଣା ହାନିବେଲାତା ଜିରୁତେଏ କାଲ୍ଝିଆନି ଉପେୟି ଅଣ୍ଡାପାମ୍, ଏଲାଆଆତିହ୍ ଏଞ୍ଜାସି ନିଙ୍ଗେ ଅଡ଼େ ଖେଣ୍ଡେ ନୀହାୟି କିନାଣି ତାଣା ରେଜା ଅୟାନେସି, ଅଡ଼େ ନୀହାୟି କିନାସି କସ୍ତକା କେୟୁତା ହେଚ୍ପାନେସି, ଅଡ଼େ କସ୍ତକା ନିଙ୍ଗେ କାୟିଦି ଇଲୁତା ଇଚାନେରି । ^{୫୯} ନାନୁ ମିଙ୍ଗେ ଖେସିମାଞ୍ଜାଇ, “ମୀରୁ ର କାନି ଜିକେଏ ପିହ୍ଆନାହା ହାତିହ୍ ଦେଁ ଏମ୍ପାଟି ହଡ଼ା ଖାହାଲି ଆଡ଼ିଦେରି ।”

୧୩

ମନ ଖେଟ୍‌ଆତିହ୍ ନାସା ଆନାୟି

^୧ ଏଚିବେଲାତା ଏଚେକା ଲକୁ ଖାହାନା, ପିଲାତ ଏମିନି ଗାଲିଲି ଲକୁତି ନେତେରି ଏଞ୍ଜାରି ପୂଜା ତଲେ ଆଚହାମାଚେସି, ଏ କାତା ଜୀସୁଇଁ ଖେସ୍ତେରି । ^୨ ଏମ୍ପାଟିଏ ଜୀସୁ ଏଞ୍ଜାରାଇଁ ଏଲେଇଚେସି, “ଏ ଗାଲିଲିତାରି ଡ଼ଣ୍ଡ ବେଟାଆହାଲିଏ ଏଞ୍ଜାରି ଅର ଗାଲିଲିତାରି କିହାଁ

ହାରେକା ପାପୁ ଗାଟାରି ଇଞ୍ଜିଁ ମୀରୁ ଅଣ୍ଠିପାଞ୍ଜେରି ? ୩ ନାନୁ ମିଙ୍ଗେ
 ଝେସିମାଞ୍ଜାଇଁ, ଏଲେକିଁ ଆଏ, ସାମା ମୀରୁ ମନ ଝେଟ୍‌ଆତିହିଁ
 ବାରେଜାଣା ତେରି ଏଞ୍ଜାରିଲେହେଁ ହାଦେରି । ୪ ସିଲହତା ଆମିନି
 ଅଟର ଜାଣାତି ଲାକ ପାତାଆଡ଼ି କଟା ଇଲୁ ରିହାନା ହାଟେରି, ଏଞ୍ଜାରି
 ବାରେଜାଣା ଜିରୁସାଲମତି ଲକୁ କିହାଁ ହାରେକା ପାପୁ ଗାଟାରି ଇଞ୍ଜିଁ
 ମୀରୁ ଅଣ୍ଠିପାଞ୍ଜେରି ? ୫ ନାନୁ ମିଙ୍ଗେ ଝେସିମାଞ୍ଜାଇଁ, ଏଲେକିଁ
 ଆଏ, ମୀରୁ ମନ ଝେଟ୍‌ଆତିହିଁ ବାରେଜାଣା ତେରି ଏଲେକିହିଁ ଏ
 ନାସା ଆଦେରି ।”

ପାଡ଼େୟି ଆୟାଆଗାଟି ତୟା ମାର୍‌ନୁ

୬ ଜୀସୁ ଇ ପୁଣ୍ଠିକିନି କାତା ଝେସ୍ତେସି, ରଅଣି ଅଙ୍କୁରି ବାଡ଼ାତା
 ର ତୟା ମାର୍‌ନୁ ଉହି ଆହାମାରେ । ଏଞ୍ଜାସି ଝାହାନା ପାଡ଼େୟି
 ପାରୀତେସି ସାମା ମେଡ଼ାଆଆତେସି । ୭ ଇଞ୍ଜା ଏଞ୍ଜାସି କାମା
 କିନାଣାଇଁ ଏଲେଇଚେସି, “ମେହ୍‌ମୁ ନାନୁ ତାନି ବାର୍‌ସା ଆଡ଼େୟିଏ ଇ
 ତୟା ମାର୍‌ନୁତା ଝାହାନା ପାଡ଼େୟି ପାରିମାଇଁ, ସାମା ମେଡ଼ା ଆହି
 ହିଲଅଁ; ଏଦାଣି ଚୁଣହା ତୁହ୍‌ମୁ, ଇଦି ଏନାଆଁତାକି ବୁମିତି ପାଡ଼ିୟା
 କିନେ ?” ୮ ସାମା କାମାକିନାସି ଏଲେଇଚେସି, “ପ୍ରବୁ ଇଦି ଇୟନା
 ତାକି ମାଣ୍‌ମେ, ନାନୁ ଇଦାଣି ସାରିସ୍ତୁଟୁ କାର୍‌ହାନା ଗାତା ହାଇଁ,
 ୯ ଅଡ଼େ ତାୟୁ ପାଡ଼େୟି ଆୟିତିହିଁ ନେହେଁ ଆୟାଆତିହିଁ ଏଦାଣି
 ଚୁଣହା ତୁହ୍‌ମୁ ।”

ଜୀସୁ ଜମିନି ଦିନା ର ଚୁଡୁଝା ଇୟାନି ନେହିଁକିନାୟି

୧୦ ର ଦିନା ଜୀସୁ ଜମିନି ଦିନା ର ଜୀହୁଦି ଲକୁଡ଼ି କୁଟମି ଇଲୁତା*
 ଜାପୁହି ମାଚେସି । ୧୧ ଏମ୍‌ଆଁ ର ଇୟା ମାଚେ, ଏଦି ଅଟର
 ବାର୍‌ସା ପାଚେକା ପଲ୍‌ଆ ବୁଡୁ ତଲେ କସ୍ତୁ ଆହିମାଚେ, ଏଦି ଚୁଡୁଝା
 ଆହାନା ସଲ୍‌କେ ଆହିଁ ତାକାଲି ଆଡ଼ିହିଲିଆତେ । ୧୨ ଜୀସୁ ଏଦାନି
 ମେସାନା ଡାଗେ ହାଟାନା ଏଲେଇଚେସି, “ଏ ଇୟା ନାନୁ ନୀ ଆଡ଼ାଆ
 କସ୍ତୁଟି ନେହିଁ ଆଡ଼ି ।” ୧୩ ଅଡ଼େ ଏଞ୍ଜାସି ଏଦାନିଲେକ କେୟୁ
 ଇଚିତେସି, ଏମ୍‌ଗାଟିଏ ଏଦି ଏ ଦେବୁଣିଏ ସଲ୍‌କେ ଆହାନା ମାହାପୁରୁତି
 ଜହରା କିଚେ ।

* ୧୩:୧୦ ୧୩:୧୦ ସିନଗଗ୍

୧୪ ସାମା ଜୀସୁ ଜମିନି ଦିନାତା ନେହୁଁ କିହିମାତାକି ଜୀହୁଦି ଲକୁଡି କୁଟମି ଇଲୁଡି† କାଜାସି କାରୁବି ଆହାନା ଲକୁଣି ଏଲେଇରେସି, “କାମା କିହାଲି ସ ଦିନା ମିଙ୍ଗେ ମାନେ; ଏଦାଣିତାକି ସ ଦିନା ନେହୁଁ ଆହାଲି ଖାଦୁ, ଜମିନି ଦିନାତା ଖାଆଦୁ ।”

୧୫ ସାମା ପ୍ରୁ ଏଞ୍ଜାଣାଇଁ ଏଲେଇରେସି, “ଆଡେ କୁଟୁ ଗାଟାଡେରି, ମୀରୁ ବାରେଜାଣା ତେରି ଜମିନି ଦିନାତା ମୀ କଡି କି ଗାଡ଼ଦେଡି ହାଃଅଲାଟି ଅହାନା ଏମୁ ଉର୍ବୁହି ହିଲଅଡେରି କି ? ୧୬ ଅଟର ବାର୍ସା ପାଡେକା ସୟତାନ ତାଣାଟି ଦସ୍ପି ଆହାମାନି ଅରୁହାମ କୁଡାତି ଇ ଇୟାନି ଜମିନି ଦିନାତା ନେହୁଁ କିନାୟି ହିଲଆଡେ କି ?” ୧୭ ଏଞ୍ଜାସି ଇ ବାରେ କାତା ଖେସାଲିଏ, ତାନି ସାଡୁୟାଁ ବାରେ ଲାଜା ବେଟାଆଡେରି, ସାମା ଜୀସୁ କିହାମାନି କାମା ମେସାନା ଲକୁ ରାହାଁ ଆଡେରି ।

ହାର୍ସୁ ପାଡେଡି

(ମାତି ୧୩:୩୧, ୩୨; ମାର୍କ ୪:୩୦-୩୨)

୧୮ ଜୀସୁ ଏଲେଇରେସି, “ମାହାପୁରୁ ରାଜି ଏନିଲେହେଁତାୟି ? ଆମ୍ବାରିତଲେ ଏଦାନି ତୁକଇଁ ? ୧୯ ଏଦି ଇଲେଡି ର ହାର୍ସୁ ପାଡେଡି ଲେହେଁ, ଏଦାଆଁ ଅହାନା ରଅସି ତାନି ବାଡାତା ମାଟିଡେସି, ଅଡେ ଏଦି ପାଡାଆହାନା ର ମାରୁନୁ ଆଡେ, ଅଡେ ହାରୁ ଲାକ ଉର୍ବୁନି ପଟାୟାଁ ଖାହାନା ଏ କମାତା ବାସା କିତୁ ।”

ପୁଲାଏମୁ

(ମାତି ୧୩:୩୩)

୨୦ ଜୀସୁ ଅଡେ ଏଲେଇରେସି, “ନାନୁ ଆମ୍ବାରିତଲେ ମାହାପୁରୁଡି ରାଜି ତୁକଇଁ ? ୨୧ ଏଦି ପୁଲା ଏମୁଲେହେଁତାୟି, ର ଇୟା ତାନିମାଣା ଗୁଣ୍ଡାତା କାଲୁହା ଇଟିଡେ, ତାୟୁ ବାରେ ଗୁଣ୍ଡା ପୁଲା ଆଡେ ।”

ଜାକଣି ଦୁଖେରି

(ମାତି ୭:୧୩, ୧୪, ୨୧-୨୩)

† ୧୩:୧୪ ୧୩:୧୪ ସିନଗର

୨୨ ତାହୁଁ ଜୀସୁ ଗାଡ଼ାତାକି ଗାଡ଼ା ନାହୁଁ ତାକି ନାହୁଁ ରେଜିହିଁ ଜାପୁହିହିଁ ଜିରୁସାଲମ ଖାକି ହାଜିମାଚେସି । ୨୩ ରଅସି ଏଞ୍ଜାଣାଇଁ ଖେଚେସି, “ପ୍ରବୁ ଗେଲ୍‌ପି ଆନାରି ଖାର୍‌ଇ ଇଚରା ଜାଣାକି ?”

ଜୀସୁ ଏଞ୍ଜାରାଇଁ ଏଲେଇଚେସି, ୨୪ “ଜୀସୁ ତୁସାନା ଜାକ୍‌ଣି ଦୁଝେରିଟି ହାଜୁ; ଇଚିହିଁ ନାନୁ ମିଙ୍ଗେ ଖେସିମାଞ୍ଜାଇଁ, ହାଚେକା ହଡାଲି ଅଣ୍‌ପିନେରି, ସାମା ହଡାଲି ଆଡ଼ଅରି । ୨୫ ଇଲୁଗାଟାସି ନିଙ୍ଗାନା ଦାରା ସୁଣ୍ଡିତି ତାହୁଁ ଏଚେତା ମୀରୁ ପାଙ୍ଗାତା ନିଚାନା ଦାରା ଡୀ ଡୀ ଖେଚିହିଁ ‘ଏ ପ୍ରବୁ ମାଙ୍ଗେତାକି ଦାରା ଦେତାମ୍’ ଇଞ୍ଜିଁ ହାଚିଦେରି, ଏଚେତା ଏଞ୍ଜାସି ମିଙ୍ଗେ ଏଲେଇଞ୍ଜାନେସି, ‘ମୀରୁ ଏମ୍‌ପିତାଚେରି ନାନୁ ପୁଞ୍ଜାମାଞ୍ଜଅଁ ।’ ୨୬ ଏଚିବେଲା ମୀରୁ ଏଲେଇଞ୍ଜେରି, ‘ଏ ପ୍ରବୁ ମାମ୍‌ନୀ ତଲେ ତିଚା ଉଚାତମି, ଅଡ଼େ ନୀନୁ ମା ଆଂଗେଣିକାଣା ଜାପୁହିମାଞ୍ଜାତି ।’ ୨୭ ଅଡ଼େ ଏଞ୍ଜାସି ମିଙ୍ଗେ ଏଲେଇଞ୍ଜାନେସି, ‘ମୀରୁ ଆମିନି ଚାୟୁତି ଲକୁଚେରି ନାନୁ ପୁଞ୍ଜାମାଞ୍ଜଅଁ; ଏ ଲାଗେଏ ପଲେଏ ତାଚେରି ନା ଡାଣାଟି ହେକ ଆଦୁ ।’ ୨୮ ☆ଏଚିବେଲା ମୀରୁ ଅବ୍ରାହାମ, ଇସାହାକ, ଜାକୁବ ଇଞ୍ଜା ବାରେ ମାହାପୁରୁ ଅଣ୍‌ପୁତି ବଲୁ ଖେହ୍‌ନାରାଇଁ ମାହାପୁରୁ ରାଜିତା ମାନାଣି ଅଡ଼େ ମିଙ୍ଗେ ପାଙ୍ଗାତା କୁତା ମାଞ୍ଜାନାଣି ଅଣ୍‌ପାନା ପାଲ୍‌କା ଚୀଟି କିହିଁ ଡୀଦେରି । ୨୯ ଅଡ଼େ ହାଚେକା ଲକୁ ଖେଡ଼ା ହପୁ ଖାକିଟି ଅଡ଼େ ଖେଡ଼ା କୁଡ଼ି ଖାକିଟି, ଚିଃନି ଖାକିଟି ଚେବୁ ଖାକିଟି ଖାହାନା ମାହାପୁରୁତି ରାଜିତି ବଜିତା କୁଗିନେରି । ୩୦ ☆ଅଡ଼େ ମେହ୍‌ଦୁ ତାୟୁତା ମାନି କଚେକା ନକିତା ଆନେରି ଅଡ଼େ ନକିତା ମାନି କଚେକା ତାୟୁତା ଆନେରି ।”

**ଜୀସୁ ଜିରୁସାଲମତି ଜୀସୁନନ୍‌ୟି
(ମାତି ୨୩:୩୭-୩୯)**

୩୧ ଏଚିବେଲାତେଏ ଏଚରଜାଣା ପାରୁସିୟା ଖାହାନା ଜୀସୁଇଁ ଖେସ୍ତେରି, “ନୀନୁ ଇ ଚାୟୁ ପିସାନା ହାଜାତୁହ୍‌ମୁ ଏନାଆଁତାକି ଇଚିହିଁ ହେରଦ ନିଙ୍ଗେ ପାୟାଲି ଅଣ୍‌ପିମାନେସି ।”

☆ **୧୩:୨୮** ୧୩:୨୮ ମାତି ୨୨:୧୩; ୨୫:୩୦ ☆ **୧୩:୨୮** ୧୩:୨୮ ମାତି ୮:୧୧,୧୨
☆ **୧୩:୩୦** ୧୩:୩୦ ମାତି ୧୯:୩୦; ୨୦:୧୬; ମାର୍କ ୧୦:୩୧

୩୭ ଜୀସୁ ଏଝାରାଇଁ ଏଲେଇଚେସି, “ମୀରୁ ହାଜାନା ଏ ନାକାଇଁ
 ଝେହ୍ନୁ, ‘ମେହ୍ନୁ ନାନୁ ନୀଞ୍ଜୁ ଅଡ଼େ ଝିଏ ବୁଡୁୟାଁ ପିସ୍ପି କିହିମାଇଁ
 ଅଡ଼େ ନେହ୍ନି କିହିମାଇଁ ଇଞ୍ଜା ତାନି ଦିନାଟିଏ ନା କାମା ରାପୁଇଁ ।’
 ୩୩ ଏନିଜିକେଏ ନୀଞ୍ଜୁ ଝିଏ ଅଡ଼େ ମାଏଁ ନାଙ୍ଗେ ତାକିହିଁ ହାଜାଲି
 ଆନେ, ଇଚିହିଁ ମାହାପୁରୁ ଅଣ୍ଟପୁତି ବଲୁ ଝେହ୍ନାସି ଜିରୁସାଲମ
 ପିସ୍ପେ ପାଙ୍ଗାତା ହାନାୟି ନେହ୍ନିଆଏ ।”

୩୪ “ଏ ଜିରୁସାଲମ, ଏ ଜିରୁସାଲମ ମାହାପୁରୁ ଅଣ୍ଟପୁତି ବଲୁ
 ଝେହ୍ନାରାଇଁ ପାୟିନାତି ଅଡ଼େ ନୀ ତାଣା ପାଣ୍ଡୁଝି ଆହାମାନାରାଇଁ
 ଝାଲୁକାତଲେ ଝେନାତି, ତାଲି କମ୍ପୁ ଏନିକିଁ ତାନି ହୀପାୟାଣି ତାନି
 ମାରାୟାଁ ତୁଇ ଜଳିନେ, ଏଲେକିଁ ଏଚର ଦେବା ନୀ ପଦି ପଦାତି
 ପୁକ୍ତହାନା ଇଚିଇଁ ଇଞ୍ଜିଁ ଅଣ୍ଟପିମାଚେଏଁ ସାମା ମୀରୁ ଏଲେକିହାଲି
 ହିୟାଆତେରି । ୩୫ ମେହ୍ନୁ ମୀ ଇଲୁ ମୀ କେମ୍ପୁତା ହୀପକି
 ଆହିମାଞ୍ଜାନେ; ଅଡ଼େ ନାନୁ ମିଙ୍ଗେ ଏଲେଇଞ୍ଜିମାଞ୍ଜାଇଁ ମାହାପୁରୁ
 ଦରୁଟି ଆମ୍ବାଆସି ଝାହିମାନେସି ଏଝାସି ନେହ୍ନାସି ଇଞ୍ଜିଁ ଏମିନି ନେଚୁ
 ଇ କାତା ଏଲେଇଞ୍ଜେରି ଏ ଦିନା ଝାଆ ପାତେକା ମୀରୁ ଅଡ଼େ ନାଙ୍ଗେ
 ମେସ୍ତଅତେରି ।”

୧୪

ଜୀସୁ ରଗ ଗାଟାଣାଇଁ ନେହ୍ନି କିନାୟି

୧ ଜୀସୁ ର ଜମିନି ଦିନା ରାନ୍ଦା ତିଞ୍ଜାଲି ପାରୁସିୟାଁ ବିତ୍ରାଟି ର
 କାଜାଣି ଇଜ ହଡାଲିଏ ଏଝାରି ଏଝାଣାଇଁ ଦହ ଦସାଲି ପରୁହି
 ମାଚେରି । ୨ ଅଡ଼େ ମେହ୍ନୁ ଏଝାଣି ନକିତା କେସ୍ତା କତାୟାଁ ପାଟିତାସି
 ରଅସି ମାଚେସି । ୩ ଏମ୍ବାଟିଏ ଜୀସୁ ମସାତି ମେରାପୁନାରି ଅଡ଼େ
 ପାରୁସିୟାଁଇଁ ଏଲେଇଚେସି, “ଜମିନି ଦିନାତା ରଅଣାଇଁ ନେହ୍ନି କିନି
 ମେରା ମାନେକି ଆଏ ?”

୪ ଏମ୍ବାଟିଏ ବାରେଜାଣା ପାଲେଏ ଆଡ଼େରି । ଇଞ୍ଜା ଜୀସୁ ଏଝାଣାଇଁ
 ତୀଗାହାଁ ନେହ୍ନି କିହାନା ମୀ ଇଜ ହାଲାମ୍ପୁ ଇଞ୍ଜିଁ ହେଲ ହୀତେସି
 । ୫ ଇଞ୍ଜା ଏଝାସି ଏଝାରାଇଁ ଏଲେଇଚେସି, “ମୀ ବିତ୍ରାଟି ଆମ୍ବାଆସି

☆ ୧୪:୫ ୧୪:୫ ମାତି ୧୨:୧୧

ମୀରଂସସି କି କଡ଼ି ଜମିନି ଦିନାତା କୁହିତା ରିତିହିଁ ଏ ଦେବୁଣିଏ ଡେଞ୍ଜା କତଅସି କି ?”

୬ ଅଡ଼େ ଏଞ୍ଜାରି ଇ ବାରେ କାତା ଖେଞ୍ଜାନା ଏନାଆଁ ଜଲ୍ଲାଲି ଆଡ଼ାଆତେରି ।

ସେବା କିନାୟି ଅଡ଼େ ତାମ୍‌ଜେ ଉଣା କିହା କଡ଼ିନାୟି

୭ ବଜିତା ହାଟ୍‌କି ଆହାମାଚାରି ନେହଁ ନେହଁ ଟାୟୁତା କୁଗାଲି ବାଟି କିହିମାଚାଣି ମେସାନା, ଏଞ୍ଜାରାଇଁ ର ପୁଣ୍ଡିକିନି କାତା ଖେସେସି, ୮ “ଏଚିରେଲ୍ଲା ରଅସି ମିଜେ ବାହା ବଜିତା ହାଟାନ୍‌ସି, ଏମ୍‌ଆଁ ନେହଁ ଟାୟୁତା କୁଗାଆଦୁ, ଇଚିହଁ ଏମ୍‌ଆଁ ନୀ କିହାଁ କାଜାସି ଜିକେଏ ହାଟ୍‌କି ଆହାଡ଼ୟିନେସି, ୯ ଏଡ଼େତା ନିଜେ ଅଡ଼େ ଏଞ୍ଜାଣାଇଁ ହାଟା ମାନସି, ଏଞ୍ଜାସି ଖାହାନା ଇଞ୍ଜାଣାକି ଇ ଟାୟୁ ପିସାହୀମୁ ଇଞ୍ଜାନେସି, ଏଡ଼େତା ନୀନୁ ଲାଜାତଲେ ଉଣା ଟାୟୁତା କୁଗିଦି । ୧୦ ସାମା ଏଚିରେଲ୍ଲା ନୀନୁ ହାଟ୍‌କି ଆହାମାନି ତାଣା ହାଜାନା ଡ଼ଇତି ଟାୟୁତା କୁଗାମୁ, ଏଚେଟିଏ ନିଜେ ହାଟି କିହାମାଞ୍ଜାନାସି, ଏ ତଣେ ନୀନୁ ଇ ନେହଁ ଟାୟୁତା କୁଗାମୁ ଇଞ୍ଜିଁ ହାଟାସାରେ ଏଚିରେଲ୍ଲା କୁଡ଼ା ଆହାମାନି ଲକୁ ନକିତା ଗାଡ଼ି ମାନି ବେଟାଆଡ଼ି । ୧୧ *ଇଚିହଁ ଆମ୍‌ଆସି ନାନୁ କାଜାତେଏଁ ଇଞ୍ଜିଁ ଇଞ୍ଜାଁ କଡ଼ିନାଣାଇଁ ଉଣା କିଞ୍ଜିଆଡ଼େ, ଅଡ଼େ ଆମ୍‌ଆସି ତାଜେ ଉଣା କିହାକଡ଼ିନେସି ଏଞ୍ଜାଣାଇଁ କାଜାସି କିଞ୍ଜିଆଡ଼େ ।”

୧୨ ଇଞ୍ଜାଁ ଜୀସୁ ତାଜେ ହାଟି କିହା ମାଚାଣାଇଁ ଜିକେଏ ଏଲେଇଚେସି, “ନୀନୁ ବଜି ହୀନାଟି ନୀ ତଡ଼େସିଙ୍ଗାଣି, ତାୟିୟାଁ, ସାମ୍‌ୟାଁ କି ନୀ ନାୟୁତା ମାନି ଦନ ଗାଟାରାଇଁ ହାଟାଆନି, ଇଚିହଁ ଏଞ୍ଜାରି ଜିକେଏ ନିଜେ ହାଟାଲି ଆଡ଼ାନେରି ଅଡ଼େ ନୀନୁ ଖେଣ୍ଡେ ବେଟାଆଡ଼ି । ୧୩ ସାମା ବଜି କିତିସାରେ ହିଲ୍ଲାଆ ଗାଟାରି, କଲ୍ଲାୟାଁ, ସଟାୟାଁ, କାଣାୟାଁଣି ହାଟାମୁ; ଆତିହଁ ନୀନୁ ନେହାଁତି ଆଡ଼ି, ୧୪ ଆତିହଁ ନିଜେତାକି ନେହେଁ, ଇଚିହଁ ନିଜେ ଖେଣ୍ଡେ ହୀହାଲି ଏଞ୍ଜାରିତାଣା ଏନାୟି ହିଲେଏ; ଇଞ୍ଜାଁ ତୀରିଗାଟାରି ଖେଣ୍ଡେ ନିଜ୍ଜନାଟି ମାହାପୁରୁ ନିଜେ ଖେଣ୍ଡେ ହିୟାନେସି ।”

* ୧୪:୧୧ ୧୪:୧୧ ମାତି ୨୩:୧୨; ଲୁକ ୧୮:୧୪

କାଜା ବଢ଼ିତି ପୁଣ୍ୟକିନାୟି
(ମାତି ୨୨:୧-୧୦)

୧୫ ଇ କାତା ଝେଞ୍ଜାନା ଏଞ୍ଜାଣିତଲେ ତିଞ୍ଜାଲି କୁଗାମାଚାରି ବିତ୍ରାଟି ରଅସି ଜୀସୁଇଁ ଏଲେଇଚେସି, “ଆମିନିଗାଟାସି ମାହାପୁରୁ ରାଜିତା ବଢ଼ି ତିନାସି ଏଞ୍ଜାସି ନେହାସି ।”

୧୬ ସାମା ଜୀସୁ ଏଞ୍ଜାଣାଇଁ ଏଲେଇଚେସି, “ରଅସି ର କାଜା ବଢ଼ି ଲକୁକି ହୀଇଁ ଇଞ୍ଜି ଅଣ୍ଠାପାନା ହାରେକା ଲକୁଇଁ ହାଟିତେସି; ୧୭ ଅଡ଼େ ତିନି କାରୁ ଆୟାଲିଏ, ଏଞ୍ଜାସି ହାଟାମାନି ଲକୁତାଣା ତାନି ହଲେଏଣାଇଁ ପାଣ୍ଠାନା ଏଲେଇଚେସି, ‘ବାରେ ଆଡ଼େୟିଏ ନୀଏଟି ମୀରୁ ତିଞ୍ଜାଲି ଖାଦୁ ।’ ୧୮ ସାମା ବାରେଜାଣା ଏଞ୍ଜାଣାଇଁ ରଣ୍ଠିଏ କାତା ଏଲେଇଚେରେ, ରଅସି ଝେସ୍ତେସି, ‘ନାନୁ ଇଚାଣି ବୁମି କତାମାଇଁ ଏଦାଆଁ ସିନିକିହାଲି ହାନାୟିମାନେ; ଏଦାଆଁତାକି ନାଞ୍ଜେ କାର୍ମା ଅଣ୍ଠାପାନୁ ନାନୁ ଖାହାଲି ଆଡ଼ଅଁ ।’ ୧୯ ଅଡ଼େ ରଅସି ଏଲେଇଚେସି, ‘ନାନୁ ପାସା ହେରୁ କଡ଼ିୟାଁ କତାମାଇଁ, ନାନୁ ଏଞ୍ଜାସିକାଣି ମାଡ଼ନାୟି ମାନେ ଏଦାଣିତାକି ନାଞ୍ଜେ କାର୍ମା ଅଣ୍ଠାପାନୁ ନାନୁ ଖାହାଲି ଆଡ଼ଅଁ ।’ ୨୦ ଅଡ଼େ ରଅସି ଏଲେଇଚେସି, ‘ନାନୁ ନୀଞ୍ଜୁ ବୀହା ଆହାମାଇଁ ଏଦାଆଁତାକି ନାନୁ ଖାହାଲି ଆଡ଼ଅଁ ।’ ୨୧ ଇଞ୍ଜା ଏ ହଲେଏସି ଖାହାନା ବାରେ ତାନି ସାଞ୍ଜୁକାରିଇଁ ଝେସ୍ତେସି । ଏଚେଟିଏ ଏ କାତା ଝେଞ୍ଜାନା ଏଞ୍ଜାସି କାର୍ବି ଆହାନା ତାନି ହଲେଏଣାଇଁ ଏଲେଇଚେସି, ନୀନୁ ତବେ ଗାଡ଼ାତି ସାହଡ଼ାୟାଁ ଅଡ଼େ ତାଣ୍ଡେଣାଁ ହାଜାନା ହିଲାଆଗାଟାରାଇଁ, କଲାୟାଁ, ସଟାୟାଁ ଇଞ୍ଜା କାଣାୟାଁ ଇମ୍ପାଆଁ ହାଟାତାମୁ । ୨୨ ତାୟୁ ଏ ହଲେଏସି ଏଲେଇଚେସି, ‘ଏ ପ୍ରବୁ ନୀ କାତାତଲେ ବାରେ କିଡ଼ମି ସାମା ଇଲୁ ନେଞ୍ଜା ହିଲେଏ ।’ ୨୩ ଏମ୍ପାଟିଏ ସାଞ୍ଜୁକାରି ହଲେଏଣାଇଁ ଟାଣ୍ଡିତେସି, ‘କାଜା ଆଂଗେଣି ଅଡ଼େ ମାରୁନୁ ତୁଇ ହାଜାନା ନା ଇଲୁ ଏନିକି ନେଞ୍ଜେନେ ଏଦାଆଁତାକି ଲକୁଣି ଖାହାଲି ଏଲେଇନାମୁ । ୨୪ ନାନୁ ଝେସିମାଞ୍ଜାଇଁ ତଲି ହାଟାମାଚାରି ବିତ୍ରାଟି ରଅସି ଜିକେଏ ନା ବଢ଼ି ଖାଣ୍ଡାଲି ବେଟାଆଅସି ।”

ଏନିଲେହେଁତାସି ଜୀସୁତି ସୀସୁ ଆନେସି
(ମାତି ୧୦:୩୭, ୩୮)

୨୫ ମାନ୍ଦା ଲକୁ ଜୀସୁତଲେ ହାଜିମାଚେରି, ଏଝାସି ତାୟୁଝାକି ସିନିକିହାନା ଏଝାରାଇଁ ଏଲେଇଚେସି, ୨୬ ☆“ଆମ୍ବାଆସି ନା ତାଣା ଝାହାନା ତାନି ତାଲି, ତାଞ୍ଜି, ତକ୍ତି, ମୀରକା, ମାସକା, ତାୟି ତାଞ୍ଜିସ୍ତାଣି ଅଡେ ତାନି ଜୀସୁତି ଜିକେଏ ଅପଅସି ଏଝାସି ନା ସୀସୁ ଆୟାଲି ଆଡଅସି । ୨୭ ☆ଆମ୍ବାଆସି ତାନି କୁସ ଡେକାନା ନା ଜେଚ ଜେଚ ଝାଅସି, ଏଝାସି ନା ସୀସୁ ଆୟାଲି ଆଡଅସି । ୨୮ ମୀ ବିତ୍ରାଟି ଆମ୍ବାଆସି ପାଡକିହେଁ କଟା ଇଲୁ ଦସାଲି ଅଣପିନେସି, ଦହ୍ନି କାମା ରାପୁହାଲି ଟାକାୟାଁ ଏନୁ କି ଏଉ ଇଞ୍ଜିହେଁ ଏମ୍ବାତି ଲେକା କିଅସିକି ? ୨୯ ଏଚେତା ଏଝାସି ପୁନାଦି ନିପହାନା ରାପୁହାଲି ଆଡାଆସାରେ, ଏଚେକା ଲକୁ ଏଦାଆଁ ମେହ୍ନେରି, ବାରେଜାଣା ଏଝାଣାଇଁ କାକ୍ନେରି, ୩୦ ଲକୁ ଏଝାଣାଇଁ ଲାଜାକିହେଁ ଏଲେଇନେରି, ଇଝାସି ଇଲୁ ଦସାଲି ମାଟହେସି ରାପୁହାଲି ଆଡାଆଚେସି । ୩୧ ର ରାଜା ଅର ରାଜା କପାଟି ଦୁକୁ କିହାଲି ହାଜିମାନାଟି ଦସ ମାଣା କସକା ଏଝାଣି କଡେ ମାଣା କସକା କପାଟି ଦୁକୁ କିହାଲି ଆଡିନେରିକି ଆଏ ଇଞ୍ଜିଁ ଅଣପଅସିକି ? ୩୨ ଆଡାଆଲେହେଁ ଇଚିହେଁ ଏ ରାଜା ହେକ ମାନାଟିଏ ଏଝାସି ରାଜିମାନା ଆୟାଲି କସକାଣି ହିଡଡି ତାକି ଏଲେଇଞ୍ଜା ପାଣିନେସି । ୩୩ ଏଲେକିହେଁଏ ମୀ ବିତ୍ରାଟି ଜିକେଏ ଆମ୍ବାଆସି ତାନି ବାରେ ପିହଆତିହେଁ ଏଝାସି ନା ସୀସୁ ଆୟାଲି ଆଡଅସି ।”

ମୁଆ ହାରୁ
(ମାତି ୫:୧୩; ମାର୍କ ୯:୫୦)

୩୪ “ହାରୁତ ନେହାୟି; ସାମା ହାରୁ ମୁଆସାରେ ଏଦାଆଁ ଏନିକିଁ ଅଡେ ଏନାଆଁତଲେ ହାରୁ ଲେହେଁ ମୁପି କିନାୟି ? ୩୫ ଏଦି ବୁମିତା କି ଗାତା କଚୁତା କୁଡୁସାଲି ଜିକେଏ ଜଡେ ଆଏ । ଲକୁ ଏଦାନି ପାଞ୍ଜାତା କୁତା ତୁହ୍ନେରି । ଆମ୍ବାଆରି ଝେଞ୍ଜାଲି କୀର୍କା ମାତିହେଁ, ଝେଞ୍ଜୁ ।”

☆ ୧୪:୨୬ ୧୪:୨୭ ମାତି ୧୦:୩୭ ☆ ୧୪:୨୭ ୧୪:୨୭ ମାତି ୧୦:୩୮; ୧୭:୨୪; ମାର୍କ ୮:୩୪; ଲୁକ ୯:୨୩

୧୫

ଜାକ୍ଵିତି ମେଣ୍ଟା

(ମାତି ୧୮:୧୨-୧୪)

୧ ✨ର ଦିନା ସିସୁ ରାହନାରି ଅଡ଼େ ପାପୁ ଗାଗାରି ବାରେଜାଣା ତାନି କାତା ଖେଞ୍ଜାଲି ଖାହିମାରେରି । ୨ ଏଚେଟିଏ ପାରୁସିୟାଁ ଅଡ଼େ ମେରାପୁନାରି ଜୀସୁଇଁ ଗୁରୁମୁରୁ ଆହିଁ ଏଲେଇଚେରି, “ଇଝାସି ପାପୁ ଗାଗାରାଇଁ ଆବିମାନେସି, ଇଞ୍ଜା ଏଝାରିତଲେ ତିଞ୍ଜି ଉଣ୍ଠି ମାନେସି !” ୩ ଏମ୍ବାଟିଏ ଜୀସୁ ଏଝାରାଇଁ ଇ ପୁଣ୍ଠିକିନି କାତା ଖେସ୍ତେସି ।

୪ “ମୀ ବିତ୍ରାଟି ଆମ୍ବାଆଡେରି ଇଲେତି ଲକୁ ମାଞ୍ଜେରି, ଏଝାଣାକି ପାସାକଡ଼ି ମେଣ୍ଟାୟାଁ ମାଚିହିଁ, ଏଝାସିକା ବିତ୍ରାଟି ରଣ୍ଠି ଜାକ୍ଵିତିହିଁ ଏଝାସି ଏନାଆଁ କିନେସି, ରଣ୍ଠି ଉଣା ପାସାକଡ଼ି ମେଣ୍ଟାୟାଁ ବାଗାତା ପିସାନା ଜାକ୍ଵାମାନି ମେଣ୍ଟା ପାଣ୍ଠି ପାତେକା ପାରଅସି କି ? ୫ ଇଞ୍ଜା ବେଟାଆଡ଼ିସାରେ ରାହାଁତଲେ ଡେକାନା ଇଜ ତାନେସି, ୬ ଇଞ୍ଜା ତାନି ତଣେସିକାଣି ଅଡ଼େ ନାୟୁଁତାରାଇଁ ହାଟାନା ଏଲେଇନେସି, ମୀରୁ ନା ତଲେ ରାହାଁ କିଦୁ, ଏନାଆଁତାକି ଇଚିହିଁ ଜାକ୍ଵାମାଟି ନା ମେଣ୍ଟା ବେଟାଆଡେସି । ୭ ନାନୁ ମିଙ୍ଗେ ଖେସିମାଞ୍ଜାଇଁ, ଏଲେକିହିଁ ଏ ମନ ଖେଟ୍‌ହାଲି ଲଡ଼ା ଆଆଗାଟି ରଅସି ଉଣା ପାସାକଡ଼ି ତୀରିଗାଗାରି କିହାଁ ପାପୁ ଗାଗାସି ରଅସି ତାନି ମନ ଖେଟ୍‌ହା କଡ଼ିତିହିଁ, ଏଝାଣି କସିମି ଲାକପୁରୁ ହାରେକା ରାହାଁ ଆନେ ।”

ଜାକ୍ଵିତି ଟାକା

୮ “ଅଡ଼େ ଇଲେତି ଆମିନି ଇୟା ମାନେ, ଏ ଇୟାନାକି ଦସଗଟା ଖେଣ୍ଠି ଟାକା ମାଚିହିଁ ରଣ୍ଠାଆଁ ଜାକ୍‌ହିହିଁ ଏଦି ଏନାଆଁ କିନେ, ଦୀଝି ଡ଼ସାନା ଇଲୁ ହେପାନା ଏ ଜାକ୍‌ହି ଟାକା ପାଣ୍ଠି ପାତେକା ଜାଡ଼ୁ ତଲେ ପାରେଏକି ? ୯ ଇଞ୍ଜାହାଁ ଏ ଟାକା ବେଟାଆଡ଼ିସାରେ ଏଦି ତାନି ତଡ଼ ଲୁକୁଣି ଇଞ୍ଜା ନାୟୁକାତି ଲକୁଣି ରୁଣ୍ଠି କିହାନା ଏଲେଇନେ ନା ତଲେ ରାହାଁ କିଦୁ, ଏନାଆଁତାକି ଇଚିହିଁ ଜାକ୍‌ହାମାଟି ଟାକା ବେଟାଆଡେସି । ୧୦ ନାନୁ ମିଙ୍ଗେ ଖେସିମାଞ୍ଜାଇଁ, ଏଲେକିହିଁ

☆ ୧୫:୧ ୧୫:୧ ଲୁକ ୫:୨୯,୩୦

ଆତ୍ମାଆସି ମନ ଖେଟ୍ଟନେସି, ଇଲେତି ପାପୁ ଗାଟାରାକି ମାହାପୁରୁତି ଦୂରୁୟା ନକିତା ରାହା ଆନେ ।”

ଜାଜିତି ମୀରୁଏସି

୧୧ ଜୀସୁ ଅଡେ ଏଲେଇଚେସି, ରଅଣାକି ରିଆରି ମୀରୁକା ମାଚେରି । ୧୨ ଏଞ୍ଜାରି ବିତ୍ରାଟି ଉଣା ମୀରୁଏସି ଆବାଇଁ ଏଲେଇଚେସି, ଆବା ଇଲୁତି ଦନ ବାଟି କିହାନା ନାଜେ ଆୟାନି ବାଗା ହିୟାମୁ । ଏଚେଟିଏ ତାମି ଆବା ତାନି ଦନ ବାଟି କିହାନା ରୀ ମୀରୁକାକି ହୀତେସି । ୧୩ ଏମ୍ବାଟିଏ ଏଚରଦିନା ହାଜାଲିଏ ଇତି ମୀରୁଏସି ଇଲୁ ବାଗା ହୀହାମାଗାଣି ପାରୁରାହାଁ ଟାକାୟାଁ ଆସାହାଁ ହେକରାଜି ହାଜାତୁସ୍ତେସି, ଇଞ୍ଜା ଲେନିପନିଏ ତାୟୁ ଏସ୍କି ଅଣ୍ପାଆନା ଲାଗେଏତି କାମାତା ତାନି ଦନ ରାପୁହେସି । ୧୪ ସାମା ବାରେ ଦନ ରାପୁହି ଜେଟ ଏ ଦେସାତା କାର୍ଡୁ କାଡାରା ଆହାଲିଏ ଏଞ୍ଜାସି କାକୁଲି ଆଡେସି । ୧୫ ଏଚେଟିଏ ଏଞ୍ଜାସି ହାଜାନା ଏ ଦେସାତି ର ସାଞ୍ଜୁକାରି ତାଣା ଗତି ତୟିତେସି, ଏଞ୍ଜାସି ଏଞ୍ଜାଣାକି ପାଜିୟାଁ ମେଚାଲି ଗୁଡିୟାତା ପାଣ୍ଡିତେସି; ୧୬ ଇଞ୍ଜା ପାଜିୟାଁ ଆମିନି କାଜା ସାଲିୟାଁ ତିଞ୍ଜି ମାରୁ, ଏଞ୍ଜାଆଁ ତିଞ୍ଜାଲି ମନ କିତେସି, ସାମା ଆତ୍ମାଆରି ଏଞ୍ଜାଣାକି ତିଞ୍ଜାଲି ହୀହି ହିଲଆଡେରି । ୧୭ ର ଦିନା ତୀରପୁ ଆହାନା ଅଣ୍ପିତେସି, ମା ଆବା ତାଣାତି ଗତି ବୁତି ତିନି ରାନ୍ଦେଏ ହାରା ହାଜିମାନେ, ସାମା ନାନୁ ଇମ୍ବାଆଁ ହାକି ତାକି ହାହିମାଇଁ । ୧୮ ନାନୁ ନିଜ୍ଜାନା ମା ଆବା ତାଣା ହାଇଁ ଇଞ୍ଜା ଏଞ୍ଜାଣାଇଁ ଖେହ୍ଲାଇଁ, “ଲାକପୁରୁତି ଆବା କପାଟି ଅଡେ ନୀ ନକିତା ନାନୁ ପାପୁ କିତେସି; ୧୯ ନୀ ମୀରୁଏଣାତେସି ଇଞ୍ଜା ନାନୁ ଅଡେ ପାଡା ଆଅଁ; ନାଜେ ର ହଲେଏଣା ଲେହେଁ ଇଟାମୁ ।” ଏମ୍ବାଟିଏ ଏଞ୍ଜାସି ନିଜ୍ଜାନା ତାମି ଆବା ଖାକି ହାଚେସି ।

୨୦ ସାମା ଆବା ତାନି ମୀରୁଏଣା ଖାହିମାନାଣି ହେକଟିଏ ମେସାନା କାର୍ମା ଆହାନା ହଟି ହଟିହିଁ ହାଜାନା ପମାହାଁ ନଣ୍ଡିତେସି । ୨୧ ଏମ୍ବାଟିଏ ମୀରୁଏ ଗାଟାସି ଏଲେଇଚେସି, “ଲାକପୁରୁ ଆବା କପାଟି ଅଡେ ନୀ ନକିତା ନାନୁ ପାପୁ କିତେସି, ନୀ ମୀରୁଏଣାତେସି ଆୟାଲି ପାଡା ଆଅଁ ।” ୨୨ ସାମା ଆବା ତାନି ହଲିୟାଜାଣି ଏଲେଇଚେସି, “ଅଜିତି ହିମ୍ପରି ତବେ ତାଚାନା ଇଞ୍ଜାଣାଇଁ ହୁତି କିଦୁ, ଇଞ୍ଜାଣି କେୟୁତା

ମୁଦି ଅଡ଼େ କତାୟାଣା ସେପୁୟାଁ ତୁରଝି କିଦୁ, ^{୨୩} ଇଞ୍ଜାହାଁ ଆଙ୍ଗା ଆଡ଼ି କଡ଼ି ତାଲୁ ତାକା ହାଜାନା ପାୟାଦୁ; ମାର ତିଞ୍ଜା ଉଣ୍ଡାନା ରାହାଁ କିନ, ^{୨୪} ଇଚିହୁଁ ନା ମୀରୁଏସି ହାହା ହାଜାମାରେସି, ଝେଣ୍ଡେ ନୀତାମାନେସି; ଜାଙ୍ଗା ହାଜାମାରେସି ଅଡ଼େ ମେଡ଼ା ଆୟାତେସି ।” ଏମ୍ବାଟିଏ ଏଞ୍ଜାରି ରାହାଁ କିହିମାଚେରି ।

^{୨୫} ଏଚିବେଲାତା କାଜା ମୀରୁଏସି ଗୁଡ଼ିୟାତା ମାରେସି, ଏଞ୍ଜାସି କାମା କିହାଁ ଇଲୁ ତାଗେ ଝାୟାଲିଏ, ତାମି ଇଜ ବାଜାଗାଜା ଅଡ଼େ ରାହାଁ କିହିମାନି ହାଲି ଝେଞ୍ଜାନା, ^{୨୬} ର ହ୍ରେଲଏଣାଇଁ ହାଟାନା ଝେରେସି, “ମାଜ ଏନାଆଁ କିହିମାନେରି ।” ^{୨୭} ଏଞ୍ଜାସି ଏଞ୍ଜାଣାଇଁ ଏଲେଇଚେସି, “ନୀ ଉଣା ତାୟି ଝେଣ୍ଡା ଝାହାମାନେସି, ଅଡ଼େ ଏଞ୍ଜାସି ନେହୁଁ ଆଙ୍ଗା ତଲେ ଝେଣ୍ଡା ଝାଡ଼ାଣି ମେସାନା ମୀ ଆବା ଆଙ୍ଗା ଆଡ଼ି କଡ଼ି ପାୟାମାନେସି ।”

^{୨୮} ଏମ୍ବାଟିଏ କାଜା ତାୟି କାରବି ଆହାନା ଇଜ ହାଲାଆତେସି; ସାମା ତାମି ଆବା ପାଙ୍ଗାତା ଝାହାନା ଏଞ୍ଜାଣାଇଁ କାହିବା କପା ଆଆନି ଇଜ ଝାମୁ ଇଞ୍ଜୁଁ ବାଡ଼ିମାଲିତେସି । ^{୨୯} ଇଞ୍ଜା ଏଞ୍ଜାସି ତାମି ଆବାଇଁ ଏଲେଇଚେସି, “ମେହ୍ମୁ ନାନୁ ଇଚର ବାର୍ସା ଆଡ଼େ ନୀ ହ୍ରେଲଏଣା ଲେହେଁ କାମା କିହିମାଇଁ, ଏଚେଲା ଜିକେଏ ନୀ ହୁକୁମି ଉରାହିଲଅଁ, ଆଡ଼ିଜିକେଏ ନା ତରେସିଙ୍ଗା ତଲେ ବଜି କିହାଲି ନୀନୁ ନାଙ୍ଗେ ର ଗରି ତାଲୁ ଜିକେଏ ହାହାମାଞ୍ଜଅତି; ^{୩୦} ସାମା ଇ ନୀ ମୀରୁଏସି ଇଲୁଡି ବାରେ ଦନ ଅହାନା ସାନେଣିସ୍ତାତଲେ ମାଞ୍ଜାନା ବାରେ ରାପୁହେସି, ଏଚେତା ଇଞ୍ଜାସି ଝେଣ୍ଡାଞ୍ଜାଡ଼େସି, ଏଚେତା ଏଞ୍ଜାଣାକି ଆଙ୍ଗା ଆଡ଼ି କଡ଼ି ପାୟାମାଞ୍ଜି ।” ^{୩୧} ଏଚେଟିଏ ତାଞ୍ଜି ଗାଟାସି ଏଲେଇଚେସି, “ମୀରୁଏଣା ନୀନୁତ କାଲେଏ ନା ତଲେ ମାଞ୍ଜାମାଞ୍ଜି, ଅଡ଼େ ଏନା ଏନାୟି ନାଦି ଏ ବାରେତ ନୀଦି; ^{୩୨} ସାମା ଇ ନୀ ତାୟି ହାହା ହାଜାମାରେସି, ଝେଣ୍ଡେ ନୀତାମାନେସି, ଜାଙ୍ଗା ହାଜାମାରେସି, ମେଡ଼ା ଆୟାତେସି, ଏଦାଆଁତାକି ରାହାଁ କିନାୟି ମାଚେ ।”

୧୬

ଲାଗେଏଡି ଗୁମୁସ୍ତା

^୧ ଜୀସୁ ତାନି ସୀସୁୟାଁଇଁ ଏଲେଇଚେସି, “ର ଦନଗାଟାସି ମାଚେସି; ଏଞ୍ଜାଣାକି ର ଗୁମୁସ୍ତା ମାଚେସି, ଏଞ୍ଜାସି ତାନି ଦନତି ଆଲାରା

କିହାମାନାଣି ପୁଞ୍ଜାନା, ^୨ ଏଝାସି ଏଝାଣାଈଁ ହାଟାନା ଏଲେଇଚେସି, 'ନାନୁ ନୀ କାତା ଝେଚେଏଁ ନୀନୁ ନୀ ଗୁମୁସ୍ତା କାମା ଏନି କିହିମାଞ୍ଜି ଲେକା ତସ୍ତାମ୍, ଇଚିହିଁ ନୀନୁ ଅଡେ ଗୁମୁସ୍ତା ଆହା ମାଞ୍ଜାଲି ଆଡଅତି ।' ^୩ ଏମ୍ବାଟିଏ ଏ ଗୁମୁସ୍ତା ଅଣ୍ପା କଡିଚେସି, 'ନା ସାଝୁକାରି ନା ଗୁମୁସ୍ତା କାମା ପିସ୍ପି କିହିମାଞ୍ଜାନେସି, ନାନୁ ଏନାଆଁ କିଇଁ ? ଇଚିଆ କାରହାଲି ନାଞେ ବପୁ ହିଲେଏ, ଅଡେ ରୀସ୍ପା ତିଞ୍ଜାଲି ଲାଜା ହଚି ମାଞ୍ଜାନେ । ^୪ ନୀଏଁ ପୁଚେଏଁ, ନାଞେ ଗୁମୁସ୍ତା ପାଣାଟି ପିସ୍ପି କିୟାତି ତାୟୁ ଲକୁ ନାଞେ ତାମି ଇଲକାଣା ଆବାନିଲେହେଁ କିଇଁ ।' ^୫ ଇଞ୍ଜା ଏଝାସି ତାମି ସାଝୁକାରି ତାଣାଟି ରୀଣା ଅହାମାଚାରାଇଁ ହାଟାନାହାଁ ତଲିତାଣାଇଁ ଝେଚେସି, 'ନା ସାଝୁକାରି ତାଣା ନୀ ରୀଣା ଏଚେକା ମାନେ ?' ^୬ ଏଝାସି ଏଲେଇଚେସି, 'ପାସାକଡି ତାବା ନିୟୁଁ' ଗୁମୁସ୍ତା ଏଝାଣାଇଁ ଏଲେଇଚେସି, 'ନୀନୁ ତବେ ଇମ୍ପାଆଁ କୁଗାନା ରୀ କଡି ଦସ ଇଞ୍ଜାଁ ରାଟାମୁ ।' ^୭ ତାୟୁ ଅଡେ ରଅଣାଇଁ ଝେଚେସି, 'ନୀନୁ ଏଚେକା ରୀଣା ଅହାମାଞ୍ଜି ?' ଏଝାସି ଏଲେଇଚେସି, 'ର ମାଣା ବାସ୍ତା ଗହଁୟାଁ' ଗୁମୁସ୍ତା ଏଝାଣାଇଁ ଏଲେଇଚେସି, 'ନୀନୁ ତବେ ଇମ୍ପାଆଁ କୁଗାନା ଆଟା ଝାଞ୍ଜା ଇଞ୍ଜାଁ ରାଟାମୁ ।' ^୮ ଏ ଲାଗେଏତି ଗୁମୁସ୍ତା ବୁଦିତଲେ କାମା କିହାମାନାକି ସାଝୁକାରି ଏଝାଣାଇଁ ନୀନୁ ନେହିଁ କାମା କିହାମାଞ୍ଜି ଇଚେସି; ଏନାଆଁତାକି ଇଚିହିଁ ଉଜେଡିତି ମୀରକା କିହାଁ ଈ ଦାରତିତାରି ତାମି କାମାତା ହାରେକା ବୁଦିଗାଟାରି ।"

^୯ ନାନୁ ଜିକେଏ ମିଞେ ଝେସିମାଞ୍ଜାଇଁ, "ମୀରୁ ଦାରତିତି ଲାଗେଏତି ଦନ ତଲେ ତଣେ ଦହ୍ପୁ, ଏଦି ରାଡିସାରେ ମିଞେ କାଲ୍ଲକାଲ୍ଲାତି ବାସା ଟାୟୁତା ମିଞେ ଆବାନେରି । ^{୧୦} ଆମ୍ବାଆସି ଉଣା କାମାତା ନାମୁଗାଟାସି ଆନେସି ଏଝାସି କାଜା କାମାତା ଜିକେଏ ନାମୁଗାଟାସି ଆନେସି, ଇଞ୍ଜା ଆମ୍ବାଆସି ଉଣା କାମାତା ନାମୁଗାଟାସି ଆଆସାରେ ଏଝାସି କାଜା କାମାତା ଜିକେଏ ନାମୁଗାଟାସି ଆଆସି । ^{୧୧} ଲାଗେଏତି ଦନତା ନାମୁ ଗାଟାଚେରି ଆହାହିଲଅଚେରି, ଆଡିହିଁ ଆମ୍ବାଆସି ମିଞେ ନାମାହାଁ ସାତା ଦନ ମୀ କେୟୁତା ହେଚ୍ପାନେସି ? ^{୧୨} ମୀରୁ ଏଚକାତାଣା ଦନତି ନାମୁତଲେ ଲେମ୍ବା ହିଲାଆସାରେ ମିଞେ ମୀ ଲଡାମାନାଣି ଆମ୍ବାଆସି ହିୟାନେସି ?"

୧୩ ✧“ର ହଲେଏସି ରୀ ସାଞ୍ଜୁକାରି ତାଣା ହଲେଏସି ଆହାଲି ଆଡ଼ଅସି; ଇଚିହିଁ ରଅଣାଲ୍ ଜୀଞ୍ଜୁ ନନେସି ରଅଣାଲ୍ ଜୀଞ୍ଜୁ ନନେସି, ଆଆତ୍ ରଅଣାଲ୍ ମାନୁଞ୍ଜି ଆନେସି ରଅଣାଲ୍ ଅପଅସି । ମୀରୁ ମାହାପୁରୁ ଅଡ଼େ ଦନତି ହଲିୟାଙ୍ଗା ଆହାଲି ଆଡ଼ଅଡ଼େରି ।”

ଜୀସୁ ଖେସ୍ତି କାତାୟି

(ମାତି ୧୧:୧୨, ୧୩; ୫:୩୧, ୩୨; ମାର୍କ ୧୦:୧୧, ୧୨)

୧୪ ଇ ବାରେ କାତା ଖେଞ୍ଜାନା ଦନ ଜୁପକା ପାରୁସିୟାଁ ଜୀସୁଲ୍ କାକ୍‌ହେରି । ୧୫ ଏଡେଟିଏ ଜୀସୁ ଏଞ୍ଜାରାଲ୍ ଏଲେଇଡେସି, “ଆମ୍ବାଆରି ମାଣସି ନକିତା ତୀରିଗାଟାରି ଇଞ୍ଜିଁ ତସା କଡ଼ିମାନେରି, ମୀରୁ ଏଲେତି ଲକୁ, ସାମା ମାହାପୁରୁ ମୀ ହିୟାଁତି ପୁନାସି ଇଚିହିଁ ଏନାୟି ମାଣସି ଅଣ୍‌ପୁତା କାଜାୟି ଲେହେଁ ତଞ୍ଜା ଆନେ, ଏଡ଼ି ମାହାପୁରୁ ନକିତା ଅପାଆଗାଟାୟି ।”

୧୬ ✧“ମସାତି ନେରା ଅଡ଼େ ମାହାପୁରୁ ଅଣ୍‌ପୁତି ବଲୁ ଖେହ୍‌ନାରି ରାଡ଼ିତି ପତି ଜହନ ପାଡେକା ସାଲୁଞ୍ଜି ଆହିମାରୁ; ଏଡିବେଲାଟିଏ ମାହାପୁରୁ ରାଡ଼ିତି ନେହିଁ କାରୁ ଖେକ୍‌ହି ମାନେରି ଇଞ୍ଜାଁ ବାରେଜାଣା ତାନି ବାଡ଼ୟୁ ତଲେ ମାହାପୁରୁ ରାଡ଼ିତା ହଡ଼ିମାନେରି ।

୧୭ ✧ହାଗୁପାକା ଅଡ଼େ ଦାରତି ବାରେ ମେଣ୍‌ଜିନେ ସାମା ମେରାତି ଇଚାୟି ସିନା ଜିକେଏ ମେଣ୍‌ଜେଏ ।”

୧୮ ✧“ଆମ୍ବାଆସି ତାନି ଡକ୍‌ଜିନି ପିସାନା ଏଟ୍‌କାତାଣି ବୀହା ଆନେସି, ଏଞ୍ଜାସି ଦାରି କିନେସି; ଇଞ୍ଜାଁ ଆମ୍ବାଆସି ପିସି ଡକ୍‌ଜିନି ବୀହା ଆନେସି, ଏଞ୍ଜାସି ଦାରେଲା ଆନେସି ।”

ଦନ ଗାଟାସି ଅଡ଼େ ଲାଜର

୧୯ “ର ଦନ ଗାଟାସି ମାରେସି, ଏଞ୍ଜାସି ହାରେକା ଅଜିତି ହିମ୍ବୁରିଦୁକି ହୁଚାନା ନେହିଁ ରାୟା ତିଞ୍ଜିହିଁ ହାରେକା ରାହାଁତଲେ ଡ଼ୟିମାରେସି । ୨୦ ସାମା ଏଞ୍ଜାଣି ଦୁଖେରି ଦାରିତା ଲାଜର ଦରୁଗାଟି ରୀସପା ତିନାସି ଡ଼ୟାମାରେସି, ୨୧ ଗୁଡ଼ା ଆଙ୍ଗା ଗାହାଁୟାଁ ଆହାମାରେସି; ଏ ଦନ ଗାଟାଣି ଜୁଟା ଲିତା ତିଞ୍ଜାନା ତାନି ବାଣ୍ଡି ପାଞ୍ଜିକିହାଲି ଆସା

✧ ୧୭:୧୩ ୧୭:୧୩ ମାତି ୭:୨୪ ✧ ୧୭:୧୭ ୧୭:୧୭ ମାତି ୧୧:୧୨, ୧୩ ✧ ୧୭:୧୭ ୧୭:୧୭ ମାତି ୫:୧୮ ✧ ୧୭:୧୮ ୧୭:୧୮ ମାତି ୫:୩୨; ୧କର ୭:୧୦, ୧୧

କିହିମାରେସି; ଇଞ୍ଜା ନେସକା ଖାହି ତାନି ଗାହାଁୟା ନାକିମାତୁ ।
 ୨୨ ର ଦିନା କାର୍ମାଗାଟି ଲାଜର ହାହାହାରେସି ଇଞ୍ଜା ଲାକପୁରୁତି
 ଦୁତୁୟା ତଲେ ଅବ୍ରାହାମ ମାଟିତାଣା ଅଞ୍ଜିଆଡେସି; ତାୟୁ ଏ ଦନ
 ଗାଟାସି ଜିକେଏ ହାହାହାରେସି ଇଞ୍ଜା ମାହାଣି ମାଣ୍ଡାତା ମୁସ୍ପି
 ଆଡେସି, ୨୩ ଅଡେ ଏଞ୍ଜାସି ହାଡାରି ମାନି ରାକ୍ତିତି କସ୍ତଲେ କିଲିବିଲି
 ଆହୁଁ ଲାକ ସିନିକିହାଲିଏ ହେକଟି ଅବ୍ରାହାମ ଅଡେ ତାନିତଲେ
 ଲାଜରଇଁ ମେସ୍ତେସି । ୨୪ ଏରେଟିଏ ଏଞ୍ଜାସି ହାଡିଡେସି, ଏ ଆବା
 ଅବ୍ରାହାମ, ନାଈ କାର୍ମା ଅଣ୍ପାନା ଲାଜରଇଁ ନା ତାଣା ପାଣ୍ଡାମୁ,
 ଏଞ୍ଜାସି ତାନି ଖାଞ୍ଜୁତା ଏୟୁ ବନ୍ଦା ତାତାନା ନା ଖେନ୍ଦରିତି ହିଡ଼ି
 କିୟାପେସି, ଇତିହୁଁ ନାନୁ ଇ ହିରୁତା କିଲିବିଲି ଆହିମାଇଁ । ୨୫ ସାମା
 ଅବ୍ରାହାମ ଏଲେଇରେସି, ‘ମୀରଏଣା ନୀନୁ ନୀତାମାଟି ବେଲତା ନୀ
 ନେହାଣି ବେଟାଆଡି, ଇଞ୍ଜା ଲାଜର ଏଲେକିହୁଁ ଏ ପଲୁଆ ଗାଟାଣି
 ବେଟାଆଡେସି, ଇଦାଆଁ ଅଣ୍ପାମୁ; ସାମା ନୀଏଁ ଏଞ୍ଜାସି ଇମ୍ପାଆଁ ସୁକୁ
 ବେଟାଆହି ମାନେସି, ଅଡେ ନୀନୁ କିଲିବିଲି ଆହିମାଞ୍ଜି । ୨୬ ଅଡେ
 ର କାତା ମୀ ମାଦି ମା ମାଦି ର କାଜା ଗାଡୁୟୁ ମାନେ, ଆମ୍ପାଆରି
 ଇ ଟାୟୁଟି ମୀ ତାଣା ହାଜାଲି ମନ କିନେରି, ଏଞ୍ଜାରି ହାଜାଲି
 ଆଡୁଅରି ଆଆଡୁଁ ଏ ଟାୟୁଟି ଇ ଟାୟୁତା ଗାଣ୍ଡାତାନା ଖାୟାଲି
 ଆଡୁଅରି । ୨୭ ଏମ୍ପାଟିଏ ଦନ ଗାଟାସି ଏଲେଇରେସି, ଏ ଆବା,
 ଆତିହୁଁ ନାନୁ ନିଈ ବାଡିମାଲିମାଞ୍ଜାଇଁ, ଲାଜରଇଁ ମା ଆବା ଇଜ
 ପାଣ୍ଡାମୁ, ୨୮ ଇତିହୁଁ ନା ପାସାଜାଣା ତାୟିୟା ମାନେରି; ଏଞ୍ଜାରି
 ଜିକେଏ ଏନିକିଁ ଇ କସ୍ତଗାଟି ଟାୟୁତା ଖାଅରି, ଏଦାଆଁତାକି ଏଞ୍ଜାସି
 ଏଞ୍ଜାରିତାଣା ସାକି ହୀନେସି । ୨୯ ସାମା ଅବ୍ରାହାମ ଏଲେଇରେସି,
 ‘ଏଞ୍ଜାରିତାଣା ମସା ଅଡେ ମାହାପୁରୁ ଅଣ୍ପୁତି ବଲୁ ଖେହନାରି ପତିୟା
 ମାନୁ, ଏଞ୍ଜାରି ଏ କାତାତି ଖେଣ୍ଡାମ୍ପାରି ।’ ୩୦ ଏମ୍ପାଟିଏ ଦନ ଗାଟାସି
 ଏଲେଇରେସି, ଏ ଆବା ଅବ୍ରାହାମ, ଏରେକେଏ ସାରୁ ଆଏ, ସାମା
 ହାଡାରି ବିତ୍ରାଟି ରଅସି ଏଞ୍ଜାରିତାଣା ହାନେସି ଆତିହୁଁ ଏଞ୍ଜାରି ମନ
 ଖେନ୍ଦନେରି । ୩୧ ସାମା ଅବ୍ରାହାମ ଏଲେଇରେସି, ଏଞ୍ଜାରି ମସା ଅଡେ
 ମାହାପୁରୁ ଅଣ୍ପୁତି ବଲୁ ଖେହନାରି କାତା ଖେନଅରି, ଆତିହୁଁ
 ହାଡାରି ବିତ୍ରାଟି ଖେଣ୍ଡେ ନିଈଡୁଁ ଜିକେଏ ଏଞ୍ଜାଣି କାତା ନାମଅରି
 ।”

୧୭

ପାପୁ

(ମାତି ୧୮:୭,୭,୧୧,୧୨; ମାର୍କ ୯:୪୨)

୧ ଜାସୁ ତାନି ସାସୁୟାଁଇଁ ଏଲେଇଚେସି, “ଏମିନି ତାୟିପାରି କିନି ତାଣାଟି ଲକୁ ପାପୁତା ହେରନେରି, ଏ ବାରେ ପିଟଞ୍ଜି ଆଏ, ସାମା ତାୟିପାରି କିଞ୍ଜି କିନାସି ଆୟତା ଏଞ୍ଜାସି ଗାତି ତଣ୍ଡ ବେଟାଆନେସି; ୨ ଉଣା କକାରି ବିତ୍ରାଟି ରଅଣାଇଁ ତାୟିପାରି କିନିବାଟା ତାନି ହେରକିତା କାଜା ଜେତାଞ୍ଜାଲି ଦସାନା ସାମ୍‌ଦୁରିତା ମେଡ଼ହିହିଁ ଏଞ୍ଜାଣାକି ନେହେଁ ଆଡେମା ।

୩ *ମୀରୁ ମୀ ତାକି ଜାଗ୍ରାତା ଆହାମାଞ୍ଜୁ ।” “ନୀ ତାୟି ପାପୁ କିନେସି, ଆତିହିଁ ଏଞ୍ଜାଣାଇଁ ଲାଗାମୁ; ଏଞ୍ଜାସି ନାନୁ ପାପୁ କିଡେଏଁ ଇଞ୍ଜିଁ ମନ ଖେଟ଼ହିହିଁ, ଏଞ୍ଜାଣି ପାପୁ ମ୍ବେକହା ତୁହମୁ । ୪ ଅଡେ ଏଞ୍ଜାସି ସାତା ପାଲି ନୀ କପାଟି ପାପୁ କିନେସି ଅଡେ ସାତା ପାଲି ନୀ ତାଣା ଖେଣ୍ଡା ଖାହାନା ନାନୁ ମନ ଖେଟ଼ହିମାଇଁ ଇଞ୍ଜିଁ ଇଞ୍ଜାନେସି ଆତିହିଁ ଏଞ୍ଜାଣି ପାପୁ ମ୍ବେକହା ତୁହମୁ ।”

ନାମୁ

୫ ଏଚେଟିଏ ପାଶୁଞ୍ଜି ଆହାମାନାରି ପ୍ରବୁଇଁ ଏଲେଇଚେରି, “ମା ନାମୁତି ପାତି କିୟାମୁ ।”

୬ ପ୍ରବୁ ଏଲେଇଚେସି, “ର ହାର୍ସୁ ପାଡେୟି ଏଚେକା ମୀ ନାମୁ ମାଟିହିଁ ମା, ଇ ତୁତୁକଲି ମାରନୁତି ହୀରୁତଲେ ମେଗାହାଜାନା ସାମ୍‌ଦୁରିତା ଉହି ଆମୁ ଇରିହିଁ ଏଦି ମୀ କାତା ମାନଞ୍ଜି ଆନେ ।”

ର ହଲେଏସି କିନି କାମା

୭ “ସାମା ମୀ ବିତ୍ରାଟି ଇଲେତାସି ଆମ୍ବାଆସି ମାନେସି, ତାନି ହଲେଏସି ହେରୁ ତହାନା କି କଡିୟାଁ ମେଚାନା ଖାଡିସାରେ ଏଞ୍ଜାସି ଏଞ୍ଜାଣାଇଁ ଜୁରୁୟାଁ ଗହମୁଦେଁ ଇନେସି ? ୮ ନାଜେ ତିଞ୍ଜାଲି ହିୟାମୁ, ନାନୁ ତିଞ୍ଜାଲି ଆଡାଆ ପାଡେକା ଚେଡେଲି ହିମ୍ବରି ରୁପାନା ନା ସେବା କିୟାମୁ, ଇଞ୍ଜା ତାୟୁ ନୀନୁ ତିନାମୁ ଇଞ୍ଜିଁ ଏଞ୍ଜାଣାଇଁ ଏଲେଇନଅସି ? ୯ ର ହଲେଏସି ସାଞ୍ଜୁକାରି କାତା ମାନଞ୍ଜି ଆହାନା କାମା କିନାକି

☆ ୧୭:୩ ୧୭:୩ ମାତି ୧୮:୧୫

ଏଞ୍ଜେଲ୍ ଜହରା କିନେସିକି ? ୧୦ ଏଲେକିହି ଏ ମୀରୁ ଜିକେଏ ହୁକୁମି ତଲେ କାମା କିତି ତାୟୁ ‘ମାନ୍ସୁ ପାଡ଼ା ଆଆ ହଲିୟାଜାତମି; ଏନାୟି ମାନ୍ସୁ କୁନାୟି ମାଚେ ଏଦାଆଁ କିହାମାନମି’ ଇଞ୍ଜେରି ।”

ଜୀସୁ ଦସଜାଣା କାଜା ରଗ ଗାଟାରାଇଁ ନେହିଁ କିନାୟି

୧୧ ଜୀସୁ ଜିରୁସାଲମତା ହାଜିମାଚାଟି ଗାଲିଲି ଅଡ଼େ ସମିରଣି ଦେସା ମାଦିଟି ହାଜିମାଚେସି । ୧୨ ଏମ୍ବାଟିଏ ଏଞ୍ଜାସି ର ନାୟୁଁତା ଏଗାହାଜାଲିଏ ଦସଜାଣା କାଜା ରଗ ଗାଟାରି ଏଞ୍ଜାଣାଇଁ ବେଟାଆଡେରି; ୧୩ ଏଞ୍ଜାରି ହେକ ନିଚାନା କାଜା ଗିୟାଁତଲେ ଏଲେଇଚେରି, “ଏ ଜୀସୁ ଗୁରୁ ମାଜେ କାର୍ମା ମେସ୍ତାମୁ !”

୧୪ ଜୀସୁ ଏଞ୍ଜାରାଇଁ ମେସାନା ଏଲେଇଚେସି, “ମୀରୁ ହାଜାନା ପୂଜେରାଜା ତାଣା ତଞ୍ଜା ଆକାଦୁ ।” ଅଡ଼େ ଏଞ୍ଜାରି ହାଜି ହାଜିହିଁ ନେହିଁ ଆଡେରି । ୧୫ ସାମା ଏଞ୍ଜାରି ବିତ୍ରାଟି ରଥସି ତାନୁ ନେହିଁ ଆଡ଼ାଣି ମେସାନା କାଜା ଗିୟାଁତଲେ ମାହାପୁରୁତି ଜହରା କିହିଁ କିହିଁ ଖେଣ୍ଡା ଖାହାନା, ୧୬ ଜୀସୁତି କତାୟାଁ ଡ଼ଇ ମୁନୁ କୁତାନା ଜହରା କିଡେସି; ଏଞ୍ଜାସି ସମିରଣି ଲକୁ ମାଚେସି । ୧୭ ଏଚେଟିଏ ଜୀସୁ ଏଲେଇଚେସି, “ଦସଜାଣା ନେହିଁ ଆଆଡେରିକି ? ଅଡ଼େ ନ ଜାଣା ଏମ୍ବିୟା ମାନେରି ? ୧୮ ମାହାପୁରୁଇଁ ଜହରା କିହାଲି ଇ ଜୀହୁଦିଆଆତି ଲକୁ ପିସ୍‌ପେ ଆମ୍ବାଆସି ଖେଣ୍ଡା ଖାଆଡେସି ?” ୧୯ ଇଞ୍ଜା ଜୀସୁ ଏଞ୍ଜାଣାଇଁ ଏଲେଇଚେସି, “ନିଜାମା ହାଲାମୁ ନୀ ନାମୁ ନିଜେ ନେହିଁ କିହାମାଞ୍ଜାନେ ।”

**ମାହାପୁରୁ ରାଜି ଖାନାୟି
(ମାତି ୨୪:୨୩-୨୮, ୩୭-୪୧)**

୨୦ ମାହାପୁରୁତି ରାଜି ଏଚେଲା ଖାହିମାନେ, ଇ କାତା ପାରୁସିୟାଁ ଖେଞ୍ଜାଲିଏ ଏଞ୍ଜାସି ଏଞ୍ଜାରାଇଁ ଏଲେଇଚେସି, “ମାହାପୁରୁତି ରାଜି ତଞ୍ଜା ଆହିଁ ଖାଏ; ୨୧ ଇମ୍ବାଆଁ ମାନେକି ଏମ୍ବାଆଁ ମାନେ ଇଞ୍ଜାଁ ଲକୁ ଖେସ୍ତାରି; ଇତିହିଁ ମାହାପୁରୁତି ରାଜି ମୀ ବିଡେଏ ମାନେ ।”

୨୨ ଇଞ୍ଜା ଜୀସୁ ତାନି ସୀସୁୟାଁଇଁ ଏଲେଇଚେସି, “ଇଲେତି ବେଲା ଖାନ୍, ଏଚିବେଲା ମାଣ୍ଡସି ମୀରୁଏଣାତି ର ଦିନା ମେସାଲି ମନ୍ କିତିହିଁ ଜିକେଏ ମେହିଅଡେରି । ୨୩ ଏଚିବେଲା ଲକୁ ମିଜେ

ଖେପ୍ତାନେରି, ଏଝାସି ଇମ୍ବାଆଁ ମାନେସି ଏମ୍ବାଆଁ ମାନେସି; ସାମା ଏଝାରି କାତା ଆହୁଆଦୁ କି ଏଝାରିତଲେ ତାକାଆଦୁ । ୨୪ ଏନିଇଚିହିଁ ହାଗୁ ମ୍ବୁହନାଟି ର କନଟି ଅର କନଝାକି ଉଜେଡ଼ି ଆନେ, ଏଲେକିହିଁ ଏ ମାଣ୍ଠସି ମୀରଏଣା ଦିନାତା ଆନେ । ୨୫ ସାମା ଏଝାସି ଗାତି କସ୍ତ ପାଣ୍ଡନାୟି ମାନେ, ଇଞ୍ଜା ଇ କାଲ୍ଲାତି ଲକୁ ଏଝାଣାଇଁ ଅପଅରି । ୨୬ ଅଡେ ନହ ବେଲାତା ଏନିକି ଆହାମାଚେ, ମାଣ୍ଠସି ମୀରଏସି ଝାନ୍ତି ଦିନାତା ଜିକେଏ ଏଲେକିହିଁ ଏ ଆନେ; ୨୭ ନହ ଜାଜାତା ହଡୁନି ଦିନା ପାତେକା ଲକୁ ତିଞ୍ଜି ଉଣ୍ଡିହିଁ ବାହା କିୟାଲି ବାହା ହିୟାଲି ହେରାମାଚେରି, ଏତିବେଲା କାଜା ପିୟୁ ଝାଡେ ଇଞ୍ଜା ବାରେତି କୁପହାତୁସ୍ତେ । ୨୮ ଲଟ ବେଲାତା ଜିକେଏ ଏଲେଏ ଆଡେ, ଲକୁ ତିଞ୍ଜି ଉଣ୍ଡି ମାଚେରି, କଡି ମାଚେରି, ପାରୁତି ମାଚେରି, ମାରୁକା ଉହି ମାଚେରି ଅଡେ ଇଲକା କିହାଲି ହେରାମାଚେରି, ୨୯ ସାମା ଲଟ ସଦମ ଗାଡ଼ାଟି ହଡ଼ା ହାଲୁଝନିଏ, ଲାକପୁରୁଟି ହିରୁ ଅଡେ ଗାନ୍ଦାଗୁଣ୍ଡା ଝାହାନା ବାରେତି ନାସା କିଡେ । ୩୦ ମାଣ୍ଠସି ମୀରଏସି ଝାନ୍ତି ଦିନାତା ଜିକେଏ ଏଲେଆହିଁ ଏ ଆନେ ।”

୩୧ ☆ “ଏ ଦିନା ଆମ୍ବାଆସି ଇଲୁ ଲାକ ମାନେସି, ଏଝାସି ଇଲୁ ବିତ୍ରାମାନି ତାନି ଆସ୍ତି ଅହାଲି ରେଚା ଝାଆପେସି; ଏଲେକିହିଁ ଏ ଆମ୍ବାଆସି ନେଃଏଲାତା ମାନସି ଇଜ ଝେଣ୍ଡା ଝାଆପେସି । ୩୨ ଲଟ ଡକ୍ତନି କାତା ଅଣପାଦୁ ! ୩୩ ☆ ଆମ୍ବାଆସି ତାନି ଜୀଝୁତି ନୀଟହାଲି ମନ କିନାସି, ଏଝାସି ନାସା ଆନେସି, ଅଡେ ଆମ୍ବାଆସି ତାନି ଜୀଝୁତି ଆସା କିଆଗାଟାସି ଏଝାସି ନୀତିନେସି । ୩୪ ନାନୁ ମିଜେ ଝେସିମାଞ୍ଜାଇଁ, ଏ ଲାଆଁୟା ରିଆରି କାଟେଲିତା ତୁରା ଡୟିନେରି, ରଅସି ଅଝିଆନେସି ଅଡେ ରଅସି ଏମ୍ବାଆଁ ଡୟିନେସି । ୩୫ ରୀ ଇୟାସିକା ରଣ୍ଡିଏ ତାଣା ନୁୟିମାନୁ, ରଣ୍ଡି ଅଝିଆନେ ରଣ୍ଡି ଏମ୍ବାଆଁ ଡୟିନେ । ୩୬ ରିଆରି ନେଃଏଲାତା ମାନେରି, ରଅସି ଅଝିଆନେସି, ରଅସି ଏମ୍ବାଆଁ ଡୟିନେସି ।”

୩୭ ଏଚେଟିଏ ସୀସୁୟାଁ ଏଲେଇଚେରି, “ଏ ପ୍ରବୁ ଏମ୍ବିୟା ?” ଜୀସୁ ଏଲେଇଚେସି, “ମାଡ଼ହା ଏମ୍ବିୟାମାନେ ଏମ୍ବାଆଁ ରାମ୍ବାୟାଁ ରୁଣ୍ଡା ଆନୁ

☆ ୧୭:୩୧ ୧୭:୩୧ ମାତି ୨୪:୧୭,୧୮; ମାର୍କ ୧୩:୧୫,୧୬ ☆ ୧୭:୩୩ ୧୭:୩୩ ମାତି ୧୦:୩୯; ୧୭:୨୫; ମାର୍କ ୮:୩୫; ଲୁକ ୯:୨୪; ଜହ ୧୨:୨୫

।”

୧୮

ରାବ୍ବେଣି ଇୟାନି ନୀହାୟି

^୧ ଖାହାଆନା ଅଲେ ଅଲେ ପ୍ରାତାନା କିନାୟିମାନେ, ଇ କାତାତି ଜୀସୁ ସୀସୁୟାୟି ପୁଣ୍ଡିକିନି କାତାତଲେ ଖେସ୍ତେସି ^୨ “ର ଗାଡ଼ାତା ର ନୀହାୟି କିନାସି ମାଚେସି, ଏଞ୍ଜାସି ମାହାପୁରୁଇଁ ଆଜି ହିଲାଆତେସି କି ମାଣ୍ଡସିୟାୟି ଜିକେଏ ଅଣ୍ଡି ହିଲାଆତେସି । ^୩ ଏ ଗାଡ଼ାତା ର ରାବ୍ବେଣି ମାଚେ, ଏଡ଼ି ନୀହାୟି କିନାଣି ତାଣା ଅଲେ ଅଲେ ହାଜିହୁଁ ନୀନୁ ନେହୁଁ ନୀହାୟି କିହୁଁ ନା କପାଟି ନିଙ୍ଗିମାଞ୍ଜାନାଣା ତାଣାଟି ଗେଲ୍‌ପାମୁ ଇଞ୍ଜୁଁ ବାତିମାଲିମାଚେ । ^୪ ଅଡ଼େ ଏଞ୍ଜାସି ଏଡ଼ାନି କାତା ଖେଞ୍ଜି ହିଲାଆତେସି; ତାୟୁ ଏଞ୍ଜାସି ମନ ମନତା ଅଣ୍ଡିତେସି, ନାନୁ ମାହାପୁରୁଇଁ ଆଜିହିଲଅଁ କି ମାଣ୍ଡସିୟାୟି ଅଣ୍ଡି ହିଲଅଁ, ^୫ ଆଡ଼ିଜିକେଏ ଇ ରାବ୍ବେଣି ନାଙ୍ଗେ କସୁ ହାହିମାଞ୍ଜାନାକି ନାନୁ ତାନି କପାଟି ନିଙ୍ଗିମାନି ନୀହାୟି ଡିକହାତୁହୁଇଁ, ଆଆତ ଏଡ଼ି ନାଙ୍ଗେ ବାରେବେଲା ଗିଜିଗିଜା କିହେମାଞ୍ଜାନେ ।”

^୬ ଏମ୍ପାଟିଏ ପ୍ରବୁ ଏଲେଇଚେସି, “ଇ ଲାଗେଏତି ନୀହାୟି କିନାଣି କାତା ଅଣ୍ଡାପାଦୁ । ^୭ ଆଡ଼ିହୁଁ ମାହାପୁରୁ ଆଡ଼ିତି ଲକୁ ଲାଆଁ ମାଦେନା ଏଞ୍ଜାଣାଇଁ ହାଡ଼ିହୁଁ ଡ଼ୟିନେରି, ଏଞ୍ଜାସି କି ଏଞ୍ଜାରି ନୀହାୟି କିଅସି ? ଆଡ଼ିଜିକେଏ ଏଞ୍ଜାସି ଏଞ୍ଜାରି ସାତୁୟାୟିକି ହାଚେକା ଅର୍ହନାସି ଆନେସି କି ? ^୮ ନାନୁ ମିଙ୍ଗେ ଖେସିମାଞ୍ଜାଇଁ, ଏଞ୍ଜାସି ତବେ ଏଞ୍ଜାରି ତାକି କିଞ୍ଜି ଆହାମାନି ପଲ୍‌ଆ କାମାତି ନୀହାୟି କିନେସି, ଆଡ଼ିଜିକେଏ ମାଣ୍ଡସି ମୀରଏସି ଦାରତିତା ଖାହାନା ନାମୁତି ମେହନେସିକି ?”

ପାରୁସି ଅଡ଼େ ସିସୁ ରୁାହନାଣି ପୁଣ୍ଡିକିନି କାତା

^୯ ତାମଙ୍ଗେ ତୀରିଗାଟାତମି ଇଞ୍ଜୁଁ ଅଣ୍ଡାପାନା ଏଟକା ତାରାଇଁ ହାଣି କିନି ଲକୁଣି ଜୀସୁ ଇ ପୁଣ୍ଡିକିନି କାତା ଖେସ୍ତେସି, ^{୧୦} ରିଆରି ପ୍ରାତାନା କିହାଲି ର ପ୍ରାତାନା ଇଲୁତା ହାଚେରି, ରଅସି ପାରୁସି ଅଡ଼େ ରଅସି ସିସୁ ରୁାହନାସି । ^{୧୧} ପାରୁସି ନିତାନା ଇଲେକିହୁଁ ପ୍ରାତାନା କିତେସି, “ଏ ମାହାପୁରୁ ନାନୁ ନିଙ୍ଗେ ଜହରା କିହିମାଞ୍ଜାଇଁ, ନାନୁ ଏଟକା ଲକୁ ଲେହେଁ ଦାମ୍ବୁ ହିଲାଆ ଗାଟାତେଏଁ ଆଏ, ସରୁ, ଦାରି

ଗାଟାତେଏଁ ଆଏ କି ଇ ସିସ୍ତୁ ରୁାହନାଣି ଲେହେଁ ଜିକେଏ ଆଏ; ୧୨ ନାନୁ ଖାରା ତାକି ରୀ ଦେବା ଉପାସା କିହିମାଇଁ, ଅଡ଼େ ନାନୁ ବେଟାଆହି ମାନାଣି ବାରେ ଦସ ବାଗାଟି ର ବାଗା ହୀହିମାଇଁ ।” ୧୩ ସାମା ସିସ୍ତୁ ରୀହନାସି ହେକ ନିଚାନା ତାନି କାନୁ ଲାକପୁରୁ ଖାକି ଜିକେଏ ପେର୍ହାଁ ସିନିକିହାଲି ସାସା କିଆତେସି, ସାମା ତାନି ବକତା ଖେଟା କଡାନା ଏଲେଇଚେସି, “ଏ ମାହାପୁରୁ ନାନୁ ପାପୁ ଗାଟାତେଏଁ ନାଙ୍ଗେ କାର୍ମା ମେସ୍ତାମୁ ।” ୧୪ ✧ “ନାନୁ ମିଙ୍ଗେ ଖେସିମାଞ୍ଜାଇଁ, ଏଝାସି ଆଏ ସାମା ସିସ୍ତୁ ରୀହନାସି ତାରିଗାଟାସି ଆହାନା ତାନି ଇଜ ହାଚେସି; ଏନିଇଚିହିଁ ଆମ୍ବାଆସି ନାନୁ କାଜାତେଏଁ ଇଞ୍ଜା କଡିନେସି, ଏଝାଣାଇଁ ଉଣା କିଝିଆନେ, ସାମା ଆମ୍ବାଆସି ନାନୁ ଉଣାତେଏଁ ଇନେସି, ଏଝାଣାଇଁ କାଜାସି କିଝିଆନେ ।”

ଜୀସୁ ଉଣା ପଦି ପଦାୟାଣି ବର ହୀନାୟି

(ମାତି ୧୯:୧୩-୧୫; ମାର୍କ ୧୦:୧୩-୧୬)

୧୫ ଏଝାସି ଏନିକିଁ କକାରି ପଦାଁଣି ତାରିନେସି, ଏଦାଆଁତାକି ଲକୁ ଏଝାରାଇଁ ଜୀସୁ ତାଣା ତାଚାଲି ମାଟ୍‌ହେରି; ସାମା ସୀସୁୟାଁ ଏଦାଆଁ ମେସାନା ଏଝାରାଇଁ ଦାକା ହୀଚେରି । ୧୬ ସାମା ଜୀସୁ କକାରି ପଦାଁଣି ତାଗେ ହାଟାନା ଏଲେଇଚେସି, “କକାରି ପଦାଁଣି ନା ତାଗେ ଖାହାଲି ହୀଦୁ, ଏଝାରାଇଁ କାହିକିଆଦୁ; ଏନିଇଚିହିଁ ମାହାପୁରୁଟି ରାଜି ଇଲେତାରାଝାୟି । ୧୭ ନାନୁ ମିଙ୍ଗେ ସାତା ଖେସିମାଞ୍ଜାଇଁ, ଆମ୍ବାଆସି ଉଣା କକାରି ପଦାୟାଁ ଲେହେଁ ମାହାପୁରୁ ରାଜି ଆହସି ଏଝାସି ଏନିକିଁ ଜିକେଏ ଏମ୍ବାଆଁ ହଡାଲି ଆଡ଼ଅସି ।”

ର ଦନ ଗାଟାସି

(ମାତି ୧୯:୧୬-୩୦; ମାର୍କ ୧୦:୧୭-୩୧)

୧୮ ଜୀହୁଦି ଲକୁ ବିତାଟି କାଜାସି ଜୀସୁଇଁ ଖେଚେସି, “ଏ ନେହିଁ ଗୁରୁ କାଲ୍‌କାଲ୍‌କାତି ଜୀସୁ ବେଟାଆହାଲି ନାନୁ ଏନାଆଁ କିଇଁ?”

୧୯ ଜୀସୁ ଏଝାଣାଇଁ ଏଲେଇଚେସି, “ନାଙ୍ଗେ ନେହାଁତି ଇଞ୍ଜିଁ ଏନାଆଁତାକି ଏଲେଇଞ୍ଜିମାଞ୍ଜି ? ଇଚିହିଁ ମାହାପୁରୁ ରଅସିଏ ନେହାଁସି ମାନେସି ଏଝାଣି ପିସ୍‌ପେ ଆମ୍ବାଆସି ନେହାଁସି ହିଲଅସି ।

✧ ୧୮:୧୪ ୧୮:୧୪ ମାତି ୨୩:୧୨; ଲୁକ ୧୪:୧୧

୨୦ ହୁକୁମିକା ପୁଞ୍ଜାମାଞ୍ଜି, ‘ଦାରି କିଆନି, ଲକୁଣି ପାୟାଆନି, ସରୁ କିଆନି, ମିଟିସାକି ହାଆନି, ତାଲି ତାଞ୍ଜି କାତା ମାନି କିମ୍ପୁ ।’”

୨୧ ଦନଗାଟାସି ଏଲେଇଚେସି, “ନାନୁ ଇ ବାରେ ଉଣାଞ୍ଜେଡ଼ାଟିଏ କିହିମାଈଁ ।”

୨୨ ଜୀସୁ ଇ କାତା ଖେଞ୍ଜାନା ଏଞ୍ଜାଣାଇଁ ଏଲେଇଚେସି, “ନାନୁ ର କାମା କିନାୟିମାନେ; ନାନୁ ନୀ ତାଣା ମାନି ବାରେ ଦନବିତି ପାରତାନାହାଁ ହିଲାଆ ଗାଟାରକି ଦାନା ହାମ୍ପୁ, ଇଞ୍ଜା ତାୟୁ ନାନୁ ଲାକପୁରୁତା ଦନ ବେଟାଆଦି; ଏଚେଟିଏ ନା ଜେଚ ଜେଚ ଖାମ୍ପୁ ।”

୨୩ ସାମା ଏଞ୍ଜାସି ଇ ବାରେ କାତା ଖେଞ୍ଜାନା ହାରେକା ଦୁକୁ ଆଡେସି, ଇଚିହିଁ ଏଞ୍ଜାସି ବାଡକୁ ଗାଟାସି ମାଚେସି ।

୨୪ ଏଚେଟିଏ ଜୀସୁ ଏଞ୍ଜାଣାଇଁ ମେସାନା ଏଲେଇଚେସି, “ଆମ୍ପାଆରି ଦନ ମାନେ, ଏଞ୍ଜାରି ହାରେକା କସ୍ତଲେ ମାହାପୁରୁତି ରାଜିତା ହଡ଼ନେରି ! ୨୫ ଇଚିହିଁ ମାହାପୁରୁତି ରାଜିତା ଦନଗାଟାସି ହଡ଼ନି କିହାଁ ଉରୁ ସୁଜା କାଣିଟି ହଚାହାନାୟି ଉସାସା ।”

୨୬ ଏ କାତା ଖେଞ୍ଜିମାଟାରି ଏଲେଇଚେରି, “ଆତିହିଁ ଆମ୍ପାଆସି ଗେଲୁପି ଆହାଲି ଆଡ଼ିନେସି ?”

୨୭ ଜୀସୁ ଏଲେଇଚେସି, “ଏନାଆଁ ଲକୁ କିୟାଲି ଆଡ଼ାଆଗାଟାଣି ମାହାପୁରୁ କିହାଲି ଆଡ଼ିମାନେସି ।”

୨୮ ଏଚେତା ପିତର ଜୀସୁଇଁ ଖେଚେସି, “ମେହ୍ମୁ ମାମ୍ପୁ ବାରେ ପିସାନା ନୀ ଜେଚ ଖାହିମାନମି ।”

୨୯ ଜୀସୁ ଏଞ୍ଜାରାଇଁ ଖେସ୍ତେସି, “ନାନୁ ମିଙ୍ଗେ ସାତା ଖେସିମାଞ୍ଜାଇଁ, ଆମିନି ଗାଟାରି ମାହାପୁରୁ ରାଜିତାକି ଇଲୁକାଣ୍ଡା, ଡକ୍ରିନି, ତାୟି, ତାଲି ତାଞ୍ଜି, ଅଡେ ମୀରକା ମାସ୍କାଣି ପିସାମାନେରି, ୩୦ ଏଞ୍ଜାରି ଇ ଜୁଗୁତା ହାରେକା ଆଗାଡ଼ା ବେଟାଆହାନା, ଖାନି ଜୁଗୁତା କାଲାକାଲାତି ଜୀଞ୍ଜୁ ବେଟା ଆନେସି ।”

ଜୀସୁ ତାନି ଦେବା ତାନି ହାକିତି ଖେହ୍ନାୟି

(ମାତି ୨୦:୧୭-୧୯; ମାର୍କ ୧୦:୩୨-୩୪)

୩୧ ଜୀସୁ ତାନି ବାରଜାଣା ସୀସୁୟାଁଇଁ ହାଟାନା ଖେସ୍ତେସି, “ମେହ୍ମୁ ମାର ଜିରୁସାଲମତା ହାଜିମାନାୟି, ଏମ୍ପାଆଁ ମାଣ୍ଡି ମୀରଏଣି ତାକି

ମାହାପୁରୁ ଅଣ୍ଟାପୁତି ବଲୁ ଖେଦନାରି ଏନା ଏନାଆଁ ରାଚାମାନେରି, ଏ ବାରେ ମାଣ୍ଡି ମୀରୁଏଣା ତାଣା ସାତା ଆନେ; ୩୭ ଇଚିହିଁ ଏଞ୍ଜାଣାକ୍ ଏଟକା କୃତାତାରି କେୟୁତା ହେରପିଆନେସି, ଇଞ୍ଜା ଏଞ୍ଜାରି ଏଞ୍ଜାଣାକ୍ କାକ୍ନେରି, ଏଞ୍ଜାଣାକ୍ ହୀଣି କିହାନା ହୁପିନେରି, ୩୮ ଏଞ୍ଜାଣାକ୍ ସାଟ୍ଟି ଡରିତଲେ ଖେଚାନା ପାୟିନେରି, ଇଞ୍ଜା ତାନି ଦିନାଟିଏ ନିଜ୍ଜାନେସି ।”

୩୪ ସାମା ସୀସୁୟାଁ ଇ ବାରେ କାତା ପୁଞ୍ଜାଲି ଆଡାଆତେରି; ଇ କାତା ଏଞ୍ଜାରିତାଣା ଡଗୁନା ମାରେ, ଏନାଆଁ ଖେସ୍ପି ଆହିମାରେ ଏ ବାରେ ପୁଞ୍ଜିହିଲାଆତେରି ।

ରାସପାତିନି କାଣାକ୍ ଜୀସୁ ନେହିଁ କିନାୟି
(ମାତି ୨୦:୨୪-୩୪; ମାର୍କ ୧୦:୪୭-୫୨)

୩୫ ଜୀସୁ ଜିରିହି ଗାଡାତା ଏଜିମାଚାଟି ର କାଣା ଜିରୁତା କୁଗାନା ରାସପିମାରେସି । ୩୬ ଏଞ୍ଜାସି ଲକୁତି ହାଜିମାନି ହାଡା ଖେଞ୍ଜାନା, “ଇଦି ଏନାୟି ଆହିମାନେ ଇଞ୍ଜିଁ ଖେଚେସି ।” ୩୭ “ନାଜରିତତି ଜୀସୁ ଇମ୍ପାଟି ହାଜିମାନେସି” ଇଞ୍ଜିଁ ଖେସ୍ପେରି ।

୩୮ ଏଚେଟିଏ କାଣା କାଜା ଗିୟାତଲେ ଏଲେଇଞ୍ଜି ଇଚେସି, “ଏ ଜୀସୁ ଦାଞ୍ଜୁଦ ମୀରୁଏଣାତି ନାଞ୍ଜେ କାର୍ମା ମେସ୍ତାମୁ ।”

୩୯ ସାମା ନକିତା ହାଜିମାଚାରି ଏଞ୍ଜାଣାକ୍ ପାଲେଏ ମାଞ୍ଜାଲି ଦାକା ହୀତେରି, ସାମା ଏଞ୍ଜାସି ଅଡେ କାଜା ଗିୟାତଲେ ଏଲେଇଚେସି, “ଏ ଜୀସୁ ଦାଞ୍ଜୁଦ ମୀରୁଏଣାତି ନାଞ୍ଜେ କାର୍ମା ମେସ୍ତାମୁ ।”

୪୦ ଏଚେଟିଏ ଜୀସୁ ଏମ୍ପାଆଁ ନିଚାନା କାଣାକ୍ ତାନି ଦାରିତା ତାଚାଲି ଚାଣ୍ଡିଚେସି; ଏଚେତା କାଣା ତାଗେ ଖାଚେସି ଇଞ୍ଜା ଜୀସୁ ଏଞ୍ଜାଣାକ୍ ଖେଚେସି, ୪୧ “ନାନୁ ନିଞ୍ଜେତାକି ଏନାଆଁ କିକ୍ ଇଞ୍ଜିଁ ମନ କିହିମାଞ୍ଜି ?”

କାଣା ଏଲେଇଚେସି, “ଏ ପ୍ରବୁ ନାନୁ ଏନିକିଁ ମେସାଲି ଆଡ଼ିକ୍ ।”

୪୨ ଜୀସୁ ଖେସ୍ପେସି, “ନାନୁ ମେହ୍ମୁ, ନୀ ନାମୁ ନିଞ୍ଜେ ନେହିଁ କିୟାତେ ।”

୪୩ ଏ ଦେବୁଣିଏ ଏଞ୍ଜାସି ମେସାଲି ଆଡ଼ିଚେସି ଇଞ୍ଜା ମାହାପୁରୁତି ଜହରା କିହିଁ କିହିଁ ଜୀସୁ ଜେଚ ହାଚେସି, ଅଡେ ଲକୁ ଏନାଆଁ ମେସାନା ମାହାପୁରୁକ୍ ଜହରା କିଚେରି ।

୧୯

ଜୀସୁ ଅଡ଼େ ଜକିୟ

୧ ଜୀସୁ ଜିରିହତା ହଡ଼ାନା ଗାଡ଼ା ମାଦିଟି ହାଜିମାରେସି ।
 ୨ ଏମ୍ବାଆଁ ଜକିୟ ଦରୁଗାଟାସି ରଅସି ମାରେସି, ଏଞ୍ଜାସି ସିସୁ
 ରୀହନାରି ବିତ୍ରାଟି କାଜାସି ଅଡ଼େ ଏଞ୍ଜାଣାକି ହାରେକା ଦନ ମାରେ ।
 ୩ ଜୀସୁ ଏନିଲେହେତାସି ଇଞ୍ଜି ଏଞ୍ଜାଣାକି ମେସାଲି ହାରେକା ମନ
 ମାରେ, ସାମା ହାରେକା ଲକୁ ମାଚାକି ମେସାଲି ଆଡ଼ିହିଲାଆଡେସି,
 ଏନାଆଁତାକି ଇଚିହ ଏଞ୍ଜାସି କୁଜା ମାରେସି । ୪ ଏମ୍ବାଟିଏ ଏଞ୍ଜାସି
 ନକିତା ହଟି ହଟି ହାଜାନା ଜୀସୁ ହାନି ଜିରୁତା ଏଞ୍ଜାଣାକି ମେସାଲି ର
 ତୟା ମାରୁନୁତା ହଡେସି, ଇଚିହ ଜୀସୁ ଏ ଜିରୁଟି ହାନାୟି ମାରେ ।
 ୫ ଜୀସୁ ଏମ୍ବାଆଁ ଏଜାନା ଲାକ ସିନିକିହାନା ହାଟିତେସି, “ଆଡ଼େ ଜକିୟ
 ତବେ ରେଚାଞ୍ଜାମୁ ଇଚିହ ନୀଞ୍ଜୁ ନାନୁ ମୀ ଇଜ ଗତା ଖାନାୟି ମାନେ
 ।”

୬ ଏଞ୍ଜାସି ତବେ ରେଚାଞ୍ଜାହାନା ଏଞ୍ଜାଣାକି ରାହାଟି ତାମି ଇଜ
 ହାଟିତେସି । ୭ ଇଦାଆଁ ମେସାନା ବାରେ ଲକୁ ମୁରୁ ମୁରୁ ଆହ କାତା
 ଆଡେରି, “ଇଞ୍ଜାସି ର ପାପୁ ଗାଟାରି ଇଜ ଗତା ହାଜିମାନେସି ।”

୮ ସାମା ଜକିୟ ନିଚାନା ପ୍ରବୁକି ଏଲେଇଚେସି, “ଏ ପ୍ରବୁ ନାନୁ ନା
 ଦନତି ର ବାଗା ହିଲାଆ ଗାଟାରାକି ହୀକି, ଅଡ଼େ ନାନୁ ଆମ୍ବାଆରି
 ତାଣାଟି ଏନାଆଁ ତାଚାମାଟିହ ସାରି ବାଗା ଆଗାଡ଼ା ଖେଟ୍ଟି ।”

୯ ଏମ୍ବାଟିଏ ଜୀସୁ ଏଲେଇଚେସି, “ନୀଞ୍ଜୁ ଇ ଇଜତି ଲକୁତାକି
 ଗେଲ୍‌ପିନାୟି ଖାହାମାନେ, ଇଚିହ ଇଞ୍ଜାସି ଜିକେଏ ଅବ୍ରାହାମତି
 କୁଡ଼ାତାସି । ୧୦ ଇଚିହ ଏନାୟି ଜାକ୍ସା ହାଜାମାନେ ଏଦାଆଁ
 ପାରାନା ଗେଲ୍‌ପାଲି ମାଣ୍ଡାସି ମୀରଏସି ଖାହାମାନେସି ।”

ବାଂଗାରା ଟାକା (ମାତି ୨୫:୧୪-୩୦)

୧୧ ଲକୁ ଇ କାତା ଖେଞ୍ଜି ମାଚାଟି ଏଞ୍ଜାସି ଅଡ଼େ ର ପୁଣ୍ଡିକିନି
 କାତା ଖେସ୍ତେସି, ଇଚିହ ଏଞ୍ଜାସି ଜିରୁସାଲମ ତାଗେ ଆହାମାରେସି,
 ଇଚିହ ମାହାପୁରୁ ରାଜି ତବେ ତଞ୍ଜାଆନେ ଇଞ୍ଜି ଅଣ୍ଡିମାଚେରି
 । ୧୨ ଏଞ୍ଜାସି ଏଲେଇଚେସି, “ର କାଜା କୁଡ଼ାତାସି ରାଜା ପାଣା

☆ ୧୯:୧୦ ୧୯:୧୦ ମାତି ୧୮:୧୧

ବେଟାଆହାଁ ଖେଣ୍ଟା ଖାଇଁ ଇଞ୍ଜି ର ହେକ ରାଜି ହାଚେସି ।
 ୧୩ ଏଝାସି ତାନି ଦସଜାଣା ହଲିୟାଙ୍ଗାଣି ହାଟାନା ଏଝାରାକି ଦସଗଟା
 ଖେଣ୍ଟି ଟାକା ଲାକା ହାହାନା ଏଲେଇଚେସି, ‘ନାନୁ ଖେଣ୍ଟା ଖାନି
 ପାତେକା ମୀରୁ ଇ ଟାକା ତଲେ ବେବାରା କିନ୍ତୁ ।’ ୧୪ ସାମା
 ତାନି ଦେସାତାରି ଏଝାଣାଇଁ ଅଫିହିଲାଆତେରି, ‘ଇଝାସି ମାଙ୍ଗେତାକି
 ରାଜା ଆୟାଆପେସି’ ଇଞ୍ଜି ତାନି ଜେଟଏ କସକାଣି କାରୁ ଖେସା
 ପାଣ୍ଡିତେରି ।”

୧୫ ତାନ୍ତୁ ଏଝାସି ରାଜା ପାଣା ବେଟାଆହାନା ତାନି ରାଜିତା
 ଖେଣ୍ଟାଖାଚେସି, ଇଞ୍ଜା ତାନୁ ଟାକାୟାଁ ହାହାମାଟି ହଲିୟାଙ୍ଗା ବେବାରା
 କିହାଁ ଏଚେକା ଲାବା କିହାମାନେରି ଏଦାଆଁ ପୁଞ୍ଜାଲି ଏଝାରାଇଁ
 ହାଟିକିଚେସି, ଇଞ୍ଜା ଖେଚେସି । ୧୬ ତଲିତାସି ଖାହାନା ଏଲେଇଚେସି,
 “ବାବୁ ନାନୁ ହାହାମାଞ୍ଜାତି ର ଟାକା ତଲେ ବେବାରା କିହାନା
 ଦସଟାକା ଲାବା କିହାମାଇଁ ।” ୧୭ ଏଝାସି ଏଝାଣାଇଁ ଏଲେଇଚେସି,
 “ନେହୁଁ ଟିକାଣାଗାଟି ନାମୁତି ହଲେଏଣାତି, ନାନୁ ଡଣା କାମାତାକି
 ନେହୁଁ କାମା କିହାମାନାକି ନାନୁ ନିଙ୍ଗେ ଦସଗଟା ଗାଡ଼ାୟାଁ
 ସାଲୁଝି କିନି ଅଦିକାରା କିମ୍ତୁ ।” ୧୮ ଅଡ଼େ ରଅସି ଖାହାନା
 ଏଲେଇଚେସି, “ବାବୁ ନାନୁ ହାହାମାଞ୍ଜାତି ଟାକା ତଲେ ପାସାଗଟା
 ଲାବା କିହାମାଇଁ ।” ୧୯ ଏଝାସି ଏଝାଣାଇଁ ଜିକେଏ ଏଲେଇଚେସି,
 “ନାନୁ ଜିକେଏ ପାସାଗଟା ଗାଡ଼ାୟାଁ ମୁହେଁ ଅଦିକାରା ଆମ୍ତୁ ।”
 ୨୦ ଅଡ଼େ ରଅସି ଖାହାନା ଏଲେଇଚେସି, “ପ୍ରବୁ ମେହମ୍ତୁ ଇଦି
 ନାନୁ ହାହାମାଞ୍ଜାତି ଟାକା; ଇଦାଆଁ ନାନୁ ଦ୍ରାଃଆଲିତା ରୁପାନା
 ଇଟାମାଚେସି । ୨୧ ଇଚିହୁଁ ନାନୁ ନିଙ୍ଗେ ଆଜାଚେସି, ନାନୁ
 ର ଗିରିଗିରା ଗାଟାତି, ଇଟା ହିଲାଆଗାଟାଣି ପାରିନାତି, ମାଟା
 ହିଲାଆତାଣା ଦାଃଆନାତି ।” ୨୨ ଏଝାସି ଏଝାଣାଇଁ ଏଲେଇଚେସି,
 ଆଡ଼େ ପଲ୍ଲଆଗାଟି ହଲେଏଣାତି, ନୀ ଗୁଡିତି ହାଡ଼ାତଲେ ନୀ
 ନୀହାୟି କିୟାଇଁ, ନାନୁ ଗିରିଗିରା ଗାଟାଚେସି, ଇଟାହିଲାଆ ତାଣା
 ପାରିନାଚେସି ମାଟାଆତି ତାଣା ଦାଃଆନାଚେସି ଇଦାଆଁ ପୁଞ୍ଜାମାଟି
 ? ୨୩ ଆତିହୁଁ ଏନାଆଁତାକି ନା ଟାକାତି ରୀଣା ଅନାରାକି ହାଆତି,
 ନାନୁ ଖାହାନା ଅତିତଲେ ବେଟାଆଚେସିମା । ୨୪ ଇଞ୍ଜା ଦାରିତା
 ନିଟାମାଚାରାଇଁ ଖେସେସି, “ଇଝାଣି ତାଣାଟି ଏ ଟାକା ମୀଞ୍ଜା ଅହାନା

ଆତ୍ମାଆରିକ ଦସଟାକା ମାନୁ ଏଝାଣାକି ହୀଦୁ ।” ୨୫ ଏଚେଟିଏ ଏଝାରି ଝେସ୍ତେରି, “ପ୍ରଭୁ ଏଝାଣାକି ଦସଟାକା ମାନୁ ।” ୨୬ ✱ନାନୁ ମିଙ୍ଗେ ଝେସିମାଞ୍ଜାଇଁ, “ଆମିନିଗାଟାଣାକି ମାନେ, ଏଝାଣାକି ଗାତି ହୀପକିଆନେ । ସାମା ଆତ୍ମାଆରାଝାୟି ହିଲେଏ ଏଝାଣି ତାଣା ଏନାୟି ମାନେ ଏଦାଆଁ ଜିକେଏ ଏଝାଣି ତାଣାଟି ଅଝିଆନେ । ୨୭ ✱ସାମା ନାଙ୍ଗେ ତାମି ରାଜା ଆହାଲି କୂହାମାଞ୍ଜାନି ସାତୁୟାଁଇଁ ଇମ୍ପାଆଁ ତାକା ହାଜାନା ଏଝାରାଇଁ ନା ନକିତା ଚୁଣ୍ଡହାତୁହ୍ଦୁ ।”

ଜୀସୁ ଜିରୁସାଲମତା ରାହାଁଟି ହାନାୟି

(ମାତି ୨୧:୧-୧୧; ମାର୍କ ୧୧:୧-୧୧; ଜହ ୧୨:୧୨-୧୯)

୨୮ ଇ ବାରେ କାତା ଝେସ୍ତେ ତାୟୁ ଜୀସୁ ଜିରୁସାଲମ ଝାକି ହାଚେସି । ୨୯ ଏଝାସି ଜୀତ ହରୁ ଦାରିତା ମାନି ବେତନିୟାଁ ଅଡେ ବେତପାଗି ନାସକାଣାଁ ଏଜାନା ତାନି ସୀସୁୟାଁ ବିତ୍ରାଟି ରିଆରାଇଁ ଇ କାତା ଝେସା ପାଣ୍ଡିତେସି । ୩୦ “ମୀରୁ ହାଜାନା ମୀ ନକିତି ନାୟୁତା ହଡୁଦୁ ଇଞ୍ଜାଁ ଲକୁ ଏଚେଲା ହଡା ହିଲଅରି; ଇଲେତି ର ଗାଡୁଦେ ତାଲୁତି ଦସାମାନାଣି ମେହ୍ଦେରି; ଏଦାଆଁ ଦାଝାଁ ହୁକହା ନା ତାଣା ତାଟିହ୍ଁ ଝାଦୁ । ୩୧ ଆତ୍ମାଆସି ଏନାଆଁତାକି ହୁକହିମାଞ୍ଜେରି ଇଞ୍ଜାଁ ଝେଞ୍ଜାତିହ୍ଁ, ଇଦାନି ମା ପ୍ରଭୁକି ଲଡ଼ାମାନେ ଇଞ୍ଜାଁ ଝେହ୍ଦୁ ।”

୩୨ ଏମ୍ପାଟି ଜୀସୁ ପାଣ୍ଡାମାଚାରି ଏଝାସି ଏନିକ୍ଁ ଝେସାମାଚେସି, ଏଲେହେଁ ମେସ୍ତେରି । ୩୩ ଇଞ୍ଜାଁ ଏଝାରି ଗାଡୁଦେ ତାଲୁତି ଦାଝାଁ ହୁକହିମାଚାଟି ଗାଡୁଦେ ସାଝୁକାରିୟାଁ “ଏନାଆଁତାକି ହୁକହିମାଞ୍ଜେରି ଇଞ୍ଜାଁ ଝେଚେରି?”

୩୪ ଏଝାରି ଏଲେଇଚେରି, “ଇଦାନି ମା ପ୍ରଭୁକି ଲଡ଼ାମାନେ ।” ୩୫ ଏମ୍ପାଟିଏ ଗାଡୁଦେ ଜୀସୁ ତାଣା ତାଚାନା ଏଦାନିଲେକ ହିମ୍ପରିକା ପାସାନା ଜୀସୁଇଁ ଲାକ କୁଗିକିତେରି । ୩୬ ଅଡେ ଏଝାସି ନକିତା ହାଜିମାଚାଟି ଲକୁ ଜିରୁତା ତାମି ହିମ୍ପରିକା ପାସ୍ତେରି ।

୩୭ ଇଞ୍ଜାଁ ଏଝାସି ଜିରୁସାଲମ ତାଗେ ମାନି ଜୀତ ହରୁଟି ଝାନି ବେଲାତା ଏଝାସି ଇଞ୍ଜାଁ ତାମି ସୀସୁୟାଁ ଜୀସୁ କିତି ବାଡୁୟୁତି କାମାତାକି ମାହାପୁରୁଇଁ ଜହରା କିହିହ୍ଁ ରାହାଁଟି ପାଚୁ ପାଟିତେରି । ୩୮ “ପ୍ରଭୁତି

✱ ୧୯:୨୬ ୧୯:୨୬ ମାତି ୧୩:୧୨; ମାର୍କ ୪:୨୫; ଲୁକ ୮:୧୮ ✱ ୧୯:୨୭ ୧୯:୨୭ ମାତି ୨୫:୧୪-୩୦

ଦରୁଟି ଆମିନି ରାଜା ଖାହିମାନେସି ଏଞ୍ଜାଣାକି ନେହେଁ । ଲାକପୁରୁ ହିଡ଼ଡ଼ି ଅଡ଼େ ଲାକପୁରୁତି ମାହାପୁରୁଇଁ ଗାଞ୍ଜୁରମି ଆଡ଼େ ।”

୩୯ ଏଚେଟିଏ ଲକୁ ମାନ୍ଦାଟି ଏଚରଜାଣା ପାରୁସିୟାଁ ଜୀସୁଇଁ ଏଲେଇଚେରି, “ଏ ଗୁରୁ ନୀ ସୀସୁୟାଁଇଁ ଲାଗାମୁ ।”

୪୦ ନାନୁ ମିଙ୍ଗେ ଖେସିମାଞ୍ଜାଇଁ, “ଇଞ୍ଜାରି ପାଲେଏ ଆଡ଼ିସାରେ, ଖାଲକା ହାଲେହେଁ କାଜା ଗିୟାତଲେ ଜଲିତୁମା ।”

ଜୀସୁ ଜିରୁସାଲମ ତାକି ଡାନାୟି

୪୧ ଅଡ଼େ ଏଚେତା ଗାଡ଼ା ତାଗେ ଖାଡେସି, ଏଚିବେଲା ଗାଡ଼ାତି ମେସାନା ଡାହିହୁଁ ଏଲେଇଚେସି, ୪୨ “ନାନୁ ହାଅ, ନାନୁ ନୀଞ୍ଜୁ ହିଡ଼ଡ଼ି ଜିରୁ ପୁଟିହୁଁ ଅକିଡେମା ! ସାମା ଏଦି ନୀ ତାଣାଟି ଡଗୁମାନେ ! ୪୩ ଏଚିବେଲା ମାହାପୁରୁ ନିଙ୍ଗେ ଗେଲପାଲି ଅଣ୍ପାମାଞ୍ଜାତେସି ଏଡାଆଁ ପୁନାଆତାକି ଏଚିବେଲାତା ନୀ ସାଡୁୟାଁ ନୀ ସାରିସୁଟୁ କାଜା କଟା ଦସାନା ମୁଚାନେରି, ୪୪ ଇଞ୍ଜା ନିଙ୍ଗେ ଅଡ଼େ ନୀ ତାଣା ମାନି ନୀ ମୀରକାଣି କୁଡ଼ପୁନାସା କିୟାନେରି, ଅଡ଼େ ର ଖାଲିତି ଅର ଖାଲି ଲାକ ଡାରି ଆହାଲି ହିୟଅରି, ଇଲେତି ଦିନା ଖାହିମାନେ ।”

ମାହାପୁରୁ ଇଲୁତା ଜୀସୁ ହଡ଼ନାୟି

(ମାତି ୨୧:୧୨-୧୭; ମାର୍କ ୧୧:୧୫-୧୯; ଜହ ୨:୧୩-୨୨)

୪୫ ଏମ୍ବାଟିଏ ଜୀସୁ ମାହାପୁରୁ ଇଲୁତା ହଡ଼ନାହାଁ ବେବାରା କିନାରାଇଁ ଏମ୍ବାଟି ହାସା ପେରହାଡୁସ୍ତେସି, ୪୬ ଦାମ୍ବୁପତିତା ରାସ୍କି ଆହାମାନେ, “ନା ଇଲୁ ପ୍ରାଡାନା ଇଲୁ ଆନେ, ସାମା ମୀରୁ ଏଡାଆଁ ଡଂଗାୟାଁ ପାଞ୍ଜୁ ମ୍ବୁପହାଡୁସ୍ତେରି ।”

୪୭ ✨ଅଡ଼େ ଜୀସୁ ଦିନାତାକି ଦିନା ପ୍ରାଡାନା ଇଲୁତା ଜାପୁହି ମାଚେସି, ସାମା କାଜା ପୂଜେରାଜା ଅଡ଼େ ମେରାପୁନାରି ଲକୁତି କାଜାରି ତଲେ ଜୀସୁଇଁ ପାୟାଲି ଅଣ୍ପିମାଚେରି, ୪୮ ସାମା ଲକୁ ରାହାଁଟି ଏଞ୍ଜାଣି ଜାପୁନାଣି ଖେଞ୍ଜିମାଚାକି ଏଞ୍ଜାରି ଏନିକିହାଲି ଆନେ ପାରୁ ବେଟାଆହି ହିଲାଆଚେରି ।

☆ ୧୯:୪୭ ୧୯:୪୭ ଲୁକ ୨୧:୩୭

୨୦

ଜୀସୁତି ଅଦିକାରା

୧ ର ଦିନା ଜୀସୁ ମାହାପୁରୁ ଇଲୁତା ଲକୁଣି ଜାପୁହି ମାଚେସି, ଅଡ଼େ ନେହୁଁ କାରୁ ଝେକ୍‌ହି ମାଚେସି, ଏଚିବେଲା କାଜା ପୁଜେରାଙ୍ଗା ଅଡ଼େ ମୋରାପୁନାରି ପ୍ରାଚିନାଙ୍ଗା ତଲେ ଝାହାନା ଝେଚେରି, ୨ “ନାନୁ ଆମିନି ଅଦିକାରା ତଲେ ଈ ବାରେ କିହିମାଞ୍ଜି, ଏଲେକିହାଲି ଆମ୍ବାଆସି ଅଦିକାରା ହୀହାମାଞ୍ଜାନେସି, ମାଙ୍ଗେ ଝେସ୍ତାମ୍ ।”

୩ ସାମା ଜୀସୁ ଏଝାରାଇଁ ଏଲେଇଚେସି, “ନାନୁ ଜିକେଏ ର କାତା ଝେଞ୍ଜାଇଁ, ନାଙ୍ଗେ ଝେସ୍ତାମ୍ ୪ ଜହନଇଁ ବାପ୍ତିସ୍ତା* ହୀମୁ ଇଞ୍ଜୁ ଆମ୍ବାଆସି ଚାଣ୍ଡିତେସି, ଲାକପୁରୁଟି କି ମାଣସି ତାଣାଟି ?”

୫ ଏଚେଟିଏ ଏଝାରି ତାମ୍ବୁ ତାମ୍ବୁ ଜଲୁକି ଆଡେରି, “ଲାକପୁରୁଟି ଇନାୟି, ଆତିହୁଁ ଏଝାସି ଏଲେଇଞ୍ଜାନେସି ଏନାଆଁତାକି ଏଝାଣାଇଁ ନାମାଆତେରି ? ୬ ସାମା ମାଣସି ତାଣାଟି ଇନାୟି, ଇଞ୍ଜା ଲକୁ ମାଙ୍ଗେ ଝାଲୁକାତଲେ ପାୟାନେରି, ଇଚିହୁଁ ଜହନଇଁ ମାହାପୁରୁ ଅଣପୁତି ବଲୁ ଝେହନାରି ତାଣାଟି ରଅସି ଇଞ୍ଜୁ ହାରେକା ନାମାମାନେରି ।” ୭ ଏଝାରି ଏଲେଇଚେରି, “ମାମ୍ବୁ ପୁଞ୍ଜାହଲଅମି ଏଦି ଏମ୍ବିଟି ଆହାମାନେ ।”

୮ ଜୀସୁ ଏଝାରାଇଁ ଏଲେଇଚେସି, “ଆତିହୁଁ ନାନୁ ଆମିନି ଅଦିକାରା ତଲେ କିହିମାଇଁ ନାନୁ ଜିକେଏ ଝେସ୍ତାଅଁ ।”

ଅଞ୍ଜୁରି ବାଡ଼ାତା ବାଗା କାମାକିନାରି ପୁଣ୍ଡିକିନି କାତା

(ମାତି ୨୧:୩୩-୪୭; ମାର୍କ ୧୨:୧-୧୨)

୯ ଏମ୍ବାଟିଏ ଜୀସୁ ଇ ପୁଣ୍ଡିକିନି କାତା ଝେସ୍ତେସି, “ରଅସି ର ଅଞ୍ଜୁରି ବାଡ଼ା କିହାନା କାମା କିନାରାକି ବାଗା ହୀହାନା ହାରେକା ଦିନାତାକି ଅର ଦେସାତା ହାଚେସି । ୧୦ ଅଞ୍ଜୁରି ପାଡ଼େୟି କାମ୍ବି ବେଲା ଏଝାସି ତାନି ବାଗା ବେଟାଆହାଲି ର ହଚ୍‌ଲେଏଣାଇଁ ପାଣ୍ଡିତେସି, ସାମା ଅଞ୍ଜୁରି ବାଡ଼ାତା କାମାକିନାରି ଏଝାଣାଇଁ ମାଡ଼ା ଝେଚାନା ଝାରଇ କେମ୍ବୁଟି ପେରହାତୁସ୍ତେରି । ୧୧ ଏଝାସି ଅଡ଼େ ର ହଚ୍‌ଲେଏଣାଇଁ ପାଣ୍ଡିତେସି; ଏଝାରି ଏଝାଣାଇଁ ଜିକେଏ ଝେଚାନା ନିନ୍ଦା କିହାଁ ଝାରଇ

* ୨୦:୪ ୨୦:୪ ମୁଞ୍ଜିନାୟି

କେନ୍ଦୁଟି ପେରହା ପାଣ୍ଡିତେରି; ୧୨ ତାମ୍ଭୁ ଅଡ଼େ ରଅଣାଲ୍ ପାଣ୍ଡିତେସି, ସାମା ଏଝାଣାଲ୍ ଜିକେଏ ରାଣାରକା କିହାନା ବାଡ଼ାତି ପାଙ୍ଗାତା ମେଡ଼ହାତୁସ୍ତେରି । ୧୩ ଏମ୍ବାଟିଏ ଅଙ୍ଗୁରି ବାଡ଼ାତି ସାଞ୍ଜୁକାରି ନୀଏଟି ଏନାଆଁ କିଲ୍ ଇଞ୍ଜି ଅଣପାନା, ନା ଜାଞ୍ଜୁତି ମୀରଏଣାଲ୍ ପାଣ୍ଡିଲ୍ ଆତିହ୍ ଏଝାଣାଲ୍ ମାନି କିନେରି । ୧୪ ସାମା କାମାକିନାରି ଏଝାଣାଲ୍ ମେସାନା ତାମ୍ଭୁ ତାମ୍ଭୁ ଏଲେଇଶ୍ମି ଆଡ଼େରି ‘ଇଝାସି ଅଦିକାରା ଗାଟାସି, ଇଝାଣାଲ୍ ପାୟାତୁହ୍ନ, ଆତିହ୍ ଇ ଅଙ୍ଗୁରି ବାଡ଼ା ମାଙ୍ଗେ ଆୟାନେ ।’ ୧୫ ଅଡ଼େ ଏଝାଣାଲ୍ ଅଙ୍ଗୁରି ବାଡ଼ା ପାଙ୍ଗାତା ମେଡ଼ହାନା ପାୟିତେରି ।”

“ଆତିହ୍ ଅଙ୍ଗୁରି ବାଡ଼ାତି ସାଞ୍ଜୁକାରି ଏଝାଣାଲ୍ ଏନାଆଁ କିନେସି ? ୧୬ ଏଝାସି ଝାହାନା ଇ କାମା କିନାରାଲ୍ ପାୟାତୁହ୍ନେସି, ଅଡ଼େ ଏଟକାତାରକି ଏ ଅଙ୍ଗୁରି ବାଡ଼ା ହାନେସି ।”

ଲକୁ ଇ କାତା ଝେଞ୍ଜାନା ଏଲେଇତେରି, “ଏଲେକିହ୍ ଆଞ୍ଜୁଏ ଆଆପେ ।”

୧୭ ସାମା ଜୀସୁ ଏଝାଣାଲ୍ ଝେସ୍ତେସି, “ଆତିହ୍ ରାଟାମାନି ଇ ବଲୁ ଏନାୟି ?

ଇଲୁ କେପିନାରି ଆମିନି ଝାଲିତି କୁଡେରି,

ଏଦି ଇଲୁ କନତି ମୂଲୁ ଝାଲି ଆଡେ ।

୧୮ ଆମ୍ବାଆସି ଏ ଝାଲି ଲାକ ତରଗିନେସି, ଏଝାସି କାଣ୍ଡାମୁକା ଆନେସି; ଇଞ୍ଜା ଏ ଝାଲି ଆମ୍ବାଆରି ମୁହେଁ ତରଗିନେ ଏଝାଣାଲ୍ ଗୁଣ୍ଡୁଗୁଣ୍ଡା କିନେ ।”

ସିସ୍ତୁ ହାନି କାତା

(ମାତି ୨୨:୧୫-୨୨; ମାର୍କ ୧୨:୧୩-୧୭)

୧୯ ଏଚେଟିଏ ମେରାପୁନାରି ଅଡ଼େ କାଜା ପୂଜେରାଙ୍ଗା ଦେବୁଣିଏ ଜୀସୁଲ୍ ଆସାଲି ଅଣ୍ଡିତେରି, ସାମା ଲକୁ ମାନ୍ଦାତି ଆଜିତେରି, ଇତିହ୍ ଏଝାସି ଏ ପୁଣ୍ଡିକିନି କାତା ଏଝାଣାଲ୍ ସିନକିହାନା ଝେସାମାଚେସି ଇଞ୍ଜି ଏଝାରି ପୁଚେରି । ୨୦ ଏମ୍ବାଟିଏ ଏଝାରି ଜୀସୁଲ୍ ପାଣା ଅଡ଼େ ବାଡ଼ମୁଗାଟି ସାଲୁଝି କିନାରି କେନ୍ଦୁତା ଏଝାଣାଲ୍ ହେର୍ପାଲି ପାରୁ ପାରାତେରି, ଇଞ୍ଜା ଏଚରଜାଣା ତାମ୍ଭୁ ତାମ୍ଭେ

ଦାର୍ମଗାଟାରି ଇଞ୍ଜି ତସା କଡିନି ନାଡ଼ିକିନାରି ଜୀସୁଇଁ ତାନି ଝେହ୍ନି କାତାତା ଦହ୍ ଦସାଲି ଏଝାଣି ତାଣା ପାଣ୍ଡିତେରି । ୨୧ ଏଝାରି ଜୀସୁଇଁ ଝେରେରି, “ଗୁରୁ, ମାମ୍ବୁ ପୁଞ୍ଜାମାନମି, ନୀନୁ ଏନାଆଁ ଝେସାମାଞ୍ଜି ଅଡ଼େ ଜାମ୍ବୁହାମାଞ୍ଜି ଏଡ଼ି ସାତା, ଅଡ଼େ ଆମ୍ବାଆରାଇଁ ପାରଡ଼ା ବାଟି କିଅତି, ସାମା ସାତା ମାହାପୁରୁତି ଜିରୁତି କାତା ଜାମ୍ବୁ । ୨୨ ଆତିହ୍ କାୟିସରକି ସିସୁ ହୁନାୟି ମେରା ମାନେକି ଆଏ ।”

୨୩ ସାମା ଜୀସୁ ଏଝାରି ନାଡ଼ିକିନି ଅଶ୍ପୁତି ପୁଞ୍ଜାନା ଏଝାରାଇଁ ଝେସେସି, “ନାଙ୍ଗେ ର ଝେଣ୍ଡି ଟାକା ହିୟାଦୁ ।” ୨୪ ଏ ଝେଣ୍ଡି ଟାକାତା ଆମ୍ବାଆରି ବମା ଅଡ଼େ ଦରୁ ମାନେ, ଏଝାରି ଝେସେରି, “କାୟିସରଝାୟି ।” ୨୫ ଏଚେଟିଏ ଜୀସୁ ଏଝାରାଇଁ ଝେସେସି, “ଆତିହ୍ କାୟିସରଝାୟି ଏନାୟି ଏଦାଆଁ କାୟିସରକି ହୀଦୁ; ଇଞ୍ଜା ମାହାପୁରୁଝାୟି ଏନାୟି ଏଦାଆଁ ମାହାପୁରୁକି ହୀଦୁ ।” ୨୬ ଏଚେଟିଏ ଏଝାରି ଲକୁ ନକିତା ଏଝାଣାଇଁ ଏନି ଦହ୍ ଦସାଲି ଆଡ଼ାଆଡେରି, ଇଞ୍ଜା ଏଝାରି ଜୀସୁ ଝେସ୍ତି କାତାତାକି ଆଡ଼ାଜାକା ଆହାନା ପାଲେଏ ମାଚେରି ।

**ହାଡ଼ାରି ଝେଣ୍ଡେ ନିଙ୍ଗିନି କାତା
(ମାତି ୨୨:୨୩-୩୩; ମାର୍କ ୧୨:୧୮-୨୭)**

୨୭ ☆ଏମ୍ବାଟିଏ ହାଡ଼ାରି ଝେଣ୍ଡେ ନିଙ୍ଗିନାଣି ନାମିହିଲାଆଗାଟି ଏଚରଜାଣା ସାଦୁକିୟାଁ ଜୀସୁତାଣା ଝାହାନା ଝେଚେରି, ୨୮ “ଏ ଗୁରୁ ମସା ମାଙ୍ଗେଡାକି ରାଡ଼ାମାନେସି, ରଅସି ବୀହା ଆହାଁ କକାରି ପଦାଁ ଆଆନା ହାଡ଼ିହ୍, ଏଝାଣି ତାୟି ତାନି ତକ୍ତିନି ଇଟାନା ଏଝାଣି କୂଡ଼ା ଏପିକିୟାଲି ଆନେ । ୨୯ ସାତା ଜାଣା ତାୟିୟାଁ ମାଚେରି; କାଜାସି ବୀହା ଆହାନା କକାରି ପଦାଁ ଆଆନା ହାଡ଼େସି; ୩୦ ତାୟି ଏଝାଣି ଜେଚତାସି ଇଟିତେସି, ଅଡ଼େ ଏଝାଣି ଜେଚତାସି ଇଟିତେସି; ୩୧ ଏଲେକିହ୍ ଏ ସାଡ଼ା ଜାଣା ଜିକେଏ କକାରି ପଦାଁ ଆଆନା ହାଡ଼େରି । ୩୨ ତାୟି ଏ ଇୟା ଜିକେଏ ହାଡ଼େ । ୩୩ ଆତିହ୍ ଝେଣ୍ଡେ ନିଙ୍ଗିନି ଦିନା ଏଝାରି ବିତ୍ରାଟି ଏ ଇୟା ଆମ୍ବାଆରି ତକ୍ତି ଆନେ ? ଇତିହ୍ ସାତା ଜାଣା ଜିକେଏ ଏଦାନି ଇଟାମାଚେରି ।”

☆ ୨୦:୨୨ ୨୦:୨୭ କାମା ୨୩:୮

୩୪ ଜୀସୁ ଏଝାରାଇଁ ଏଲେଇଚେସି, “ଇ ଦାର୍ତତି ଲକୁ ବୀହା କିନେରି ଅଡେ ଆନେରି, ୩୫ ସାମା ଝାନ୍ତି ଜୁଗୁତାକି ଇଞ୍ଜା ହାକିଟି ନିଙ୍ଗାଲିତାକି ପାଡା ଆନାରି ବୀହା ଆଅରି କି ବୀହା ହୀଅରି; ୩୬ ଇଚିହିଁ ଏଝାରି ଦୂତୁୟାଲେହେଁ ଆହାନା ଏଚେଲାଝା ହୀଅରି, ଇଞ୍ଜା ହାକିଟି ନିଙ୍ଗାମାନାକି ଏଝାରି ମାହାପୁରୁତି ମୀରକା ଆନେରି । ୩୭ ସାମା ହାଡାରି ସାତେଏ ନିଙ୍ଗନେରି ଇଞ୍ଜାଁ ମସାଲ୍ ଜିକେଏ ଝେହିମାନି ବୂଟାତି କାବୁତଲେ ନେହିଁ କିଁ ତସାମାଚେସି, ଇଚିହିଁ ଏଝାସି ପ୍ରବୁଲ୍ ଅବାହାମତି ମାହାପୁରୁ, ଇସାହାକତି ମାହାପୁରୁ ଅଡେ ଜାକୁବତି ମାହାପୁରୁ ଇଞ୍ଜାମାଚେସି । ୩୮ ଏଝାସି ହାଡାରି ମାହାପୁରୁ ଆଏ ସାମା ଜୀଝୁଗାଟାରି ମାହାପୁରୁ; ଇଚିହିଁ ମାହାପୁରୁ ନକିତା ବାରେଜାଣା ନୀତାମାନେରି ।”

୩୯ ଏମ୍ବାଟିଏ ମେରାପୁନାରି ବିତ୍ରାଟି ଏଚରଜାଣା ଏଲେଇଚେରି, “ହାଅ, ଗୁରୁ ନୀନୁ ଅଜେ ଝେସ୍ତାତି ।” ୪୦ ଇଚିହିଁ ଏଝାଣାଇଁ ଅଡେ ଏନାଆଁ ଝେଞ୍ଜାଲି ଏଝାରାକି ସାସା ହିଲାଆତେ ।

କ୍ରୀସ୍ତ ଆମ୍ବାଆସି

(ମାତି ୨୨:୪୧-୪୬; ମାର୍କ ୧୨:୩୫-୩୭)

୪୧ ଏମ୍ବାଟିଏ ଜୀସୁ ଏଝାରାଇଁ ଝେଚେସି, କ୍ରୀସ୍ତ ଦାଝୁଦ ମୀରଏସି, ଲକୁ ଏନିକିଁ ଏଲେଇନେରି ? ୪୨ ଇଚିହିଁ ଦାଝୁଦ ତାନୁଏ ପାଚୁ ପତିତା ଏଲେଇଞ୍ଜି ମାନେସି, ପ୍ରବୁ ନା ପ୍ରବୁଲ୍ ଝେସ୍ତେସି,

୪୩ ନାନୁ ନୀ ସାତୁୟାଣି ନୀ କତାୟାଁ ଡଇ ଇଟାଆ ପାତେକା,

ନୀନୁ ନା ଟିଝନିଝାକି କୁଗାମାନାମୁ ।

୪୪ ଦାଝୁଦ ତାନୁଏ ଏଝାଣାଇଁ ପ୍ରବୁ ଇଞ୍ଜାଁ ମାନେସି; ଆତିହିଁ କ୍ରୀସ୍ତ ଏନିକିଁ ଏଝାଣି ମୀରଏସି ?

ମେରାପୁନାରି ତାଣାଟି ଜାଗ୍ରାତା

(ମାତି ୨୩:୧-୩୬; ମାର୍କ ୧୨:୩୮-୪୦)

୪୫ ତାୟୁ ବାରେ ଲକୁ ନକିତା ସୀସୁୟାଁଲ୍ ଝେସ୍ତେସି, ୪୬ “ମେରା ଜାପୁନାରି ତାଣାଟି ଜାଗ୍ରାତା ! ଇଚିହିଁ ଏଝାରି ଲାମ୍ବା ଲାମ୍ବା ହିମ୍ବରିକା ହୁଚାନା ତିରଝିହିଁ ରେଜାଲି, ଅଡେ ହାଟା ବାଜାରାତା ଜହରା

ବେଟାଆହାଲି, ପ୍ରାତାନା ଇଲକାଣା ନେହୁଁ ନେହୁଁ କୁଚୁର୍ଯ୍ୟା ଅଡ଼େ ବଜିତା ନେହୁଁ ଟାୟୁ ବେଟାଆହାଲି ଅଣ୍ଠିପିନେରି; ୪୭ ଏଞ୍ଜାରି ରାଣ୍ଠେଣିସିକା ଇଲୁ ସେନ୍ଦିନେରି ଅଡ଼େ ଉଜେ ଉଜେଏ ଲାମ୍ବା ଲାମ୍ବା ପ୍ରାତାନା କିନେରି; ଏଞ୍ଜାରି ହାରେକା ଡ଼ଣ୍ଡୁ ବେଟାଆନେରି ।”

୨୧

ରାଣ୍ଠେଣିନି ଦାନା

(ମାତି ୧୨:୪୧-୪୪)

୧ ଏଚିବେଲା ଦନଗାଟାରି ଦାନା ପେଡ଼ାତା ତାନି ଦାନା ମେଡ଼ୁହି ମାଟାଣି ଜୀସୁ ସିନିକିହିମାଚେସି, ୨ ଅଡ଼େ ର କାର୍ମାଗାଟି ରାଣ୍ଠେଣି ଖାହାନା ଏମ୍ପାଆଁ ରା ଉଣା ତାମ୍ପାତି ଆଦଲି ମେଡ଼ୁହାଣି ମେସାନା ଏଲେଇଚେସି, ୩ “ନାନୁ ମିଙ୍ଗ ସାତା ଝେସିମାଞ୍ଜାଇଁ ଇ କାର୍ମାଗାଟି ରାଣ୍ଠେଣି ଗାଡ଼ି ଦାନା ହୀହାମାନେ, ୪ ଇଚିହୁଁ ଦନ ଗାଟାରି ତାନି ଗାଡ଼ି ଦନଟି ଇଚାଣି ତାତାନା ବେଟୁ ହୀହାମାନେରି, ସାମା କାର୍ମାଗାଟି ରାଣ୍ଠେଣି ତାନି ହିଲାଆବେଲାତା ତାଙ୍ଗେ ନୀତାଲିତାକି ଏନାୟି ମାଚେ ଏ ବାରେ ହୀହାମାନେ ।”

ମାହାପୁରୁ ଇଲୁ ନସ୍ତୁ ଆନି କାତା

(ମାତି ୧୪:୩-୧୪; ମାର୍କ ୧୩:୩-୧୩)

୫ ଅଡ଼େ ଆମ୍ବା ଆମ୍ବାଆରି ମାହାପୁରୁ ଇଲୁ ଅଜି ଅଜିତି ଖାଲକା ଅଡ଼େ ଦାନା ହୀନାଣି ତଲେ ଅଜିକ ଆଜାମାନେ ଇଞ୍ଜାଁ ଇଞ୍ଜାଲିଏ ଜୀସୁ ଏଲେଇଚେସି, ୬ “ମୀରୁ ନୀଏଁ ଏନା ଏନାଆଁ ମେସିମାଞ୍ଜେରି, ଦିନା ଖାନେ, ଏଚିବେଲା ର ଖାଲି ଅର ଖାଲି ଲାକ ଡ଼ୟେଏ, ଇ ବାରେ ମେଣ୍ଟାହାନେ ।”

କସ୍ତୁ ଅଡ଼େ ନିନ୍ଦା ଖାନି କାତା

(ମାତି ୨୪:୩-୧୪; ମାର୍କ ୧୩:୩-୧୩)

୭ ଏଚିବେଲା ଏଞ୍ଜାରି ଏଞ୍ଜାଣାଇଁ ଝେଚେରି, “ଏ ଗୁରୁ ଆଡ଼ିହୁଁ ଇ ବାରେ ଏଚେଲା ଆନେ ? ଇଞ୍ଜାଁ ଇ ବାରେ ଆମିନି ବେଲାତା ଆନେ, ଏ ବେଲାତି ସିନା ଏନାୟି ?”

୮ ଜୀସୁ ଏଲେଇଚେସି, “ଜାଗ୍ରାତା ମୀରୁ ଏନିକ ଆନ୍ଦା ଆଅତେରି; ଇଚିହୁଁ ହାରେକା ନା ଦରୁଟି ଖାହାନା ନାନୁ ଏଞ୍ଜାତେଏଁ ଅଡ଼େ ଏ

ଦିନା ଏଦାତେୟିଏ ଇଞ୍ଜିଁ ଇଞ୍ଜାନେରି; ଏଞ୍ଜାରି ଜେଟ ହାଲାଆଦୁ ।
 ୯ ଇଞ୍ଜା ମୀରୁ ଏଚେତା ଜୁଜୁ ଇଞ୍ଜା ମେଲି ଆହିମାନାଣି ଖେଚିସାରେ
 ଆଜାଆଦୁ; ଏନିଇଚିହଁ ଇ ବାରେ ନକେଏ ଆୟାଲି ଆନେ,
 ଆଡ଼ିଜିକେଏ ଏଚିବେଲା ଜୁଗୁ ରାଏ ।”

୧୦ ତାୟୁ ଏଞ୍ଜାରାଇଁ ଏଲେଇରେସି, “ଦେସା କପାଟି ଦେସା, ରାଜି
 କପାଟି ରାଜି ମେଲି ନିଜିନେ, ୧୧ ଇଞ୍ଜା ଇମ୍ପାଆଁ ଏମ୍ପାଆଁ ବୁମି ଖୀଡ଼ିନେ,
 ହାରେକା ଚାୟୁତା ମରଡ଼ି ଇଞ୍ଜା କାରୁଝୁ ଖାନ୍ନେ, ଅଡ଼େ ହାଗୁ ପାକାତା
 ଆଜିହଠେପତି ସିନାୟାଁ ତଞ୍ଜା ଆନୁ । ୧୨ ସାମା ଇ ବାରେ ଆଆ ନକେଏ
 ଲକୁ ମିଙ୍ଗେ ଆସାନା ନା ଦରୁ ତାକି ନିନ୍ଦା କିହାନା ଜୀହୁଦି ଲକୁତି
 କୁଟମି ଇଲ୍‌କାଣା*, କାୟିଦି ଇଲ୍‌କାଣା, ରାଜା ଇଞ୍ଜା ନାହାୟି କିନାରି
 ତାଣା ହେର୍‌ପାନେରି; ୧୩ ଇଦି ମିଙ୍ଗେତାକି ସାକି ଆନେ । ୧୪ ✨ଇଞ୍ଜା
 ଏନାଆଁ ଜିଲିଇଁ ଏନାଆଁ ଖେହ୍‌ଇଁ ଇଞ୍ଜିଁ ତଲିଏ ମନତା ଅଣ୍‌ପାଆଦୁ;
 ୧୫ ଏନାଆଁତାକି ଇଚିହଁ ମୀ ସାତୁୟାଁ ମିଙ୍ଗେ ଖେଣ୍‌ଣେ ଜଲ୍‌ଲି
 କି ଖେସାଲି ଆଡ଼ାଆପେରିଞ୍ଜା ଇଞ୍ଜିଁ ନାନୁ ମିଙ୍ଗେ ଏଚିବେଲାତା
 ନେହଁ ବୁଦି ଅଡ଼େ ସୁଞ୍ଜା ହିୟାଇଁ । ୧୬ ସାମା ମୀ ତାଲି ତାଞ୍ଜି ତାୟିୟାଁ
 ସାମନ୍‌ୟାଁ ଇଞ୍ଜା ମୀ ତଣେସିଙ୍ଗା ଜିକେଏ ମିଙ୍ଗେ ହେର୍‌ପାନେରି,
 ଅଡ଼େ ମୀ ବିତ୍ରାଟି ଆମ୍ବା ଆମ୍ବାଆରାଇଁ ଇର୍‌ହାନା ପାୟିନେରି, ୧୭ ଇଞ୍ଜା
 ନା ଦରୁ ତାକି ବାରେ ଲକୁତାଣା ଲାଜା ବେଟାଆଦେରି ଅଡ଼େ ଅପଅରି
 । ୧୮ ସାମା ମୀ ତାୟୁଁ ତୁଁ ର ବାଣା ଜିକେଏ ନସ୍ତ ଆଏ; ୧୯ ଅର୍‌ହିନି
 ତାଣାଟି ମୀରୁ ମୀ ଜୀଝୁତି ଗେଲ୍‌ପିକିହା କଡ଼ିଦେରି ।”

ଜିରୁସାଲମ ନାସା ଆନି କାତା

(ମାତି ୨୪:୧୫-୨୧; ମାର୍କ ୧୩:୧୪-୧୯)

୨୦ “ସାମା ମୀରୁ ଏଚିବେଲା ସାତୁୟାଁ ଜିରୁସାଲମ ଗାଡ଼ାତା
 ମୁଚାମାନାଣି ମେହ୍‌ଦେରି, ଏଚିବେଲା ଏଦି ନାସା ଆନି କାଲା ଏଦାତେ
 ଇଞ୍ଜିଁ ପୁଞ୍ଜୁ । ୨୧ ଏଚିବେଲା ଏମିନିଗାଟାରି ଜୀହୁଦା ଦେସାତା
 ମାନେରି, ଏଞ୍ଜାରି ହର୍‌କାଣା ହଣ୍‌ପାରି; ଇଞ୍ଜା ଏମିନିଗାଟାରି ଗାଡ଼ା
 ବିତ୍ରା ମାନେରି, ଏଞ୍ଜାରି ହଡ଼ା ହାଲ୍‌ବେରି; ଏମିନିଗାଟାରି ନାସ୍‌କାଣାଁ

* ୨୧:୧୨ ୨୧:୧୨ ସିନଗର ✨ ୨୧:୧୪ ୨୧:୧୪ ଲୁକ ୧୨:୧୧,୧୨

ମାନେରି, ଏଞ୍ଜାରି ଗାଡ଼ାତା ହଡ଼ଆପେରି; ୨୨ ଏନିଇତିହିଁ ମାହାପୁରୁ ପତିତା ରାୟକି ଆହାମାନି ବାରେ କାତାଲେହେଁ ଆୟାଲିତାକି ଏନି ତଣ୍ଡ ହାନି କାଲା । ୨୩ ଆୟତା ଏତିବେଲା ପୁରାମାସା ଆହାମାନୁ କି ପାଲୁ ଉର୍ହିମାନୁ ଏଞ୍ଜି ଉଣେଏ କସ୍ତ ପାଣ୍ଡୁକି ! ଏନିଇତିହିଁ ଏତିବେଲା ଈ ଦାର୍ତତିତା କାଜା ତଣ୍ଡ ଅଡ଼େ ଈ ଲକୁତାକି ମାହାପୁରୁତି କପା ଆନେ, ୨୪ ଏଚରଜାଣା କାଣ୍ଡାତଲେ ଟୁଣ୍ଡି ଆନେରି, ଇଞ୍ଜା ଏଚର ଜାଣାଇଁ ଦସ୍ତପି କିହାଁ ଏଟକା କୁଡ଼ାତି ଲକୁତାଣା ଅନେରି, ଇଞ୍ଜା ଏଟକା ଜାଡ଼ିତି ଲକୁତି କଲା ଏଆ ପାତେକା ଏଞ୍ଜାରି କଡ଼ାୟାଁ ତଇ ଜିରୁସାଲମ ଗାଡ଼ା ଝିସ୍ତପିଆହିଁ ତୟନେ ।”

ମାଣସି ମୀରୁଏସି ଝେଣ୍ଡା ଝାନାୟି

(ମାତି ୨୪:୨୯-୩୧; ମାର୍କ ୧୩:୨୪-୨୭)

୨୫ ☆“ଏମ୍ବାଟିଏ ଝେଡ଼ା ଲେଞ୍ଜୁ ଅଡ଼େ ହୁକାୟାଁ ବିତ୍ରାଟି ଏନି ଏନି ସିନାୟାଁ ତଞ୍ଜାଆନେ, ସାମ୍ବୁରି ଗାଜି ନାଣି ଇଞ୍ଜା ଏୟୁ ନିଜିନାଣି ମେସାନା ଦାର୍ତତିତା ବାରେ ଦେସାତି ଲକୁ ଆତାଜାକା ଆନେରି, ୨୬ ଇଞ୍ଜା ଦାର୍ତତିତା ଏନା ଏନାୟି ଗଟଞ୍ଜି ଆହିମାନେ ଇଞ୍ଜାଁ କାଚାନା ଲକୁ ଆଜିତାକି ଜୀଝୁ ପିସ୍ତିଲେହେଁ ଆନେରି, ଏନିଇତିହିଁ ହାଗୁ ପାକାତି ବାଡ଼ୟୁ ବାରେ ଝୀତିନେ । ୨୭ ☆ଏତିବେଲା ମାଣସି ମୀରୁଏସି କାଜା ବାଡ଼ୟୁ ଅଡ଼େ ଗାଝୁରମି ତଲେ ହାଗୁ ଲାକତି ଦୁୟାଟି ଝାନାଣି ମେହ୍ଦେରି । ୨୮ ସାମା ଈ ବାରେ ଗଟଞ୍ଜି ଆୟାଲି ମାଟ୍ହିସାରେ ମୀରୁ ଲାକ ସିନିକିଦୁ ଏନିଇତିହିଁ ମିଜେଁ ଗେଲ୍ପିନି କାତା ଏଜିମାଞ୍ଜାନେ ।”

ତୟା ମାର୍ବୁଟି ଜାପିନାୟି

(ମାତି ୨୪:୩୨-୩୫; ମାର୍କ ୧୩:୨୮-୩୧)

୨୯ ଅଡ଼େ ଜୀସୁ ଏଞ୍ଜାରାଇଁ ର ପୁଣ୍ଡିକିନି କାତା ଝେସ୍ତେସି, “ତୟା ମାର୍ବୁ ଅଡ଼େ ବାରେ ମାର୍ବକାଣି ସିନିକିଦୁ; ୩୦ ଏତିବେଲା ଏଞ୍ଜି ଗଝେଡ଼ି ଗାଲ୍ଲୁ, ଏ ଗଝେଡ଼ି ଗାଲ୍ଲୁନାଣି ମେସାନା କାରା ଝେଡ଼ା ଝାଡ଼େ ଇଞ୍ଜାଁ ମୀରୁ ପୁଞ୍ଜେରି; ୩୧ ଏଲେକିହିଁ ଏ ମୀରୁ ଈ ବାରେ ମେସାନା ମାହାପୁରୁତି ରାଜି ଏଜିମାଞ୍ଜାନେ ଇଞ୍ଜାଁ ପୁଞ୍ଜେରି ।”

☆ ୨୧:୨୫ ୨୧:୨୫ ଝେ ବଲୁ ୭:୧୨,୧୩ ☆ ୨୧:୨୭ ୨୧:୨୭ ଝେ ବଲୁ ୧:୭

୩୨ “ନାନୁ ମିଙ୍ଗ ସାତା ଝେସିମାଞ୍ଜାଲ୍, ଇ ବାରେ ଆଆପାତେକା ଇ କାଲ୍ଲାତି ଲକୁ ଏନିଜିକେଏ ମେଣ୍ଟାଅରି । ୩୩ ହାଗୁପାକା ଦାରୁତି ବାରେ ମେଣ୍ଟାନ୍ତେ, ସାମା ନା ବଲୁ ଏଚେଲାଝା ମେଣ୍ଟାତ ।”

କାରିହିଁ ମାନାୟି

(ମାତି ୨୪:୩୭-୪୪; ମାର୍କ ୧୩:୩୨-୩୭)

୩୪ “ଏଦାଆଁତାକି ମୀରୁ ଜାଗ୍ରାତା ଆହାନା ମାଞ୍ଜୁ, ଆଆତିହିଁ ତିନାଣି ଉନାଣି ଅଡେ ବାଡକିନି ଅଣ୍ପୁ ମୀ ହିୟାତା ନେଞ୍ଜିନେ ଅଡେ ଏ ଦିନା ଦେରୁଣିଏ ପାନ୍ଦାଲେହେଁ ମୀ ମୁହେଁ ଝାନ୍ତେ; ୩୫ ଏନିଇତିହିଁ ଏଦି ପାନ୍ଦା ଲେହେଁ ଦାରୁତିତି ବାରେ ଜାଡିତି ଲକୁ ମୁହେଁ ଝାନ୍ତେ । ୩୬ ସାମା ମୀରୁ ଏନିକିଁ ଇ ବାରେ ଝାହିମାନି ତଣ୍ଡଟି ଗେଲ୍ପି ଆହାଲି ଅଡେ ମାଣ୍ଡି ମୀରୁଏଣି ନକିତା ନିଚାଲି ଆଡିଦେରି, ଏଦାଆଁତାକି ବାରେବେଲା କାଡାନା ପ୍ରାଡାନା କିହେମାଞ୍ଜୁ ।”

୩୭ ☆ଜୀସୁ ଏଚିବେଲା ପ୍ରାଡାନା ଇଲୁତା ଜାପୁହି ମାଚେସି, ଇଞ୍ଜା ଲାଆଁୟାଁ ଗାଡାଟି ହଡା ହାଜାନା ଜୀତ ଇନି ହରୁତା ମାଣ୍ଡିତେସି । ୩୮ ଅଡେ ବାରେ ଲକୁ ପ୍ରାଡାନା ଇଲୁତା ଜୀସୁ କାତା ଝେଞ୍ଜାଲି ଲାଡ଼ ଲାଈସିଏ ରୁଣ୍ଡା ଆହିମାଚେରି ।

୨୨

ଜୀସୁଇଁ ପାୟାଲି ପାରୁ ପାରିନାୟି

(ମାତି ୨୪:୧-୫; ମାର୍କ ୧୪:୧,୨; ଜହ ୧୧:୪୫-୫୩)

୧ ପିସପିଆନି ପାରୁ ଦରୁଗାଟି ପୁଲାଏୟୁ ଆଣ୍ଡାଆତି ରୁଟି ତିନି ପାରୁ ତାଗେ ଆହିମାଚେ । ୨ ଇଞ୍ଜା କାଜା ପୁଜେରା ଅଡେ ମୋରାପୁନାରି, ଜୀସୁଇଁ ଏନିକିଁ ପାୟାଲି ଆଡିନେରି, ଏଦାଆଁତାକି ପାରୁ ପାରିମାଚେରି, ସାମା ଏଝାରି ଲକୁଣି ଆଜିମାଚେରି ।

ଜୀହୁଦା ଜୀସୁଇଁ ଆସ୍ପି କିହାଲି ରାଡି ଆନାୟି

(ମାତି ୨୬:୧୨-୨୬; ମାର୍କ ୧୪:୧୦, ୧୧)

୩ ଏଚିବେଲା ବାରଜାଣା ସୀସୁୟାଁ ବିତ୍ରାମାନି ଇସ୍ପାରିୟତ ଦରୁଗାଟି ଜୀହୁଦା ହିୟାତା ସୟତାନ ହଟେ; ୪ ଅଡେ ଜୀହୁଦା ହାଜାନା ଏନିକିଁ

☆ ୨୧:୩୭ ୨୧:୩୭ ଲୁକ ୧୯:୪୭

କାଜା ପୂଜେରାଜୀ ଅଡ଼େ ମାହାପୁରୁ ଇଲୁ କାପୁଗାଟି କାଜାରି କେୟୁତା ଆସ୍ତି କିନେସି, ଏଦାଆଁତାକି ଏଞ୍ଜାରିତଲେ କାତାବାର୍ତ୍ତା ଆଡ଼େସି । ୫ ଏମ୍ବାଟିଏ ଏଞ୍ଜାରି ରାହାଁ ଆହାନା ଏଞ୍ଜାଣାକି ଟାକାୟାଁ ହୀହାଲି ଆଞ୍ଜିତେରି । ୬ ଅଡ଼େ ଜୀହୁଦା ରାଜି ଆହାନା ଲକୁ ହିଲାଆବେଲାତା ଜୀସୁଇଁ ଏଞ୍ଜାରି କେୟୁତା ହେର୍ପାଲି ପାରୁ ପାରୀତେସି ।

ପିସ୍ପିଆନ୍ତି ପାର୍ବୁତି ବଜି ତିୟାରା କିନାୟି

(ମାତି ୨୭:୧୭-୨୫; ମାର୍କ ୧୪:୧୨-୨୧; ଜହ ୧୩:୨୧-୩୦)

୭ ତାୟୁ ଆମିନି ଦିନା ପୁଲାଏୟୁ ଆଣ୍ଡାଆତି ରୁଟି ତିନି ପିସ୍ପିଆନ୍ତି ପାର୍ବୁତାକି ମେଣ୍ଡା ଡାଲୁକାଣି ପୂଜା କିନି ଦିନା ଏତେ; ୮ ଏଚେଟିଏ ଜୀସୁ ପିତର ଅଡ଼େ ଜହନଇଁ ଇ କାତା ଖେସା ପାଣ୍ଡିତେସି, “ମୀରୁ ହାଜାନା ମାଙ୍ଗେତାକି ପିସ୍ପିଆନ୍ତି ପାର୍ବୁତାକି ରାନ୍ଦା ଖାଜାଦୁ ମାର ତିନଖା ।”

୯ ଏମ୍ବାଟିଏ ଏଞ୍ଜାରି ଜୀସୁଇଁ ଖେଚେରି, “ମୀୟୁ ଆୟିୟା ହାଜାନା ରାନ୍ଦା ଖାଜିହାଲାପାରି ଇଞ୍ଜିଁ ନୀନୁ ଅଣ୍ଡିମାଞ୍ଜି ?”

୧୦ ଏଞ୍ଜାସି ଏଞ୍ଜାରାଇଁ ଏଲେଇଚେସି, “ମୀରୁ ଗାଡ଼ା ହଟିସାରେ ଡକାତା ଏୟୁ ଅହିମାନାଣାଇଁ ମେହ୍ଦେରି; ଏଞ୍ଜାଣି ଜେଚ ଜେଚ ହାଜାନା ଏଞ୍ଜାସି ଆମିନି ଇଜ ହଡ଼ନେସି ଇଲୁ ଗାଟାଣାଇଁ ଖେହ୍ଦୁ, ୧୧ ଗୁରୁ ନିଜ ଇଲେଇଞ୍ଜିଁ ଖେସା ପାଣ୍ଡାମାଞ୍ଜାନେସି, ନାନୁ ନା ସୀସୁୟାଁ ତଲେ ପିସ୍ପିଆନ୍ତି ପାର୍ବୁତି ବଜି ଏମିନି ଇଲୁତା ତିଇଁ ଏ ବାକ୍ରା ଆମିନାୟି ତସ୍ତାମୁ ? ୧୨ ଏମ୍ବାଟିଏ ଏଞ୍ଜାସି ନେହ୍ ତିୟାରା ଆହାମାନି ଲାକନି ପାରୁତି ର କାଜା ବାକ୍ରା ତସ୍ତାନେସି; ଏମ୍ବାଆଁ ମାଙ୍ଗେତାକି ରାନ୍ଦା ଖାଜାଦୁ ।”

୧୩ ଏଞ୍ଜାରି ହାଜାନା ଜୀସୁ ଏଞ୍ଜାରାଇଁ ଏନିକିଁ ଖେସାମାଚେସି, ଏଲେକିଁ ମେସାନା ପିସ୍ପିଆନ୍ତି ପାର୍ବୁତି ରାନ୍ଦା ଖାଜିତେରି ।

ପ୍ରବୁତି ବଜି

(ମାତି ୨୭:୨୬-୩୦; ମାର୍କ ୧୪:୨୨-୨୬; ଲକର ୧୧:୨୩-୨୫)

୧୪ ପିସ୍ପିଆନ୍ତି ପାର୍ବୁତି ବେଲା ଆୟାଲିଏ, ଜୀସୁ ଅଡ଼େ ତାନି ପାଣ୍ଡି ଆଡ଼ି ସୀସୁୟାଁ ତଲେ ତିଞ୍ଜାଲି କୁଟିତେରି । ୧୫ ଅଡ଼େ ଏଞ୍ଜାସି ଏଞ୍ଜାରାଇଁ ଏଲେଇଚେସି, “ନାନୁ ଦୁକୁ କସ୍ ପୁଃଆ ନକେଏ ମୀ ତଲେ

ଇ ପିସ୍‌ପିଆନ୍ତି ପାର୍ବୁତି ବଢ଼ି ତିଞ୍ଜାଲି ହାରେକା ଅଣ୍‌ପାମାରେଏ !
 ୧୭ ଏନ୍‌ଇଚିହିଁ ନାନୁ ମିଙ୍ଗେ ୱେସିମାଞ୍ଜାଇଁ, ମାହାପୁରୁ ରାଜିତା ଇ
 କାତା ବାରେ ପୂରା ଆଆପାତେକା ନାନୁ ଅଡ଼େ ଏରେଲାଞ୍ଜା ଏଦାଆଁ
 ତିନଅଁ ।”

୧୭ ଇଞ୍ଜା ଏଞ୍ଜାସି ର ସଲ୍ଲା ଆସାନା ମାହାପୁରୁଇଁ ଜହରା କିହାନା
 ଏଲେଇରେସି, “ମୀରୁ ଇଦାଆଁ ଅହାନା ମୀ ବିତ୍ରା ବାଟିକିଦୁ ।
 ୧୮ ଇଚିହିଁ ନାନୁ ମିଙ୍ଗେ ୱେସିମାଞ୍ଜାଇଁ, ମାହାପୁରୁ ରାଜି ଖାଆ
 ପାତେକା ନାନୁ ନୀଞ୍ଜୁଟିଏ ଅଜୁରି ରାସା ଏରେଲାଞ୍ଜା ଗହଅଁ ।”

୧୯ ଅଡ଼େ ଏଞ୍ଜାସି ରୁଟି ଅହାନା ମାହାପୁରୁଇଁ ଜହରା କିହାଁ ତ୍ରିକହାନା
 ହୀହାଁ ଏଲେଇରେସି, “ମିଙ୍ଗେତାକି ହୀପୁକି ଆହାମାନି ନା ଆଙ୍ଗା ଇଦି;
 ନାଙ୍ଗେ ଅଣ୍‌ପାଲି ଇଦାଆଁ କିଦୁ ।” ୨୦ ଏଲେକିହିଁଏ ତିଚି ତାୟୁ
 ଏଞ୍ଜାସି ଗହନି ସଲ୍ଲା ଆସାନା ଏଲେଇରେସି, “ଇ ସଲ୍ଲାତା ମିଙ୍ଗେତାକି
 ଖାକୁହିମାନି ନା ନେତେରିତି ପୁଃନି ରାଜିମାନା ।”

୨୧ “ସାମା ମେହ୍‌ଦୁ ଆମ୍ବାଆସି ନାଙ୍ଗେ ସାତୁ କେନ୍ଦୁତା
 ହେରପିମାଞ୍ଜାନେସି, ଏଞ୍ଜାସି ନା ତଲେ ବଢ଼ିତା କୁଗାମାନେସି ।
 ୨୨ ଏନ୍‌ଇଚିହିଁ ମାହାପୁରୁ ତୀରି କିହାମାଟି ଲେହେଁ ମାଣ୍‌ସି ମୀରୁଏସି
 ହାନେସି, ସାମା ଏଞ୍ଜାଶାଇଁ ସାତୁ ତାଣା ହେରପିନେସି ଆୟତା ଏଞ୍ଜାସି
 ଉଣେଏ ତଣ୍ଡୁ ବେଟା ଆନେସି ।”

୨୩ ଏମ୍ବାଟିଏ ଏଞ୍ଜାରି ମା ବିତ୍ରାଟି ଆମ୍ବାଆସି ଇଲେତି କାମା କିନେସି
 ଇଞ୍ଜାଁ ତାମ୍ବୁ ତାମ୍ବୁସୁ ଜଲ୍‌କି ଆଡ଼େରି ।

ଆମ୍ବାଆସି କାଜାସି ଇଞ୍ଜାଁ ବାଦିବାଦା

୨୪ ☆ଇଞ୍ଜା ଏଞ୍ଜାରି ବିତ୍ରାଟି ଆମ୍ବାଆସି କାଜାସି ଆନେସି ଇଞ୍ଜାଁ
 ସୀମୁୟାଁ ବିତ୍ରା ଆସ୍‌ପି ଆଡ଼େରି । ୨୫ ଏମ୍ବାଟିଏ ଜୀମୁ ଏଞ୍ଜାରାଇଁ
 ଏଲେଇରେସି, “ଏଟ୍‌କା କୁଡ଼ାତି ରାଜାୟାଁ ଏଞ୍ଜାରି ମୁହେଁ ସାଲ୍‌ଝି
 କିନେରି, ଅଡ଼େ ଆମିନି ଗାଟାରି ଏଞ୍ଜାରାଇଁ ସାଲ୍‌ଝି କିନେରି, ଏଞ୍ଜାରି
 ଲକୁତାଣା ନେହାଁରି ଇଞ୍ଜାଁ ୱେଙ୍ଗାଲି ଅଣ୍‌ପିନେରି । ୨୬ ☆ସାମା ମୀ
 ବିତ୍ରା ଏଲେଆଆଦୁ ଇଚିହିଁ ମୀ ବିତ୍ରା ଆମ୍ବାଆସି କାଜାସି ଏଞ୍ଜାସି

☆ ୨୨:୨୪ ୨୨:୨୪ ମାତି ୧୮:୧; ମାର୍କ ୯:୩୪; ଲୁକ ୯:୪୭ ☆ ୨୨:୨୬ ୨୨:୨୬ ମାତି
 ୨୩:୧୧; ମାର୍କ ୯:୩୫ ☆ ୨୨:୨୭ ୨୨:୨୭ ମାତି ୨୦:୨୫-୨୭; ମାର୍କ ୧୦:୪୨-୪୪

ଓଣା ଆଠେସି, ଇଞ୍ଜା ଆମ୍ବାଆସି ସାଲୁଓ କିନାସି ଏଞ୍ଜାସି ସେବା କିନାସି ଆଠେସି । ୨୭ ✨ଆମ୍ବାଆସି କାଜାସି ? ତିଞ୍ଜାଲି କୁଗିନାସି କାଜାସି କି ସେବା କିନାସି କାଜାସି ? ତିଞ୍ଜାଲି କୁଗିନାସି କାଜାସି ଆଏକି ? ସାମା ନାନୁ ମୀ ବିତ୍ତା ସେବା କିନାତେଏଁଲେହେଁ ଆହାମାଇଁ ।”

୨୮ “ସାମା ମୀରୁ ନା ବାରେ କସ୍ତା ନା ତଲେ ମାଞ୍ଜାମାଞ୍ଜେରି; ୨୯ ଇଞ୍ଜା ନା ଆବା ଏନିକିଁ ନାଞ୍ଜେ ସାଲୁଓ କିହାଲି ପାଣା ହୀହାମାଞ୍ଜାନେସି, ନାନୁ ଜିକେଏ ଏଲେକିହଁ ଏ ମିଞ୍ଜେ ହିୟଇଁ, ୩୦ ✨ଏନିକିଁ ମୀରୁ ନା ରାଜିତା ନା ତଲେ କୁଗାନା ତିଞ୍ଜେରି, ଇଞ୍ଜା ସିଂଗାସାଣିତା କୁଗାନା ଇସ୍ତାୟେଲତି ବାର କୁଡ଼ାତି ସାଲୁଓ କିଦେରି ।”

ପିତର ଜୀସୁଇଁ ପୁଞ୍ଜାହିଲଅଁ ଇଞ୍ଜିଁ ଖେହ୍ନି କାତା

(ମାତି ୨୭:୩୧-୩୫; ମାର୍କ ୧୪:୨୭-୩୧; ଜହ ୧୩:୩୭-୩୮)

୩୧ “ସିମନ, ସିମନ ମେହ୍ନୁ ସୟତାନ ଗହଁ ହାଣିକିନିଲେହେଁ ସୟତାନ ମାହାପୁରୁ ତାଣାତି ହେଲ ବେଟାଆହାମାନେ; ୩୨ ସାମା ନୀ ନାନୁ ଏନିକିଁ ମେଣ୍ଡେଏ, ଇଦାଆଁତାକି ନାନୁ ନୀ ତାକି ପ୍ରାଡାନା କିତେଏଁ; ଇଞ୍ଜା ନୀନୁ ନେହଁ ଆହାନା ଖେଣ୍ଡାସାରେ ନୀ ତାୟିୟାଣି ତୀରପୁକିମୁ ।”

୩୩ ସାମା ପିତର ଏଲେଇଚେସି, “ଏ ପୁରୁ ନାନୁ ନୀ ତଲେ କାୟିଦିତା ହାଜାଲି ଅଡ଼େ ହାହାଲି ଜିକେଏ ଆଣ୍ଡାଇଁ ।”

୩୪ ସାମା ଜୀସୁ ଏଲେଇଚେସି, “ଏ ପିତର ନାନୁ ଏଲେଇଞ୍ଜିମାଞ୍ଜାଇଁ, ନୀଞ୍ଜୁ କୟୁ କେଣ୍ଡା ନକେଏ ନୀନୁ ନାଞ୍ଜେ ତାନିପାଲି ପୁଞ୍ଜାହିଲଅଁ ଇଞ୍ଜିଁ ଖେହ୍ନି ।”

ଚାକାୟଁ ମଣା ଅଡ଼େ କାଣ୍ଡା

୩୫ ✨ଜୀସୁ ଏଞ୍ଜାରାଇଁ ଏଲେଇଚେସି, “ଏଚିଚେଲା ନାନୁ ମିଞ୍ଜେ ତାବୁୟଁ ମଣା ଇଞ୍ଜା ସେପୁୟଁ ଅଆନା ହାଜୁ ଇଞ୍ଜିଁ ପାଣ୍ଡା ମାଞ୍ଜାତେଏଁ ଏ ବେଲା ମିଞ୍ଜେ ଏନାୟି ଓଣା ଆୟାତେକି ?” ଏଞ୍ଜାରି ଏଲେଇଚେରି, “ଏନାୟି ଆଏ ।”

☆ ୨୨:୨୭ ୨୨:୨୭ ଜହ ୧୩:୧୨-୧୫ ☆ ୨୨:୩୦ ୨୨:୩୦ ମାତି ୧୯:୨୮ ☆ ୨୨:୩୫ ୨୨:୩୫ ମାତି ୧୦:୯,୧୦; ମାର୍କ ୭:୮,୯; ଲୁକ ୯:୩; ୧୦:୪

୩୬ ଏମ୍ବାଟିଏ ଜୀସୁ ଏଲେଇଚେସି, “ସାମା ନୀଏଁ ଆମ୍ବାଆରାକି ତାରୁୟାଁ ମାନୁ ଏଝାସି ଏଝାଆଁ ଅପେସି, ଏଲେକିହିଁଏ ମଣା ଜିକେଏ ଅପେସି, ଅଡେ ଆମ୍ବାଆରାକି କାଣ୍ଡା ହିଲେଏ ଏଝାସି ତାନି ହିମ୍ବୁରି ପାରତାନା କତାପେସି । ୩୭ ଇଚିହିଁ ନାନୁ ମିଙ୍ଗ ଝେସିମାଞ୍ଜାଇ, ମାହାପୁରୁ ପତିତା ରାସ୍‌କି ଆହାମାନାୟି ସାତେଏ ନାଙ୍ଗେତାକି ଆନାୟି ମାନେ, ଏଝାସି ପାପୁ ଗାଟାରି ତଲେ ଲେକା ଆନେସି, ଏଲେଆହିଁଏ ଏ ବାରେ ନାଙ୍ଗେ ଏଜାତାଟିମାନେ ।”

୩୮ ଏମ୍ବାଟିଏ ଏଝାରି ଏଲେଇଚେରି, “ଏ ପ୍ରବୁ ଇମ୍ବାଆଁ ରୀ କାଣ୍ଡା ମାନୁ ।” ଇଞ୍ଜା ଏଝାସି ଏଲେଇଚେସି, “ହାଅ, ଏଝିଏ ସାରି ଆନୁ ଇଚେସି ।”

ଜୀସୁ ଜୀତ ହରୁତା ପ୍ରାତାନା କିନାୟି (ମାତି ୨୭:୩୭-୪୭; ମାର୍କ ୧୪:୩୨-୪୨)

୩୯ ଏଝାସି ଗାଡାଟି ହଟା ହାଜାନା ତାନୁ ହାଲ୍‌ଝିତିଲେହେଁ ଜୀତ ହରୁତା ହାଚେସି, ଅଡେ ସୀସୁୟାଁ ଜିକେଏ ଏଝାଣି ଜେଚ ହାଚେରି । ୪୦ ଏମ୍ବାଆଁ ଏଜାନା ଏଝାସି ତାନି ସୀସୁୟାଁଠି ଝେସ୍ତେସି, “ମୀରୁ ଏନିକିଁ ପାନ୍ଦାତା ହେରୁଝି ଆଅଡେରି, ଇଦାଆଁତାକି ପ୍ରାତାନା କିଦୁ ।”

୪୧ ଅଡେ ଏଝାସି ଏଝାରି ତାଣାଟି ହିରେ ହେକ ହାଜାନା ମେଣ୍ଡାକୁତାନା ପ୍ରାତାନା କିହିଁ ଝେସ୍ତେସି, ୪୨ “ଏ ଆବା ନୀନୁ ମନ କିତିହିଁ ଇ ଦୁକୁ କସ୍ତ ନା ତାଣାଟି ଗୁଚି କିମ୍ବୁ; ସାମା ନା ମନ କଡେ ଆଏ ନୀ କାତେଏ ଆପେ ।” ୪୩ ଅଡେ ଲାକପୁରୁତି ର ଦୁତୁ ତଞ୍ଜାଆହାନା ଏଝାଣାକି ବାଡ଼ୁୟି ହୀତେ । ୪୪ ଏଚେଟିଏ ଏଝାସି ହାରେକା ଦୁକୁ ତଲେ ଅଡେ ଗାଡିକିହିଁ ପ୍ରାତାନା କିତେସି, ଇଞ୍ଜା ଏଝାଣି ଗାମା ନେତେରିଲେହେଁ ବୁମିତା ତରଗିମାଚେ ।

୪୫ ଅଡେ ଏଝାସି ପ୍ରାତାନାଟି ନିଙ୍ଗା ଝାହାନା ତାନି ସୀସୁୟାଁଣି ଦୁକୁ ତଲେ ଇଦା କିତାଣି ମେସ୍ତେସି; ୪୬ ଇଞ୍ଜା ଏଝାସି ଏଝାରାଠି ଏଲେଇଚେସି, “ଏନାଆଁତାକି ତୁରାମାଞ୍ଜେରି ? ପାନ୍ଦାତା ଏନିକିଁ ହେରୁଝିଅଡେରି ଏଦାଆଁତାକି ନିଙ୍ଗାନା ପ୍ରାତାନା କିଦୁ ।”

ଜୀସୁଙ୍କ ଦହନି କାତା

(ମାତି ୨୭:୪୭-୫୭; ମାର୍କ ୧୪:୪୩-୫୦; ଜହ ୧୮:୩-୧୧)

୪୭ ଏଞ୍ଜି ସି ଜଲିମାଚାଟି ର ମାନ୍ଦା ଲକୁ ଏମ୍ପାଆଁ ଏଗା ଖାଡେରି, ଅଡେ ବାଠଜାଣା ସୀସୁୟାଁ ବିତ୍ରାଟି ଜୀହୁଦା ଦରୁଗାଚାସି ଏଞ୍ଜାରି ନକିତା ଖାହାନା ଜୀସୁଙ୍କ ନଶ୍ୱାଲି ତାନି ତାଣା ହାଚେସି । ୪୮ ସାମା ଜୀସୁ ଏଞ୍ଜାଣାଙ୍କ ଏଲେଇଚେସି, “ଏ ଜୀହୁଦା ନଶ୍ୱାନା ମାଣ୍ଡସି ମୀରଏଶାଙ୍କ ସାତୁୟାଁ କେୟୁତା ହେରପିମାଞ୍ଜି ?”

୪୯ ଏମ୍ପାଟିଏ ଜୀସୁତଲେ ମାଚାରି ଇଦି ଏନାୟି ଇଞ୍ଜି ପୁଞ୍ଜାନା ଜୀସୁଙ୍କ ଏଲେଇଚେରି, “ଏ ପ୍ରବୁ ମାମ୍ବୁ ଇଞ୍ଜାଚାଙ୍କ କାଣ୍ଡାତଲେ ପାୟିନମି କି ?” ୫୦ ଅଡେ ଏଞ୍ଜାରି ରଅସି କାଜା ପୂଜେରା ହଲେଏଶାଙ୍କ ଇରହାନା ତାନି ଚିଠିନି କିୟାଁ ଦୁରାତୁସ୍ତେସି ।

୫୧ ସାମା ଜୀସୁ ଏଲେଇଚେସି, “ଇଚେକେଏ ଆଡେ” ଇଞ୍ଜାନା ଏଞ୍ଜାଣି କିୟାଁ ତୁଗାନା ନେହଁ କିଚେସି ।

୫୨ ଅଡେ ଜୀସୁ ତାଙ୍ଗେ ଆସାଲି ଖାହାମାଟି କାଜା ପୂଜେରା, ମାହାପୁରୁ ଇଲୁଡି କାପୁଗାଚାରି ଅଡେ ଲକୁଡି କାଜାଚାଙ୍କ ଏଲେଇଚେସି, “ମୀରୁ ସରୁଙ୍କ ଆହନିଲେହେଁ ଇଟା କାଣ୍ଡା ଅଡେ ଚେଙ୍ଗାୟାଁ ଆସାନା ଖାହାମାଞ୍ଜେରି ? ୫୩ ନାନୁ କାଲେଏ ମୀ ତଲେ ମାହାପୁରୁ ଇଲୁଡା ମାଚେଏଁ, ଏଚିବେଲା ମୀରୁ ନାଙ୍ଗେ ଆସ୍ତାଆଚେରି; ସାମା ଇ ଦିନା ମୀଦିଏ ଅଡେ ଆନ୍ଦେରିତି ବାଡୁୟୁ ରାଜିକିନି ଦିନା ।”

ପିତର ଜୀସୁଙ୍କ ପୁଞ୍ଜାହିଲଅଁ ଇଞ୍ଜି ଇନାୟି

(ମାତି ୨୭:୫୭, ୫୮, ୬୯-୭୫; ମାର୍କ ୧୪:୫୩, ୫୪, ୬୭-୭୨; ଜହ ୧୮:୧୨-୧୮, ୨୫-୨୭)

୫୪ ତାୟୁ ଏଞ୍ଜାରି ଏଞ୍ଜାଣାଙ୍କ ଅହାନା କାଜା ପୂଜେରା ଇଜ ତାଚେରି; ସାମା ପିତର ହେକ ମାଞ୍ଜାନା ଜେଚ ଜେଚ ହାଚେସି । ୫୫ ଅଡେ ଏଞ୍ଜାରି ଆଂଗେଣିତା ହିରୁ ତାସାନା ହିରୁ ସାରିସୁରୁ କୁରିଚେରି, ଇଞ୍ଜା ପିତର ଜିକେଏ ଏଞ୍ଜାରିତଲେ କୁରିଚେସି । ୫୬ ଏମ୍ପାଟିଏ ର ହଲେଣି ପିତର ହିରୁ ମାଣ୍ଡାତା କୁଗାମାନାଣି ମେସାନା, ଏଞ୍ଜାଣାଙ୍କ ସିନିକିହାନା ଏଲେଇଚେ, “ଇଞ୍ଜାସି ଜିକେଏ ଏଞ୍ଜାଣିତଲେ ମାଚାସି ।”

☆ ୨୨:୫୩ ୨୨:୫୩ ଲୁକ ୧୯:୪୭; ୨୧:୩୭

୫୭ ସାମା ପିତର ଏଲେଇରେସି, “ଆଏକା ନାନୁ କଡ଼େ ଏଞ୍ଜାଣାଇଁ ପୁଣ୍ୟୁ ପୁଞ୍ଜାହିଲଅଁ ।”

୫୮ ଅଡ଼େ ଗାଡ଼େକା ହାଜାଲିଏ ଅଡ଼େ ରଅସି ଏଲେଇରେସି, “ନାନୁ ଜିକେଏ ଏଞ୍ଜାରି ବିତ୍ରାଟି ରଅତି ।” ସାମା ପିତର ଏଲେଇରେସି, “ଆଏ ତାୟି ନାନୁ କଡ଼େ ଆଏ ।”

୫୯ ଅଡ଼େ ର ଗଂଟା ହାଜାଲିଏ ଅର ରଅସି ଏଲେଇରେସି, “ସାତେଏ ଇଞ୍ଜାସି ଏଞ୍ଜାରିତଲେ ମାଚାସି, ଏନିଇଚିହିଁ ଇଞ୍ଜାସି ଗାଲିଲି ଦେସାତାସି ।”

୬୦ ସାମା ପିତର ଏଲେଇରେସି, “ନାନୁ ଏନାଆଁ ଇଞ୍ଜିମାଞ୍ଜି ତାୟି ନାନୁ ଏଦାଆଁ ପୁଞ୍ଜାହିଲଅଁ ।”

ଏ ଦେବୁଣିଏ କୟୁ କେଶ୍‌ତେ; ୬୧ ଏମ୍ବାଟିଏ ପ୍ରୁ ମୁମ୍ବୁ ଚୁପରହାନା ପିତରଇଁ ସିନିକିତେସି; ଏମ୍ବାଟିଏ ନୀଞ୍ଜୁ କୟୁ କେଶ୍‌ଆ ନଟେକଏ ନାନୁ ପୁଞ୍ଜାହିଲଅଁ ଇଞ୍ଜାଦି, ପ୍ରୁ ଖେସ୍ତି ଇ କାତା ତାନି ମନତା ଖାଡ଼େ, ୬୨ ଇଞ୍ଜା ଏଞ୍ଜାସି ପାଙ୍ଗାତା ହାଜାନା ଗାଡ଼ି ଦୁକୁ ଆହାନା ଡ଼ୀତେସି ।

ଜୀସୁଇଁ ନିନ୍ଦାକିହିଁ କାକ୍‌ନାୟି ଅଡ଼େ ଖେନାୟି

(ମାତି ୨୭:୨୭,୨୮; ମାର୍କ ୧୪:୨୫)

୬୩ ଅଡ଼େ ଆମିନିଗାଟାରି ଜୀସୁଇଁ ଆସା ଇଟାମାଚେରି, ଏଞ୍ଜାରି ଏଞ୍ଜାଣାଇଁ ଖେଚି ଖେଚିହିଁ କାକ୍‌ହେରି, ୬୪ ଅଡ଼େ ଏଞ୍ଜାଣି ମୁମ୍ବୁତ୍ତା ହିମ୍ବୁରି ପିକ୍‌ହାନା ଖେଚେରି, “ନାନୁସାଁ ମାହାପୁରୁ ଅଣ୍‌ପୁତି ବଲୁ ଖେହ୍‌ନାତି ! ଖେସ୍ତାମୁ ନିଙ୍ଗେ ଆମ୍ବାଆସି ଖେତାତେସି ?” ୬୫ ଅଡ଼େ ଏଞ୍ଜାରି ହାରେକା କାତା ଏଞ୍ଜାଣି କପାଟି ଜଲାନା ଏଞ୍ଜାଣି ନିନ୍ଦାକିତେରି ।

ବେରଣିମାଣ୍ଡା ନକିତା ଜୀସୁ

(ମାତି ୨୭:୫୯-୬୬; ମାର୍କ ୧୪:୫୫-୬୪; ଜହ ୧୮:୧୯-୨୪)

୬୬ ଲାଇଁ ଖେୟାଲିଏ ଲକୁତି କାଜାରି, କାଜା ପୂଜେରାଙ୍ଗା ଅଡ଼େ ମୋରାପୁନାରି ରୁଣ୍ଡା ଆହାନା ତାନି ବେରଣିମାଣ୍ଡାତା ଜୀସୁଇଁ ଅହାନା ଖେଚେରି, ୬୭ “ନାନୁ କ୍ରୀସ୍ତତିକି ମାଙ୍ଗେ ଖେସ୍ତାମୁ ।” ସାମା ଏଞ୍ଜାସି ଏଞ୍ଜାରାଇଁ ଏଲେଇରେସି, “ନାନୁ ମିଙ୍ଗେ ଖେସ୍ତାସାରେ ମୀରୁ ନାମଅତେରି; ୬୮ ଅଡ଼େ ନାନୁ ଖେଞ୍ଜାତିହିଁ ମୀରୁ ଖେସାଲି

ଆଡ଼ଅଡ଼େରି । ୬୯ ସାମା ନାଏଁଟିଏ ମାଣ୍ଡି ମୀରୁଏସି ବାଡ଼ୁଗାଟି ମାହାପୁରୁ ଚିଝନି ଟଟତା କୁଗିନେସି ।”

୭୦ ଏମ୍ବାଟିଏ ବାରେଜାଣା ଝେରେରି, “ଆଡ଼ିହିଁ ନୀନୁ ମାହାପୁରୁ ମୀରୁଏଶାତିକି ?”

ଏଝାସି ଏଝାରାଇଁ ଏଲେଇରେସି, “ମୀରୁତ ଝେସିମାଞ୍ଜାଦେରି, ନାନୁ ଏଝାଡେସିଁ ।”

୭୧ ଏରେଟିଏ ଏଝାରି ଏଲେଇରେରି, “ମାଙ୍ଗେ ଅଡ଼େ ଏନି ସାକି ଲଡ଼ା, ମୀରୁତ ଇ କାତା ତାନି ଗୁଡ଼ିଟିଏ ଝେରାୟି ।”

୨୩

ପିଲାତ ନକିତା ଜୀସୁ

(ମାତି ୨୭:୧, ୨; ୨୭:୧୧-୧୪; ମାର୍କ ୧୫:୧-୫; ଜହ ୧୮:୨୮-୩୮)

୧ ଏରେଟିଏ ଡାୟୁ ବାରେଜାଣା ନିଙ୍ଗାନା ଜୀସୁଇଁ ପିଲାତ ନକିତା ଅଡ଼େରି । ୨ ଇଞ୍ଜା ଏଝାରି ଜୀସୁ କପାଟି ଦହ ଦସାନା ଏଲେଇରେରି, “ମାନ୍ସୁ ପୁରମି ଇଝାସି ମା କୁଡ଼ାତି ଲକୁଣି ପଲ୍ଲଆ ଜାପ୍‌ହିମାନେସି, ଇଡ଼ିହିଁ ଇଝାସି କାୟିସରକି ସିସୁ ହୁଆଡୁ, ତାନୁ ନାନୁଏ କ୍ରୀସୁ ଅଡ଼େ ରାଜାଡେସିଁ ଇଞ୍ଜାଁ ଝେସା କଡ଼ିମାନେସି ।”

୩ ଏରେଟିଏ ପିଲାତ ଜୀସୁଇଁ ଝେରେସି, “ନୀନୁ କି ଜୀହୁଦି ଲକୁଡ଼ି ରାଜାଡ଼ି ?”

ଜୀସୁ ଝେସେସି, “ନୀନୁତ ଝେସିମାଞ୍ଜି ।”

୪ ଏରେଟିଏ ପିଲାତ କାଜା ପୂଜେରା ଅଡ଼େ ବାରେ ଲକୁଣି ଏଲେଇରେସି, “ନାନୁ ଇଝାଣି ତାଣା ଏନି ଦହ ପ୍ଲାଝଆଡେସିଁ ।”

୫ ସାମା ଏଝାରି ଗାଡ଼ିକିହିଁ ଜଲିଡେରି, “ଇଝାସି ଗାଲିଲିଟିଏ ମାଡ଼ହାନା ଇମ୍ବା ପାଡେକା ବାରେ ଜୀହୁଦା ଦେସାତି ଲକୁଣି ଜାପ୍‌ହାନା ଲାଗେଏ କିହିମାନେସି ।”

ହେରଦ ନକିତା ଜୀସୁ

୬ ସାମା ପିଲାତ ଇ କାତା ଝେଞ୍ଜାନା ଝେରେସି, “ଇଝାସି ଗାଲିଲିତାସିକି ?” ୭ ଇଞ୍ଜା ଏଝାସି ହେରଦ ରାଜା ରାଜି ତାସି ଇଞ୍ଜାଁ ପୁଞ୍ଜାନା ଏଝାଣାଇଁ ହେରଦ ତାଣା ପାଣ୍ଡିଡେସି, ଏନିଇଡ଼ିହିଁ ଏଡ଼ିବେଲା ହେରଦ ଜିରୁସାଲମତା ମାଡେସି । ୮ ହେରଦ ଜୀସୁଇଁ

ମେସାନା ହାରେକା ରାହାଁ ଆଡେସି, ଏନିଇଚିହିଁ ଏଞ୍ଜାସି ଏଞ୍ଜାଣି କାତା ଝେଞ୍ଜା ମାତାକି ଏଞ୍ଜାଣାଇଁ ହାରେକା ଦିନାଟିଏ ମେସାଲି ମନ କିହିମାରେସି, ଇଞ୍ଜା ଏଞ୍ଜାଣି ତାଣାଟି ଏନି କାବାଆନି କାମାକିନାଣି ମେହୁଇଁ ଇଞ୍ଜାଁ ଆସା କିହିମାରେସି ।^୯ ହେରଦ ଜୀସୁଇଁ ଏନି ଏନି କାତାୟାଁ ଝେରେସି, ସାମା ଜୀସୁ ଏଞ୍ଜାଣାଇଁ ଏନି କାତାଞ୍ଜା ଝେଶ୍ଵେ ଝେହୁଆଡେସି ।^{୧୦} ସାମା କାଜା ପୂଜେରାଜା ଅଡେ ମେରାପୁନାରି ନିରାନା ଏଞ୍ଜାଣି କପାଟି ଆଜିହପେତି କାତାୟାଁ ଜଲିମାରେରି ।^{୧୧} ଏରେଟିଏ ହେରଦ ତାନି କସକା ତଲେ ଏଞ୍ଜାଣାଇଁ କାକହି କାକହିହିଁ ନିନ୍ଦାକିତେରି ଏରେଟିଏ ର ପାରୁଁ ହିମ୍ବୁରି ଏଞ୍ଜାଣାଇଁ ହୁଟି କିହାନା ପିଲାତ ତାଣା ଝେଶ୍ଵେ ପାଣ୍ଡିତେରି ।^{୧୨} ଏ ଦିନାଟିଏ ପିଲାତ ଅଡେ ହେରଦ ତଣେ ଆଡେରି; ଏଞ୍ଜାରି ନଡେଏ ସାତୁୟାଁଲେହେଁ ମେସପି ଆଡିତେରି ।

ଜୀସୁକି ହାନି ଡଣ୍ଡ

(ମାତି ୨୭:୧୫-୨୬; ମାର୍କ ୧୫:୬-୧୫; ଜହ ୧୮:୩୯; ୧୯:୧୬)

^{୧୩} ଏମ୍ବାଟିଏ ପିଲାତ କାଜା ପୂଜେରା ଜୀହୁଦି ଲକ୍ଷୁତି କାଜାରି ଅଡେ ବାରେ ଲକ୍ଷୁଇଁ ହାଟି କିହାନା ଏଞ୍ଜାଣାଇଁ ଏଲେଇରେସି, ^{୧୪} “ଇଞ୍ଜାସି ଲକ୍ଷୁଣି ପଲ୍ଲଆ ଜାପୁହିମାନେସି ଇଞ୍ଜାଁ ମୀରୁ ନା ତାଣା ତାଡେରି; ସାମା ନାନୁ ଏଞ୍ଜାଣାଇଁ ମୀ ନକିତା ତାୟିପାରି କିତେଏଁ ଇଞ୍ଜାଁ ମୀରୁ ଝେସାମାଞ୍ଜାତି ଏନି ଦହ ଏଞ୍ଜାଣି ତାଣା ପୁଞ୍ଜାଆଡେଏଁ, ଇଞ୍ଜାଁ ହେରଦ ଜିକେଏ ପୁଞ୍ଜାଆଡେସି, ^{୧୫} ଏନିଇଚିହିଁ ହେରଦ ଅଡେ ଝେଶ୍ଵେ ନା ତାଣା ପାଣ୍ଡାଡେସି; ଇଞ୍ଜାଁ ମେହୁଦୁ ଇଞ୍ଜାସି ହାନି ଡଣ୍ଡ ପାଣ୍ଡି ଏନି ଦହଞ୍ଜା କିହାହିଲଅସି; ^{୧୬} ଏଦାଆତାକି ନାନୁ ଇଞ୍ଜାଣାଇଁ ସାଟୁଣି ତଲେ ଝେଚାନା ପିହୁଇଁ ।” ^{୧୭} ପିସପିଆନି ପାରୁଁ ବେଲା କାୟିଦି ମାନାରି ବିତ୍ତାଟି ରଅଣାଇଁ ଏଞ୍ଜାଣାକି ପିସାଲି ମେରା ମାତେ ।

^{୧୮} ସାମା ଏଞ୍ଜାରି ରହେଏ ଗାଡିକିହିଁ ଏଲେଇରେରି, “ଇଞ୍ଜାଣାଇଁ ପାୟାଦୁ ବାରବାଇଁ ମାଜେ ପିସାହିୟାମୁ !” ^{୧୯} ଇ ବାରବାଇଁ ଗାଡାଡି ଗଡହା ତାକି ଇଞ୍ଜାଁ ରଅଣାଇଁ ପାୟାମାତାକି କାୟିଦି ଇଟାମାରେରି ।

^{୨୦} ସାମା ପିଲାତ ଜୀସୁଇଁ ପିସାଲି ଅଣପାନା ଲକ୍ଷୁ ମାନ୍ଦାତି ଅଡେ ପୁଣ୍ଡି କିହାଲି ଝେସେସି । ^{୨୧} ସାମା ଏଞ୍ଜାରି କାଜା ହାଡାତଲେ

ଏଲେଇରେରି, “ଏଝାଣାଈଁ ପାସି ମୁଣ୍ଡାତା ଏକଦୁ ପାସି ମୁଣ୍ଡାତା ଏକଦୁ ଇଞ୍ଜିଁ ଇରେରି ।”

୨୨ ଇଞ୍ଜିଁ ଏଝାସି ଅଡେ ତାନି ପାଲି ଝେସ୍ତେସି, “ଏନାଆଁତାକି, ଏଝାସି ଏନି ଦହ କିହାମାନେସି ? ନାନୁ ଏଝାଣି ତାଣା ଏନି ହାନିହରେତି ଦହ ପୁଃଆତେଏଁ; ଏନାଆଁତାକି ନାନୁ ଏଝାଣାଈଁ ସାସ୍ତି ହୀହାନା ପିହଇଁ ।”

୨୩ ସାମା ଏଝାରି କାଜା ଗିୟାଁତଲେ ଏଝାଣାଈଁ ପାସି ମୁଣ୍ଡାତା ଏକହାଲି ଝେସ୍ତେରି, ତାୟୁ ଏଝାରି ଝେସ୍ତାୟିଏ ଆଡେ । ୨୪ ଇଞ୍ଜିଁ ଏଝାରି ଝେସ୍ତିଲେହେଁଏ କିୟାଲି ପିଲାତ ହୁକୁମି ହୀତେସି; ୨୫ ସାମା ଆନିନିଗାଟାସି ଗଡ଼ହା ଅଡେ ଲକୁଣି ପାୟାଲିଏ କାୟିଦିତା ଇଟାମାଟାଣାଈଁ ରୀସା ମାରେରି ପିସ୍ତେସି, ଅଡେ ଜୀସୁଈଁ ଏଝାସି ଏଝାରି ଅଶ୍ପିତି ଲେହେଁ କିୟାଲି ଏଝାରିତାଣା ହେରପିତେସି ।

ଜୀସୁଈଁ ପାସି ଏକନାୟି

(ମାତି ୨୭:୩୨-୪୪; ମାର୍କ ୧୫:୨୧-୩୨; ଜହ ୧୯:୧୭-୨୭)

୨୬ ଏଝାରି ଜୀସୁଈଁ ଅହିମାଟାଟି ସିମନ ଦରୁଗାଟି କୁରିଣି ଦେସାତି ର ନାୟୁଁଟି ଝାହିମାରେସି, ଏଝାରି ଏଝାଣାଈଁ ପାସିମୁଣ୍ଡା ଡେକି କିହାନା ଜୀସୁ ଜେଚ ଜେଚ ଅଡେରି ।

୨୭ ମାୟା ଲକୁ ଜୀସୁ ଜେଚ ହାଜିମାରେରି ଅଡେ ତାନି ତାକି ବକତା ଝେଟା କଡିହଁ ଡୀହି ଡୀହି ଏତରଜାଣା ଇୟାସିକା ଜିକେଏ ଏଝାଣି ଜେଚ ହାଜିମାରୁ । ୨୮ ସାମା ଜୀସୁ ଏଝାସିକାଝାକି ସିନିକିହାନା ଏଲେଇରେସି, “ଆଲ, ଜିରୁସାଲମତି ମାୟାକାତେରି ନା ତାକି ଡୀଆଦୁ ସାମା ମୀ ତାକି ଅଡେ ମୀ କକାରି ପଡ଼ାଁ ତାକି ଡୀଦୁ; ୨୯ ହେଶୁ ଇଲେତି ଦିନା ଝାହିମାନେ, ଆମ୍ବାଆୟି ବାଝେଣିସିକା, ଆମ୍ବାଆୟି ଏରେଲା ପୁରାମାସା ଆହାହିଲାତ ଅଡେ ପାଲୁ ଉଡ଼ହା ହିଲାତ ଲକୁ ଏଝାସିକାଣି ମିଝେଏ ନେହେଁ ଇଞ୍ଜାନେରି । ୩୦ ☆ଏରିବେଲା ଲକୁ ହରକାଣି ଏଲେଇନେରି ମା ଲାକ ତରଗାଦୁ ଅଡେ ଉଣା ହରକାଣି ଏଲେଇନେରି ମାଝେ ପୁକିହାନା ଡକୁହାଦୁ । ୩୧ ଏନିଇତିହଁ ଲକୁ

☆ ୨୩:୩୦ ୨୩:୩୦ ଝେ ବଲୁ ୭:୧୭

ହିଲଲି ମାରନୁତି ଏଲେକତିହିଁ, ଏଦି ଖାୟିସାରେ ଏଦାଆଁ କିହାଁ ଆଗାଡ଼ା କିଅରିକି ?”

୩୨ ଦହଗାଟାରି ରିଆରି ଜିକେଏ ପାସି ଏକହାଲି ଜୀସୁତଲେ ଅଢ଼ିଆଟେରି । ୩୩ ଏମ୍ବାଟିଏ ଏଞ୍ଜାରି ତାୟଁଁ ରୁପାଁ ଇନି ଟାୟୁତା ଏଜାନା ଏମ୍ବାଆଁ ଜୀସୁଇଁ ପାସି ମୁଣ୍ଡାତା ଏକହାନା ଏ ରା ଦହଗାଟାରି ବିତ୍ରାଟି ରଅଣାଇଁ ଏଞ୍ଜାଣି ଟିଝନିଞ୍ଜାକି ଅଡ଼େ ରଅଣାଇଁ ଏଞ୍ଜାଣି ଟେବ୍ରିଞ୍ଜାକି ପାସି ଏକହେରି । ୩୪ ଏତିବେଲା ଜୀସୁ ଏଲେଇଚେସି, “ଏ ଆଦା ଏଞ୍ଜାରି ଦହ ଆହଆନି, ଇଚିହିଁ ଏଞ୍ଜାରି ଏଦାଆଁ କିହିମାନେରି ଏଦାଆଁ ପୁଞ୍ଜାହିଲଅରି ।”

ଅଡ଼େ ଏଞ୍ଜାରି ଏଞ୍ଜାଣି ହିମ୍ବୁରି ବାଟିକିହାଲି ପାଦି କିତେରି । ୩୫ ଇଞ୍ଜାଁ ଲକୁ ବାରେ ନିଚାନା ସିନିକିହିମାଚେରି, ଏଞ୍ଜାରି ବିତ୍ରାଟି କାଜାରି ଜିକେଏ ନିନ୍ଦାକିହିଁ ଏଲେଇଚେରି, “ଏଞ୍ଜାସି ଏଟକା ଲକୁଣି ଗେଲ୍ପିଚେସି; ଏଞ୍ଜାସି ମାହାପୁରୁ ଆଟିତି କ୍ରୀସୁ ଇଚିହିଁ ତାନୁଏ ତାଙ୍ଗେ ଗେଲ୍ପିକିହା କତାପେସି ।”

୩୬ କସକା ଜିକେଏ ଏଞ୍ଜାଣି ତାଗେ ହାଜାନା ପୁଲାଏୟୁ ଗସାଲି ହାହାଁ ଏଞ୍ଜାଣାଇଁ କାକ୍‌ହିହିଁ ଏଲେଇଚେରି, ୩୭ “ନୀନୁ ଜୀହୁଦି ଲକୁତି ରାଜାତି ଇଚିହିଁ ନୀନୁଏ ନିଙ୍ଗେ ପିସ୍‌ପି କିହାକତାମୁ ।”

୩୮ ଇଞ୍ଜାଁ ଏଞ୍ଜାଣି ପାସିମୁଣ୍ଡା ଲାକ ଇଲେଇଞ୍ଜାଁ ରାସକି ଆହାମାଚେ, “ଇଞ୍ଜାସି ଜୀହୁଦି ଲକୁତି ରାଜା ।”

୩୯ ଅଡ଼େ ପାସି ମୁଣ୍ଡାତା ପାସି ଏକହାମାଟି ଦହଗାଟାରି ବିତ୍ରାଟି ଜିକେଏ ରଅସି ଏଞ୍ଜାଣାଇଁ ନିନ୍ଦାକିହିଁ ଏଲେଇଚେସି, “ନୀନୁ କ୍ରୀସୁତି ଆଏକି ? ନିଙ୍ଗେ ଅଡ଼େ ମାଙ୍ଗେ ପିସ୍‌ପି କିୟାମୁ ।”

୪୦ ସାମା ଅଡ଼େ ରଅସି ଏଞ୍ଜାଣାଇଁ ଦାକା ହାହାନା ଏଲେଇଚେସି, “ନୀନୁ ଏଞ୍ଜାଣିଲେହେଁ ତଣ୍ଡୁ ବେଟାଆହିଁ ଜିକେଏ ନିଙ୍ଗେ ମାହାପୁରୁଇଁ ଆଜି ହିଲେଏ ? ୪୧ ଅଡ଼େ ମାରସା ନୀହାୟି ତଲେ ତଣ୍ଡୁ ବେଟାଆହିଁ ମାନାୟି, ଇଚିହିଁ ମା କିତି କାମାତି ପାଡ଼େୟି ବେଟାଆହିଁ ମାନାୟି; ସାମା ଇଞ୍ଜାସି ଏନି ଦହ କିହାହିଲଅସି ।” ୪୨ ଇଞ୍ଜାଁ ଏଞ୍ଜାସି ଜୀସୁଇଁ ଏଲେଇଚେସି, “ଏ ଜୀସୁ ନୀନୁ ନୀ ରାଜିତା ହାଟିସାରେ ନାଙ୍ଗେ ଅଣ୍ଟାପାମୁ ।”

୪୩ ଏମ୍ବ୍ରାଟିଏ ଜୀସୁ ଏଝାଣାଇଁ ଏଲେଇଚେସି, “ନାନୁ ନିଙ୍ଗ ସାତା ଝେସିମାଞ୍ଜାଇଁ, ନୀଞ୍ଜୁ ନୀନୁ ଲାକପୁରୁତା ନା ତଲେ ମାଞ୍ଜି ।”

ଜୀସୁତି ହାକି

(ମାତି ୨୭:୪୫-୪୬; ମାର୍କ ୧୫:୩୩-୪୧; ଜହ ୧୯:୨୮-୩୦)

୪୪ ଏତିଚେଲା ସମାନା ବାରଗଂଟା ଆହାମାଚେ, ଅଡ଼େ ଝେଡ଼ା ଉଜେଡ଼ି ହାଆତାକି ତାନି ଗଂଟା ପାତେକା ଦେସା ବାରେ ଆନ୍ଦେରି ଆହାମାଚେ, ୪୫ ଇଞ୍ଜା ମାହାପୁରୁ ଇଲୁତା ଲେଚାମାନି ହିମ୍ବରି ରୀ ବାଗା ଆହୁଁ ଗେଞ୍ଜା ହାଚେ । ୪୬ ଅଡ଼େ ଜୀସୁ କାଜା ଗିୟାତଲେ ହାଟିହୁଁ ଏଲେଇଚେସି, “ଏ ଆବା ନୀ କେୟୁତା ନା ଜୀସୁତି ହେର୍ପିମାଞ୍ଜାଇଁ !” ଏଲେଇଞ୍ଜି ଜଲାନା ତାନି ଜୀସୁ ହାଚେ ।

୪୭ ଏଦାଆଁ ମେସାନା ପାସାକଡ଼ି କସ୍କା ମୁହେଁ କାଜାସି ମାହାପୁରୁଇଁ ଜହରା କିହୁଁ ଏଲେଇଚେସି, “ଇଝାସି ସାତେଏ ତୀରିଗାଟାସି ମାଚେସି ।”

୪୮ ଇଞ୍ଜା ଏଝାଣାଇଁ ମେସାଲି ରୁଣ୍ଡା ଆହାମାଚି ବାରେ ଲକୁ ଇ ବାରେ ମେସାନା ବକତା ଝେଚା କଡ଼ିହୁଁ ଝେଣ୍ଡା ହାଚେରି । ୪୯ ସାମା ଜୀସୁଇଁ ପୁଞ୍ଜାମାଚି ବାରେ ଲକୁ ଇଞ୍ଜା ଗାଲିଲିଟି ରହେଏ ଆଣ୍ଡାନା ତାନି ଜେଚ ଜେଚ ଝାହାମାଚି ଇୟାସିକା ହେକ ନିଚାନା ଏ ବାରେ ସିନିକିହିମାରୁ ।

ଜୀସୁଇଁ ମୁହନାୟି

(ମାତି ୨୭:୫୭-୬୧; ମାର୍କ ୧୫:୪୨-୪୬; ଜହ ୧୯:୩୮-୪୨)

୫୦ ଇଞ୍ଜା ଜୀହୁଦି ଦେସାତି ହାରାମାତିୟା ଇନି ଗାଡ଼ାତି ଜସେପ ଇନାସି ଜୀହୁଦି ଲକୁତି କାଜା କୁଲମିତି ରଅସି ମାଚେସି; ଏଝାସି ନେହାସି ଇଞ୍ଜା ତୀରିଗାଟାସି ମାଚେସି । ୫୧ ଜୀହୁଦାତି ହାରାମାତିୟା ଇନି ନାୟୁତି ଜସେପ ଇନାସି ର ମାଣ୍ଡସି ମାଚେସି । ଏଝାସି ଦାମ୍ବୁଗାଟାସି ଇଞ୍ଜା ମାନି ଗାଟାସି ମାଚେସି ଅଡ଼େ ମାହାପୁରୁତି ରାଜି ଝାନାଣି କାଟିମାଚେସି । କାଜା ବେରଣିତି ମାଣ୍ଡସି ମାଚିହୁଁ ଜିକେଏ, ଏଝାସି ଏଝାରି କାତା ଅଡ଼େ କାମାତା ଆଣ୍ଡିହିଲଆତେସି । ୫୨ ଏଝାସି ପିଲାତ ତାଣା ହାଜାନା ଜୀସୁ ମାଡ଼ହାତି ରୀସେସି, ୫୩ ଇଞ୍ଜା ମାଡ଼ହାତି ରେପହାନା ନେହୁଁ ପାଡ଼ାଡ଼ା ହିମ୍ବରି ରୁପାନା ଏମ୍ବାଆଁ

ହରୁତା କାର୍ତ୍ତାମାତା ଏବେଲା ଆତ୍ମାଆରି ମୁସାହିଲାଆ ମାତୁହା ମୁହନି ଚାୟୁତା ଏଞ୍ଜାଣାଇଁ ମୁସ୍ତେରି । ୫୪ ଏ ଦିନା ତିୟାରା ଆନି ଦିନା ମାତେ ଅଡ଼େ ଜମିନି ଦିନା ଏଗା ଖାହିମାତେ ।

୫୫ ଅଡ଼େ ଗାଲିଲିଟି ଖାହାମାନି ଇୟାସିକା ଜେଚ ଜେଚ ହାଜାନା ମାହଣି ମାଣ୍ଡା ଅଡ଼େ ତାନି ମାତୁହା ଏନିକ୍ ମୁସାମାତାଣି ମେସ୍ତୁ ୫୬ ଇଞ୍ଜା ଏଞ୍ଜି ଖେଣ୍ଡା ହାଜାନା ଗାନ୍ଦା ନିୟୁଁ ଇଞ୍ଜା ଗାନ୍ଦାଗାଟି ଆସ୍ତି ତିୟାରା କିତୁ । ଇଞ୍ଜା ଜମିନି ଦିନାତା ତାନି ମେରାଲେହେଁ ଜମିତୁ ।

୨୪

ଜୀସୁ ହାହାନା ଖେଣ୍ଡେ ନିଜିନାୟି

(ମାତି ୨୮:୧-୧୦; ମାର୍କ ୧୬:୧-୮; ଜହ ୨୦:୧-୧୦)

୧ ଅଡ଼େ ଜମିନି ଦିନାତି ମେରା ତଲେ ଜମିତୁ, ସାମା ଖାତାତି ତଲିତି ଦିନାତା ଜୁଲୁପୁଲୁ ଖେୟାଲିଏ ଏଞ୍ଜି ତାମ୍ବୁ କୁହାମାତି ଗାନ୍ଦାନିୟୁଁ ଆସାନା ମାହଣି ମାଣ୍ଡାତା ହାରୁ । ୨ ଇଞ୍ଜା ମାହଣି ମାଣ୍ଡାତା ପୁକ୍ତାମାତି ଖାଲି ଗୁତା ଆହାମାନାଣି ମେସ୍ତୁ ୩ ସାମା ଏଞ୍ଜି ବିତ୍ରା ହାଜାନା ପ୍ରବୁ ଜୀସୁତି ମାତୁହା ଏମ୍ବାଆଁ ମେହୁଆତୁ । ୪ ଏଞ୍ଜି ଏଦାଆଁତାକି ବିଲକି ଆହିମାତି ଦେବୁଣିଏ ମୁହନି ହିମ୍ବରି ହୁତାମାତି ରିଆରି ଏଞ୍ଜାସିକା ନକିତା ନିଚାମାନେରି । ୫ ଏମ୍ବାଟିଏ ଏଞ୍ଜି ଆତାଜାକା ଆହାନା ବୁମିତା ତାର୍କା ଲେସ୍ତୁ ଇଞ୍ଜା ଏଞ୍ଜାରି ଏଞ୍ଜାସିକାଣି ଏଲେଇଚେରି, “ମୀରୁ ଏଦାଆଁତାକି ହାତାରି ବିତ୍ରାଟି ନୀତାମାନାରାଇଁ ପାରିମାଞ୍ଜେରି ? ୬ ☆ଏଞ୍ଜାସି ଇମ୍ବାଆଁ ହିଲଅସି, ଏଞ୍ଜାସି ନିଜାମାନେସି, ଏଞ୍ଜାସି ଗାଲିଲିତା ମାତାଟି ଖେସାମାଞ୍ଜାତାଣି ଅଣ୍ପାଦୁ । ୭ ମାଣ୍ଡସି ମୀରୁଏସି ପାସି ମୁଣ୍ଡାତା ହାୟାଲି ପାପୁ ଗାଗାରି ତାଣା ହେରପି ଆନ୍ଦାୟି ମାନେ ଇଞ୍ଜା ତାନି ଦିନାଟିଏ ହାକିଟି ଖେଣ୍ଡେ ନିଜିନେସି ।”

୮ ଏମ୍ବାଟିଏ ଏଞ୍ଜି ଏଞ୍ଜାଣି ଖେସ୍ତି କାତା ଅଣ୍ପପିତୁ, ୯ ଇଞ୍ଜା ଏଞ୍ଜି ମାହଣି ମାଣ୍ଡାଟି ଖେଣ୍ଡା ହାଜାନା ଏଗାର ଜାଣା ସାମୁୟାଁ ଅଡ଼େ ଏଟକା ତାରାଇଁ ଇ ବାରେ କାତା ଖେସ୍ତୁ । ୧୦ ଏଞ୍ଜି ମଗ୍ଦଲିନି ମରିୟମ, ଜହାନା, ଜାକୁବ ତାନି ଇୟା ମରିୟମ ଅଡ଼େ ଏଞ୍ଜାସିକାତଲେ ମାତି ଏଟକାତି

☆ ୨୪:୬ ୨୪:୬ ମାତି ୧୬:୨୧; ୧୬:୨୨,୨୩; ୨୦:୧୮,୧୯; ମାର୍କ ୮:୩୧; ୯:୩୧; ୧୦:୩୩,୩୪; ଲୁକ ୯:୨୨; ୧୮:୩୧-୩୩

ଇୟାସିକା; ଇଞ୍ଚି ପାଣ୍ଡୁଞ୍ଚି ଆହାମାନାରାଇଁ ଇ ବାରେ କାତା ଖେସ୍ତୁ ।
 ୧୧ ସାମା ଇ ବାରେ କାତା ଏଞ୍ଚାରି ନକିତା ମନତା ଗାଡ଼ିକିତି ର ପୁସ୍ତପନି
 ଲେହେଁ ଆଡେ, ଅଡେ ଏଞ୍ଚାରି ଏଞ୍ଚାସିକାଣି ନାମାଆଡେରି । ୧୨ ସାମା
 ପିତର ନିଜ୍ଞାନା ମାଡ଼ହା ମୁହନି ଟାମୁତା ହଟି ହଟିହଁ ହାଚେସି, ଇଞ୍ଚା
 କାପାନା ସିନିକିଡେସି ଏମ୍ବାଆଁ ପାଡ଼ାଡ଼ା ହିମ୍ବୁରିକା ମେସ୍ତେସି, ଇଞ୍ଚା
 ଇଦି ଏନି ଆଡେ ଇଞ୍ଚା କାବାଆହାନା ତାମି ଇଜ ହାଚେସି ।

ଇମାୟୁତା ହାନାୟି
(ମାତି ୧୭:୧୨, ୧୩)

୧୩ ଏ ନେତୁ ଏଞ୍ଚାରି ବିତ୍ରାଟି ରିଆରି ଜିରୁସାଲମଟିଏ ଏଗାର
 କିଲମିଟରଲେହେଁ ହେକ ମାତି ଇମାୟୁ ଇନି ନାୟୁତା ହାଜିମାଚେରି
 । ୧୪ ଅଡେ ହାଜି ହାଜିହଁ ଇ ବାରେ କାତା ଜଲ୍ଲକି ଆହିମାଚେରି ।
 ୧୫ ଏଲେକଁ ଖେସ୍ତପି ଆହଁ ତାମ୍ବୁ ତୁମ୍ବୁ ଜଲ୍ଲକି ଆହିମାଚାଟି ଜୀସୁ
 ତାମ୍ବୁ ଏଞ୍ଚାରିତାଣା ଖାହାନା ଏଞ୍ଚାରିତଲେ ହାଚେସି; ୧୬ ସାମା ଏଞ୍ଚାରି
 ଏଞ୍ଚାଣାଇଁ ମେସ୍ତ୍ର ଜିକେଏ ପୁଞ୍ଜାଲି ଆଡ଼ାଆଡେରି । ୧୭ ଜୀସୁ ଏଞ୍ଚାରାଇଁ
 ଖେଚେସି, “ମୀରୁ ହାଜି ହାଜିହଁ ଏନା ଏନାଆଁ ଜଲ୍ଲକି ଆହିମାଞ୍ଜେରି
 ?” ଏମ୍ବାଟିଏ ଏଞ୍ଚାରି ମୁମ୍ବୁ ଖୁଡ଼ି କିହାନା ନିତେରି । ୧୮ ଅଡେ ଏଞ୍ଚାରି
 ବିତ୍ରାଟି କ୍ଲେୟାପା ଇନାସି ରଅସି ଏଞ୍ଚାଣାଇଁ ଖେସ୍ତେସି, “ଇ ଖାରା ବିତ୍ରା
 ଜିରୁସାଲମତା ଏନା ଏନାୟି ଆଡେ ଏମ୍ବାଆଁ ମାନାରି ବିତ୍ରାଟି ନୀନୁ
 ରଅତିଏ ପୁଞ୍ଜାହିଲଅତିକି ?”

୧୯ ଏଞ୍ଚାସି ଏଞ୍ଚାରାଇଁ ଖେଚେସି, “ଏନା ଏନାୟି ଆଡେ ?”

ଏଞ୍ଚାରି ଏଞ୍ଚାଣାଇଁ ଖେସ୍ତେରି, “ନାଜରିତ ଜୀସୁତି କାତା; ମାହାପୁରୁ
 ନକିତା ଅଡେ ବାରେ ଲକୁ ନକିତା ଏ ଜୀସୁ କାମାତା ଅଡେ
 କାତାତା ର ବାଡ଼ୁଗାଟି ମାହାପୁରୁ ଅଣପୁତି ବଲୁ ଖେହନାସି
 ମାଚେସି, ୨୦ ଅଡେ ମା କାଜା ପୂଜେରାଜା ଅଡେ ସାଲୁଞ୍ଚି କିନାରି
 ଏଞ୍ଚାଣାଇଁ ହାକି ତଣ୍ଡୁ ହାହାଲି ହେରପାନା ଏଞ୍ଚାଣାଇଁ ପାସି ମୁଣ୍ଡାତା
 ଏକହାନା ପାୟିତି କାତା । ୨୧ ସାମା ଏଞ୍ଚାସି ଇସ୍ରାୟେଲ ଲକୁଣି
 ପିସ୍ତପି କିନାସି ଇଞ୍ଚା ମାମ୍ବୁ ଆସା କିହାମାଚମି; ସାମା ଇ ବାରେ
 ଆହାନା ନୀଞ୍ଜୁଟିଏ ତାନିଦିନା ଆହିମାନେ । ୨୨ ଅଡେ ଜିକେଏ ମା
 ବିତ୍ରାଟି ଏଚରଜାଣା ଇୟାସିକା ମାଲେ ଆଡ଼ାଜାକା କିହାମାଞ୍ଜାନୁ;

ଏହି ଲାଭସିଏ ମାଡ଼ହା ମୁହନି ଚାୟୁତା ହାଜାମାରୁ, ୨୩ ଏମ୍ବାଆଁ ଏହି ଏଞ୍ଜାଣି ମାଡ଼ହା ମେହୁଆନା ଖାହାନା ଖେସ୍ତାତୁ, ଇଞ୍ଜା ଦୁତୁୟା ତଞ୍ଜାଆହାନା ଖେସ୍ତାତେରି, ଏଞ୍ଜାସି ନୀତାମାନେସି । ୨୪ ଅଡ଼େ ମା ବିତ୍ରାଟି ଏଚରଜାଣା ମାଡ଼ହା ମୁହନି ଚାୟୁତା ହାଜାନା ଇୟାସିକା ଖେସ୍ତଲେହେଁଏ ମେସ୍ତେରି ସାମା ଏଞ୍ଜାଣାଇଁ ମେହୁଆତେରି ।”

୨୫ ଏମ୍ବାଟିଏ ଜୀସୁ ଏଞ୍ଜାରାଇଁ ଏଲେଇଚେସି, “ଆଡ଼େ ବୁଦି ହିଲାଆଗାଟାତେରି, ଅଡ଼େ ମାହାପୁରୁ ଅଣ୍ଟପୁତି ବଲୁ ଖେହନାରି ବାରେ କାତାତି ନାମାଲି ଆଡ଼ାଆଲେହେଁତି ହିୟା ଗାଟାତେରି, ୨୬ କ୍ରୀସ୍ତ ଇ ବାରେ କସ୍ତ ବେଟାଆହାନା ତାନି ଗାଞ୍ଜୁରମିତା ହଡ଼ନାୟି ହିଲାଆତେ କି ?” ୨୭ ମସା ଇଞ୍ଜା ବାରେଜାଣା ମାହାପୁରୁ ଅଣ୍ଟପୁତି ବଲୁ ଖେହନାରି ତାଣାଟି ମାଡ଼ହାନା ଦାମ୍ବୁ ସାସ୍ତେରିତା ତାନି ତାକି ରାସ୍ତକି ଆହାମାନି ବାରେ କାତା ଏଞ୍ଜାସି ଏଞ୍ଜାରାଇଁ ପୁଣ୍ଡି କିତେସି ।

୨୮ ଏଞ୍ଜାରି ହାଜିମାଟି ନାୟୁଁ ତାଗେ ଏଜାଲିଏ ଜୀସୁ ଅଡ଼େ ନକିତା ହାନି ଅଣ୍ଟପୁ ତସ୍ତେସି । ୨୯ ସାମା ଏଞ୍ଜାରି ଏଞ୍ଜାଣାଇଁ ଆଂଗିହୁଁ ଏଲେଇଚେରି, “ମା ତଲେ ତୟାହାଲାମୁ ଏନିଇଚିହୁଁ ଆନ୍ଦେରି ଆହିମାନେ, ଖେଡ଼ାହାଚେୟିଏ ।” ଏମ୍ବାଟିଏ ଏଞ୍ଜାସି ଏଞ୍ଜାରିତଲେ ତୟାଲି ଇଲୁ ବିତ୍ରା ହାଚେସି । ୩୦ ଅଡ଼େ ଏଞ୍ଜାରିତଲେ ରାନ୍ଦା ତିଞ୍ଜାଲି କୁରିତି ତାୟୁ ଏଞ୍ଜାସି ରୁଟି ଆସାଁ ମାହାପୁରୁଇଁ ଜହରା କିତେସି, ଇଞ୍ଜା ଡିକହାନା ଏଞ୍ଜାରାକି ହାତେସି । ୩୧ ଏମ୍ବାଟିଏ ଏଞ୍ଜାରି କାଣକା ଦେପିଆତୁ ଇଞ୍ଜା ଏଞ୍ଜାରି ଏଞ୍ଜାଣାଇଁ ପୁଚେରି; ଅଡ଼େ ଏ ଦେବୁଣିଏ ଏଞ୍ଜାସି ଏଞ୍ଜାରି କାଣକାତା ତଞ୍ଜା ଆଆତେସି । ୩୨ ଏଚେଟିଏ ଏଞ୍ଜାରି ତାମ୍ବୁତାମ୍ବୁ ଏଲେଇଚେରି, “ଏଚିବେଲା ଜିରୁତା ଏଞ୍ଜାସି ମାଙ୍ଗେ ଜିରୁତା କାତାବାର୍ତା ଆହିମାଚେସି ଅଡ଼େ ମାଙ୍ଗେ ଦାମ୍ବୁ ସାସ୍ତେରି ତେଲ୍‌ହି କିହିମାଞ୍ଜାତେସି, ଏଚିବେଲା ମା ହିୟାଁ କାଡ଼ି ମାଞ୍ଜାଆତେ କି ?”

୩୩ ଅଡ଼େ ଏଞ୍ଜାରି ଦେବୁଣିଏ ନିଙ୍ଗାନା ଜିରୁସାଲମତା ଖେଣ୍ଡା ହାଜାନା କୃଡ଼ା ଆହାମାଇଁ ଏଗାର ଜାଣା ସୀସୁୟାଁ ଅଡ଼େ ଏଞ୍ଜାରି ଆଡ଼ିତାରାଇଁ ମେସ୍ତେରି; ୩୪ ଏଞ୍ଜାରି ଏଲେଇଞ୍ଜିମାଚେରି, “ପ୍ରବୁ ସାତେଏ ନିଙ୍ଗାମାନେସି ଅଡ଼େ ସିମନଇଁ ତଞ୍ଜାଆତେସି ।”

୩୫ ଅଡ଼େ ଏଝାରି ଜିକେଏ ଜିରୁତି ବାରେ କାତା ଅଡ଼େ ରୁଟି ଡିକହାଟିଏ ଏଝାରି ପୁଞ୍ଜାଲି ଆଡ଼ିତମି ଇଞ୍ଜିଏ ଏଝାରି ଝେସ୍ତେରି ।

ଜୀସୁ ତାନି ସୀସୁୟାଁଇଁ ତଞ୍ଜା ଆନାୟି

(ମାତି ୨୮:୧୭-୨୦; ମାର୍କ ୧୬:୧୪-୧୮; ଜହ ୨୦:୧୯-୨୩; କାମା ୧:୭-୮)

୩୬ ସାମା ଏଝାରି ଇ ବାରେ କାତା ଜଲ୍ଲକି ଆହିମାଚାଟି ଜୀସୁ ଏଝାରି ମାଦି ନିଚାନା ଏଲେଇଚେସି, “ମିଙ୍ଗେ ହିଡ଼ଡ଼ି ଆୟାପେ ।”

୩୭ ଏମ୍ବାଟିଏ ଏଝାରି ବୁଡୁ ମେସ୍ତମି ଇଞ୍ଜିଏ ଅଶପାନା ଆଡାଜାକା ଆଡେରି । ୩୮ ଏଚେଟିଏ ଏଝାସି ଏଝାରାଇଁ ଏଲେଇଚେସି, “ମୀ ହିୟାତା ଏନାଆଁତାକି ଆଜିମାଞ୍ଜେରି, ଇଞ୍ଜା ମୀ ହିୟା ଏନାଆଁତାକି ଆନାମାନା ଆହିମାନେ ? ୩୯ ନାନୁଏ ଏଝାତେଏଁ ନା କେସ୍ତା କତାୟା ମେହ୍ଦୁ, ନାଙ୍ଗେ ଡାଗାଦୁ ମୀରୁ ନାଙ୍ଗେ ଡଙ୍ଗା ପେଶ୍କା ମାନାଣି ମେସ୍ତିଲେହେଁ ବୁଡୁକି ହିଲାତ ।”

୪୦ ଅଡ଼େ ଏଝାସି ଏଲେଇଞ୍ଜାନା ଏଝାରାଇଁ ତାନି କେସ୍ତା କତାୟା ତସ୍ତେସି । ୪୧ ଏଲେଜିକେଏ ଏଝାରି ରାହାଁତାକି ନାମାଲି ଆଡାଆନା ଆନାମାନା ଆହାଁ କାବା ଆହିମାଚାକି ଜୀସୁ ଏଲେଇଚେସି, “ମିଙ୍ଗେ ଇମ୍ବାଆଁ ଏନି ରାନ୍ଦା ମାନେକି ?” ୪୨ ଏମ୍ବାଟିଏ ଏଝାରି ଏଝାଣାକି ର ଝାସ୍ତି ମୀନୁ ହୀତେରି, ୪୩ ଅଡ଼େ ଏଝାସି ଏଦାଆଁ ଆସାନା ଏଝାରି ନକିତା ତିଚେସି ।

୪୪ ଇଞ୍ଜା ଏଝାସି ଏଝାରାଇଁ ଏଲେଇଚେସି, “ମସାତି ମେରା ପତିତା ଇଞ୍ଜା ମାହାପୁରୁ ଅଶ୍ପୁତି ବଲ୍ଲୁ ଝେହ୍ନାରି ପତିତା ଅଡ଼େ ପାରୁ ପତିତା ନାଙ୍ଗେତାକି ଏନାୟି ରାସ୍ତକି ଆହାମାନେ, ଏ ବାରେ ସାତା ଆନାୟି ମାନେ, ନାନୁ ମୀ ତଲେ ମାଚାଟି ଇ ବାରେ ଝେସାମାଞ୍ଜାତେଏଁ ।”

୪୫ ଏଚେଟିଏ ଏଝାରି ଏନିକିଁ ଦାମ୍ବୁଁ ସାସ୍ତେରି ତେଲହାଲି ଆଡ଼ିନେରି, ଏଦାଆଁତାକି ଏଝାରି ହିୟାତି ଦାରା ଦେତେସି; ୪୬ ଅଡ଼େ ଏଝାସି ଏଝାରାଇଁ ଏଲେଇଚେସି, “ଏଲେଆହ୍ଁ ରାସ୍ତକି ଆହାମାନେ, କ୍ରୀସ୍ତ ଦୁକୁ କସ୍ତ ବେଟା ଆନେସି ଅଡ଼େ ତାନି ଦିନାଟିଏ ହାଡାରି ତାଣାଟି ଝେଶ୍ତେ ନିଜିନେସି, ୪୭ ଇଞ୍ଜା ଜିରୁସାଲମଟିଏ ମାଟ୍‌ହାନା ବାରେ କୁଡ଼ା ତାଣା ଏଝାଣି ଦରୁଟି ପାପୁ ମ୍ଲେପ୍‌କି ଆୟାଲି ମନ୍ ଝେଟ୍‌ନି କାତା ଝେକ୍‌ନାୟି ମାନେ । ୪୮ ମୀରୁ ଇ ବାରେତାକି ସାକି ଆଦେରି ।

୪୯ ☆ ଅଡ଼େ ହେଣୁ ଆବା ଏନାଆଁ ଆଞ୍ଜାମାନେସି ଏଦାଆଁ ନାନୁ ମୀ ତାଣା ପାଣ୍ଡିମାଞ୍ଜାଇଁ, ସାମା ଲାକପୁରୁଟି ବାଡ଼ୁୟୁ ପୁଞ୍ଜାଆ ପାତେକା ମୀରୁ ଇ ଗାଡ଼ାତେଏ ମାଞ୍ଜୁ ।”

ଜୀସୁ ଲାକପୁରୁ ଅଞ୍ଜିଆନାୟି

(ମାର୍କ ୧୬:୧୯, ୨୦; କାମା ୧:୯-୧୧)

୫୦ ☆ ଏମ୍ବାଟିଏ ଜୀସୁ ଏଞ୍ଜାରାଇଁ ବେତନିୟାଁ ପାତେକା ଅତେସି ଇଞ୍ଜା ତାନି କେସ୍ତା ପେର୍ହାନା ଏଞ୍ଜାରାଇଁ ବର ହୀତେସି । ୫୧ ଇଞ୍ଜା ଏଞ୍ଜାରାଇଁ ବର ହୀହି ହୀହି ଏଞ୍ଜାସି ଏଞ୍ଜାରି ତାଣାଟି ଏଚକା ଆହାନା ଲାକପୁରୁ ଅଞ୍ଜିଆତେସି । ୫୨ ଏଚେଟିଏ ଏଞ୍ଜାରି ଏଞ୍ଜାରାଇଁ ଜହରା କିହାନା ହାରେକା ରାହାଁତଲେ ଜିରୁସାଲମତା ଝେଣ୍ଡା ହାଚେରି, ୫୩ ଇଞ୍ଜା ଏ ଦିନାଟିଏ କାଲେଏ ମାହାପୁରୁ ଇଲୁତା ମାଞ୍ଜାନା ମାହାପୁରୁଇଁ ଜହରା କିହେମାଚେରି ।

ପୁସ୍ତକ ଫେରା

The New Testament in the Kuvi language of India: ପୁସ୍ତକ ଫେରା (Bible)

copyright © 2020 The Word for the World International

Language: କୁଭି (Kuvi)

Contributor: The Word for the World International

ପୁସ୍ତକ ଫେରା, କୁଭି ପୁସ୍ତକ ଫେରା, 2020

The New Testament in Kuvi Language

The Word for the World International

This translation is made available to you under the terms of the Creative Commons Attribution license 4.0.

You may share and redistribute this Bible translation or extracts from it in any format, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2023-04-12

PDF generated using Haiola and XeLaTeX on 21 Feb 2024 from source files dated 13 Apr 2023

081337bf-dba3-542b-bc85-280acfb14d33